

唐詩紀事



唐詩紀事
第三冊

明·洪楙校



第一輯
第四十四種

依原刊本排印
貝葉山房張氏藏版

唐詩紀事目次

第三冊

第四十一卷

自行簡

章孝標

施肩吾

鮑溶

孟簡

李程

張蕭遠

許康佐

許堯佐

張南史

徐凝

朱畫

侯喜

蔣防

第四十二卷

王涯

令狐楚

張仲素

第四十三卷

竇參

郎士元

于良史

舒元興

李諒

李賀

呂溫

呂恭

段洪古

何元上

羊士諤

馮宿

柳宗元

吳武陵

邵真

崔膺

衛象

李宣遠

熊孺

崔立之

鄭遵

韋紆

第四十四卷

王建

第四十五卷

朱灣 王良會 柳公綽 張正一 徐放

崔備 蘇郁 明幽貞 張儼 杜頴

韋丹 鄭俞 杜元穎 吳丹 鄭餘慶

趙宗儒 周引亮 王播 周斥物 許攷

張碧

第四十六卷

劉言史 劉猛 李餘 李涉 劉昭禹

孫昌胤 嚴休復 朱慶餘 劉軻 獨孤鉉

張燦 楊虞卿 楊汝士 張志和

第四十七卷

謝良輔 鮑防 杜奕 丘丹 嚴維

鄭概 陳元初 呂渭 范燈 樊珣

劉蕃 賈弇 沈仲昌 李祐 李播

蕭靜 崔子向 李逢吉 楊乘

第四十八卷

李泌 韋臯 李德裕 鄭遠古 裴航

裴休 呂羣 徐商 韋渠牟 陸長源

盧宗回 劉 闢 薛宜僚 陸希聲 崔季卿

皇甫徹

第四十九卷 胡果 吉 旼 劉 眞 鄭 據 盧 貞

張 渾 白居易九老 項 斯 龐 蘊 蔡 京

滕 邁 郭周藩 殷濟之 裴思謙 何 扶

鄭 濟 廖有方 薛書記 賈 耽 盧 眞

姚 合

第五十卷 封 敖 鄭 薰 王 幹 宋 雍 李 肇

韋 澳 段文昌 姚 向 溫 會 李敬伯

姚 康 張元正 楊嗣復 彘穀子 楊 摩

劉 郇伯 王 觀 陳上美 侯 洌 崔 樞

陳彥博 郭良驥 崔 暉 李景遜 康 球

第五十一卷 白敏中 魏 扶 馬 桓 崔 鉉 殷堯藩

沈亞之 裴夷直 楊敬之 房千里 厲 元

喻鳧 楊衡 符載 王彥威 繁知一

楊洵美

第五十一卷

雍裕之 裴潏 皇甫璠 李旼 徐凝

張祐 崔涯 盧儲 趙璜 柴夔

王繼勳 夏鴻 曹汾 楊鴻 易重

第五十三卷

喬琳 王鋌 于興宗 李明 楊牢

李汶儒 薛蒙 李艱 于瓌 王嚴

劉騫 李涯 劉璐 盧佑 李續

盧求 田章 高彥 牛微 蕭祐

魏謨 陸贄 李商隱 劉得仁

第五十四卷

韋表微 羅弘信 高崇文 王智興 劉綺莊

馬戴 孟遲 南卓 鄭顥 李羣玉

溫庭筠 周絲

第五十五卷

周鼎 王起 盧肇 丁陵 姚鵠

第五十六卷

高退之 孟球 劉耕 裴翻 樊驤

崔軒 蒯希逸 林滋 李宜古 黃顥

張道符 丘上卿 石貫 李潛 孟宁

唐思言 左牢 王甚夷 金厚載

鄭略 李彙征 劉威 崔郊 譚銖

郭夔 來鵬 來鵠 鄭洪業 杜牧

許渾 童翰卿 雍陶 周元範 李元範

李遠 朱可名 趙嘏 祝元膺 韋承貽

鄭史 韋楚老

第五十七卷

段成式

第五十八卷

溫庭皓 韋蟾 李敬方 李漢 李郢

韓宗 劉滄 柳棠 賀蘭朋古 崔珏

李洞 長孫翱 崔櫓 曹唐 于武陵

崔總 劉魯風 盧尙卿

第五十九卷

薛瑩 褚載 汪遵 蕭遇 盧渥

李訥 崔元範 楊知至 封彥卿 盧鄴

高湘 盧激 滕倪 林傑 李明遠

李章武 郭圓 薛逢 張洪靖 韓察

崔恭 崔文信 陸纏 胡澄 高銖

張賈

第六十卷

李節 費冠卿 劉虛白 蕭建 袁不約

孫緯 周祚 崔澹 盧頻 李郭

李頻 賈馳 薛能 曹鄴 裴虔餘

陳陶

唐詩紀事卷第四十一

白行簡

章孝標

施肩吾

鮑溶

孟簡

李程

張蕭遠

許康佐

許堯佐

張南史

徐凝

朱畫

侯喜

蔣防

白行簡

春從何處來詩云。欲識春生處。先從木德來。入門潛報柳。度嶺暗驚梅。透雪寒光散。銷冰水鏡開。曉迎郊綺發。夜逐斗光回。淑氣寅中變。新聲雨後催。偏宜資律呂。應是候陽臺。

在巴南望郡南山云。臨江一嶂白雲間。紅綠層層錦綉班。不作巴南天外意。何殊昭應望驪山。樂天和云。返照前山雲樹明。從君苦道似華清。試聽腸斷巴猿叫。早晚驪山有此聲。（時樂天在忠州。）

九日作云。降慮意何如。窮荒九日初。三秋異鄉客。一紙故人書。對酒情無限。聞緘思有餘。感時空寂寞。懷舊幾躊躇。鴈盡平沙迴。煙銷大漠虛。登臺南望處。掩淚對雙魚。

行簡以瀘水羅賦得名。其警句云：焦螟之生必全，有以小爲貴者。江漢之流雖大，盡可以一貫之。又曰：夕掛于壁，如滿月之在天。曉用於人，狀圓荷之映水。

行簡字知退，敏而有詞。元和二年登第，爲度支郎中。寶曆二年卒。

行簡小字阿怜。樂天同宿湖亭詩云：潯陽少有風情客，招宿湖亭盡却迴。水檻虛涼風月好，夜深惟有阿怜來。

行簡恩賜章服。樂天以詩寄之云：吾年五十加朝散，爾亦今年賜服章。齒髮恰同知命歲，官銜俱是客曹郎。（予兄弟年五十，賜緋俱是主客都官。）榮傳錦帳花聯萼，彩動綾袍鴈趁行。大抵着緋宜老大，莫嫌秋鬢數莖霜。

章孝標

孝標元和十三年下第。時輩多爲詩以刺主司，獨孝標爲歸燕詩，留獻侍郎庾承宣。得詩展轉吟諷，庾果重典禮曹。孝標來年登第，詩云：舊累危巢泥已落，今年故向社前歸。連雲大廈無棲處，更望誰家門戶飛。孝標及第，除正字，東歸題杭州樟亭驛云：樟亭驛上題詩客，一半等爲山下鹿。世事日隨流水去，紅花還似白頭人。初成落句云：紅花真笑白頭人，改爲還似。且曰：我將老，成名似我，芳艷詎能久乎？及還鄉而逝，或曰：前有八元，後有孝標，皆桐廬人，復同姓而

皆不達矣。

李紳鎮揚州。請孝標賦春雪詩。命題於臺盤上。孝標唯然索筆一揮云。六出花飛處處飄。精窗拂砌上寒條。朱門到晚難盈尺。盡是三軍喜氣銷。

孝標及第後寄紳曰。及第全勝十改官。金鞍鍍了出長安。馬頭漸入揚州郭。爲報時人洗眼看。紳以一絕箴之曰。假金方用真金鍍。若是真金不鍍金。十載長安得第一。何須空腹用高心。

孝標大和中山南東道從事。試大理評事。

明日鑿輿欲向東。守宮金翠帶愁紅。九門佳氣已西去。千里花開一夜風。(無題)

右張爲取詩爲主客圖。

歸海上舊居云。鄉路遶兼葭。紫紆出海涯。人衣被蜃氣。鳥跡印鹽花。艸沒題詩石。潮推坐釣槎。還歸舊衙裏。凝思賞煙霞。

長安秋日云。田家無五行。水旱卜蛙聲。牛犢乘春放。兒孫候暖耕。池塘煙未起。桑柘雨初晴。歲晚香醪熟。村村自送迎。

右二詩韋莊又元集。

施肩吾

肩吾洪州人。元和十年登第。以洪州西山羽化之地。慕其真風。高蹈於此。爲詩奇麗。著百韻山居詩。才情富贍。如荷翻紫蓋。搖波面。蒲瑩青刀。插水眉。又經粘薜荔。龍鬚軟。雨壓芭蕉鳳翅垂。

又贈邊將詩曰。輕生奉國不爲難。戰苦身多舊箭瘢。玉匣鎖龍鱗甲冷。金鈴襯鷓羽毛寒。皂貂擁出花當背。白馬騎來月在鞍。猶恐犬戎臨虜塞。柳營時把陣圖看。

又上禮部侍郎陳情云。九重城裏無親識。八百人中獨姓施。弱羽飛時攢箭險。蹇驢行處薄冰危。晴天欲照盆難反。貧女如花鏡不知。却向從來受恩地。再求青律變寒枝。

又贈友人下第閑居云。花眼綻紅斟酒看。藥心抽綠帶煙鋤。皆輕巧之極。

惜花云。落盡萬株紅。無人解繫風。今朝芳徑裏。惆悵錦機空。

隋曲有疏勒鹽。唐曲有髮厥鹽。阿鵲鹽。或云。關中人謂好爲鹽。故肩吾詩云。顛狂楚客歌成雪。媚賴吳娘笑是鹽。蓋當時語也。今杖鼓譜中。尙有炎杖聲。

效古興云。金雀無舊釵。緗綺無舊裾。唯有一寸心。長貯萬里夫。南軒夜虫織已促。北牖飛蛾遶殘燭。祇言衆口鑠千金。誰信獨愁銷片玉。不知歲晚歸不歸。又將啼眼縫征衣。

夜宴曲云。闌缸如書。賈不眠。玉爐夜起。沉香煙。青娥一行十二仙。欲笑不笑。桃花燃。碧窗弄嬌梳洗晚。戶外不知雲漢轉。被郎頃刻。屠酥盞。酒入四肢紅玉軟。

肩吾有年來如拋梭。不老應不得之句。又及第後。過楊子江詩云。憶昔將貢年。抱愁此江邊。魚龍玄閃鑠。白浪高於天。今日步青草。還來經此道。江神也世情。爲我風色好。

右張爲取作主客圖。

張籍贈詩云。世間漸覺無多事。難得空名未着身。合取藥成相待喫。不須先作上天人。又送肩吾東歸云。知君本是煙霞客。被薦因來城闕間。世業偏臨七里瀨。仙遊多在四明山。早聞詩句傳人徧。新得科名到處閑。惆悵灞亭相送去。雲中琪樹不同攀。

鮑溶

岐路詩云。北風送微寒。徒侶勤遠程。憂人席不暖。殘月馬上明。飄飄岐路間。長見日初生。重嶂曉色淺。疎猿寒啼清。人間多岐路。常恐終身行。迴見四方人。車輪無留聲。空谷亦堪隱。下田非懶耕。古人有遺訓。飽食非親繁。我生禮義鄉。少小見太平。聖賢猶羈旅。况復非其名。

長城作云。蒙公虜生人。北築秦氏冤。禍興蕭牆內。萬重防禍根。城成六國亡。宮闕啓千門。生人半爲土。何用空中原。奈何家天下。骨肉尙無恩。投沙擁海水。安得不久翻。乘高慘人魂。寒

日易黃昏。枯骨貫朽。沙中如有言。萬古驪山葬。誰知野火燔。

秋暮山中寄李益端公云。舊事與日遠。酒花仍舊香。前年綉衣客。此節過此堂。侍臣不自高。笑解綉衣裳。眼雲有餘態。人鳥不亂行。我恐雲嵐色。損君鞍馬光。君言此何言。且共覆前觴。古人重一笑。買日輕金裝。日盡秉燭遊。千年不能忘。君言此何言。明日皆異鄉。明日非今日。山下道路長。一從山下去。天地再炎涼。此期果難得。夢君馬玄黃。

許渾過鮑溶宅有感云。寥落故人宅。重來身已亡。古苔殘墨沼。深竹舊書堂。秋色館池靜。雨聲雲木涼。無因展交道。日暮倍心傷。

溶登元和進士第。與韓愈。李正封。孟郊友善。

溶有途中句云。躍馬非壯歲。報恩無高功。斯言化爲火。日夜焚深衷。又上太原王尙書云。天王委管籥。開閉秦北門。頂戴日月光。口宣雨露言。又秋懷句云。萬里歧路多。一身天地窄。右張爲主客圖。取溶爲工用博解宏拔主。

孟簡

惜分陰詩云。業廣因功苦。拳拳志士心。九流難酌挹。四海易消沉。對景嗟移晷。窺園詎改陰。三冬勞聚學。曠景重兼金。刺股情方勵。偷光思益深。再中如可冀。終嗣絕編音。

元和中簡將試詣日者卜之曰近東門坐卽得之矣既入卽坐西廊迫晚忽得疾鄰坐請與終篇見其姓卽東門也乃擢上第

簡字幾道德州人元和中爲戶部侍郎以職貶後以太子賓客分司卒尤工詩尙節義

簡擬古云劍客不誇怨主人知取心但營纖毫義肯許千萬金勇則看熟擊憤來聽虎吟平生貴蘊德刃敵無幽深

李程

程正元中試日五色賦破題云德動天鑿祥開日華其卷已黜揚於陵質之主文呂謂於是已落重收

詠冰壺云琢玉性惟堅成壺體更圓虛心含衆象應物受寒泉溫潤資天質清真稟自然日融光自散雪映色逾鮮至鑿功實無私照豈偏明將水鏡對日與粉闌連拂拭終爲美提攜佇見傳勿令毫髮黑遺恨綴成篇

程字表臣爲翰林學士日過八塲乃至時號八塲學士寶曆二年爲相最爲帝所重曰高飛之翮長者在前卿朝廷羽翮也

張蕭遠

履春冰詩云。一步一愁新。輕輕恐陷人。薄光全透日。殘影半銷春。蟬想行時翼。魚驚躍處鱗。風虛難駐足。岸闊怯迴身。豈暇踟躕久。寧辭顧盼頻。願將兢慎意。從此赴通津。

觀燈云。十萬人家火燭光。門門開處見紅粧。歌鍾喧夜更漏暗。羅綺滿街塵土香。星宿別從天畔出。蓮花不向水中芳。寶釵驟馬多遺落。依舊明朝在路傍。

蕭遠。元和進士登第。與舒元興聲價俱美。（出廣棟言）

秦雲寂寂僧還定。盡日無人鹿遶牀。（句）日暮風吹官渡柳。白鷗飛出石頭牆。（廢城句）雙雙白燕入祠堂。（乳石洞玉女祠句）

右張爲取作主客圖。

張籍有弟。蕭遠雪夜同宿詩云。數卷新游蜀客詩。長安僻卷得和隨。草堂深夜携琴宿。說似青城館裏時。

許康佐

白雲起封中詩云。英英白雲起。呈瑞出封中。表聖甯依地。逢時豈待風。浮輝迷皎潔。流影忽冲融。自叶堯天美。誰言漢日同。泥金光乍掩。檢玉氣俄通。猶願非煙瑞。亭亭不散空。

元稹酬許五康佐詩云。猿啼三峽雨。蟬報兩京秋。珠玉慙新贈。芝蘭忝舊遊。他年問狂客。

須向老農求。

康佐以中書舍人爲翰林侍講學士。與王起皆爲文宗寵禮。帝讀春秋。至閹弑吳子余祭。問閹何人耶。康佐以中官。方彊不敢對。帝嘻笑。後問李訓。訓曰。國君不近刑人。以爲輕死之道。帝曰。朕近刑人多矣。得不慮哉。訓曰。列聖知而不能遠。惡而不能去。陛下念之。宗廟福也。於是內謀翦除矣。康佐終於禮部尙書。

許堯佐

堯佐金谷懷古云。石氏遺文在。淒涼見故園。清風思奏樂。衰草念行軒。舞榭蒼苔掩。歌臺落葉繁。斷雲歸舊壑。流水咽新源。曲沼殘煙歛。叢筍宿鳥喧。唯余池上月。猶似對金樽。

康佐諸弟皆第進士。而堯佐最先進。又舉宏詞。爲太子授書郎。八年康佐繼之。

堯佐正元十六年。與燉煌張宗本。滎陽鄭權。皆佐征西府。後位諫議大夫。卒。

張南史

陸滕宅秋雨中探韻云。同人永日自和將。深竹閑園偶辟強。已被秋風交憶脣。更聞寒雨勸飛觴。歸心莫問三江水。旅服徒霑九月霜。醉裏欲尋騎馬路。蕭條幾處有垂楊。

送朱大北遊云。歲暮一爲別。江湖聊自寬。且無人事變。誰爲客行難。郢曲怜公子。皇州憶

伯鸞蒼蒼遠山際。松樹獨宜寒。

南史好弈碁。其後折節讀書。遂入詩境。李端哭之云。諫草文猶在。圍碁智不如。高仲武云。張君弈碁者。中年感激。苦節學文。數年間。稍入詩境。如已被秋風教憶膾。更聞寒雨勸飛觴。事與物力俱矣。

南史字季直。幽州人。以試參軍。避亂居揚州。楊子再召未赴。而卒。

錢起贈南史云。紫泥何日到滄洲。笑向東陽沈隱侯。黛色晴峯雲外出。縠紋江水縣前流。使臣自欲論公道。才子非關厭薄遊。溪畔秋蘭雖可佩。知君不得少停舟。

徐凝

范攄言樂天爲杭州刺史。令訪牡丹。獨開元寺僧惠澄。近於京師得之。植於庭。時春景方深。惠澄設油幕覆其上。會凝自富春來。未識。白先題詩曰。此花南地知難種。慚愧僧閑用意栽。海燕解憐頻睨睨。胡蜂未識更徘徊。虛生芍藥徒勞妬。羞殺玫瑰不敢開。唯有數苞紅萼在。含芳只待舍人來。白尋到寺看花。乃命徐同醉而歸。時張祐傍舟而至。二生各希首薦。白曰。二君論文。苦廉白之闕。鼠穴勝負。在於一戰也。遂試。長劍倚天外。賦餘霞散成綺。詩試訖。解送凝爲元祐次耳。祐曰。祐詩有地勢遙尊岳。河流側讓關。又題金山寺詩曰。樹影中流見。鐘聲兩岸聞。

雖碁毋潛云。塔影挂青漢。鍾聲和白雲。此句未爲佳也。凝曰。美則美矣。爭如老夫今古長如白
練飛。一條界破青山色。凝遂擅場。祐歎曰。榮辱糾紛。亦何常也。遂行歌而邁。凝亦鼓枻而歸。自
是二生不隨鄉賦矣。白又以祐宮詞四句皆數對。未足奇也。後杜牧守秋浦。與祐爲詩酒友。酷
吟祐宮詞。以白有非祐之論。常不平之。乃爲詩以高之曰。誰人得似張公子。千首詩輕萬戶侯。
又云。如何故國三千里。虛唱歌詞滿六宮。杜盛言其美者。欲以苟異於白。而曲成於張也。故牧
又著論。言近有元者。喜爲浮言嫖語。鼓扇浮置。吾恨方在下位。未能以法治之。斯亦數佐於祐
耳。潘若冲郡閣雅談云。凝官至侍郎。多吟絕句。曾吟廬山瀑布。餽炙人口。又題處州縉雲山黃
帝上昇之所鼎湖。蓋黃帝鑄鼎處也。有池在山頂。詩云。黃帝旌旗去不迴。空余片石碧崔嵬。有
時風卷鼎湖浪。散作晴天雨點來。自後無敢題者。凝送馬向游蜀云。遊子去咸京。巴山萬里程。
白雲連鳥道。青壁遞猿聲。雨露經泥坂。煙花望錦城。工文人共許。應記蜀中行。

送李補闕歸朝云。駟牡歸城闕。雙鳧去海門。還從清切楚。再沐聖明恩。禮樂中朝貴。文章
大雅存。江湖多旅逸。獻替欲誰論。

問漁叟云。生事同薄梗。機心在野船。如河臨逝水。白髮未忘筌。

樂天薦徐凝。屈張祐論者至今鬱鬱。或歸白之妬才也。余讀皮日休論祐云。祐元和中。作

宮體詩辭曲艷發。當時輕薄之流。能其才。合謀得譽。及老大。稍闕建安風格。誦樂府錄。知作者本意。講諷怨謫。時與六義相左右。此爲才之最也。祐初得名。乃作樂府艷發之詞。其不羈之狀。往往間見疑之。操履不見於史。然方千學詩於凝。贈之詩曰。吟得新詩草裏論。戲反其辭。謂村裏老也。方千世所謂簡古者。且能譏凝。則凝之朴略樵魯。從可知矣。樂天方以實行求才。薦凝而抑祐。其在當時。理其然也。令狐楚以祐詩三百篇上之。元稹曰。彫虫小技。或獎激之。恐害風教。祐在元白時。其舉不甚持重。杜牧之刺池州。祐且老矣。詩益高。名益重。然牧之少年所爲。亦近於祐。爲祐恨白。理亦有之。余嘗謂文章之難。在發源之難也。元白之心。本乎立教。乃寓意于樂府雍容宛轉之詞。謂之諷諭。謂之閑適。既持是取大名。時士翕然從之。師其詞。失其旨。凡言之浮靡艷麗者。謂之元白體。二子規規攘臂解辨。而習俗既深。牢不可破。非二子之心也。所以發源者非也。可不戒哉。

青山舊路在。白首醉還鄉。(別白公句) 試到第三橋。便入千頃花。(句) 高景爭來草木頭。一生心事酒前休。山公自是山人侶。攜手醉登城上樓。(答白公句)

右張爲取作主客圖。

朱 晝

贈友人古鏡云。我有古時鏡。初自壞陵得。蛟龍猶泥蟠。魑魅幸月蝕。摩久見菱蘗。青於藍水色。贈君將照心。無使心受惑。

喜陳懿老示新製云。一別一千日。一日十二憶。苦心無閑時。今夕見玉色。玉色復何異。紅明含羣德。有文如星宿。飛入我胸臆。憂愁方破壞。懽喜重補塞。使我心口全。且非黃金力。將攀下風手。願假仙鸞翼。予欲見詩人孟郊。故寄誠於此。

賦得花籐藥合寄穎陰故人云。藤生南海濱。引蔓青且長。剪削爲花枝。何人無文章。非才亦有心。割骨開余芳。繁葉落何處。孤貞在中央。願盛黃金膏。寄與青眼郎。路遠莫知意。水深天蒼蒼。

書元和間進士。

侯喜（劉師服軒轅彌明）

韓退之石鼎聯句詩序云。元和七年十二月四日。衡山道士軒轅彌明。舊與進士劉師服。衡湘中相識。師服在京。夜抵其居。宿有校書郎侯喜。新有能詩聲。夜與劉說詩。彌明指爐中石鼎曰。子能爲我賦此乎。喜卽援筆賦之。彌明繼焉。詩曰。好匠斲山骨。剝中事煎烹。（師服）直柄未當權。寒口且吞聲。（喜）龍頭縮菌蠢。豕腹脹膨脝。（彌明）外苞乾蘚文。中有暗浪驚。

(師服)在冷安白足。遭焚意彌亨。(喜)謬當鼎鼐間。妄使水火爭。(彌明)大若烈士膽。圓如戰馬纓。(師服)上比香爐尖。下與鏡面平。(喜)秋菰未落帶。凍芋彊抽萌。(彌明)一塊元氣間。細泉幽竇碩。(師服)不值輸寫處。焉知懷抱清。(喜)方當洪爐然。益見小器盈。(彌明)睨睨無刀跡。團團類天成。遙疑龜負圖。出曝曉正晴。(喜)旁有雙耳穿。上爲孤髻撐。(彌明)或訝短尾銑。大似無足鐘。(師服)可惜寒食毯。擲在路傍坑。喜何當出灰地。無計離瓶嬰。(師服)陋質荷斟酌。狹中貴提擎。(師服)豈能養仙藥。但未污羊羹。(喜)形模婦女笑。量度兒童輕。(彌明)徒爾堅重性。不過升合盛。仍似廢穀仰。側見折軸橫。(喜)時於蚯蚓竅。微作蒼蠅鳴。(彌明)以茲醜溢僊。實負任使誠。(師服)常居顧盼地。敢有漏泄情。寧依暖熱弊。不與寒涼并。(彌明)區區徒自效。瑣瑣不足呈。(師服)迴旋但兀兀。開合唯鏗鏗。(喜)全勝瑚璉貴。空有口傳名。豈比俎豆古。不爲手所撻。磨礪去圭角。浸潤著光明。願君莫嘲諷。此物方施行。(四韻並是彌明作也)始師服援筆題首句。授喜喜綴其下云。云。道士笑曰。子詩如是而已乎。卽袖手竦肩。傍北牖坐。謂劉曰。吾不解世俗書。弟子爲我書吾句。因高吟龍頭豕腹一聯。初不似經意。詩旨有似譏喜。二子相顧慚駭。欲以多窮之。道士不用意。益切奇出不可附。說皆侵劉侯。二子思竭。不能續。道士曰。章不可不成。命劉把筆。唱出四十

字爲八句讀畢謂二子曰此皆不足與語此寧爲文耶吾所聞子皆不足聞也二子驚惋自失

蔣防

春風扇微和詩云麗日催遲景和風扇早春暖浮丹鳳闕韶媚黑龍津滄蕩迎仙仗霏微送畫輪綠搖宮柳散紅待禁花新舞席皆迴雪歌筵暗送塵幸當陽律候惟願及佳辰

望禁苑祥光詩云嘉瑞生天色葱籠幾效祥樹搖三殿側日映九城傍仙霧今同色卿雲未可章拱汾疑鼎氣臨渭比熒光豈並春風舊俄同聖壽長微臣時一望短羽欲翱翔

冬至日祥風應候詩云節逢清景空氣古二儀中獨喜登高日先知應候風端呈光燁化表慶盛堯聰况與承時叶還將入律同微微萬井逼習習九門通透殿爐煙起殷勤報歲功

杜賓客永豐里新居云退蹟居三逕辭榮繼二疏聖情容解印帝里許懸車已去龍樓籍猶分御廩儲風泉輸耳目松竹助玄虛調護心常在山林思有餘應嗤紫芝客遠就白雲居

元和中李紳及防薦龐嚴爲翰林學士李逢吉誣紳罪逐之出嚴刺信州防刺汀州于敖封還詔書搢紳意伸其枉曰于給事犯宰執之怒中龐蔣之屈不亦善乎奏下乃論貶嚴太輕衆嗤諫防作連州廖先生碑銘云長慶末余自尙書司封郎中知制誥翰林學士出守臨汀尋改此郡

唐詩紀事卷第四十二

王涯

令狐楚

張仲素

王涯

獻壽詞云。宮觀參差列九重。祥雲瑞氣捧塔濃。微臣欲獻南山壽。遙指南山對袞龍。
遊春詞云。曲江絲柳變煙條。寒谷冰隨暖氣消。纔見春光生綺陌。已聞清樂動雲韶。
經過柳陌與桃蹊。尋逐春光著處迷。鳥度時時衝絮起。花繁袞袞壓枝低。

秋思云。綠軒涼吹動輕衣。夜聽更長玉漏稀。月渡天河光轉濕。鵲驚秋樹葉頻飛。
宮連太液見滄波。暑氣微消秋意多。一夜輕風蘋末起。露珠灑盡滿池荷。

從軍辭云。髭頭夜落捷書飛。來奏金門着賜衣。白馬將軍頻破鏑。黃龍戍卒幾時歸。
塞下曲云。辛勤幾出黃花戍。迢遞初隨細柳營。塞晚每愁殘月苦。邊秋更逐斷蓬聲。
年少辭家從冠軍。金裝寶劍去邀勳。不知馬骨傷寒水。唯見龍城起暮雲。

平戎辭云。太白秋高助發兵。長風夜卷虜塵清。男兒解却腰間劍。喜見從王道化平。
塞虜常爲敵。邊聲已報秋。平生多志氣。箭底覓封侯。

從軍辭云。戈甲從軍久。風雲識陣難。今朝拜韓信。封日斬成安。燕頤多奇相。狼頭敢犯邊。寄言班定遠。正是立功年。

隴上行。負羽到邊州。鳴笳度隴頭。雲黃知塞近。草白見邊秋。

閨人贈遠。花明綺陌春。柳拂御溝新。爲報遼陽客。流芳不待人。

遠戍功名薄。幽閨年貌傷。妝成對春樹。不語淚千行。形影一朝別。煙波千里分。君看望君處。祇是起行雲。戴勝飛晴野。淒淒下濁河。春風樓上望。誰見淚痕多。

春江曲。搖漾越江春。相將看白蘋。歸時不覺夜。出浦月隨人。

家寄征江岸。征人幾歲遊。不如潮水信。每月到沙頭。乘曉南湖去。參差疊浪橫。前洲在何處。露裏鴈嚶嚶。

塞下曲。三戍漁陽再渡遼。驛弓在臂劍橫腰。匈奴欲似知名姓。休傍陰山更射鵞。

獵馬千羣鴈幾雙。燕然山下碧油幢。傳聲漠北單于破。火照旌旗夜受降。

朔雪飄飄開鴈門。平沙歷亂卷蓬根。功名恥計擒生數。直斬樓蘭報國恩。

隴水潺湲隴樹秋。征人到此汨雙流。鄉關萬里無因見。西戍河源早晚休。

陰積茫茫塞草腓。桔槔烽上暮煙飛。關河北望天連海。蘇武曾將漢節歸。

漢苑行。二月春風變柳條。九天清樂奏雲韶。蓬萊殿後花如錦。紫閣街前雪未銷。
迴鴈高翻太液池。新花口發上林枝。年光到處皆堪賞。春色人間總未知。

春風澹蕩影悠悠。鸞囀高枝燕入樓。千步回廊老鳳吹珠簾。處處上銀鈎。

閑思云。洞房今夜月如練。復如霜。爲照離人恨。亭亭到曉光。

涯。字廣津。博學工屬文。梁肅陸贄異其才。元和中爲相。又相穆宗。至文宗時。李訓敗。遂及禍。

令狐楚

宮中樂云。楚塞金陵靖。巴山玉疊空。萬方無一事。端坐大明宮。

雪霽長揚苑。冰開太液池。宮中行樂日。天下盛明時。柳色煙相似。梨花雪不如。春風空有意。一一麗皇居。月上宮花靜。煙含遠樹深。銀臺門已閉。仙漏夜沉沉。九重青鎖闥。百尺碧雲樓。明月秋風起。珠簾上玉鈎。

遠別離云。楊柳黃金穗。梧桐碧玉枝。春來消息斷。早晚是歸時。玳織鴛鴦履。金裝翡翠簾。畏人相借問。不擬到城南。

遊春辭云。曉遊臨碧殿。晚日上春亭。芳樹羅仙苑。晴山展翠屏。一夜好風吹。新花一萬枝。

風前調玉管。花下簇金樞。

長相思云。君行登隴上。妾夢在閨中。玉箸千行落。銀牀一半空。綺席春眠覺。紗窗曉望迷。朦朧殘夢裏。猶自在遼西。

年少行云。少小邊城慣。放狂驪騎蕃馬射黃羊。如今年老無筋力。猶倚營門數鴈行。

家本清河住五城。須憑弓箭覓功名。等閑飛鞚秋原上。猶向寒雲試射聲。

弓背霞明劍照霜。秋風走馬出咸陽。未收天子河源地。不擬回頭望故鄉。

霜滿庭中月滿樓。金樽玉柱對清秋。當年稱意須爲樂。不到天明不肯休。

從軍行云。荒鷄隔水啼。汗馬向風嘶。終日隨旌旆。何時罷鼓鼙。孤心眠夜雪。滿眼是秋沙。

萬里猶防寒。三年不見家。却望冰河闊。前登雪嶺高。征人幾多在。又擬戰臨洮。胡風千里驚。漢

月五更明。縱有還家夢。猶聞出塞聲。暮雪迷青海。陰霞覆白山。可恰班定遠。生入玉門關。

寒下曲云。雪滿衣裳冰滿鬚。曉隨飛將發單于。平生志氣今何在。把得家書淚似珠。

邊艸蕭條塞鴈飛。征人南望盡霑衣。黃塵滿面長須戰。白髮生頭未得歸。

思君恩云。小苑鶯歌歇。長門蝶舞多。眼看春又去。翠幄不經過。

紫禁香如霧。青天月似霜。雲韶何處奏。祇是在昭陽。鷄鳴天漢曙。鶯語禁林春。誰入巫山

夢唯應洛水神。

王昭君云。錦車天外去。毳幕雪中開。魏闕蒼龍遠。蕭關赤鴈來。仙娥今下嫁。驕子白同和。劍戟歸田盡。牛羊繞塞多。

望春辭云。高樓望見一花開。便覺春光四面來。曉日晴雲知次第。東風不用更相催。

雲霞五采浮天闕。梅柳千般夾御溝。不上黃山南北望。豈知春色滿神州。

楚久爲太常博士。詩云。何日居三署。終年尾百寮。世傳之。立春後言懷。招李庭弼推云。閑齋夜擊唾壺歌。試望夷門柰遠何。每聽寒笳離夢斷。時窺清鑑旅愁多。稍驚霄漏丁丁促。已覺春風習習和。海內故人君最老。花間鞭馬更相過。

節度宣武酬樂天夢得云。蓬萊仙監（樂天）客曹郎（劉爲主客）曾枉高車客大梁。見擁旌旆治軍旅。知親筆硯事文章。愁看柳色懸離恨。憶遞花枝助酒狂。洛下相逢肯相寄。南金璀璨玉淒涼。劉詩云。曾經謝病客遊梁。今日相逢憶李王。少有一身兼將相。更能四面占文章。白詩云。馬頭拂柳時回轡。豹尾穿花暫亞槍。誰引相公開口笑。不逢白傅與劉郎。

楚自翰林學士拜相。子綸自湖州召入翰林爲學士。問歲拜相。渭南尉趙嘏獻詩曰。鷲在卿雲冰在壺。代天才業奉訐謨。榮同伊陟傳朱戶。秀比王商入畫圖。昨夜星辰爲劍履。前年風

月滿江湖。不知機務時多暇。猶許詩家屬和無。

正元七年。杜黃裳知舉。微服訪名士於尹樞。樞言子弟有崔元略。孤進有林藻。令狐楚。其年樞冠榜試珠還合浦賦。藻賦成。夢人謂曰。何不敍珠來去之意。既寤改之。黃裳謂藻曰。敍珠來去。如有神助。是年楚第五。藻第十一。

楚字穀士。德棗之裔。與李逢吉善。元和末爲相。敬宗遂李紳。楚自宣武節度徙天平。入爲左僕射。開成間卒。楚遊義興寺。寄上李逢吉相公云。柳宮無事詣蓮宮。相公久住此寺。步步猶疑是夢中。勞役徒爲萬夫長。閑遊曾與二人同。鸞鳳飛去仙巢在。龍象潛來講席空。松下花飛頻佇立。一心千里憶梁公。

遊晉祠上李逢吉相公云。不歷晉祠三十年。白頭重到一凄然。泉聲自昔鏘寒玉。草色雖秋耀翠鈿。少壯同遊常有數。尊榮再會便無緣。相思臨水下雙淚。寄入并汾向洛川。

張仲素

聖神樂云。玉帛殊方至。歌鍾比屋聞。華夷今一貫。同賀聖明君。

海浪恬丹徼。邊塵靜黑山。從今萬里外。不復鎖蕭關。九陌祥煙合。千春瑞月明。官花同苑柳。先發鳳凰城。空中樂云。網戶交如綺。紗窗薄似煙。樂吹天上曲。人是月中仙。

翠匣開寒鏡。珠釵掛步搖。粧成祇是曉。更漏促清霄。紅果搖池實。金盤露井冰。甘泉將避暑。臺殿水光凝。月彩浮鸞殿。砧聲遶鳳樓。笙歌臨水檻。紅燭乍迎秋。奇樹留寒翠。神池結夕波。黃山一夜雪。渭水鴈聲多。

春遊云。煙柳飛輕絮。風榆落小錢。濛濛百花裏。羅綺競鞦韆。

聘望登香閣。爭高下砌臺。林間踏青去。席上意錢來。行樂三春節。林花百和香。當年重意氣。先占鬪雞場。

春閨怨云。雪盡萱抽葉。風輕水變苔。玉關書信絕。又見發庭梅。

萋萋邊城柳。青青陌上桑。提籠行採葉。昨夜夢漁陽。

桂魄初生秋露微。輕羅已薄未更衣。銀箏夜久殷勤弄。心性空房不忍歸。

太平辭云。風俗今和厚。君王在穆清。行看採花曲。盡是太階平。

聖德超千古。皇風靜四方。蒼生今息戰。無事覺時長。

遊春曲云。萬樹江邊杏。新開一夜風。滿園深淺色。照在綠波中。

上苑何窮樹。花開次第新。香車與絲綺。風靜亦生塵。

送春辭云。日日人空老。年年春更歸。相歡在尊酒。不用惜花飛。

塞上曲云。天驕遠塞行。出鞘寶刀鳴。定是酬恩日。今朝覺命輕。

卷旆生風喜氣新。早持龍節靜邊塵。漢家天子圖麟閣。身是當今第一人。

贈遠云。當年只是守空帷。夢見江山覺別離。不見鄉書傳鴈足。唯看新月吐蛾眉。

厭攀楊柳臨青閣。閑採芙蓉傍碧潭。走馬臺邊人不見。拂雲堆畔戰方酣。

閨人思云。愁見遊空百丈絲。春風惹斷更傷離。閑花落徧蒼苔地。盡日無人誰得知。

秋夜曲云。丁丁漏水夜何長。漫漫輕雲露月光。秋逼暗虫通夕響。征衣未寄莫飛霜。

碧窗斜月藹清輝。愁聽寒蛩淚濕衣。夢裏分明見關塞。不知何路白金徽。

秋天一夜靜無雲。斷續鴻聲到曉聞。欲寄征衣問消息。居延城外又移軍。

博山沉燎絕餘香。蘭燼金槃怨夜長。爲問青青河畔草。幾回經雨復經霜。

天馬辭云。天馬初從渥水來。效歌曾唱得龍媒。不知玉塞沙中路。苜蓿殘花幾處開。

躑躅宛駒齒未齊。欖金噴玉向風嘶。來時行盡金河道。獵獵輕風在碧蹄。

縱山鶴詩。羽客騷仙鶴。將飛駐碧山。映松殘雪在。度嶺片雲還。清唳因風遠。高姿對水閑。

笙歌憶天上。城郭歎人間。幾覺霜毛潔。殊知藻質班。迢迢煙路逸。喬詭詭能攀。

砌臺。卽今搽撻臺也。仲素詩云。寫望臨香閣。登黃下砌臺。林間踏青去。席上意錢來。

仲素字繪之。建封之子。憲宗以仲素段文昌爲翰林學士。韋賢之曰。學士所以備顧問。不宜專取辭藝。罷之。後終中書舍人。

右王涯令狐楚張仲素五言七言絕句共作一集號三舍人集今盡錄於此。

唐詩紀事卷第四十二

竇參

郭士元

于良史

舒元興

李諒

李賀

呂溫

呂恭

段波古

何元上

羊士諤

馮宿

柳宗元

吳武陵

邵真

崔膺

衛象

李宣遠

熊孺登

崔立之

郭遵

韋紆

竇參

謫江表久未歸有詩云。一自經放逐。徘徊無所從。便爲出山雲。不隨飛去龍。名豈不欲保。歸豈不欲早。苟無三月資。難適千里道。離心與羈思。終日常草草。人生年幾齊。憂苦則先老。誰能假羽翼。使我暢懷抱。

湖上閑居云。避影將息陰。自然知音稀。向來深林中。偶亦有所窺。飛鳥口銜食。引鷓上高枝。高枝但各有。安知宜不宜。止止復何云。物情何自私。

高仲武云。參詩祖沈千運。比於孟郊。尚在廊廡之間。然萬丈水聲落。四時松色寒。又人生年幾齊。憂苦卽先老。羽翮未齊。而力已具。

參字時中。爲人矜嚴。倖直果於斷。初爲萬年尉。失囚。貶尉江夏。代同舍人罪。人義之。相德宗。與陸贄不平。以姦賄。貶死於岳州。

郭士元

題劉相公三湘圖云。昔別醉衡霍。嚮來憶南洲。今朝半津却。兼得瀟湘遊。稍辨荊門樹。依然芳杜洲。微明三巴峽。咫尺萬里流。去鳥不知倦。遠帆生暮愁。涪陽指天末。北渚空悠悠。枕上見漁父。坐中常狎鷗。誰言魏闕下。自有東山幽。

寒下曲云。寶刀塞上兒。身經百戰口。曾有百勝心。竟未嫖姚知。白草山頭日初沒。黃沙城下歌聲發。蕭條夜靜邊風吹。獨倚營門望秋月。

贈韋司直云。聞君感歎二毛初。舊友相依萬里餘。烽火有時驚暫定。甲兵無處可安居。客來吳越星霜久。家在平陵音信疏。昨日風光還入戶。登山臨水意何如。近張南史云。雨餘深巷靜。獨酌定殘春。車馬雖嫌僻。鶩花不棄貧。蟲聲粘戶網。鼠跡印床塵。借問山陽會。如今有幾人。高仲武云。士元員外。河岳英奇。人倫秀異。自家形國。遂擁大名。右丞已後。與錢郎更長。自

丞相已下出使作收。二公無詩祖餞。時論鄙之。兩公詞體大約欲同。就中郎公稍更閑雅。近於康樂。如荒城背流水。遠鴈入寒雲。又去鳥不知倦。遠帆生暮愁。又蕭條夜靜邊風吹。獨倚營門望秋月。可齊衡古人。掩映時輩。又暮蟬不可聽。落葉豈堪聞。古人謂謝朓工於發端。比之於今。有慙沮矣。

士元字君胃。中山人。寶應中。選畿縣官。詔試中書。補渭南尉。歷拾遺。鄧州刺史。

送彭將軍云。雙旌漢飛將。萬里授橫戈。春色臨關盡。黃雲出塞多。鼓鼙悲絕漠。烽戍隔長河。莫斷山陽路。天驕已請和。

送孫願云。悠然富春客。憶與暮潮歸。擢第人多羨。如君獨步稀。亂流江渡淺。遠色海山微。若訪新安路。嚴陵有釣磯。

宿杜氏江樓云。適楚豈吾願。思歸秋向深。故人江樓月。夜夜千里心。落葉覺鄉夢。鳥啼驚越吟。廖廖更何有。斷續空成砧。送彭將軍以下二章。并贈張南史詩。姚合取爲極元集。

于良史

良史爲張徐州建封從事。每自吟曰。出身三十年。髮白衣猶碧。日暮倚朱門。從朱污袍赤。公因爲奏章服焉。

春山夜月云。春來多勝事。賞翫夜忘歸。掬水月在手。弄花香滿衣。興來無遠近。欲去惜芳菲。南望鍾鳴處。樓臺深翠微。

冬日寄李贊府云。地險朝陽滿。天邊宿霧收。風兼殘雪起。河帶斷冰流。北闕馳心極。南闕尚旅遊。登臨恩不已。何處得銷憂。

閑居寄薛據云。隱几讀黃老。閑齋耳目清。僻居人事少。多病道心生。雨洗山林濕。鷓鴣池館晴。晚來因廢卷。行樂至西城。

高仲武云。良史工於清雅。工於形似。如風兼殘雪起。河帶斷冰流。吟文未終。較然在目。
舒元興

大和九年。誅王涯等。仇士良愈專恣。文宗惡之。雖登臨遊幸。未嘗爲樂。或瞠目獨語。左右莫敢進問。因題詩曰。輦路生春草。上林花滿枝。憑高何限意。無復侍臣知。一日看牡丹。或吟曰。拆者如語。含者如咽。俯者如愁。仰者如悅。吟罷方省。元輿詞不覺嘆息。泣下沾衣。

李翱在長沙。嫁韋中丞愛姬所生女。流落者。元輿自京馳詩贈翱曰。湘江舞罷忽成悲。便脫鸞靴出絳帷。誰是蔡邕琴酒客。魏公懷舊嫁文姬。

元輿婺州人。與李訓善。同相文宗。專附鄭注。詭謀繆算。日與訓比。敗天下事。二人爲之也。

元輿授監察御史時坊州刺史汪洌贓貨御史大夫溫造署元輿往訊之於坊州按獄有詩云中部接戎塞。頑山四周遭。風冷木長瘦。石磽人亦勞。牧守苟懷仁。瘡之時爲瘡。其愛如赤子。始得無啼號。奈何貪狼心。潤屋沉脂膏。攫搏如猛虎。吞噬若狂獠。山秃逾高採。水窮益深撈。鱸魚既斷跡。鹿兔無遺毛。氓苦稅外緡。吏髮笑中刀。大君明四目。燭之動秋毫。春茲一州命。慮齊墜波濤。臨軒詔小臣。汝往窮貪饕。分明舉公法。爲我緩窮騷。小臣誠小心。奉命如煎熬。飲水不待夕。驅馬凌晨臯。及此督簿書。游詞出狴牢。門牆見狼狽。案牘問腥臊。探情與之言。變態如彘獠。直非旣巧飾。僞意乃深韜。去惡猶農夫。稂莠須耘耨。恢恢布疎網。罪者何由逃。自顧孱鈍姿。利器非能操。六句始歸奏。霜落秋原蒿。寄謝守土臣。努力清郡曹。須知聽甚卑。勿謂天之高。

橋山懷古云。軒轅馱代千萬秋。淥波浩蕩東南流。今來古往無不死。獨有天地長悠悠。我乘驛騎到中部。古聞此地爲渠搜。橋山窈兀在其左。荒榛交鎖寒風愁。神仙天下亦如此。况我蹙役同蜉蝣。誰言衣冠葬其下。不見弓劍何人收。哀喧叫笑牧童戲。陰天月落狐狸遊。鄰思皇墳立人極。車輪馬跡無不周。洞庭張樂降口鶴。涿鹿大戰摧蚩尤。智勇神天不自大。風后力牧輸長箒。襄城迷路問童子。帝鄉歸去無人留。崑崙求道失遺跡。荆山鑄鼎余荒丘。君不見黃龍飛去山下路。斷髻成草風颼颼。

八月五日中部官舍讀唐歷天寶已來追愴故事云將尋國朝事靜讀柳芳歷八月日之五開卷忽感激正當天寶末撫事坐追愴仰思聖明帝貽禍在肘腋楊李盜吏權貪殘日狼藉燕戎伺其便百萬奮長戟兩河連烟塵二京成瓦礫生人死欲盡楔業猶不息肅宗傳寶圖冠難連年擊天地方開泰鑄鼎成繼述萬國哭龍衰悲思動蠻貊自此千秋節不復動金石悲風楊霜天纔惟冷塵席零落太平老東西亂離客往往爲余言嗚咽淚雙滴況當近塞地哀吹起邊笛撫机觀陳文使我心不擇花萼笑繁華溫泉樹客碧霓裳烟雲盡梨園風雨隔露囊與金鏡東游驚波瀾昔聞歡娛事今日成慘感神仙不可求劍璽苦文積萬古長恨端蕭蕭秦陵陌

坊州按獄蘇氏莊記室二賢自鄆州走馬相訪留連數日發後獨坐寂寞因成詩寄之云

十年一相見世路信多歧雲雨易分散山川長間之我銜鳳闕恩按獄橋山陲君在龍驤府掌奏羽檄詞相去百餘里魂夢自相馳形容在胸臆書札通相思煩君愛我深輕車忽載脂寒門秋色老霜氣方凝姿此地少平川崗阜相參差誰知路非遠行者多云疲君能犯勁風信宿凌欵危情親不自倦下馬開雙眉相對坐沉吟屈指驚歲時萬事且莫問一盃欣共持陽鳥忽西傾明蟾掛高枝卷簾引瑤玉滅燭臨霜墀中庭有疎蘆浙浙聞風吹長河卷雲色凝碧無瑕疵一言開我懷曠然澹希夷悠悠夜方永冷思偏相宜眉睫無他人與君閑解題陶然叩寂寞更

請吟清詩得意且忘言。何況竹與絲。頃刻過三夕。起坐輕四支。明朝告行來。慘然還別離。出門送君去。君馬楊金羈。迴來坐空堂。寂寞無人知。重重碧雲合。何處尋佳期。

李諫

蘇州元日郡齋感懷寄越州元相公杭州白舍人云。稱慶還鄉郡吏歸。端髮明發儼朝衣。首開三百六旬曆。新知四十九年非。當官補拙猶勤慮。遊宦量才已息機。舉族共資隨月俸。一身惟憶故山薇。舊交邂逅封疆近。老牧蕭條宴賞稀。書札每來同笑語。篇章時到借光輝。絲綸暫厭分符竹。舟楫初登擁羽旗。未知今日情何似。應與幽人事有違。(時長安四年也)

樂天和李中丞元日寄詩兼呈微之云。領郡慚當潦倒年。鄰州喜得平生友。又云。憑鴛傳語與李六。倩鴈將書寄元九。莫嗟一日日催人。且貴三年年入手。

樂天草諒泗州刺史制云。諒自澄城長。訖尙書郎。中間再爲州牧。三宰劇縣。苦心郵隱。仁恕及物。操刃決滯。書驕有聲。諒後爲京兆尹。

諒字復言。徵之有酬復言元日郡齋感懷詩云。臘盡殘銷春又歸。逢新別故欲沾衣。自驚身上添年幾。休繫心中小是非。貴富祝來何所遂。聰明鞭得轉無機。羞看稚子先拈酒。帳望平生舊探薇。去日漸加余日少。賀人閑闕故人稀。椒花麗句開重檢。艾髮衰容惜寸輝。苦思正直

酬白雪。閑觀風色助青旂。千官伏下爐烟裏。東海西頭意獨遠。（祝富貴。鞭聰明。皆正旦童稚俗云。）

李賀

高軒過云。華裾織翠青如惹。金環壓轡搖玲瓏。馬蹄隱耳聲隆隆。入門下馬氣如虹。云是東京才子。文章鉅公。二十八宿羅心胸。元精昭昭貫當中。殿前作賦聲摩空。筆補造化天無功。龐眉書客感秋蓬。誰是死艸生華風。我今垂翅附冥鴻。他日不羞蛇作龍。（退之皇甫湜聯騎造門。賀摠角荷衣而出。此詩操觚立成。）

賀以詩謁退之。時爲國子博士。已送客解帶。門人呈卷。旋讀之。首篇鴈門太守行云。黑雲壓城欲摧甲。光向月金鱗開。却援帶命邀之。其詩云。黑雲壓城欲摧甲。光向月金鱗開。龜聲滿天秋色裏。塞上燕脂凝夜紫。半卷紅旗臨易水。霜重鼓聲寒不起。報君黃金臺上意。捉搦玉龍爲君死。（鴈門太守行。）

李商隱作賀小傳云。京兆杜牧。爲李長吉序。狀長吉之奇甚盡。世傳之。長吉姊嫁王氏者。語長吉之事尤備。長吉細瘦。通眉長指爪。能苦吟疾書。最先爲昌黎韓愈所知。所與遊者。王參元。楊敬之。權璩。崔植爲密。每旦日出與諸公游。未嘗得題。然後爲詩。如他人思量牽合。以及程

限爲意。常從小奚奴，騎巨驢，背一古破錦囊。遇有所得，卽書投囊中。及暮歸，太夫人使婢探囊出之，見所書多，輒曰：「是兒要當歐出心始已耳。」上燈與食，長吉從婢取書，研墨疊紙，足成之。投他囊中，非大醉及弔喪日，率如此。過亦不復省。王楊輩時復來探取寫去，長吉往往獨騎往京洛，所至或時有隨棄之。故沈子明家所餘四卷而已。長吉將死時，或晝見一緋衣人，駕赤蚪，持一版書，若太古篆，或霹靂石文者，云：「當召長吉。」長吉了不能讀，歛下榻叩頭，言阿夔（長吉學語時呼太夫人云）老且病，賀不願去。緋衣人笑曰：「帝成白玉樓，立召君爲記。」天上差樂不苦也。長吉獨泣，邊人盡見之，少之。長吉氣絕，常所居窗中，勃勃有煙氣，聞行車嘒管之聲。太夫人急止人哭，待之如炊五斗黍許時。長吉竟死。王氏姊非能造作，謂長吉者，實所見如此。嗚呼！天蒼蒼而高也，上果有帝也耶？帝果有苑囿宮室觀闈之玩耶？苟信然，則天之高邈，帝之尊嚴，亦宜有物文彩愈此世者，何獨番番於長吉，而使其不壽耶？噫！又豈世所冒才而奇者，不獨地上少耶？天上天不多邪？長吉生二十六年，位不過奉禮太常，當時人亦多排擯毀斥之，又豈才而奇者，帝獨重之，而人返不重耶？又豈人見會勝帝耶？

飛香芝紅滿天春（上雲樂句）酒酣喝月使倒行（句）踢天磨刀割紫雲（此硯句）

右張爲取作主客圖。

杜牧之序其文集云。賀字長吉。元和中。韓吏部亦頗道其歌詩。雲煙綿聯。不足爲其態也。水之迢迢。不足爲其情也。春之盎盎。不足爲其和也。秋之明潔。不足爲其格也。風檣陣馬。不足爲其勇也。凡棺篆鼎。不足爲其古也。時花美女。不足爲其色也。荒國陰殿。梗莽丘壟。不足爲其恨。怨悲愁也。鯨呿鼉擲。牛鬼蛇神。不足爲其虛荒幻誕也。蓋騷之裔。理雖不及。辭或過之。騷有感。怨刺。對言及君臣理亂。時有以激發人意。乃賀所爲。無得有是。賀能探尋前事。所以深嘆恨。今古未嘗經道者。如金銅仙人辭漢歌。補梁庾肩吾宮體。謠求取情狀。離絕。遠去。筆墨畦逕。間亦殊不能知之。賀生二十七年死矣。世皆曰。使賀且未死。少加以理。奴僕命騷可也。

呂 溫

字和叔。一字化光。禮部侍郎涓之子。正元中。連中兩科。德宗召爲集賢校書。後爲治書御史。坐王叔文。貶道州。改衡州。年四十而歿。有子安衡。

溫和張舍人聞琴云。迢遞天上真。寂寞丘中琴。憶爾山水韻。起子仁智心。凝情在正始。超想疏煩襟。涼生子夜後。月照禁垣深。遠風蕙蘭氣。微露清桐陰。方襲緇衣慶。永奉南薰吟。

贈友人云。南山雙喬松。擢本皆千尋。夕流膏露津。朝被青雲陰。負雪出深澗。搖風倚高岑。明堂久不創。雲幹何森森。匠意方雕巧。時情正誇淫。生材會有用。天地豈無心。

道州觀野火詩云。南風吹烈火。焰焰燒楚澤。陽景當晝連。陰天半夜赤。過處若桴掃。來時如電激。豈復辨蕭艾。焉得分玉石。蟲蛇盡燦爛。虎兕出奔迫。積穢一蕩除。和氣始融液。堯時旣敬授。禹稼斯肇迹。遍生合穎禾。大秀兩岐麥。家有京抵詠。人無溝洫感。若悟焚如功。來歲終受益。

衡州早春云。碧水何逶迤。東風吹春草。煙波千里曲。不辨嵩陽道。又云。病肺不飲酒。傷心不看花。唯驚望鄉處。猶自隔長沙。

劉夢得序其文曰。早聞詩禮於先侍郎。從梁肅學文章。勇於藝能。咸有所祖。年益壯。志益大。遂撥去文學。與雋賢交。重氣概。覈名實。歆然以致君及物爲大欲。每與其徒講疑考要。皇王霸強之際。臣子忠賢之道。出入上下。千百年間。詆訶角逐。疊發連柱。得一善輒肝衡繫節。揚袂頓足。信容得色。舞于眉端。以爲按是言。修是理。合乎心。而氣將之。昭昭然若揭日月而行。孰能闕其勢。而能爭天光者。嗚呼。言可信。而時異。道甚長。而命窄。精氣爲物。其有所歸乎。又曰。和叔生少遇君。而卒以謫。似賈生。能明王道。似荀卿。始學左氏書。故其文微爲富豔。夫羿之關弓。唯巴蛇九日。乃能盡其力。而迴注鷄爵。亦要中於尋常之間。非羿之手。弓有能有不能。所遇然也。後之達解者。推而廣之。知余之素交。不相索於文字之內而已。其序如此。是以夢得元微之。柳

子厚悼呂衡州詩并誄皆以溫功業未濟爲辭。

夢得詩曰。一夜霜風雕玉芝。蒼生望絕士林悲。空懷濟世安人略。不見男婚女嫁時。遺草一函歸大史。旅墳三尺近要離。荆方徒歲行將滿。欲爲君刊第二碑。

微之詩云。氣敵三人傑。交深一紙書。我投冰瑩眼。君報水憐魚。脰股唯夸瘦。膏盲豈暇除。傷心死諸葛。□□□髮餘。

又云。望有經綸釣。虔收宰相刀。江文駕風遠。雲兒接天高。國待球琳器。家藏虎豹韜。盡將千載寶。埋入五原蒿。

又云。白馬雙旌隊。青山八陣圖。請纓期繫虜。枕草誓捐軀。勢激三千壯。年應四十無。遙聞不瞑目。非是不憐吳。

又云。鵬鷲生難敵。沉檀死更香。兒童喧市井。羸老哭碑堂。雁起沙汀暗。雲連海氣黃。祝融峯上月。幾點北人喪。

子厚作誄云。元和六年八月日。衡州刺史東平呂君卒。君由道州以陟爲衡州。君之卒。二州之人哭者逾月。湖南人重社飲酒。是月上戊。不洒去樂。會哭于神所。而歸君之志與能。不施于生人。知之者。又不過十人。世徒讀君之文章。歌君之理行。不知二者之於君其末也。萬不試

而一出焉。猶爲當世甚重。使君幸得出其什二三。巍然爲偉人。與世無窮。其可涯也。

溫孟冬蒲津開河亭作云。息駕非窮途。未濟豈迷津。獨立大河上。北風來吹人。雪霜日茲始。草木當更新。嚴冬不肅殺。何似見陽春。

溫有偶然作云。悽悽復汲汲。忽覺年四十。今朝淚滿衣。不是傷春泣。又曰。中夜兀然坐。無言空涕洟。丈夫志氣事。兒女安得知。可見以其志也。

呂恭

呂溫春日與李六景儉及第恭聯句。景儉云。始見花滿枝。又見花滿地。溫云。且持增氣酒。莫滴傷心淚。恭云。深誠長鬱結。芳辰自妍媚。景儉云。笑歌聊永日。誰知此時意。溫又有同恭歲暮寄晉州李協律詩。其略曰。伊我抱微尚。仲氏卽心期。討論自少小。形影相差池。此來胸中氣。欲耀天下奇。雲衢兩沛艾。煙閣雙萎蕤。幾年困方枘。一旦失多歧。道因窮理悟。命以盡性知。皆失志之狀也。

呂渭四子溫。恭儉遜。柳宗元誌恭墓云。以爲賢豪絕人。又云。恭之妻。裴延齡女也。

段洪古

洪古。澧州人。呂溫守道州時。洪古客焉。洪古奉陪郎中使君樓上夜把火看花詩云。城上

芳園花滿枝。城頭太守夜看時。爲報林中高舉燭。感人情思欲題詩。

溫答段秀才云。盡日看花君不來。江城半夜爲君開。樓中共指南園火。紅燼隨花落碧苔。
溫送段秀才歸澧州云。相南孤白芷。幽託在清潯。豈有馨香發。空勞知處深。推賢路已隔。
賤乏力不任。慚我一言分。負君千里心。寸義薄聯組。片誠兼敵金。方期踐冰雪。無使弱思侵。

何元上

呂溫知道州時。元上居此州。謂之何處士。

元上有所居寺院。涼夜書情呈溫云。庾公念病宜清暑。遣向僧家占上方。月光似水衣裳濕。松氣如秋枕簟涼。幸似薄才當客次。無因弱羽逐鸞翔。何由一示雲霄路。腸斷星星兩鬢霜。
溫答云。意氣曾傾四國豪。偶來幽寺息塵勞。嚴陵釣處江初滿。梁甫吟時月正高。新識幾人知杞梓。故園何歲長蓬蒿。期君自致青雲上。不用傷心歎二毛。

溫又有送何山人之容州詩云。匣有青萍笥有書。何門不可曳長裾。應須定取真知者。遣對明君說子虛。

羊士諤

小園春至偶書。寶郎中孟員外云。松篠雖苦節。冰霜慘其間。欣欣發佳色。如喜東風還。

幽抱想前躅。冥鴻度南山。春臺一以眺。達士未解顏。偃息非老圃。沉吟闕玄關。馳暉忽復失。歲不得閑。君子當濟物。舟楫難其攀。心期自有約。去掃蒼苔班。

酬西川獨孤侍御見寄云。百雉層城上將壇。列營西照雪峯寒。文章立事須銘鼎。談笑論功恥據鞍。草檄青油推健筆。曳裾黃閣聳危冠。雙金未比三年字。負弩空慙知者難。

亂後曲江云。憶昔曾遊曲水濱。來春長有探春人。遊春人靜空池在。直至春深不似春。

順宗實錄云。元年六月。貶宣州巡官羊士諤爲汀州寧化縣尉。士諤性傾險。時以公事至京。遇叔文用事。朋黨相煽。頗不能平。公言其非。叔文聞之怒。欲下詔斬之。執諤不可。則令杖殺之。又不可。遂貶焉。由是叔文始大惡執諤。士諤受知李吉甫。又最善呂溫。薦爲御史。嘗爲資州刺史。

張爲主客圖。以樂天爲廣大教化主。士諤爲入室。取其句云。風泉留古顏。笙碧相遺音。
(歷山句)桂朽有遺馥。鸞飛安可待。(句)塵沙謫如霧。長波驚鱗度。鷹起汀州寒。馬嘶高城暮。銀缸倦秋館。綺瑟瞻永路。重有携手期。清光倚玉樹。

士諤望女儿山。早歲有卜築之志云。望女山頭春雪銷。路傍仙杏發柔條。心思欲去知何日。惆悵迴車上野橋。酬蕭使君出妓夜讌見送云。玉顏紅燭忽驚春。微步凌波拂暗塵。自是當

歌歛眉黛。不應惆悵爲行人。郡樓晴雪云。霽色朝雲盡。亭高露亦晞。襄關臨曲檻。蕭瑟換輕衣。地遠秦人望。天晴社燕飛。無功慙歲晚。唯念故山歸。

息舟荆溪。入陽羨南山。遊善權寺。呈李功曹云。結纜蘭渚曉。紫崑上連崗。安溫值初霽。去遶山河長。獻歲冰雪盡。細泉在路傍。行披煙杉入。激瀾橫石梁。層門表精廡。飛甍切雲翔。冲襟得高步。清眺極遠方。潭嶂積佳氣。萸英多早芳。具觀澤國秀。重使春心傷。念遵煩促途。榮利鶩隙光。勉君脫冠意。共匿無何鄉。尋山家云。獨訪山家歇。還涉茅屋斜。連隔松葉。主人聞語未開門。繞籬野菜飛黃蝶。

馮宿

宿字拱之。婺州人。爲裴度彰義判官。徐州張建封掌書記。歷工刑二侍郎。

宿尹河南。樂天夢得以詩送之。宿酬云。共稱洛邑難其選。何幸天書用不才。遙約和風新草木。且令新雪靜塵埃。臨歧有愧傾三省。別酌無辭醉百盃。明歲杏園花下集。須知春色自東來。（每春嘗接諸公杏園宴會）

柳宗元

宗元種柳戲題云。柳州柳刺史。種柳柳江邊。談笑爲故事。推移成昔年。垂陰當覆地。聳幹

會參天。好作思人樹。慚無惠化傳。

南澗中題云。秋氣集南澗。獨遊亭午時。迴風一蕭瑟。林影久參差。始至若有得。稍深遂忘疲。羈禽響幽谷。寒藻舞淪漪。去國魂已遊。懷人淚空垂。孤生易爲感。失路少所宜。寂寞竟何事。徘徊祇自知。誰爲後來者。當與此心期。

漁翁云。漁翁夜傍西巖宿。曉汲清湘燃楚竹。煙銷日出不見人。欸乃一聲山水綠。迴看天際下中流。巖上無心雲相逐。

子厚與楊誨之書云。吾年十七。求進士。四年乃得舉。二十四求博學宏詞。二年乃得仕。及爲藍田尉。走謁六官堂下。與卒伍爲列。益學老子和光同塵。雖自以爲得。然已得號爲輕薄人矣。及爲御史郎官。自以登朝廷。利害益大。雖戒礪益切。卒不免爲連累廢逐。（子厚陷王叔文之黨。遷謫。卒死於柳州。口人立廟羅池。）

雪詩云。千山鳥飛絕。萬徑人蹤滅。孤舟蓑笠翁。獨釣寒江雪。（視鄭答亂飄僧舍之句。不侔矣。東坡居士云。）

子厚死三年。愚溪無復曩時矣。劉夢得聞之賦三絕云。溪水悠悠春自來。草堂無主燕飛迴。隔簾惟見中庭草。一樹山榴依舊開。（其一）

草聖數行留壤壁。木奴千樹屬鄰家。唯見里門通德榜。殘陽寂寞出樵車。（其二）
柳門竹巷依依在。野草青苔日日多。縱有鄰人解吹笛。山陽舊侶更誰過。（其三）

吳武陵

貢院樓北新栽小松詩云。拂檻愛貞客。移根自遠峯。已從芳草沒。終不任苔封。葉小初臨雪。鱗生欲狀龍。承春濯雨露。得地近垣墉。遂吹風微動。含煙色漸濃。時迴日月照。爲謝小山松。
武陵有文而強扞。嘗爲韶州刺史。賊罪狼籍。勅令廣州幕吏鞠之。科第少年。殊不假貸。持之頗急。武陵不勝其忿。題詩路左佛廟曰。雀兒來逐颺風高。下視鷹鷂意氣豪。自謂能生千里翼。黃昏依舊委蓬蒿。

尋貶潘州司戶卒。時大和八年也。（或云李渤爲桂管觀察。吳爲副。因宴大醉。渤命銜棧米蘭泉之。明日乃悟其太過。釋之。故武陵詩云。）

武陵信州人。爲大學博士。大和初。薦杜牧於崔郾。枚第五人登第。初李愬節度唐鄧。武陵薦李景儉。王湘。健。智。沈。敏。可。表。以。自。副。時。號。知。人。

邵真

尋人偶題云。日口不復午。落花難歸樹。人生能幾何。莫厭相逢遇。

眞爲李寶臣成德軍掌書記。後從李惟岳之叛。與田悅李正己拒命。眞諫之。惟岳寤。使眞作奏。復爲將之所沮。德宗詔張孝忠朱滔合兵討。大敗之。悅嬰城。惟岳召眞議歸順。悅遣扈岌來責惟岳。且欲斬眞。

惟岳懼。斬眞以謝焉。其後王武俊表其忠。贈戶部尙書。

崔膺

感興云。富貴難義合。困窮易感恩。古來忠烈士。多出貧賤門。世上桃李樹。但結繁華子。白屋抱關人。青雲壯心死。本以勢利交。勢盡交情已。如何失情後。始歎門易軌。

膺。博陵人。性狂。少長於外家。不齒。及長能文。作道傍孤兒歌。以諷外家。張建封愛其才。以爲客。夜中大叫驚軍。衆欲食其肉。建封藏之。明日置宴。監軍曰。某有請。請崔膺。建封曰。如約。遂巡。建封又曰。某亦有請。却請崔膺。坐中皆笑。乃獲免。膺賦別佳人云。壠上流泉壠下分。斷腸嗚咽不堪聞。常娥一入月中去。巫峽千秋空白雲。（或云崔涯詩。）

李涉醉中贈膺詩云。與君兄弟斤嶺故。與君相逢楊子渡。白浪南分吳塞雲。綠楊西入隋宮路。隋家文物今雖改。舞館歌臺尙基在。煬帝陵邊草木深。汴河流水空歸海。今古悠悠人自別。此地繁華人未識。大道青樓夾翠煙。瓊幄綉帳開明月。與君一言兩相許。外捨形骸中爾汝。

楊州歌酒不可追。洛神映箔湘妃語。白馬黃金爲身置。誰能獨美他人醉。暫到香爐一夕間。能展愁眉百年事。君看白日光如箭。一度別來顏色變。早謀侯印佩腰間。莫遣看花鬢如髮。

衛象

古詞云。鵠血凋弓濕未乾。鷓鴣新染劍花寒。遼東老將鬢成雪。猶向旄頭夜夜看。
傷李端云。才子浮生促。泉臺此路賒。官卑揚執戟。年少賈長沙。人去門接鷓。災成酒誤蛇。唯余封禪草。留在茂陵家。

段成式云。大曆末禪師元鑒住荊州陟岵寺道。高有風韻。人不可得。而親張燥。嘗畫松於齋壁。符載贊之。象詠之時。號三絕。悉加嗟焉。人問之曰。無事疥吾壁也。其徒有死物命者。弗之責。有高行者。亦不稱。或怪之。乃題詩於竹曰。大海從魚躍。長空任鳥飛。乃知象大曆間江陵詩人也。

李宣遠

并州路作云。秋日并州路。黃榆落照間。孤城吹角罷。數騎射鵬還。帳幕遙臨水。牛羊自下山。征人正垂淚。烽火起雲間。

近無西耗云。遠戎兵壓境。遷客淚橫襟。烽候驚秦塞。囚居困越吟。自憐牛馬走。未識犬羊

心一月無消息。西看日又沉。

宣遠正元進士登第。

熊儒登

至日荷李常侍過郊居云。賤子守柴荆。誰人記姓名。風雲千騎降。草木一陽生。禮異江河動。歡殊里巷驚。稱觴容侍坐。看竹許同行。遇覺滄溟淺。恩疑太嶽輕。盡搜天地物。無諭此時情。和賈中丞歲酒喜見小男兩歲云。更添十歲應爲相。歲酒從今把未休。聞得一毛添五色。眼看相逐鳳池頭。

劉夢得送湘陽熊判官儒登府罷歸鍾陵。因寄江西裴中丞詩云。射策志未就。從事府云。除篋留馬卿。賦袖有劉引書。忽見夏木陰。恨然憶吾廬。復持州民刺。歸謁專城居。

樂天洪州逢儒登詩云。靖安院裏新羹下。醉笑狂吟氣最麤。莫問別來多少苦。低頭看取白髭鬚。

儒登鍾陵人。登進士第。終於藩鎮從事。

崔立之

南至隔仗望含元殿香爐詩云。千官望長至。萬國拜含元。隔仗爐光出。浮霜煙氣翻。飄飄

禁內殿漠漠澹前軒。聖日開如捧，卿雲近欲渾。輪囷酒宮闕，蕭索散乾坤。願倚天風使，披香奉至尊。

退之贈崔立之評事詩云：崔侯文章若敏捷，高浪駕天輸不盡。曾從關外來上郡，隨身卷軸車連軫。朝爲百賦猶鬱怒，暮作千詩轉逾緊。詩意殊憫其窮。

立之登正元進士第。

郭遵

南至日隔仗望含元殿香爐詩云：冕旒親負屐，卉服盡朝天。鳴谷移初日，金爐出御煙。芬馨流遠近，散漫入貂蟬。霜仗凝餘白，朱欄映轉鮮。如看浮闕在，稍覺逐風遷。爲沐皇家慶，來瞻羽衛前。

遵登正元進士第。

韋紆

南至日隔仗望含元殿香爐云：抗殿疏元首，高高接上玄。節當南至日，星是北辰天。寶戟羅仙仗，金爐引瑞煙。霏微雙闕麗，溶洩九州連。拂曙祥光滿，分晴曉色鮮。一陽今在曆，生植願陶甄。紆正元進士也。

唐詩紀事卷第四十三終

唐詩紀事卷第四十四

王建（宮詞一百首）

蓬萊正殿體金鼈。紅日初生碧海濤。開着五門遙北望。柘黃新帕御床高。
殿前傳點各依班。召對西來八詔蠻。上得青花龍尾道。側身偷覲正南山。
龍燵日氣紫瞳瞳。宣政門當玉殿風。五刻閣前卿相出。下簾身在半天中。
白玉窗中起草臣。櫻桃初出賜嘗新。殿頭傳語金階遠。因進詞來謝聖人。
內人對御疊花牋。綉坐移來玉案邊。紅蠟燭前呈草本。平明昇出閣門宣。
千牛仗下放朝初。玉案傍邊立起居。每日請來金鳳紙。殿頭無事不教書。
延英引對碧衣郎。江硯宣毫各別床。天子下簾親考試。宮人手裏過茶湯。（此詩亦云元

稹作）

朱明開着九重關。金畫黃龍五色幡。直到銀床排仗合。聖人三殿對西番。
少年天子愛邊功。親到凌煙畫閣中。教覓勳臣口圖本。長教殿裏作屏風。
丹鳳樓門把火開。先排法駕出蓬萊。棚前走馬人傳語。天子南郊一宿迴。

樓前立仗看宣赦。萬歲聲長再拜齊。日照綵盤高百尺。飛仙爭上取金甊。
集賢殿裏圖書滿。點勘頭邊御印同。真跡進來依字數。別收鎖在玉函中。
秋殿清齋刻漏長。紫微宮女夜焚香。拜陵日到公卿發。鹵簿分頭入太常。
新調白馬怕鞭聲。供奉騎來遶殿行。爲報諸王侵早起。隔門催進打毬名。
對御難爭第一籌。殿前不打背身毬。內人唱好龜茲急。天子龍輿過玉樓。
新衫一樣殿頭黃。銀帶排方獺尾長。拗把金鞭騎御馬。綠纓紅額麝煙香。
羅衫葉葉綉重重。金鳳銀鵝各一葉。每遍舞頭分兩向。太平萬歲字當中。
魚藻宮中鎖翠娥。先皇行處不曾過。如今池底休鋪錦。菱角鴟頭積漸多。
殿前明日和節。連夜瓊林散舞衣。傳報所司供蠟燭。監門金鎖放入歸。
五更五點索金車。盡放宮人出看花。仗下一時催立馬。殿頭先報內園家。
城東南北望雲樓。半下珠簾半上鉤。騎馬行人長遠過。忽防天子在樓頭。
射生宮女宿紅粧。請得新弓各自張。臨上馬時齊賜酒。男兒跪拜謝君王。
新秋白兔大於拳。紅耳霜毛趁草眠。天子不教人射煞。玉鞭遮到馬蹄前。
內人籠脫解紅綰。戴勝爭飛出手高。直到碧雲還却下一雙金爪菊花毛。

鏡渡舡頭掉綵旗。兩邊泥水濕羅衣。池東爭向池西岸。先到先書上字歸。
燈前飛入玉階虫。未臥嘗聞半夜鐘。看着中元齋日到。白盤金線綉真容。
步行送出長門遠。不許來辭舊院花。只恐他時身到此。乞來自在得還家。
一時起立吹蕭管。得寵人來滿殿迎。整頓衣裳皆着節。舞頭當拍第三聲。
琵琶先抹六么頭。小管丁寧側調愁。半夜美人雙起唱。一聲聲出鳳凰樓。
在池日暖少風波。花裏牽舡水上歌。遙索劍南新樣錦。東宮先釣得魚多。
十三初學擘箏篋。弟子名中被點留。昨日教坊新進入。並房宮女與梳頭。
紅蠻捍撥帖胸前。移坐當頭近御筵。用力獨彈金殿響。鳳凰飛出四條絃。
春風吹曲信旗竿。自得深宮不怕寒。誇道自家先上馬。團中橫過覓人看。
粟金腰帶象牙錐。插散紅翎玉窠支。旋獵一邊還引馬。歸來花鴨遶鞍垂。
雲駮月驄各試行。一般毛色一般纓。殿前來往重騎過。欲得天恩別賜名。
每夜停燈熨御衣。銀燠籠底火霏霏。遙聽帳裏君王覺。上直聲鍾始得歸。
因喫櫻桃病故歸。三年着破舊羅衣。內中侍從來還去。結得金花上貴妃。
欲迎天子看花去。下得金塔却悔行。恐見失恩人舊院。迴來憶着五絃聲。

住來舊院不堪修。近敕宣徽別起樓。聞有美人新入內。宮中未識大家愁。
自誇歌舞勝諸人。恨未承恩出內頻。連夜宮中修理院。地衣簾額一時新。
悶來無處可思量。旋下金塔旋下床。收得山丹紅藥粉。牕中洗却麝香黃。
嫌羅不着索輕繡。對面交人染褪紅。衫子成來一遍出。今朝看處滿園中。
合暗報來門鎖子。夜深應別喚笙歌。房中下着珠簾睡。月過金塔白露多。
御廚下食索時新。每見花開卽苦春。白日臥多嬌似病。隔簾教喚女醫人。
葉葉洗手邊金盆。旋拭紅巾入殿門。衆裏遙拋金橘子。在前收得便承恩。
御波水色春來好。處處分流白玉渠。密奏君王知入月。喚人相伴洗裙裾。
移來女樂部頭邊。新賜花檀大五絃。縱得紅羅手帕子。當心香畫一雙蟬。
新晴草色暖溫暾。山雪初消漸出渾。今日踏青歸校晚。傳聲問著苑東門。
兩簾新換珠簾額。中尉明朝設內家。一樣金盤五千箇。紅蘇點出牡丹花。
舞送香迷出內家。記巡傳把一枝花。散時各自燒紅燭。相逐行歸不上車。
家常愛著舊衣裳。空戴紅梳不作粧。忽把下塔衣帶解。非時應得見君王。
宣勅教歌不出房。一聲一遍報君王。再三博士留殘拍。索向宣徽作徽章。

行中第一頭先舞。博士傍遊亦被欺。忽覺管絃偷急遍。翩翩羅袖不教知。
同黃縫校捨釵梳。欲得金仙觀內居。近被天恩知識字。收來按上檢文書。
月冷江清近臘時。玉塔金瓦雪澌澌。浴堂門外抄名入。公主家人謝而脂。
未承恩澤一家愁。乍到宮中憶外頭。求首管絃聲歎逐。側商調裏唱伊州。
東風潑潑雨新休。口盡春風蕩雪溝。走馬犢車當御路。漢陽公主進雞毬。
風簾水閣壓芙蓉。四面拘欄在水中。避熱不歸金殿宿。秋河織女夜燈紅。
聖人生日明朝是。私地先須屬內盛。自寫金花紅榜子。前頭先進鳳凰衫。
避脫昭儀不擲盧。井邊含水噴鷓鴣。內中數日無呼喚。寫得滕王蛟蝶圖。
內宴初秋入二更。殿前燈火一天明。宮官分半音聲住。諸院門開觸處行。
玉蟬金堂三層插。翠髻高鬟綠鬢虛。舞處春風吹落地。歸來別賜一頭梳。
樹葉初成鳥出窠。石榴花裏笑聲多。舞中遺却金釵子。拾得從他要賞羅。
小殿新裝粉欲乾。貴妃姊妹盡來看。爲逢好日先移入。續向街西索牡丹。
內人相續報花開。准擬君王使看來。縫着五絃琴綉袋。宜春院裏按歌迴。
巡吹遍口不相和。暗看誰人曲校多。明日梨花園裏見。先須逐得內家歌。

黃金合裏盛紅雪。重結香羅四出花。一一傍邊書勅字。分明送與大臣家。
未明東上閣門開。排仗聲從後殿來。阿監兩邊相對立。遙聞索馬一時迴。
宮人早起笑相呼。不識塔前掃地夫。乞與金錢爭借問。外頭還似此間無。
小隨阿姊學吹笙。好見君王乞與名。夜掃玉床朝把鏡。黃金塔下不教行。
日高殿裏有香煙。萬歲聲來動九天。妃子院中初降誕。內人爭乞洗兒錢。
宮花不共外邊同。正月長生一朵紅。供御櫻桃看守別。直無鷓鴣在園中。
殿前鋪設兩邊樓。寒食宮人步打毬。一半走來爭跪拜。上朋先謝得頭籌。
大儀前日暖房來。囑和昭陽乞藥枝。勅賜一窠紅躑躅。謝恩未了奏花開。
床前謝賜紫羅襦。不下金塔上軟輿。官局揔來爲喜樂。院中新拜內尙書。
鸚鵡誰教轉舌關。內人手裏養來姦。語多近更承恩澤。數對君王憶隴山。
分明閑坐賭櫻桃。休却投壺玉腕勞。各把沉香雙陸子。局中鬥得壘高高。
禁寺紅樓內裏通。笙歌引駕夾城中。裏頭官監當前立。手把牙鞘竹彈弓。
春風院院落花堆。金鎖衣生掣不開。更築歌臺起粧殿。明朝先進畫圖來。
舞來汗濕羅衣徹。樓上人扶下玉梯。歸到院中重洗面。金盆水裏撥紅泥。

宿粧殘粉未明天。櫻在朝陽花樹邊。寒食內人長自打。庫中先散與金錢。
衆中愛得君王笑。偷把金箱筆硯開。書破紅蠻隔子上。旋催當內美人來。
後宮宮女無多少。起得園中笑一團。舞蝶落花相看着。春風共語亦應難。
黛眉小婦研裙長。總被抄名入教坊。春設殿前多隊舞。明頭各別請衣裳。
水中芹葉土中花。拾得還將避衆家。揔待別人般數盡。袖中捻得鬱金牙。
玉簫改調移纖指。催赴紅羅綉舞筵。未着柘枝花帽子。兩行宮監在簾前。
牕牖戶戶院相當。揔有珠簾玳瑁床。雖道君王不來宿。帳中長是炷衙香。
銀燭秋光冷畫屏。輕羅小扇撲飛螢。天階夜色涼如水。臥看牽牛織女星。
雨入珠簾滿殿涼。避風新出石盆湯。內人恐要秋衣着。不住熏籠換好香。
金吾除夜進讎名。畫袴朱衣四隊行。院院燒燈如白日。沉香火底坐吹笙。
樹頭樹底覓殘紅。一片西飛一片東。自是桃花貪結子。錯教人恨五更風。
金殿當頭紫閣重。仙人掌上玉芙蓉。太平天子朝迎日。五色雲車駕六龍。
日晚長秋簾外報。望陵歌舞在明朝。添爐欲藝熏衣麝。憶得分時不忍燒。
日映西陵松柏枝。下臺相顧一相悲。朝來樂部歌新曲。唱着君王自作詞。

淚盡羅巾夢不成。夜深前殿按歌聲。紅顏未老恩先斷。斜倚熏籠坐到明。
新鷹初放兔方肥。白日君王在內稀。薄暮千門臨欲鎖。紅旌飛騎向前歸。
黃金捍撥紫檀槽。絃索初張調更高。盡理昨來新上曲。內官籬外送櫻桃。
鴛鴦瓦上忽然驚。晝寢宮娥夢裏聲。元是吾皇金彈子。流棠窠下打流鶯。
寶仗平明金殿開。暫將絢扇共徘徊。玉顏不及寒鴛色。猶帶昭陽日影來。
閑吹玉殿昭華管。醉打梨園繆蒂花。千年一夢歸人世。絳縷猶封紫臂紗。

建初爲渭南尉。值內官王樞密者。盡宗人之分。然彼我不均。復懷輕謗之色。忽過飲語。及漢元靈信任中官。起黨錮興廢之事。樞密深憾其譏。乃曰。吾弟所有宮詞。天下皆誦於口。禁掖深邃。何以知之。建不能對。後爲詩以贈之。乃脫其禍。建詩曰。先朝行坐錯相隨。今上春宮見長時。脫下御衣偏得着。進來龍馬每交騎。當承密旨還家少。獨對邊情出殿遲。不是當家頻向說。九重爭遣外人知。

上李庶子云。紫煙樓閣碧沙亭。上界詩仙獨自行。奇險驅回還寂寞。雲山經用始鮮明。藕綃紋縷裁來滑。鏡水波濤滌得清。昏思願因秋露洗。幸容階底禮先生。建赴陝州司馬。樂天夢得以詩送之。夢得詩云。暫輟清嚴出太常。空攜詩卷赴甘棠。府公既有朝中舊。司馬應容酒後

狂案牘來時唯署字。風煙入興使成章。兩京大道多遊客。每遇詞人戰一場。樂天詩云。陝州司馬去何如。養靜資貧兩有餘。公事閑忙同少尹。俸錢多少敵尙書。只攜美酒閑爲伴。惟作新詩趁下車。自有鐵牛無詠者。計君投刃必應虛。

張籍贈建詩云。早在山東聲價遠。曾將順策佐嫵姚。識來詩句無閑語。老去官班未在朝。身屈只聞詞客說。居貧多見野僧招。獨從詩閣歸來晚。春水橋邊看柳條。

建大曆進士。爲昭應丞。太府寺丞。終於司馬。建在昭陽楊巨源寄詩曰。武皇金輅帳香塵。每歲朝元及此辰。光動泉心初浴日。氣蒸山腹摠成春。謳歌日入雲韶曲。詞賦方歸侍從臣。瑞鶴朝朝猶望幸。天教赤縣有詩人。

唐詩紀事卷第四十五

朱灣

王良會

柳公綽

張正壹

徐放

崔備

蘇郁

胡幽貞

張儼

杜顥

韋丹

鄭俞

杜元穎

吳丹

鄭餘慶

趙宗儒

周弘亮

王播

周匡物

許玫

張碧

朱灣

壁畫古松詩云。石上盤古根。謂言天生朽。安知草木性。變在畫師手。陰深方丈間。真趣幽且閒。本文離披勢搓掉。中裂空心火燒出。掃成三寸五寸枝。便作千年萬年物。莓苔濃淡意不同。一半死皮藏蠹蟲。風霜未必來到此。氣色杳似寒山中。孤標可翫不可取。能使支公道場古。平陵寓君再逢寒食云。幾迴江上泣途窮。每遇良辰歎轉蓬。火燧知從新節變。灰心還與故人同。莫聽黃鳥啼愁處。自有花開向客中。貧病固應無撓事。但將懷抱醉春風。

逼寒節寄崔七云。閑庭只是長莓苔。三徑曾無車馬來。旅館尙愁寒食口。羈心嬾向不燃灰。門前下客雖彈鋏。溪畔窮魚且曝腮。他日趨庭因問禮。須言陋巷有顏回。

九日登青山云。昔人惆悵地。繫馬又登臨。舊處煙霞在。多時草木深。水將空台色。雲共我無心。想見龍山會。良辰亦似今。

灣別湖州崔使君侃書云。灣聞蓬萊之山。藏杳冥而可到。驪龍之珠。潛瀟灑而可識。貴人之顏。無因而前。不可識。灣自假道路。問津主人。一身孤雲。兩度圓月。凡再請職事。三趨戟門。門人謂灣曰。子私來耶。公來耶。若言公。僕實非公。若言私。公庭無私。以茲交戰。彷徨于今。信知庭之與堂。不啻千里。况寄食漂母。夜眠漁舟。門如龍而難登。食如玉而難得。如龍之門。轉深如玉之粟。轉貴。實無機心。讎成機事。漢陰丈人。聞之豈不大笑。屬谿上風使。囊中金貧。望甘棠而歎。自引分而退也。

高仲武云。朱灣率履正素。放情江湖。郡國交辟。潛耀不起。有唐高人也。詩體幽遠。興用洪深。因詞寫意。窮理盡性。於詠物尤工。如受氣何曾異。開花獨自遲。所謂哀而不傷。國風之深者也。

灣爲李勉永平從事。灣秋夜燕王郎中宅賦得露中菊云。衆芳春競發。寒菊露偏滋。受氣

何曾異。開花獨自遲。晚成猶有分。欲採未過時。忍棄東籬下。看隨秋草衰。

賦得白鶴翔翠微。送陳偃下第云。不知鷗與鶴。天畔弄晴暉。背日分明見。臨川相映微。淨中雲一點。迴去雪孤飛。正好南枝住。翩翮何所依。

長安喜雪云。千門萬戶雪花浮。點點無聲落瓦溝。全似玉塵消更積。半成冰片結還流。光含曉色清天苑。輕逐微風遶御樓。平地已霑盈尺潤。年豐須荷富人侯。

右三詩韋莊取爲又元集

王良會

武元衡鎮西蜀。有中秋夜錦樓望月詩云。玉輪初滿空。迥出錦城東。相向秦樓境。分飛碣石鴻。桂香隨窈窕。珠綴隔玲瓏。不及前秋見。團圓鳳沼中。

良會和云。德星搖此夜。珥月滿重城。杏靄煙氣色。飄颻砧杵聲。令行秋氣爽。樂感素風輕。共賞千年聖。長歌四海清。(得清字)

良會以內侍省。內侍省爲監軍使。

柳公緯

和錦樓翫月詩云。此夜年年月。偏宜此地逢。近看江水淺。遙辨雪山重。萬井金花肅。千林

玉露濃不唯樓上思。飛蓋亦陪從。(得濃字)

公綽表度同爲西蜀武元衡判官。綽先入爲吏部郎中。度有詩曰。兩人同日事征西。今日君先奉紫泥。

公綽字寬。京兆人。時爲西川營田副使。兼少尹。後終於刑部尙書。取士如許康佐。崔與。李拭。韋長。皆知名貴顯云。

張正壹

和錦樓翫月詩云。高秋今夜月。皓色正蒼蒼。遠水澄如練。孤鴻迴帶霜。旅人方積思。繁宿稍沉光。朱檻叨陪賞。尤宜清漏長。(得蒼字)

正壹時爲西川觀警判官。

正壹德宗末年爲左補闕。以上書召見王叔文之黨。疑正壹言已陰事。令韋執誼反譖於上。乃與所善王仲舒。劉伯芻。皆坐遠貶。

徐放

和錦樓翫月詩云。玉露中秋夜。金波碧落開。鵲驚初泛濫。鴻思共徘徊。遠目清元徧。高空爽氣來。此時陪永望。更得上燕臺。

放字達夫。元衡西川從事。元和九年爲衢州刺史。見退之徐偃王廟碑。

崔備（得前字秋字二篇）

和錦樓翫月詩云。清景同千里。寒光盡一年。竟天多鴈過。通夕少人眠。照別江樓上。添愁野帳前。隋侯恩未報。猶有夜珠圓。

又云。四時皆有月。一夜獨當秋。照曜初含露。徘徊正滿樓。遙連雪山淨。迥入錦江流。願以清光末。年年許從游。

備時爲西川度支判官。

備使院憶山中道侶兼懷李約云。松竹去名嶽。衡茅思舊居。山君水上印。天女月中書。舊秩芸香在。空盃藥氣餘。褐衣寬易攬。白髮少難梳。病柳傷摧折。殘花惜掃除。憶巢同倦鳥。避網甚跳魚。阮巷慙交絕。商畛愧跡疎。與君非宦侶。何日共樵漁。

清溪路中寄諸公云。偏郡隔雲岑。迴溪路更深。少留攀桂樹。長渴望梅林。野筍資公膳。山花慰客心。別來無信息。可謂井瓶沉。

備登建中進士第。終工部郎中。（備僞兄弟）

元衡中秋夜聽歌聯句。此夕來奔月。何時去上天。（備）雲鬢方自照。玉腕更呈鮮。（度）

嫵婉人問意。飄飄物外緣。（公綽上相公）詩裁明月扇。歌索想夫憐。（元衡奉虛侍御）暗染口香久。長隨楚夢偏。（放）會當來彩鳳。髣髴逐神仙。（土政）

元衡在蜀。淡於接物。而開府極一時選。公綽爲少尹。正壹觀警判官。備度支判官。裴度掌書記。盧士玫觀警推官。楊嗣復節度推官。

蘇郁

鸚鵡詞云。莫把金籠閉鸚鵡。箇箇分明解人語。忽然更向君前語。三十六宮愁幾許。和戎詩云。關月夜懸青塚鏡。寒雲秋薄漢宮羅。君王莫信和親策。生得胡鵝轉更多。

郁正元元和間詩人。十二樓藏玉堞中。鳳凰雙宿碧芙蓉。流霞淺酌誰同醉。今夜笙歌弟幾重。（步虛詞）吟倚雨殘樹。月收山下村。（句）

右張爲取作主客圖。

胡幽貞

題西施浣沙石云。一朝入紫宮。萬古遺芳塵。至今溪邊花。不敢嬌青春。

歸四明詩云。海色連四明。仙舟去容易。天籍豈輒問。不是卑朝士。

張爲取二詩作主客圖。

張儼

貞元八年十二月謁先生廟絕句三首其一云仗順繼皇業并吞勢由己天命屈雄圖誰歌大風起其二得股肱賢明能以奇用兵何事傷客情何人歸帝京其三雄名垂竹帛荒陵壓阡陌終古更何聞悲風入松柏

杜顥

故絳行云君不見銅鞮觀數里城池已蕪漫君不見柝櫺宮幾重臺榭亦微蒙介馬兵車全盛時歌童舞女妖豔姿一代繁華皆其絕九原唯望塚壘纍

韋丹

江西韋大夫丹與東林靈澈上人爲忘形之契丹嘗爲思歸絕句以寄澈公云王事紛紛無暇日浮生冉冉只如雲已爲平子歸休計五老富前必共聞澈奉酬詩曰年老身閑無外事麻衣草坐亦容身相逢盡道休官去林下何曾見一人

丹字分明京兆人幼孤從外祖顏真卿元和中守江西功第一

鄭俞

玉水記方流詩云積水棋風動因知玉德幽如天含素色倅地引方流潛潤滋雲起焚華

射浪浮魚龍水不夜。草木岸無秋。壁沼甯堪比。瑤池詎可儔。若非懸坐側。猶得冀冥搜。

俞登正元十六年進士第。杜元穎。吳丹。白樂天。皆同年登科。樂天爲河南尹。俞始受長水縣令。樂天四雖吟云。命雖薄。猶勝於鄭長水。

杜元穎

玉水記方流詩云。重泉生美玉。積水異常流。始玩清堪賞。因知寶可求。斗回清氣見。馨折折紫花浮。中矩皆明德。同方叶至柔。月華偏共映。風韻喚將遊。遇鑿終無暗。逢時願見收。

元穎。淹之孫也。正元末。登第。敏文辭。憲宗時所賞。穆宗立。拜中書舍人。不閱歲。至宰相。再期鎮蜀。敬宗驕僻。元穎哀歛。上供削軍食。遂啓南詔之寇。斥爲循州司馬。死貶所。在蜀時。官屬崔璜。訖于衆廬。并奪秩分。遂之。

吳丹

玉水記方流詩云。玉泉何處記。四折水紋浮。淵下不逾矩。居方在上流。映空虛漾漾。涵日靜悠悠。影碎疑衝斗。光清耐觸舟。珪璋分辨狀。砂礫共懷愁。願獻朝賓海。縈迴入御溝。

樂天花前嘆云。前歲花前五十二。今歲花前五十五。歲課年功頭髮知。從霜成雪君看取。幾人得老莫自嫌。樊李吳韋盡成土。注云。樊絳州宗師。李諫議景儉。吳饒州丹。韋侍郎顥。皆舊

往還相次喪逝。

丹字真存。登第。歷職至鎮州宣慰副使。夔使尙書郎。卒于饒州。葬於常州。樂天爲誌。

應餘慶

知黃門相公過石門洞云。紫氛隨馬處。黃閣駐車情。嵌壑驚山勢。洲灘戀水深。地分三蜀限。關志百牢名。琬琰燦酬卹。徽言鼎餽情。（黃門武元衡也。）

餘慶字居業。滎陽人。善屬文。嚴震帥山南西道。奏置幕府。正元末。爲相。憲宗立。再相。出鎮山南西道。穆宗立。加檢校司徒。卒。

趙宗儒

宗儒字秉文。鄧州人。父驥。有文名。宗儒爲翰林學士。驥改祕書少監。父子並命。驥少與殷寅。顏真卿。柳芳。陸據。蕭穎士。李華。邵軫。善。時語曰。殷顏柳陸李蕭邵趙。謂皆全交也。宗儒正元十二年爲相。以文學歷將相位。任崇劇。然無儀矩。以治生瑣碎失名。和黃門相公詔還題石門洞云。益部恩輝降。同榮漢相還。韶芳滿歸路。軒騎出重關。望日朝天闕。披雲過蜀山。更題風雅韻。求絕翠富間。（黃門武元衡也。）

周弘亮

除夜書情詩云。何處風塵歲。雲陽古驛前。三冬不再稔。曉日又明年。春入江南柳。寒歸塞北天。還傷知候客。花景對韋編。

故鄉除夜詩云。三百六十日云終。故鄉還與異鄉同。非唯律變情堪恨。抑亦才疎命未通。何處夜歌銷臘酒。誰家高燭候春風。詩成始欲吟將看。早是去年牽課中。

弘亮登正元進士第。

王播

王播少孤貧。嘗客揚州惠照寺。木蘭院。隨僧齋飧。僧厭怠。乃齋罷而後擊鍾。後二紀。播自重位出。鍾是邦。因訪舊遊。向之題名。皆以碧紗幕其詩。播繼以二絕句曰。三十年前此院遊。木蘭花發院新修。如今再到經行處。樹老無花僧白頭。上堂已了各西東。慙愧閣梨飯後鍾。三十年來塵撲面。而今始得碧紗籠。(出摭言也。)

播字明敏。父恕。家揚州。播正元中。與弟炎起。皆有名。穆宗立爲相。居位無所裨益。復失河北。衆望不厭。乃出爲淮南節度。大和初。復輔政。時韋處厚以獻替自任。而播專以錢穀進。不甚與事。居位四年卒。

播爲淮南節度使。遊故居感舊詩云。昔年獻賦去江湄。今日行春到却悲。三逕僅存新竹

樹四鄰。惟見舊孫兒。壁間潛認偷光處。川上甯忘結網時。更見橋邊記名姓。始知題柱免人嗤。
李德裕和云。千騎風生大旆舒。春江重訪武侯廬。其提龜印銜新授。同憶鱸庭是故居。取履橋邊啼鳥換。釣璜溪畔野花疎。今來却笑臨印客。入蜀空馳使者車。

周匡物

匡物字幾本。潭州人。元和十一年。李逢吉下進士及第。時以歌詩著名。家貧。徒步應舉。至錢塘。乏餼。舡之資。久不得濟。乃題詩公館云。萬里茫茫天曠遙。秦皇底事不安橋。錢塘江口無錢過。又阻西陵兩信潮。郡牧見之。乃罪津吏。

及第後謝座主云。一從東越入西秦。十度聞鷺不見春。試向崑山投瓦礫。使容靈沼洗埃塵。悲歡暗負風雲力。感激潛生木植身。中夜自將形影語。古來吞炭是何人。

許玫

題鴈塔云。寶輪金地壓人寰。獨坐蒼鶯啓玉關。北嶺風煙開魏闕。南軒氣象鎖商山。瀟陵車馬垂楊裏。京國城池落照間。整放塵心遊物外。六街鍾鼓又催還。

玫。大和元年登第。其兄弟瑄。璿。皆高科。

張碧

秋日登岳陽樓晴望云。三秋倚練飛金盞。洞庭波定平如剗。天高雲卷綠羅低。一點君山礙人眼。漫漫萬頃鋪琉璃。煙波闊遠無鳥飛。西南東北競無際。直疑海斷青天涯。屈原回日牽愁吟。龍宮感激致應沉。賈生憔悴說不得。茫茫煙靄堆湖心。又云。范蠡帆張一掌風。無人來往繼其中。

鴻溝云。毒龍銜日天地昏。八紘變黓生愁雲。秦原走鹿無藏處。紛紛爭處蜂成羣。四溟波立鯨相吞。蕩搖五岳崩山根。魚蝦舞浪狂鯨鯢。龍蛇胆戰登鴻門。星旗羽鏃強者尊。黑風白雨東西屯。山河欲折人煙分。壯士鼓勇君王存。項莊憤氣吐不得。亞父斟聲天上聞。玉光墮地驚崑崙。留侯氣魂吞太華。吾頭一寸生陽春。神農女媧愁不言。蛇枯老媪啼泪痕。星曹定秤秤王孫。項籍骨輕迷精魂。沛公仰面爭乾坤。須臾垓下賊星起。歌聲繚繞悽人耳。吳娃捧酒橫秋波。霜天月照空城壘。力拔山兮呼到此。騷嘶懼渡烏江水。新豐瑞色在樓臺。西楚寒蒿哭愁鬼。三尺霜鳴金匣裏。神光一口八千里。漢皇驟馬意氣生。西南掃地迎天子。

美人梳頭云。玉堂花院小枝紅。綠窗一片春光曉。玉容驚覺濃睡醒。圓蟾桂出妝臺表。金盤解下叢鬢碎。三尺巫雲縮朝翠。皓指高低寸黛愁。水精梳滑參差墜。須臾攏掠蟬鬢生。玉釵冷透冬冰明。芙蓉拆向新開臉。秋泉慢轉眸波橫。鸚鵡偷來話心曲。屏風半倚遙山綠。

題祖山人池上怪石云。寒姿數片奇突兀。曾作秋江秋水骨。先生應是厭風雲。著向江邊塞龍窟。我來池上傾酒罇。半酣書破青煙痕。參差翠縷擺不落。筆頭驚怪粘秋雲。我聞吳中顧容水墨有高價。邀得將來倚松下。鋪却靈繒直道難。掉首空歸不成畫。

孟東野讀張碧集詩云。天寶太白沒。六義已消歇。大哉國風本。喪而王澤竭。先生今復生。斯文信難缺。下筆證興亡。陳辭備風骨。高秋數奏琴。澄潭一輪月。誰作探詩官。忍之不揮發。

碧字大碧。正元中人。自序其詩云。碧嘗讀李長吉集。謂春拆紅翠。霹開塾戶。其奇峭者不可攻也。及覽李太白詞。天與俱高。青且無際。鵬觸巨海。瀾濤怒讎。則觀長吉之篇。若陟嵩之巔。視諸阜者耶。余嘗銳志狂勇心魄。恨不得攤文陣以交鋒。視拔戟挾轉而口矣。

唐詩紀事卷第四十六

劉言史

劉猛

李餘

李涉

劉昭禹

孫昌胤

嚴休復

朱慶餘

劉軻

獨孤欽

張燦

楊虞卿

楊汝士

張志和

劉言史

竹裏梅云。竹裏梅花相並枝。梅花正發竹枝垂。風吹總向竹枝上。直似王家雪下時。

春過趙墟有作云。下馬邯鄲陌頭。寂寞崩墜臨車轍。古柏重生枝亦乾。餘添見風幽。滅白蒿微口紫。權新行人感此復悲春。

初下東周贈孟郊云。鶴老其更工。龜死殼亦靈。正信非外沔。終始全本情。童子不戲鹿。積書就富局。身著木葉衣。養鹿兼犂耕。偶隨下山雲。在苒失故程。漸入機險中。危思難秦行。十髮九縷絲。悠然東周城。言詞野麋態。出口多累刑。因依漢元寮。似繹細輕冷。龜助新熱靜。枯與寒聲清。斷蓬在門欄。豈當桃李榮。寄食若蠹虫。侵損利微生。固非拙爲強。懦劣寂療并。素堅冰蘖。

心潔立保賢貞。修文返正風。刊字齊古經。慚將囊末分。高樓喧世名。

過春秋峽云。峭壁蒼蒼苔色新。無風晴景白勝春。不知何樹幽崖裏。臘月開花似北人。

長門怨云。獨坐爐邊結夜愁。暫時思去亦難收。手持金筯垂紅淚。亂撥寒灰不舉頭。

樂府新詞云。花顏鬚髮一何偏。綠槐香陌欲朝天。仍嫌衆裏嬌行疾。傍鏡深藏白玉鞭。

噴沫團香小桂條。玉鞭兼賜霍嫖姚。弄影便從天禁出。碧蹄聲碎五門橋。

廣州王園寺伏日卽事寄北中親友云。南越逢初伏。東林度一朝。曲池煎畏景。高閣絕微颺。竹簾移先灑。蒲葵破復搖。地偏毛瘴近。山毒火威饒。寢汗絺如濯。親床枕並燒。墮枝傷翠羽。萎葉惜紅蕉。且因流金熾。難成獨酌謠。望霖窺潤礎。思吹候生條。旅恨生烏澗。鄉心繫洛橋。誰憐在炎客。一夕壯容銷。

言史與孟東野友善。詩中有貝州召郊之作。又有金陵瀟湘之遊。廣州贈北中親友詩。蓋言史平生所經歷處。東野哭言史詩云。精異劉言史。詩隨傾珠珂。取此爲拋擲。飛過東溟波。可惜大國謠。颺爲四夷歌。常於衆中會。顏色兩切嗟。今日果成死。葬喪之洛河。

言史送婆羅門歸本國詩云。利利玉孫字迦攝。竹錐橫寫吒羅葉。遙知漢地未有經。手牽白馬遶天行。龜茲磧西胡雪黑。大師凍死來不得。地盡年深始到船。海裏更行三十國。行多耳

斷金環落。冉冉悠悠不停脚。馬死經留却去時。往來應盡一生期。出漢獨行人絕處。積西天漏雨絲絲。

瀟湘遊云。夷女采山蕉。緝紗浸江水。野花滿髻妝花新。閑歌噉酒深峽裏。噉酒知從何處生。當時泣舜腸斷聲。翠華寂寞嬋娟沒。野篠空餘紅淚情。青煙冥冥覆杉桂。崖壁麥天風雨細。昔人幽恨此地遺。綠芳紅艷含怨姿。清猿未盡魑鼠切。汨水流到湘妃祠。北人莫作瀟湘遊。九疑雲入蒼梧愁。

放螢怨云。放螢去。不須留。聚時年少。今白頭。架中科斗萬餘卷。一字重回重照見。青雲杳渺不可親。開囊欲放增餘怨。且道遙還酩酊。仲舒漫不窺園井。那將寂寞老病身。更就微虫借光影。欲放時。汨沾裳。衝籬落。千點光。

觀繩伎云。秦陵遺樂何最珍。綵繩冉冉天仙人。廣場寒食風日好。百夫伐鼓錦臂新。銀畫青綃扶雲髮。高處綺羅香更切。重肩接立三四層。著屐背行仍應節。兩邊圓劍漸相迎。側身交步何輕盈。閃然欲落却收得。萬人肉上寒毛生。危機險勢無不有。倒掛纖腰學垂柳。下來一一芙蓉姿。粉薄鈿稀態轉奇。坐中還有沾巾者。曾見先王初教時。（潞府李相公席上作）

買花謠云。杜陵村人不田穡。入谷經谿復緣壁。每至南山草木春。卽向侯家取金碧。幽艷

凝花春景曙。採夫移得將何處。蝶惜芬叢送下山。尋斷孤香始回去。豪少居連鷓鴣東。千金使買一株紅。院多花少栽未得。零落綠娥纖指中。咸陽親戚長安里。無限將金買花子。澆紅濕綠千萬家。青絲玉轡聲啞啞。

王中丞宅夜觀舞胡騰云。石國胡兒人見少。蹲舞嶸前急如鳥。織成蕃帽頂尖。細氍胡衫雙袖小。手中拋下蒲萄盞。西顧忽思鄉路遠。跳身轉轂寶帶鳴。弄腳繽紛錦靴軟。四座無言皆瞪目。橫笛琵琶遍頭促。亂騰新毯雪朱毛。傍拂輕花下紅燭。酒闌舞罷絲管絕。木錦花西見殘月。（王中丞武俊也）

皮日休劉棗強碑文云。歌詩之風。蕩來久矣。大抵喪于南朝。壞于陳叔寶。然今之業是者。苟不能求古於建安。卽江左矣。苟不能求麗於江左。卽南朝矣。或過爲黠傷麗病者。卽南朝之罪人也。吾唐來有是業者。言出天地外。思出鬼神表。讀之則神馳八極。測之則心懷四溟。磊磊落落。眞非世間語者。有李太白。百歲有是業者。彫金篆玉。牢奇籠怪。百鍛爲字。千鍊成句。雖不在躅太白。亦後來之佳作也。有與李賀同時。有劉棗強焉。先生姓劉氏。名言史。不詳其鄉里。所有歌詩千首。其美麗恢贍。自賀外。世莫得此。王武俊之節制鎮冀也。先生造之。武俊雄健。頗好詞藝。一見先生。遂加異敬。將署之賓位。先生辭免。武俊善騎射。載先生以武乘。逞其藝。如野武。

俊先騎驚雙鴨起於蒲稗間。武俊控弦不再發。雙鴨聯翮於地。武俊歎甚。命先生曰。某之伎如是。先生之詞如是。可謂文武之會矣。何不一言以讚邪。先生由是馬上草射鴨歌。以示武俊。議者以爲禰正平鷓鴣賦之類也。武俊益重先生。由是奏請官先生。詔授棗強令。先生辭疾不就。世重之。曰。劉棗強亦如范萊蕪之類焉。故相國隴西公夷簡之節度漢南也。少與先生遊。且思相見。命列將以襄之。髹器千事。賂武俊以請先生。武俊許之。先生由是爲漢朝相府賓冠。隴西公日與之爲筆宴。其獻酬之歌詩。大播于當時。隴西公從事。或曰。以某下走之才。誠不足污辱重地。劉棗強至。衆必以公賓劉於幕吏之上。何抑之如是。公曰。愚非惜幕間一足地。不容劉也。然視其狀。有不足稱者。諸公視某與劉分。豈有間然哉。反爲之惜其壽爾。後不得已。問先生所欲爲。先生曰。司功椽甚閑。或可承闕。相國由是椽之。雖居官曹。宴見與從事儀等。後從事又曰。劉棗強縱不容在賓署。承乏於椽曹。拙矣。奚不疏整其秩。相國不得已。而表奏焉。詔下之日。先生不恙而卒。相國哀之。慟曰。果然。止椽曹。然吾愛客。葬之有加等墳云。襄陽郭五里。曰柳子關。後先生數十歲。日休始以鄙文稱于襄陽。襄陽邑人劉求。高士也。嘗述先生之道業。嘗咏先生之歌詩。且歎曰。襄之人。只知有浩然墓。不知有先生墓。恐百歲之後。埤滅而不聞。與荆棘凡骨。溷吾子之文。吾當刊焉。日休自存。旣摭實錄之。何愧嗚呼。先生之官卑。不稱其德。宜加私諡。然

棗強之號。世已美矣。故不加焉。是爲劉棗強碑。

劉猛

元微之樂府古題序云。詩訖于周。離騷訖于楚。是後詩之流。爲二十四名。賦。頌。銘。贊。文。誄。箴。詩。行。咏。吟。題。怨。歎。章。篇。操。引。謠。謳。歌曲。詞。調。皆詩人六義之餘。而作者之旨。由操而下。八名。皆起於郊祭軍賓吉凶苦樂之際。在審聲以度詞。審調以節唱。句度短長之數。聲律平上之差。莫不由之准度。而又區別。其在琴瑟者爲操引。採民眈者爲謳謠。備曲度者總得謂之歌曲。詞調。斯皆由樂以定詞。非選詞以配樂也。由詩而下九名。皆屬事而作。雖題號不同。而悉謂之爲詩可也。後之審樂者。往往採取其詞。度爲歌曲。蓋選詞以配樂。非由樂以定詞也。而纂撰者。由詩而下十七名。盡編爲樂府等題。除饒吹橫吹郊祀清商等詞。在樂志者。其餘木簡仲卿四愁七哀之輩。亦未必盡播於管弦。明矣。後之文人。遠樂者少。不復如是配列。但遇興紀題。往往兼以句讀短長於歌詩之異。劉補闕云。樂府肇於漢魏。操。仲尼學文王操。伯牙作水僊操。齊牘沐作雉朝飛。衛女作思歸引。則不於漢魏而後始。亦以明矣。况自風雅至於樂流。莫非諷興當時之事。以貽後世之人。淫襲古題。唱和重復。於文或有短長。於義咸爲贅媵。尙不如寓意古題。刺美見事。猶有詩人引古。以諷之義者焉。曹劉沈鮑之徒。時得如此。亦復稀少。近代惟詩人杜甫。

悲陳陶。哀江頭。兵馬麗人等。凡所歌行。率皆卽事名篇。無有倚傍。余少時與友人白樂天。李公垂輩。謂是爲當。遂不復擬。賦古樂府詩數十首。中一二章。咸有新意。予因選而和之。其有雖用古題。全無古義者。若出門行。不言離別。將進酒。特書列女之類是也。其或頗同古義。全創新詞。則因家止述。軍輸捉捕。請先螻蟻之類是也。劉李二子。方將極意於斯文。因爲粗明古今歌詩同異之旨焉。

月生十五前。日望光彩圓。明滿十五後。日畏光彩瘦。不見夜光色。一鱗成暗酒。匣中苦背銅。光短不照空。不惜補明月。暫無此良玉。(月生句)自念數年間。兩手中藏鈎。於心且無恨。他日爲我羞。古老傳童歌。連淫亦兵象。夜夢戈甲鳴。苦不願年長。(苦兩句)朝梳一把白。夜淚千滴雨。可恥垂拱時。老作在家女。(曉句)

張爲作主客圖。取猛月生十五前等句。以孟雲卿爲高古奧逸主。而以猛爲入室。

元微之酬劉猛見送云。種花有顏色。異色卽爲妖。養鳥惡羽翮。翦翮不待高。非無剪傷者。物性難自逃。百足雖健健。商羊亦翹翹。伊子宿然質。謬入多士朝。任氣有愎戇。容身寡朋曹。愚狂偶以直。靜僻非敢驕。一爲毫髮忤。十載山川遙。燦鐵不在火。割肌不在刀。險心露山岳。詖語翻波濤。六尺安敢主。方寸由自調。神劍士不蝕。異布火不燒。雖無二物姿。庶欲效一毫。未能深

蹙蹙多謝相勞勞。去去我移馬。遲遲君過橋。雲勢正橫壑。江流初滿槽。持此慰遠道。比之爲舊交。

李餘

張爲作主客圖。以孟雲陽爲高古奧逸主。以餘爲入室。取其句云。長安東門別。立馬生白髮。一句。霽後軒蓋繁。南山瑞煙發。一句。管鬢車馬繁。土薄開水聲。一句。

餘登長慶三年進士第。蜀人也。張籍送載餘歸蜀詩云。十年人詠好詩章。今日成名出舉場。歸去唯將新誥牒。後來爭取舊衣裳。山橋曉上蕉花暗。水店晴看芋葉光。鄉里親情相見日。一時攜酒上高堂。

賈島送餘及弟歸蜀云。知音伸久屈。覲省去光輝。津濟逢清夜。途程盡翠微。雲當綿竹疊。鳥離錦江飛。肯寄書來否。原居出甚稀。

又送餘往湖南云。昔去候溫涼。秋生滿蜀鄉。今來從辟命。春物遍涪陽。岳石桂陽雪。野帆堆渚橋。若尋吾祖宅。寂寞在瀟湘。

李涉（石本作李涉）。江巖林寺有坡詩同刻。有王蕊花在。

醉中贈崔騰云。與君兄弟住嶺故。與君相逢楊子渡。白浪南分吳塞寒。綠楊深入隋宮路。

隋家文物今雖改。舞館歌臺基尚在。揚帝陵邊草木深。汴河流。水空歸海。古今悠悠人自別。此地繁華終未歇。大道青樓夾翠煙。瓊璫繡帳開明月。與君一言兩相許。外捨形骸中爾女。楊州歌酒不能追。洛神映箔湘妃語。白馬黃金爲身置。誰能獨羨他人醉。暫到香爐一夕間。能展愁眉百世事。君看白日光如箭。一度別來顏色變。早謀侯印佩腰間。莫遣看花鬢如霰。

題鶴林寺僧室云。終日昏昏醉夢間。忽聞春盡強登山。因過竹院逢僧話。又得浮生半日閑。

春晚遊鶴林寺寄使府諸公云。野寺尋春花已遲。背巖唯有兩三枝。平生攜酒猶堪醉。爲報春風且莫吹。

岳陽別張祐云。十年蹭蹬爲逐臣。鬢毛白盡巴江春。鹿鳴猿嘯雖寂寞。水蛟山魅多精神。山瘴困中聞有赦。死灰不望光陰借。半夜州符喚牧童。虛教衰病生驚怕。巫峽洞庭千里餘。巒峽水國何親疎。由來真宰不宰我。徒勞歎者懷吹噓。竊橋昔與張生別。萬變桑田何處說。龍蛇縱在沒泥塗。長衢却爲鷺胎設。愛君氣堅風骨峭。文章真把江淹笑。洛下諸生懼刺先。烏鳶不得齊鷹鷂。岳陽西南湖上寺。水閣松房遍文字。新釘張生一首詩。自餘吟着皆無味。策馬前途須努力。莫學龍鍾虛嘆息。

晚泊潤州聞角云。孤城吹角水茫茫。風引胡笳怨思長。驚起暮天沙上雁。海門斜去兩三行。

涉嘗過九江。至皖口。遇盜。問何人。從者曰。李博士也。其豪首曰。若是李涉博士。不用剽奪。久聞詩名。願題一篇足矣。涉贈一絕云。春雨蕭蕭江上村。綠手豪客夜知聞。他時不用相迴避。世上如今半是若。

涉至揚州。一女子拜且泣。問之曰。宋態也。故吳興劉員外之愛姬。劉全白也。劉李有昔年之分。涉因贈詩曰。長憶雲仙至小時。芙蓉頭上綰青絲。當時驚覺高唐夢。唯有而今宋玉知。又云。陵陽夜宴使君筵。解語花枝在眼前。自從明月西沉海。不見常娥二十年。

涉渤之兄。織人也。早從陳許辟。憲宗時。爲太子通事舍人。投匭言吐突承璀冤狀。孔戣知。事表其姦。遂爲峽州司倉參軍。始戣見其副章。詰責不受。涉乃行賂。詣光順門通之。故戣極言涉姦險。欺天。請加顯戮。大和中。爲太學博士。自號清谿子。

張爲作主客圖。以孟雲卿爲高古奧逸主。而以涉入室。取其句云。但將鍾鼓悅私愛。肯以犬羊爲國羞。一旬。尼父未適魯。口婁倦迷津。徒懷教化心。綉鬱不能伸。

一遇知己言萬方。始喧喧。至今百王則。孰不挹其源。一旬。

六歎云。漢臣一沒。丁零塞。牧羊西過陰沙外。朝憑南鴈信難回。夜望北辰心獨在。漢家茅土橫九州。高門長戟分王侯。但將鍾鼓悅私愛。肯以犬羊爲國羞。夜霜寒雲臥冰雪。嚴風獨刃垂旌節。丁年奉使白頭歸。泣盡李陵衣上血。

春山三竭來云。釣魚竭來春日暖。松溪不厭舟行緩。野竹初栽碧玉長。澄潭欲下青絲短。昔人避世兼避仇。暮棲雲外兼悠悠。我今無事亦如此。赤鯉忽到長竿頭。汎汎隨波凡幾里。碧沙如煙沙似砥。瘦壁橫空怪石危。山花闌日禽爭水。有時帶月歸扣舷。身閑自是漁家仙。

山上竭來探新茗。新花亂發前山頂。瓊英動搖鍾乳碧。叢叢高下隨崖嶺。未必蓬萊有仙藥。能向鼎中雲漠漠。越甌遙見裂鼻香。欲覺身輕騎白鶴。

採藥竭來藥苗盛。藥生只傍行人徑。世人重耳不重目。指似藥苗心不足。野客住山三十載。妻兒共寄浮雲外。小男學語便分別。已辯君臣知匹配。都市廣長開大鋪。疾來求者多相悞。見說韓康舊姓名。識之不識先相怒。

劉昭禹

經費冠卿舊隱云。節高終不起。死戀九華山。聖主情何切。孤雲性本閑。名傳中國外。墳在亂松間。依約曾棲處。斜陽鳥自還。

昭禹字休明。婺州人也。少師林寬。爲詩刻苦。風雪詩云。句向夜深得。心從天外歸。

集首懷華山隱者云。先生入太華。杳杳絕良音。秋夢有時見。孤雲無處尋。神清峯頂立。衣冷瀑泉吟。應笑千名者。六街塵土深。

嘗與人論詩曰。五言如四十箇賢人。著一字如屠沽不得。覓句者若搨得玉合子。底必有蓋。但精心求之。必獲其寶。在湖南累爲宰。字後署天。府學士。嚴州刺史。卒于桂州幕中。有詩三百首。

孫昌胤

清明詩曰。清明暮春裏。悵望北山陲。燧火開新焰。桐花發故枝。沉冥慚歲物。歎宴阻朋知。不及林間鳥。遷喬並羽儀。

和司空曙劉愼虛九日送人云。京邑歡離羣。江樓喜遇君。開筵當九日。泛菊外浮雲。朗詠山川霽。酣歌物色曛。君看酒中意。未肯喪斯文。

柳子厚與韋中立書云。古者重冠禮。將以責成人之道。是聖人所尤用心者也。數百年來。人不復行。近有孫昌胤者。獨發憤行之。旣成禮。明日造朝。到外廷薦笏。言於卿士。其子冠畢。應之者咸無然。京兆尹鄭叔則怫然曳笏却立曰。何預我耶。廷中皆大笑。天下不以非鄭尹而快

孫子何哉。獨爲所不爲已。

昌胤登天寶進士第。

巖休復

楊州唐昌觀玉蕊花拆。有仙人游。悵然成一絕云。終日齋心禱玉宸。魂銷目斷未逢真。不如滿樹瓊瑤蕊。笑對癡花洞裏人。

羽車潛下玉龜山。塵世何由視愛顏。唯有無情枝上雪。好風吹綴綠雲鬟。

元和中見一女子。從以二女。冠三小僕。直造花所。佇立良久。命小童折花數枝。謂黃冠者曰。曩有玉峯之期。自此可以行矣。行百許步。遂不復見。休復有詩。元微之和云。弄玉潛過玉樹時。不教青鳥出花枝。的應未有諸人覺。只是巖郎卜得知。

樂天詩云。竊女偷乘鳳下時。洞中潛歇弄花枝。不緣啼鳥春饒舌。青瑣仙郎可得知。

朱慶餘

慶餘遇水部郎中張籍知音。索慶餘新舊篇什。留二十六章。置之懷袖。而推贊之。時人以籍重名。皆繕錄諷詠。遂登科。慶餘作閨意一篇。以獻曰。洞房昨夜停紅燭。待曉堂前拜舅姑。粧罷低聲問夫婿。畫眉深淺入時無。籍酬之曰。越女新粧出鏡心。自知明豔更沉吟。齊紈未足門

人貴一曲菱歌敵萬金。由是朱之詩名流於海內矣。

中秋月詩自古分功定。唯應缺又盈。一霄當皎潔。四海盡澄清。靜覺風微起。寒過雪乍傾。孤高希此遇。吟賞倍牽情。

題薔薇花云。四面垂條密。浮雲入夏清。綠攢傷手刺。紅墮斷腸英。粉着蜂鬚膩。光疑蝶翅明。雨中看亦好。况復值初晴。

送韋校書赴浙東幕云。丞相辟書新。秋關獨去人。官離芸閣早。名占甲科頻。水驛迎舫火。山城候吏塵。湘邊寄家處。到日倍榮親。

慶餘名可久。以字行。登寶應進士第。

滿酌勸僮僕。好隨郎馬啼。花時慎行李。莫上白銅堤。(句)

又題王侯廢宅云。古巷戟門誰舊宅。早曾聞說鬪官家。更無新燕來巢屋。唯有閑人去看花。空廡欲摧塵滿櫺。小池初涸草侵沙。繁華事歇皆如此。立馬踟蹰到日斜。

右張爲取此作主客圖。

姚合送景餘越州歸覲云。鄉書落姓名。太守拜親榮。訪我波濤郡。還家霧露城。海山空外遠。鏡水世間清。何計隨君去。鄰牆閑此生。

張籍送慶餘歸越云。東隣歸路遠。幾日到鄉中。有寺山皆遍。無家水不通。潮聲蓮葉雨。野氣稻苗風。州縣知名久。爭邀與客同。

劉軻

軻爲僧時。葬遺骸。夢一書生來謝。持三雞子勸食之。嚼一而吞二。後精儒術。任史官。退之欲爲文贊之。會貶不就。

玉聲如樂詩云。玉振能旋止。人言與樂并。繁音忽已闕。雅韻詘然清。珮想停仙步。泉疑咽夜聲。曲終無異韻。聽罷有餘情。特達知難擬。玲瓏豈易名。崑山如可得。一片佇爲榮。

撫言云。軻慕孟軻爲文。故以名焉。少爲僧。止于豫章高安之南果園。復求黃老之術。隱於廬山。旣而進士登第。文章與韓柳齊名。

軻上座主書曰。軻本沛上耕人。代業儒。爲農人家。天寶末。流離于邊。徙貫南鄙邊之人。嗜習翫味。異乎沛然。亦未嘗輟耕捨學。與邊俗齒。且曰。言忠信。行必果。雖夷貊行矣。故處邊如沛然。貞元中。軻僅能執經從師。元和初。方結廬于廬山之陽。日有芟夷蓄築之役。雖震風凌雨。亦不廢力。大榘或農圃餘隙。積書窗下。日與古人磨礪前心。歲月悠久。寢成書癖。

樂天云。廬山自陶謝後。正元初。有符載。楊衡輩。隱焉。今讀書屬文。結茅富谷者。猶一二十

人其中秀出者。有彭城劉軻。開卷慕孟軻爲人。秉筆慕楊雄。司馬遷爲文。軻志不息。異日必能跨符楊而攀陶謝矣。

軻字希仁。元和末。登進士第。卒于洛州刺史。與吳武陵並以史才直史館。不知爲僧者。是彭城劉軻否。

獨孤鉉

日南至云。玉曆班窮律。凝陰發一陽。輕暉猶惜短。桂影吐偏長。暑度經南斗。流晶盡北堂。乍疑周戶耀。可愛逗林光。積雪消微照。初萌動渺茫。更昇台上望。雲物已昭彰。

鉉登元和進士第。

張

寒食遣懷云。繁華泣清露。悄悄落衣巾。明日逢寒食。春風見故人。病來羞帶楚。西去欲迷秦。憔悴此時夜。青山歸四隣。

璨正元元和間進士也。

楊虞卿

過小妓英英墓云。蕭晨騎馬出皇都。聞說埋冤在路隅。別我已爲泉下土。思君猶似掌中

珠。四弦品柱聲初絕。三尺孤墳草已枯。蘭質惠心何所在。焉知過者是狂夫。樂天夢得皆有和章。

樂天云。人間有夢何曾入。泉下無家豈是歸。墳上少啼留取淚。明年寒食更霑衣。

夢得云。但見好花皆易落。從來尤物不長生。鸞台夜直衣衾冷。雲雨無因入禁城。

虞卿醉後善歌。掃市詞。又有小妓攻琵琶。虞卿死。遂辭去。樂天哭虞卿詩云。何日重聞掃市歌。誰家收得琵琶妓。

虞卿。字師臯。虢州人。佞柔善諧麗。宗閣僧孺相穆宗。引爲右司郎中。宗閣倚之。時號黨魁。爲京兆尹。以罪貶虔州司戶參軍。死。

楊汝士

唐名族重京官。而輕外任。汝士建節後詩云。挽却弓刀上砌台。上方樓殿翠雲開。山僧見我衣裳窄。知道新從戰地來。又云。而今老大騎官馬。羞向關西道姓楊。

寶曆中。楊於陵僕射入覲。其子嗣復率兩榜門生迎於潼關。宴新昌里第。僕射與所執坐。正寢。嗣復領諸生翼兩序。元白俱在。賦詩席上。汝士詩後成。元白覽之失色。詩曰。隔坐應須賜柳屏。盡將仙翰入高冥。文章舊價留鸞掖。桃李新陰在鯉庭。再歲生徒陳賀宴。一時良吏盡傳

馨。當時疏廣雖云盛。詎有茲筵醉綠醪。其日大醉歸。謂其子弟曰。吾今日壓倒元白。時爲刑侍。開成中。汝士以戶侍檢校尙書鎮東川。時樂天以太子少傅分洛。戲代內子賀兄嫂曰。劉綱與婦共登仙。弄玉隨夫亦上天。何似沙哥傾崔嫂。碧油幃引向東川。又云。金花銀碗饒兄用。罽毳羅裙任嫂裁。嫁得黔婁爲妹婿。可能空寄蜀茶來。

裴令公居守東洛。夜宴半酣。公索句。元白有得色。時公爲破題。次至汝士曰。昔日蘭亭無艷質。此時金谷有高人。自知不能加。邊裂之曰。笙歌鼎沸。勿作冷澹生活。元顧曰。樂天所謂能全其名者也。

汝士鎮東川。其子知溫。及第命妓張宴。人與紅綾一疋。詩曰。郎君得意又青春。蜀國將軍又不貧。一曲高歌紅一疋。兩頭娘子謝夫人。

汝士字慕巢。牛李特之善。開成初。鎮東川。時嗣復鎮西川。乃族昆弟。對擁節旄。世榮其門。終刑部侍郎。

張志和

漁父歌云。西塞山前白鷺飛。桃花流水鱖魚肥。青莢笠。綠蓑衣。斜風細雨不須歸。又云。釣臺漁父褐爲裘。兩兩三三艤舫舟。能縱掉。慣乘流。長江白浪不曾憂。又云。雲溪灣裏釣魚翁。舴

編爲家西復東江上雪浦邊風笑着荷衣不歎窮又云松江蟹舍主人歡菰飯蓴羹亦共冷楓葉落荻花乾醉宿漁舟不覺寒又云青草湖中月正圓巴陵漁父掉歌連釣車子掘頭船樂在風波不用仙。

憲宗時畫玄真子像訪之江湖間不可得因令集其詩上之玄真之兄張松齡懼其放浪而不返也和答其漁父云樂在風波釣是閑草堂松逕已勝攀太湖水洞庭山狂風浪起且須還。

志和字子周婺州人母夢楓生腹上而產志和十六擢明經肅宗時以事貶南浦尉不復仕居江湖自稱煙波釣徒著元真子兄鶴齡恐其遁世爲築室越州東郭與陸羽往還憲宗圖真求其歌不能致李德裕稱志和隱而有名顯而無事不窮不達嚴光之比云。

唐詩紀事卷第四十七

謝良輔 鮑防 杜奕 丘丹

嚴維 鄭概 陳元初 呂渭

范燈 樊珣 劉蕃 賈弁

沈仲昌 李祐 李播 蕭靜

崔子向 李逢吉 楊乘

謝良輔（自良輔至沈仲昌有相會作憶長安十二詠。因載他詩於其後。）

憶長安十二詠云。憶長安。正月時。和風喜氣相隨。獻壽彤庭萬國。燒燈青玉五枝。終南往
往殘雪。渭水處處流澌。

又云。憶長安。臘月時。溫泉彩仗新移。瑞氣遙迎鳳輦。日光先暖龍池。取酒蝦蟆林下。家家
守歲傳卮。

狀江南十二詠云。江南孟冬天。荻穗軟如綿。綠絹芭蕉裂。黃金橘柚懸。

太白與良輔遊涇川陵嵩寺詩云。乘君素舸泛涇西。宛似雲門對若溪。自從康樂尋山水。

何必東遊入會稽。良輔登天寶十一年進士第。（德宗時刺商州，爲團練所殺。）

又狀江南十二詠云：江南仲春天，細雨色如煙。絲爲武昌柳，布作石門泉。

鮑防

憶長安十二詠云：憶長安，二月時。玄鳥初至禰祠，百囀宮鶯繡羽，千條御柳黃絲。更有曲江勝地，此來寒食佳期。

狀江南十二詠云：江南孟春天，荇葉大如錢。白雪裝梅樹，青袍似葑田。

防雜感詩云：漢家海內承平久，萬國戎王皆稽首。天馬常銜苜蓿花，胡人歲獻蒲萄酒。五月荔枝初破顏，朝離象郡夕函關。鴈飛不到桂陽嶺，馬走皆從林邑山。甘泉御果垂仙閣，日暮無人香自落。遠物皆重近皆輕，鷄雖有德不如鶴。

防字子慎，襄陽人。正元初爲禮侍，策賢良方正，得程質、裴復、柳公綽、歸登、崔邠、韋純、魏弘簡、熊執易、世美。防知人，防於詩尤所感發，以譏切當世。與中書舍人謝良弼友善，號鮑謝。

送薛補闕入朝云：平原門下十餘人，獨受恩多未殺身。每嘆漢家兄弟少，更憐楊氏子孫貧。柴門豈斷施行馬，魯酒那堪醉近臣。賴有軍中遺令在，猶將談笑對風塵。

杜 奕

憶長安十二詠云。憶長安。三月時。上苑遍是花枝。青門幾場送客。曲水竟日題詩。駿馬金鞭無數。良辰美景追隨。

丘丹

憶長安十二詠云。憶長安。四月時。南郊方乘旌旗。嘗耐玉卮更獻。舍桃絲籠交馳。芳草落花無限。金張許史相隨。

狀江南十二詠云。江南季冬月。紅蟹大如鱸。湖水龍爲鏡。鑪風氣作煙。

韋蘇州秋夜寄丹云。懷君屬秋夜。散步詠涼天。山空松子落。幽人亦未眠。

丹和云。露滴梧葉鳴。秋風桂花發。中有學仙侶。吹簫弄明月。

蘇州又贈丹詩云。跡與孤雲遠。心將野鶴俱。那同石氏子。每到府門庭。

丹和云。久作煙波侶。暫將絳組親。還同褚伯玉。人館忝州人。

蘇州聽江笛送陳侍御云。遠聽江上笛。江上笛若君。還愁獨宿客。更向郡齋聞。

丹和云。離樽聞夜笛。寥亮入寒城。月落車馬散。悽惻主人情。

蘇州送丘員外還山詩云。長棲白雲表。暫訪高齋宿。還辭郡邑誼。歸泛松江綠。結茅隱蒼

嶺。伐薪響深谷。同是山中人。不知往來躅。靈芝非庭草。遼鶴委池鶩。終當書里門。一表高陽族。

丹酬云。側聞郡守至。偶乘黃犢出。不別桃源人。一見經累日。蟬鳴念秋稼。蘭酌動離瑟。臨水降麾幢。野艇纔容膝。參差碧山路。目送江帆疾。涉海得驪珠。棲梧慚鳳質。媿非鄭公里。歸掾蒙籠室。

蘇州重送丘二十二還臨平山居云。歲中始再見。方來又解攜。纔留野艇語。已憶故山棲。幽澗人夜汲。深林鳥長啼。還持郡齋酒。慰子霜露凄。

丹和云。賣藥有時至。自知往來疎。遽辭池上酌。新得口中書。步出芙蓉府。歸乘穀舄車。猥蒙招隱作。豈愧班生慮。此丹述懷之作。

丹隱臨平山。與韋蘇州往還。韋有詩贈丹云。高詞棄浮靡。正行表鄉閭。未真南宮拜。聊偃東山居。

中元日鮑端公宅遇吳天師聯句云。道流爲柱史。教戒下真仙。嚴維。共契中元會。初修內景篇。鮑防。遊方依地僻。卜室喜牆連。謝良輔。寶笥開金籙。華池漱玉泉。杜奕。怪龍隨羽翼。青節降雲煙。李青。昔去遺丹竈。今來變海田。劉蕃。養形奔二景。練骨度千年。謝良輔。騎竹投陂裏。攜壺挂牖邊。鄭概。洞中嘗入靜。河上舊談玄。陳元初。伊俗笙歌遠。蓬壺日月偏。樊珣。清驛蒯訓引。白犬伯陽牽。丘丹。法受相君後。心存

象帝先。(呂渭)道成能縮地。功滿欲昇天。(范淹)何意迷孤性。含情戀數賢。(吳筠)

鮑防代宗時以御史大夫歷福建江西觀察使呂渭大曆間爲浙西支使大曆末貶歙州司馬觀十二月詩與中元聯句皆在江南時事也詠江西而憶長安其意可見矣。

巖 維

憶長安十二詠云憶長安五月時君王避暑華池進膳甘瓜朱李續命芳蘭綵絲競處高明臺謝槐陰柳色通達。

狀江南十二詠云江南春季天。蓴菜細如絃。池邊草作逕。湖上葉如船。

維字正文越州人與劉長卿善長卿對酒寄維云陋巷喜陽和衰顏對酒歌懶從華髮亂。閑住白雲多郡簡容垂釣家貧學弄梭門前七里瀨早晚子陵過維答云蘇耽佐郡時近出白雲司藥補清羸疾窗吟絕妙詞柳塘春水慢花塢夕陽遲欲識懷君意朝朝訪檝師(時劉爲睦州司馬)

維作越之諸暨尉劉隨州以詩送云愛爾文章逸還家印綬榮退公兼色養臨下帶鄉情。喬木映官舍春山宜縣城應憐釣臺石閑却爲浮名。

維留別云中年從一尉自笑此笑非道薄甘微祿時艱恥息機晨趁本鄉府晝假故山扉。

待見干戈畢。何妨更採薇。

題靈一上人院新泉云。山下新泉出。泠泠比法源。落花纔有響。澗石未成痕。獨映孤松色。難分衆鳥喧。唯當清月夜。觀定此禪門。

送薛尚書入朝云。卑情不敢論。拜首入轅門。列郡諸侯長。登朝八坐尊。凝笳臨水發。行旆向風翻。幾許遺民法。同懷父母恩。

哭靈一上人云。一公何不住。空有遠公名。共說岑山路。今時莫可行。舊房松更老。新塔草初生。經論傳緇侶。文章遍墨卿。禪床枝幹折。法宇棟梁傾。誰復修僧史。應知傳已成。

長卿送維赴河南充嚴中丞幕府云。久別耶溪客。來乘使者軒。用才榮入幕。扶病喜同樽。山屐留何處。江帆去獨翻。暮情辭鏡水。愁夢識雲門。蓮府開花萼。桃源寄子孫。何當舉嚴助。偏沐漢朝恩。

維贈別云。早見登郎署。同時跡下僚。幾年江路永。今日國門遙。文變騷人體。官移漢帝朝。望山吟度日。接枕話通宵。萬里趨公府。孤帆恨信潮。康時知已老。聖代恥逃堯。

長卿蛇浦月下重送云。秋風颯颯鳴。風月相和寂。寒黃葉一離。一別青山暮。暮朝朝。寒江漸出高岸。老樹猶依斷橋。明日行人已遠。空餘淚逐歸潮。

維重別去。月色今霄最明。庭閉夜久天清。愁靜多年左宦。殷勤遠別深情。溪臨脩竹煙色。風落高梧雨聲。耿耿相看。不寐。遙聞擊拆山城。

長卿七里瀨重送云。秋江渺渺水空波。越客孤舟欲榜歌。手折衰楊悲老別。故人零落已無多。

維重別云。新安非故枉帆過。海內如君有幾何。醉裏別時秋水色。老人南望一狂歌。

錢起送維尉河南云。蕙葉青青花亂開。少時趨府下蓬萊。甘泉未厭楊雄賦。吏道何勞賈誼才。征陌獨愁雲蓋遠。離筵只惜暝鍾催。欲知別後相思處。願植瓊林向柏台。維終校書郎。

鄭 概

憶長安十二詠云。憶長安。六月時。風臺水榭逶迤。朱果雕籠香透。分明紫禁寒隨。塵驚久。衢客散。赭河滴瀝清驪。

司空曙寄概詩云。倦枕欲徐行。開簾秋日明。手使筇杖冷。頭喜葛巾輕。綠草前侵水。黃花半上城。虛銷此風景。不見十年兄。

狀江南十二詠云。江南孟秋天。稻花白如氈。素腕慚新藕。殘粧妬晚蓮。

陳元初

憶長安十二詠云。憶長安。七月時。槐花點散累。七夕針樓競出。中元香供初移。繡轂金鞍無限。遊人處處歸隨。

僧靈一有送元初卜居麻源詩云。欲向麻源隱。能尋謝客蹤。空山幾千里。幽谷第三重。富宇富須葺。荷衣不待縫。因君見往事。爲我謝喬松。

陳孫移耶溪舊居呈陳元初校書云。雞犬漁舟裏。長謠任興行。卽令邀客醉。已被遠山迎。書笈將非重。荷衣着甚輕。謝安無箇事。忽起爲蒼生。

呂渭

憶長安十二詠云。憶長安。八月時。闕下天高舊儀衣。冠其頒金鏡。犀象對舞丹墀。更愛終南灞上。可憐秋草碧滋。

狀江南十二詠云。江南仲冬天。紫蔗節如鞭。海將鹽作雪。山用火耕田。

渭。正元十一年知貢舉。撓悶不能定去留。寄詩前主司曰。獨坐貢闈裏。愁多芳草生。仙翁昨日事。應見此時情。

中書省柳久枯死。興元二年。車駕還。柳再榮。謂之瑞柳。明年渭以爲禮部賦題。德宗甚惡之。

渭字君載。河中人。德宗時爲禮部侍郎。與裴延齡姻家。擢其子上弟。出爲潭州刺史。卒。

范燈

憶長安十二詠云。憶長安。九月時。登高望見崑池。上苑初開露菊。芳林正獻霜梨。更想千門萬戶。月明砧杵參差。

狀江南十二詠云。江南季夏天。身熱汗如泉。蚊蚋成雷澤。袈裟作水田。

樊珣

憶長安十二詠云。憶長安。十月時。華清士馬相馳。萬國來朝漢闥。五陵共臘秦祠。晝夜歌鍾不歇。山河四塞京師。

狀江南十二詠云。江南仲夏天。時雨不如川。蘆橘垂金彈。甘蔗吐白蓮。

劉蕃

憶長安十二詠云。憶長安。子月時。千官賀至丹墀。御苑雪開瓊樹。龍堂冰作瑤池。獸炭氈爐正好。貂裘狐白相宜。

狀江南十二詠云。江南季秋天。粟熟大如拳。楓葉紅霞翠。蘆花白浪川。

蕃登天寶六年進士第。

賈弇

狀江南十二詠云。江南孟夏天。慈竹箨如編。蜃氣爲樓閣。蛙聲作管絃。

弇登大曆進士第。柳子厚先友誌云。弇長樂人。善士也。爲校書郎。卒。

李益送校書賈弇東歸寄振上人詩云。北風吹鴈數聲悲。况指前林是別時。愁草不堪頻送遠。白雲何處更相期。山隨匹馬行看暮。路入寒城獨去遲。爲向東州故人道。江淹已擬惠休詩。

沈仲昌

狀江南十二詠云。江南仲秋天。鱗鼻大如船。雷是樟亭浪。苔爲界石錢。

仲昌登天寶九年進士第。蕭穎士送劉方平沈仲昌秀才同觀所試雜文云。山東茂異。有河南劉方平。臨汝沈仲昌。以郡府計偕之。尤當禮闈。能賦之試。餘勇待賈。未始踰辰。吾徒相與登翠玉。咀遺芳。目臨雲外。思入神境。佳哉樂乎。意數子之出幽谷。而漸于陸矣。

李祐

袁江口懷王司勳王吏部云。京華不啻三千里。客淚如今一萬雙。若箇最爲相憶處。青楓黃竹入袁江。

唐宗室也。大曆元和間。江南錄事參軍纂之子。

李播

見志云。去歲買琴不與價。今年沽酒未還錢。門前債主鴈行立。屋裏醉人魚貫眠。
播登元和進士第。

播以郎中典新州。有李生攜詩謁之。播曰。此吾未第時行卷也。李曰。頃於京師書肆百錢得此。遊江淮間二十餘年矣。欲幸見惠。播遂與之。因問何往。曰。江陵謁盧尚書。播曰。公又錯也。盧是某親表。李慚悚失次。進曰。誠若郎中之言。與荆南表丈。一時乞取。再拜而出。

蕭靜

三湘有懷云。柳絮飛來別洛陽。梅花落後到三湘。世情已逐浮雲散。離恨空隨江水長。

崔子向

上鮑大夫云。行盡江南塞北時。無人不誦鮑家詩。東堂桂樹何年折。直到如今少一枝。
(鮑防。正元時人。)

送惟詳律師白越之義興云。陽羨諸峯頂。何曾異剡山。雨晴人到寺。木落夜開關。縫衲紗燈晃。看心錫杖閑。西方知有社。未得與師還。

子向正元以前爲監察御史。終南海從事。裴劍傳奇云。子向之子煒。正元中人。居南海。

李逢吉

送令狐秀才赴舉云。子有雄文藻思繁。韶年射策向金門。前隨鸞鶴登霄漢。却望風沙是塞垣。獨憶忘機陪出處。自憐何力繼飛翻。那堪兩地生離緒。蓬戶長扃行旅喧。

和嚴揆省中宿齋遇令狐員外當直之作云。致齋分直宿南宮。越石盧譔此夜同。位極班行猶念舊。名題章奏亦從公。曾驅爪士三邊靜。新贈髯參六義窮。竟夕文昌如有月。可憐如在庾樓中。

望京臺上寄令狐華州云。祇沒滯南服。顏思屬暮年。閑上望京臺。萬山蔽其前。落日歸飛翼。連翩東北天。涪江適在下。爲我久潺湲。中葉成文教。德威清遠邊。頒條信徒爾。華髮生蒼然。寄懷三峯守。岐路隔雲煙。

奉酬忠武李相公見寄云。直繼先朝衛與英。能移孝友作忠貞。劍門失險曾縛虎。淮水安流緣斬鯨。黃閣碧幢惟是儉。三公二伯未爲榮。惠連忽贈池塘句。又遣羸師破膽驚。

酬致政楊祭酒見寄云。初還相印罷戎旃。獲守皇居在紫煙。安比郢侯功蔑爾。每懷疎傳意悠然。應將半俸霑閭里。料入中條訪洞天。十載別離那可道。倍令驚喜見來篇。

逢吉與令狐楚有唱和詩曰。斷金集。裴夷直爲之序云。二相未遇時。每有所作。必驚流輩。不數年。遂壓乘筆之士。及入官。登高益復隆高。我不求異。他人自遠。逢吉卒。楚有題斷金集詩云。一覽斷金集。載悲埤玉人。牙絃千古絕。珠淚萬行新。

楊乘

甲子歲書事時上黨用兵討賊云。豎子未鼎烹。大君尙盱食。風雷隨出師。雲霞有戰色。犒功椎萬牛。募勇懸千帛。武士日曳柴。飛將競執馘。喜氣迎捷書。懽聲送羽檄。天兵日雄強。桀犬稍坼離。賊臂旣已斷。賊喉旣已搯。樂禍但鯨鯢。同惡惟肘腋。小大勢難侔。逆順初不敵。違命固天亡。恃險垂長策。蘊毒久萌牙。狼顧非日夕。禮貌忽驕狂。疏奏遂指斥。動衆豈佳兵。含忍恐無益。鴻恩旣已孤。小效不足惜。腐儒一鋌刀。投筆時感激。帝閣不敢干。恹恹坐長晝。

南徐春日懷古云。六代驕奢地。三春物象繁。靈湖通漲海。天塹隔中原。曉渡高帆駛。陰風巨艦翻。旌旗西日落。戈甲夏雲屯。豹變資陳武。龍飛擁晉元。風流前事盡。文物舊儀存。邪侮嘗移潤。忠貞幾度冤。興亡山兀兀。今古水渾渾。露暖蜂偷藥。鶯啼日到軒。酒腸堆麴蘗。詩思遶乾坤。愁夢全無蝶。離憂每愧苔。形骸勞大塊。玉石任炎崑。出處甯由己。升沉未足言。且應中聖樂。坐起任昏昏。

建鄴懷古云。故城故壘滿江濱。盡是干戈舊苦辛。見此卽須知帝力。生來便作太平人。

吳中書事云。十萬人家天堊東。管絃臺榭滿春風。名歸范蠡五湖上。國破西施一笑中。香
逕自生蘭葉小。響廊深映月華空。樽前多暇但懷古。盡日愁吟誰與同。榜句云。自怜垂拙兩何
如。書泥琴聲夜泥書。數拍胡笳彈未熟。故人新命畫胡車。

乘甲子年書事。乃會昌四年討劉稹也。張爲作主客圖。以白樂天爲廣大教化主。而以乘
爲入室之上。

乘。宣宗大中初登第。官終殿中侍御史。楊維直四子。發。假。收。嚴。發。以春爲義。其子以祝以
乘爲名。假以夏爲義。其子以照爲名。收以秋爲義。其子以鉅。鱗。鑑爲名。嚴以冬爲義。其子以注
涉澗爲名。皆以文學登第。時號修行楊家。與靖恭諸楊。比於華盛。

唐詩紀事卷第四十八

李 秘 韋 臯 李 德裕 鄭 遠古

裴 航 裴 休 呂 羣 徐 商(王傳)

韋 渠 牟 陸 長 源 盧 宗 回 劉 闢

薛 宜 僚 陸 希 聲 崔 季 卿 臯 甫 澈

李 秘

禁中送任山中云。子去非長往。君恩取大還。補天留綵石。縮地入青山。獻壽千年外。來朝數月閑。莫拋殘藥物。切欲駐童顏。

唐宗室也。元和正元時人。

韋 臯

臯少遊江夏。止於姜使君之館。有小青衣曰玉蕭。纔十許歲。常侍臯。臯後告別。與約後會。因留玉指環一枚。并詩寄情云。黃雀嚙來已數春。別時留解贈佳人。長江不見魚書至。爲遣相思夢入秦。

李德裕

元和十一年歲在丙申李逢吉下三十三人皆取寒素時有語曰元和天子丙申年三十
三人皆得仙袍似爛銀文似錦相將白日上青天德裕頗爲寒素開路及謫官南去或有詩曰
八百孤寒齊下淚一時回首望崖州（出撫言）

上已憶江南禊事云黃河西繞郡城流上已應無佞禊遊爲憶淶江春水色更隨霄夢向
吳州德裕營平泉莊遠方以異物奉之或題曰隴右諸侯供語鳥日南太守送名花

及譴責或作詩云口視具寮忘七著氣吞同列削寒溫當時誰是承恩者昔有餘波遠鬼
村之句又云畫閣不開梁燕去朱門罷掃乳烏歸千巖萬壑應惆悵流水斜傾出武關蓋恨之
也

公離東都平泉有詩云十年紫殿掌洪鈞出入三朝一品身文帝寵深陪雉尾武皇恩重
燕龍津黑山永破和親虜烏嶺全坑跋扈臣自是功高臨盡處禍來名滅不由人

公漢州日夕遊房公西湖云丞相鳴琴地何年黯玉徽（房公好琴聲聞海內）偶因微
月夕重敞故樓扉桃李蹊空在芙蓉客暫依唯憐濟川楫長與夜舟歸重題云晚日臨寒渚
微風發櫂謳鳳城波自闊魚水運難留亭古思宏棟川長憶濟舟想公高世志祇似化城游

房公舊竹亭。圓琴。緜幕風流。神期如對。有作云。流水音長在。青霞意不傳。獨悲形解後。誰聽廣陵絃。

德裕論文曰。沈休文以音韻爲切。重輕爲難。語雖甚工。旨則未遠。未可以言文外意也。古之辭高者。蓋以言妙而工。適情不取於音韻。曹植七哀詩。有四泥諧依四韻。王粲有舉原安三韻。班固多用協韻。倚歟元勳。佐漢舉信是也矣。意盡而止。成篇不拘於隻耦。文選有五韻七韻十一韻者。故篇無足尤。詞寡累句。古辭如金石琴瑟。尙於至音。今則如絲竹鞀鼓。迫於促節。卽知聲律之爲其弊也。世有非文章者。曰。詞不出於風雅。思不越於離騷。摸鴈古人何足貴也。余曰。譬諸日月。雖終古常見。而光景嘗新。此所以爲靈物者也。嘗爲文箴曰。文之爲物。自然靈氣。惚恍而來。不思而至。杼軸得之。澹而無味。琢刻藻繪。彌不足貴。如彼璞玉。磨礱成器。奢者爲之。錯以金翠。美質旣彫。良寶斯棄。此文之大旨也。

劉三復謂德裕曰。漁歌樵唱。皆傳述作。北夢述夢詩云。賦命誠非薄。良時幸已遭。君當堯舜日。官接鳳凰曹。日晚煙霄闕。心驚羽翼高。此六句夢中作。椅梧連鶴禁。埤垓接龍韜。內署北連春宮。西接羽林軍。我后憐詞客。先后朝。曾宣諭。卿等是我門客。吾僚並雋髦。著書同陸賈。待詔比王褒。重價隣玄璧。英辭淬寶刀。泉流初落澗。文賦稱言泉流於齒。

吻。露滴更濡毫。新折來獻。彤弓喜暫袁。時西戎乞盟。幽鐘二師。束身赴關。海內無事者。累月。詩稱赤豹黃龍。蓋真也。非煙含瑞氣。馴雉潔霜毛。靜室使幽獨。虛博散鬱陶。學士院有一室。西南有小樓。時燕語於此。花光晨豔豔。松韻晚騷騷。書壁看飛鶴。山岡見巨鼈。內署垣牆。皆有畫松鶴。先是西壁畫海內曲龍山。憲宗欲臨幸。中使懼而圖焉。傍簷陰藥樹。落菴蔓蒲萄。此八句。悉是內署物色。唯曾遊者。依然可想也。荷靜蓬池脰。冰寒郢水醪。每學士初上賜食。皆蓬萊池魚脰。夏至後。頒賜水及燒香酒。以酒味稍濃。常和冰而飲。禁中有酒方。荔菱奈日遠。盧橘賜常叨。先朝初臨御。南方曾獻荔。亦蒙頒賜。自後以道遠罷獻。麝氣隨蘭澤。霜華入杏膏。恩光唯覺重。攜挈未爲勞。扇迴交綵翟。鷗起颺銀條。樽待奚絲攬。書期蜀客操。盡規徒零箸。退舍尙切切。此八句。述內庭所覩。龜顧垂金鈕。鸞飛曳錦袍。御溝楊柳弱。天廐黠驕豪。屢換青春直。閑隨上苑遨。煙亅行殿竹。風折繞垣桃。此八句。述潛日遊戲。聚散俄成昔。悲愁益自熬。每懷仙駕遠。更望茂陵號。地接三茅嶺。川迎五子濤。代稱海濤。是伍子胥憤氣所作。花迷瓜步暗。石固蒜山牢。蘭野凝青管。梅洲動翠篙。泉魚驚綠妓。溪鳥遊千旋。感舊心猶絕。思歸首更搔。無聊燃密炬。誰復勸金舠。余自到此。絕無夜宴酒器中大者。呼爲剗。實係乃常顧形迹。未嘗以此而相勸也。嵐氣朝生棟。城陰暝入濠。望煙歸海嶠。送

雁度江臯。宛馬嘶寒。吳鉤在錦。未能追狡兔。空覺長江蕩。水國逾千里。風帆過萬艘。聞川終古恨。唯見暮滔滔。

德裕述夢詩。記爲夢中賦詩耳。元微之和云。聞有池塘什。還因夢寐遭。攀禾古類蔡。詠豆放過曹。莊蝶玄言祕。羅禽藻思高。注云。本篇稱六句皆夢中作。故此三聯多證夢意。已下皆言同在翰林及翰苑故事。若學士初入賜龍飛馬。故有借騎銀杏葉之句。詩詔用麥紋紙。故有麥紙侵紅點之句。麻制例別通霄。勘寫。故有蘭燈焰碧高之句。學士密邇銀臺。每旦嘗聞門使。勘契開鎖。又院門有急命。卽鈴索門自搖。習以爲異。故有吏傳開鎖契。神撼引鈴條之句。學士無過從聚會之例。時與李閑行寺觀而已。故有分阻盃盤會。閑期寺觀遊之句。乃皆唐之故事也。

鄭還古

還古閑居東都。將入京。赴選。柳當將軍者。餞之。酒酣。以一詩贈柳氏之妓曰。冶艷出神仙。歌聲勝管絃。詞輕白紵曲。歌遏碧雲天。未擬生裴秀。如何乞鄭玄。不堪金谷水。橫過墜樓前。柳喜甚。曰。專伺榮命。以此爲賀。未幾。還古除國子博士。柳見除日。卽遣入京。及嘉祥驛。而還古物故。乃放妓他適。逸史載。還古初娶柳氏女。嘉會之初。夢娶房氏。後柳卒。再娶東都李氏。屬房直溫。爲東洛少尹。李之舅也。禮宴皆房主之。始知舊夢之前定也。

還古登元和進士第

裴航

長慶中裴航下第遊鄂洛備舟還都有樊氏女同載航賂其侍兒以詩求達曰同爲胡越猶懷思况遇天花隔錦屏儻若玉京朝會去願隨鸞鶴入青冥樊答詩曰一飲瓊漿百感生玄霜搗盡見雲英藍橋便是神仙宅何必崎嶇上玉清世傳藍橋雲英之事未必信姑載於此

裴休

贈黃蘗山僧希運詩曰自從大士傳心印額來圓珠七尺身挂錫十年棲蜀水浮盃今日渡漳濱一千龍象隨高步萬里香華結勝因擬欲事師爲弟子不知將法付何人

休會昌中官于鍾陵請運至郡以所解一篇示之師不顧曰若形於紙墨何有吾宗休問其故曰上乘之印唯是一心更無別法心體一空萬緣俱寂如大日輪升於虛空其中照耀靜無纖埃證之者無新舊無淺深說之者不立義解不開戶牖直下便是動念卽畢其後休錄之爲傳心法要云

休字公美孟州人大中六年爲相能文章爲人醞藉進士雍閑宣宗曰休真儒者

巨羣

萃元和十一年。下第遊蜀。性不容下。僕馭怨之。至眉州。題詩所寓寺之東壁。其一云。路行三蜀盡。身及一陽生。賴有殘燈火。相依坐到明。其二曰。社後辭巢燕。霜前列帶蓬。願爲胡蝶夢。飛去覓關中。吟訖淚下。意緒不堪。未幾爲其奴所殺。

徐商（王傳）

商鎮襄陽。有副使節判同加章綬。商以詩賀之云。朱紫花前賀故人。兼榮此會頗關身。同年坐上聯賓榻。宗姓亭中布錦綉。晴日照旗紅灼爍。韶光入隊影玢璘。芳菲解助今朝喜。嫩蕊青條滿眼新。

觀察判官將仕郎監察御史王傳和云。朱紫聯輝照日新。芳菲全屬斷金人。華筵重處宗盟地。白雪飛時郢曲春。仙府色饒攀桂侶。蓮花光讓握蘭身。自憐亦是膺門客。吟想恩榮氣益振。

朝議郎江州刺史段成式云。雲雨軒懸鶯語新。一篇佳句占陽春。銀黃年少偏欺酒。金紫風流不讓人。連璧坐中斜日滿。貫珠歌裏落花頻。莫辭倒戴吟歸去。看欲東山又吐茵。

商宣宗時爲山南東道節度使。咸通四年爲宰相。封東莞縣子。商與曹確。楊牧。路巖。同秉政。有嘲之者曰。確確無餘事。錢財總被收。商人都不管。貨賂幾時休。

傳登大中三年進士第。初貧窶。於中條山萬固寺入院讀書。家廟碑云。隨僧洗鉢。

韋渠牟

貞元元年。渠牟爲大府卿。與金吾李齊運度支裴延齡京兆尹嗣道。皆承恩寵。薦人多得名位。時劉老師穆寂。皆科目。渠牟主穆寂。齊運主老師。會齊運朝對。上嗟其羸弱。許以致仕。而老師失據。無名子嘲之云。大尉朝天升穆老。尙書倒地落劉郎。劉禹錫曰。名場巖峻如此。出古今詩話。

渠牟南山四皓贊云。煥煥煌煌。爲珪爲璋。孰光乎不耀之光。幽幽深深。爲山爲林。孰繫乎不繫之心。足知乎虛室生白。玄門不關。流水去住。清風往還。豈比乎稷契在世。巢由在山。一物有累。兩心不閑者哉。閑之謂何。簪居薜蘿。本不于我。豈云其他。熙熙忻忻。與時爲春。匡漢避秦。惟茲四人。于德之墮。不迷其津。繪事後素。孰知其故。想像儀刑。念茲丹青。曄曄紫芝。深谷逶迤。俛仰今古。空林往時。鳳豈無德。鸞皆有羣。出處嘿語。商山白雲。

渠牟述之從子也。少警悟。攻爲詩。李白異之。授以古樂府。去爲道士。不終。更爲浮屠。已而復冠。韓滉表試校書郎。德宗誕日。詔徐岱趙需許孟容與渠牟及佛老二師並對麟德殿。質問大趣。渠牟有口辯。雖三家未究解。然答問鋒生。帝聽之意動。遷祕書郎。後倚延齡爲姦利。勢焰

可矣。擢太常卿。卒。權載之敍其文曰。初君年十一。嘗賦銅雀臺絕句。右拾遺李白見而大駭。因授以古樂府之學。且以瓌琦軼拔爲己任。至弱冠。乃喟然曰。四始五際。今旣遠矣。會情性者。因於物象。窮比興者。在於聲律。蓋辨以麗以則。得於無間。合於天倪者。其在是乎。彼思休稱謝永嘉。如芙蓉出水。鍾嶸謂范尙書如流風迴雪。吾知之矣。遂苦心藻慮。儷詞比事。纖密清巧。度越羣倫。嘗著天竺寺十六韻。魯郡文忠公序引而和之。使畫工圖於仁祠。摘句配境。偕爲勝絕。又於江南著臥疾三十韻。晉國忠肅公手翰以美之。曰。草木獨立。其在我輩生乎。其爲名臣宗公所稱賞如此。又與竟陵陸鴻漸。杼山僧皎然爲方外之侶。沉冥博約。爲日最久。而不名一行。不滯一方。故其曳羽衣也。則曰。遺名。攝方抱也。則曰。塵外。披儒服也。則今之名字著焉。周流三教。出入無際。寄詞詣理。必於斯文。

陸長源

孟東野以樂府戲贈云。蓮子不可得。荷花生水中。猶勝道傍柳。無事蕩春風。長源答云。芙蓉初出水。菡萏露中花。風吹被枯木。無奈值空槎。

東野有夷門雪贈主人云。夷門貧士空吟雪。夷門豪士皆飲酒。酒聲歡鬧入雲霄。雪聲激切悲枯朽。悲歡不同歸去來。萬里春風動江柳。

長源答云。好丹與素道不同。失意得途事皆別。東鄰年少樂未央。南客思歸腸欲絕。千里長河水復冰。雲鴻冥冥楚山雪。

酬東野新居見寄云。大道本夷曠。高情亦冲虛。因隨白雲意。偶逐青蘿居。青蘿分蒙密。四序無慘舒。餘情濯子衿。散彩還吾廬。去歲登美第。榮名在公車。將必繼管蕭。豈惟踞應徐。首夏尙清和。殘芳徧丘墟。褰幃蔭窳柳。汲井滋園蔬。達者貴知心。古人不願餘。愛君蔣生徑。且著茂陵書。

長源吳人。贍於學。德宗以宣武節度使董晉儒懷。詔長源爲司馬佐之。持法峭刻。晉卒。長源總留後事。軍亂殺之。

盧宗回

長安慈恩寺塔詩云。東方曉日上翔鸞。西轉蒼龍拂露盤。渭水冷光搖藻井。玉峯晴色墮欄杆。九重宮闕參差見。百二山河表裏觀。暫輟去蓬悲不定。一慙金界望長安。

宗回登元和進士第。

劉闢

登樓望月云。圓月當新霽。高樓見最明。素波流粉壁。丹桂拂飛螢。下瞰千門靜。旁觀萬象

生。梧桐窗下影。烏鵲檻前聲。嘯逸劉琨興。吟資瘦亮情。遊人莫登眺。迢遞故鄉程。

又云。皎潔三秋月。巍峨百丈樓。下分征客路。上有美人愁。帳卷芙蓉帶。簾褰玳瑁鉤。倚窗情渺渺。憑檻思悠悠。未得金波轉。俄成玉筍流。不堪三五夕。夫婿在邊州。

闕字太初。擢進士。宏詞科。佐韋臯府。後爲西川節度。以叛誅。

薛宜僚

宜僚以左庶子充新羅册贈使。至青州。悅一妓。段東美賦詩曰。阿母桃花方似錦。王孫草色正如煙。不須更向滄溟望。惆悵慳情又一年。到外國。謂判官苗甲曰。東美何故頻見夢中。數日而卒。櫬至青。段奠之一慟而卒。

陸希聲

古之善書。鮮有得筆法者。希聲得之。凡五字。擲。押。鉤。格。抵。用筆雙鉤。則點畫遒勁。而盡妙矣。謂之撥鐙法。希聲自言。昔二王皆傳此法。至陽冰亦得之。希聲以授沙門。警光。警光入長安。爲翰林供奉。希聲猶未達。以詩寄警光云。筆下龍蛇似有神。天池雷雨變逡巡。寄言昔日不龜手。應念江頭汧汧人。警光感其言。引薦希聲於貴倖。後至相。

希聲博學善屬文。相昭宗在位。無所輕重。以太子太師罷。李茂正犯京師。輿疾避難。卒。

崔季卿

晴江秋望云。八月長江萬里晴。千帆一道帶風輕。盡日不分天水色。口口南是岳陽城。
季卿。嶠之從孫也。

皇甫澈

正元十四年。澈刺蜀州。賦四相詩序云。蜀州刺史廳壁。記厝相位者。前後四公。謨明弼諧。遷轉歷此。顧已無取。忝跡於斯。景行道烈。嗟嘆之不足也。謹述其行事。詠其休美。庶將來君子。知聖朝之德云爾。

中書令漢陽王張柬之

周曆革元命。天步值艱阻。烈烈張漢陽。左祖清諸武。休明神器正。文物舊儀覩。南向翊大君。西宮朝聖母。借韻用作補文。茂勳鏤鐘鼎。鴻勞食茅土。至今稱五王。卓立邁萬古。

中書令鐘紹京

景龍仙駕遠。中禁姦釁結。謀猷叶聖朝。披鱗奮英節。清宮閭闔啓。滌穢氛沴滅。紫極重昭回。皇天新日月。從容廟堂上。肅穆人神悅。唐元佐命功。輝煥何烈烈。

禮部尙書門下侍郎平章事李峴

時來偶明聖。道濟甯邦國。猗歟瑚璉器。竭我股肱力。進賢黜不肖。措枉舉諸直。宦官既却坐。權豎亦移職。載踐每若驚。三已無慍色。昭昭垂憲章。來世實作則。

門下侍郎平章事王綰

舟楫濟巨川。山河資秀氣。昭膺究儒業。屈指取高位。北征戮驕悍。東守輯攜貳。論道致巍巍。持衡無事事。知己不易遇。宰相固有器。瞻事華壁中。來者誰其嗣。

唐詩紀事卷第四十九

胡杲 吉皎 劉真 鄭據

盧貞 張渾 白居易 項斯

龐蘊 蔡京 滕邁 郭周藩

殷潛之 裴思謙 何扶 鄭澣

廖有方 薛書記 賈耽 盧貞

姚合

胡杲（前懷州司馬安定胡杲年八十九）

九老會賦詩云。閑居同會在三春。大抵恐年最出羣。霜髯不嫌盃酒興。白頭仍愛玉爐熏。徘徊玩柳心猶健。老大看花意却勤。鑿落滿斟判酌酌。香囊高挂任氤氳。搜神得句題紅紙。望景長吟對白雲。今日友情何不替。齊年同事聖明君。

吉皎（衛尉鄉致仕馮翊吉皎年八十八）

九老會云。休官罷任已閑居。林苑園亭興有餘。對酒最宜花藻發。邀歡不厭柳條初。低腰

醉舞垂緋袖。擊筇謳歌任。褐裾甯用管絃來。合雜自親松竹且清虛。飛觥酒到須先酌。賦詠成詩不住書。借問商山賢四皓。不知此後更何如。

劉真（前磁州刺史廣平劉真八十七）

九老會云。垂絲今日幸同筵。朱紫居身是大年。賞景尙知心未退。吟詩猶覺力完全。閑庭飲酒連三月。在席權豪象七賢。山茗煑時秋霧碧。玉盃斟處彩霞鮮。臨階花笑如歌妓。傍竹松聲當管絃。雖未學窮生死訣。人間豈不是神仙。

擲據（前龍武軍長史滎陽鄭據八十五）

九老會云。東洛幽間日暮春。邀懽多是白頭賓。官班朱紫多相似。年幾高低次第勻。聯句每言松竹意。停盃多說古今人。更無外事來心肺。空有清虛入思神。醉舞兩迴迎勸酒。狂歌一曲會余身。今朝何事偏情重。同作明時列任臣。

盧貞（前侍御史內供奉官苑陽盧貞八十三）

九老會云。三春已盡洛陽宮。天氣初晴景象中。千朵嫩桃迎曉日。萬株垂柳逐和風。非論官位皆相似。及至年高亦共同。對酒歌聲猶覺妙。玩花詩思豈能窮。先時共作三朝貴。今日猶逢七老翁。但願綠醪常滿酌。煙霞萬里會應通。

張 渾（前永州刺史。清河張渾七十七。）

九老會云。幽亭春盡共爲懽。印綬居身是大官。遊跡豈勞登遠岫。垂絲何必坐溪磻。詩聯六韻猶應易。酒飲三杯未覺難。每况襟懷同要會。共將心事比波瀾。風吹野柳懸羅帶。日照庭花落綺紈。此席不煩鋪錦帳。斯筵堪作畫圖看。

白居易（刑部尙書致仕。年七十四。）

九老會云。七人五百八十四。拖紫紆朱垂白鬚。囊裏無金莫嗟歎。樽中有酒且歡娛。吟成六韻神還玉。飲到三杯氣尙甦。鬼賊狂歌教婢拍。婆娑醉舞道孫扶。天年高邁二疎傳。人數多於四皓圖。除卻三山五天竺。人間此會目應無。

樂天退居洛中。作尙齒九老之會。其序曰。胡吉劉鄭盧張等六賢。皆多壽。餘亦次焉。於東都弊屋履道坊。合尙齒之會。七老相顧。既醉且歡。靜而思之。此會希有。因各賦七言韻詩一章。以記之。或傳諸好事者。時會昌五年二月二十四日。樂天云。其年夏。又有二老。年貌絕倫。同歸故鄉。亦來斯會。續命書姓名年齒。寫其形貌。附于圖右。與前七老。題爲九老圖。仍以一絕贈之。云。雪作鬚眉雲作衣。遼東華表暮雙歸。當時一鶴猶希有。何況今逢兩令威。（洛中遺老李元爽。年一百三十六。僴僧如滿。歸洛年九十五歲。）又云。時祕書狄兼謨。河南尹盧貞。以年未七

十。雖與會而不及列。

項斯

斯字子遷。江東人。始未爲聞人。因以卷謁楊敬之。楊苦愛之。贈詩云。幾度見詩盡好。及觀標格過於詩。平生不解藏人善。到處逢人說項斯。未幾詩達長安。明年擢上第。蒼梧雲氣詩云。何年書作愁。漠漠便難收。數點山能遠。平鋪水不流。濕連湘竹暮。濃蓋舜墳秋。亦有思鄉客。看來盡白頭。

贈金州姚合使君云。爲郎名更重。領郡是蹉跎。官壁題詩盡。衙庭看鶴多。城池連竹塹。灘落帶椒坡。未覺旌藩貴。閑行觸處過。始張水部籍。爲律格詩。惟朱屢餘親授其旨。泐流而下。有任蕃。陳標。章孝標。司空圖。咸及門焉。寶曆開成之際。斯尤爲水部所知。故其詩格與之相類。鄭少師薰云。項斯逢水部。誰道不關情。斯留別水部詩云。省中重拜別。兼領故人書。已念此行遠。不應相問疏。子城西並宅。御水北同渠。要取春前到。乘閑候起居。

佳人背江坐。眉際列煙樹。(庾樓燕句)馬蹄沒青莎。船跡成空波。春風吹雨意。何處便相值。(古意)燭殘催卷席。坐冷怕梳頭。寒入鴈聲長。(句)

右張爲取於主客圖

張籍贈詩云。端坐吟詩忘忍飢。萬人中亦見君稀。門連野水風長到。驢放秋原夜不歸。日暖剩收新落葉。天寒更着舊生衣。曲江亭上頻頻見。爲愛鸚鵡雨裏飛。

龐 蘊

蘊有詩云。未識龍宮莫說珠。識珠言說與君殊。空拳只是嬰兒信。豈得將來誑老夫。又曰。萬法從心起。心生萬法生。法生何日子。來去枉虛行。寄語修道人。空生慎勿生。如能達此理。不動出深坑。

又曰。極目觀前境。寂寥無一人。迴頭看後底。影亦不隨身。又曰。神識苟能無罣礙。廓周法界等虛空。不假坐禪持戒律。超然解脫豈勞功。

蘊字道元。衡陽人。嗜浮屠法。厭離貪俗。挈所有沉之洞庭。鬻竹器以爲生。後居襄陽。臨終。召刺史于頔謂曰。但願空諸所有。慎勿實諸所無。善住世間。皆知影響。言訖奄然而化。時正元間也。世號龐居士。

居士初參石頭和尚。問師不與萬法爲侶。是什麼人。石頭以手掩居士口。居士豁然大悟。石頭一日問居士云。子自見老僧已來。日用事作麼生。居士云。若問某甲日用事。直下無開口處。石頭云。知子什麼方始問子。居士遂呈一頌曰。日用事無別。惟吾自偶諧。頭頭非取捨。處處

勿張華。朱紫誰爲號。青山絕點埃。神通并妙用。運水及般柴。石頭然之曰。子將緇耶。素耶。居士曰。願從所慕。遂不染剃。

居士後之江南。參見馬祖。問不與萬法爲侶。是什麼人。祖云。待你一口吸盡西江水。卽向汝道。居士言下頓悟。宗要。乃作頌曰。十方同聚會。箇箇學無爲。此是蓮佛場。心空及第歸。

居士一日訪谷隱道者。道者問云。誰居士。立起杖子。隱云。莫是上上機麼。居士拋下杖子。隱無語。居士云。只知上上機。不覺上上事。隱云。作麼生。是上上事。居士拈起杖子。隱云。不得草草。居士云。可憐強作主宰。隱云。有一機人。不要拈提。豎拂亦不明對。答言辭。居士若逢。如何則是。居士云。何處逢隱。把住居士。居士轉身使唾。隱無語。居士與一頌曰。焰水無魚下底鉤。覓魚無處笑君愁。可憐谷隱攷禪伯。被唾如何見亦羞。

蔡京

邕州蔡大夫京者。故令狐文公楚鎮滑臺日。於僧中見曰。此童眉目疎秀。進退不懼。惜其單幼。可以勸學乎。師從之。乃得陪學於相國子弟。後以進士舉上第。尋又學究登科。作尉畿服。旣爲御史。覆獄淮南。李相紳憂悸而卒。頗得繡衣之稱。謫居澧州。爲厲員外玄所辱。稍遷撫州刺史。以辭氣自負。郡有汝水爲放生池。不許漁罟之事。忽一人乘小舟釣於此。蔡遣吏捕釣者。

乃爲詩曰。拋却長竿卷却絲。手攜篋笥獻新詩。臨川太守清如鏡。不是漁人下釣時。京覽詩召之。已去。卒不言其姓字。或曰。野人張頂也。京益自驕矜。作詩責商山四皓曰。秦末家家思逐鹿。商山四皓獨忘機。如何鬢髮霜相似。更出深山定是非。及假節。交道山吳溪。傍徨賦詩。久之。詩曰。停橈積水中。覺目孤煙外。借問吳溪人。誰家有山賣。旣而殞於邕南。藁殯此地。亦有其兆矣。詠子規云。千年冤魄化爲禽。永逐悲風叫遠林。愁血滴花春豔死。月明飄浪冷光沉。凝成紫塞風前淚。驚破紅樓夢裏心。腸斷楚詞歸不得。劍門迢遞蜀江深。

劉夢得有送前進士蔡京赴學究科詩云。已是世間能賦客。更攻窗下絕編書。又云。幸遇天官舊丞相。知君無翼上虛空。蓋欲薦之時相也。京以進士舉登學究科。時爲奸及第惡科名。有錦上披篋之誚焉。

令狐文公在天平後堂宴樂。京時在坐。故義山詩云。白足禪僧思敗道。青袍御史擬休官。謂京曾爲僧也。或云。咸通中爲廣西節度。褊忮貪克峻條。令爲炮熏剝斷法。御下慘毒。爲軍中所逐。後貶死。

騰 萬

湖州崔芻言郎中。初爲越副戎。宴席中有周德華者。劉採春女。善歌楊柳枝詞。所唱七八

篇皆名流之詠。騰邁郎中一首云。三條陌上拂金羈。萬里橋邊映酒旗。此日令人腸欲斷。不堪將入笛中吹。賀知章祕監一首云。碧玉裝成一樹高。萬條垂下綠絲條。不知細葉誰裁出。二月春風似剪刀。楊巨源員外一首云。江邊楊柳遶塵絲。立馬憑君折一枝。唯有春風最應惜。殷勤更向手中吹。劉禹錫尙書一首云。春江一曲柳千條。二十年前舊板橋。曾與美人橋上別。恨無消息到今朝。韓琮舍人二首云。枝裊芳腰葉鬪眉。春來無處不如絲。灞陵原上多離別。少有長條拂地垂。又曰。梁苑隋堤事已空。萬條猶舞舊春風。那堪更想千年後。誰見楊花入漢宮。

雪溪子曰。杜牧舍人云。巫娥廟裏低含雨。宋玉堂前斜帶風。滕郎中又云。陶令門前窻接籬。亞夫營裏拂朱旗。但不言楊柳二字。最爲妙也。是以姚合郎中吟道傍亭子詩云。南陌遊人迴首去。東林道者杖藜歸。不稱亭而意見矣。邁登元和進士第。

郭周藩

譚宜者。陵州民叔皮子也。開元末生而有異。年二十餘。忽失所在。大曆初年。還家。卽霞冠羽衣。真仙之流也。言訖而去。其家靈泉湧出。禱必有應。因名潭子池。亦曰天池。進士郭周藩爲詩記其事。曰。潒水一百步。世名譚子池。余詰陵陽叟。此池當因誰。父老謂余說。本郡譚叔皮。開元末年中。生子宗阿宜。墜地便能語。九歲多髭眉。不飲亦不食。未嘗言渴飢。十五銳行走。快馬

不能追。二十入山林。一去無還期。父母憶念深。鄉閭爲立祠。大曆元年春。此兒忽來歸。頭冠簪鳳凰。身著霓裳衣。普遍拯疲俗。丁寧告親知。余爲神仙官。下界不可祈。恐爲妖魅假。不如早平夷。此有黃金藏。鎮在茲廟基。發掘散生聚。可以救貧羸。金出繼靈泉。湛若清琉璃。泓澄表符瑞。水旱無竭時。言訖辭冲虛。杳靄上玄微。凡情留不得。攀望衆號悲。尋稟神仙誠。徹廟僅開窺。果獲無窮寶。均融沾困危。巨源出巔頂。噴湧世間稀。異境流千古。終年福四維。

周藩河東人。登元和六年第。

殷潛之

野人殷潛之。題箒筆驛云。江東矜割據。鄴下尊孤嫠。霸略非匡漢。宏圖欲佐誰。奏書辭後主。仗劍出全師。重襲褒斜路。懸開反正旗。欲將苞有截。必使覺無遺。沉慮經謀際。揮毫決勝時。圓觚當分畫。前竝此操持。山秀扶英氣。川流入妙思。箒成功在殺。運去事終虧。命屈天方獸。人亡國自隨。艱難推舊姓。開創極初基。總歎曾過地。寧探作教資。若歸新曆數。誰復顧衰危。報德兼明道。長留識者知。

杜牧之和云。三吳裂婺女。九錫獄孤兒。霸王業未半。本朝心是誰。永安宮受詔。箒筆驛沉思。晝地乾坤在。儒毫勝負知。艱難司草創。得失計毫厘。寂默經千慮。分明渾一期。川流縈智思。

山簪助扶持。慷慨匡時略。從容問罪師。褒中秋鼓角。渭曲晚旄旗。仗義懸無敵。鳴攻固有辭。若非天奪去。豈復慮能支。子夜星纔落。鴻都鼎便移。郵亭世自換。白日事長垂。何處躬耕者。猶題殄瘁詩。

裴思謙

思謙及弟後。作紅牋名紙十數。詣平康里。因宿於里中。詒旦賦詩曰。銀釭斜背解鳴璫。小語儉聲賀玉郎。從此不知蘭麝貴。夜來新染桂枝香。

思謙開成三年登上第。

何扶

扶大和九年及第。明年捷三篇。因以一絕寄舊同年曰。金榜題名墨尚新。今年依舊去年春。花間每被紅烟問。何事重來只一人。

蕭嶸

和李德裕遊漢州房公湖云。太尉留琴聽。時移重可尋。徽絃一掩抑。風月助登臨。榮駐青油騎。高張白雪音。祗言酬唱美。良史記王箴。

又云。靜對煙波夕。猶思棟宇精。臥龍空有處。馴鳥獨忘情。顧步襟期遠。參差物象橫。自宜

雕樂石。爽氣際青城。

舊竹亭。開琴云石室。寒鸞。孫枝雅器裁。坐來山水操。絃斷弔遺埃。

澣。餘慶之子。文宗時。爲翰林學士。進左丞。出爲山南西道節度使。以戶部尚書召。卒。文宗嘗爲餘慶曰。涵卿令子。而朕直臣也。可更相賀。涵澣舊名。以文宗故名改焉。

廖有方

有方。元和十年。失意遊蜀。至寶雞西界。定旅逝者。書板記之曰。余元和乙未歲落第。西征適此。聞呻吟之聲。潛聽而微。憫也。問其疾。苦住止。對曰。辛勤數舉。未偶知音。眊矚叩頭。久而復語。唯以殘骸相託。余不能言。俄而逝。余乃鬻所乘馬於村豪。備棺瘞之。恨不知其姓字。臨歧悽斷。復爲銘曰。嗟君沒世。委空囊。幾度勞心。翰墨場。半面爲君。申一慟。不知何處是家鄉。明年。李逢吉擢有方及第。改名游鄉。唐之義士也。有方交州人。柳子厚以序送之。

薛書記

元相公賓府。有薛書記。飲酒醉後。因爭令擲注子。擊傷相公猶子。遂出幕。醒來乃作十離詩。上獻府主。

犬離主云。馴撓朱門四五年。毛香足淨主人憐。無端咬着親情客。不得紅絲毯上眠。

筆離手云。越管宣毫始稱情。紅牋紙上撒花瓊。都緣用久鋒頭盡。不得羲之手裏擎。
馬離廐云。雪耳紅毛淺碧蹄。追風曾到日東西。爲驚玉貌郎君墜。不得華軒更一嘶。
鸚鵡離籠云。隴西獨自一孤身。飛去飛來上錦裯。都緣出去無方便。不得籠中再喚人。
燕離巢云。出入朱門未忍拋。主人嘗愛語咬咬。銜泥穢汚珊瑚簾。不得梁間更壘巢。
珠離掌云。皎潔圓明內外通。清光似照水精宮。都緣一點瑕相穢。不得終霄在掌中。
魚離池云。戲躍蓮池四五秋。常搖朱尾弄輪鉤。無端擺斷芙蓉朵。不得清波更一遊。
鷹離主云。爪利如鋒眼似鈴。平原捉兔稱高情。無端竄向青雲外。不得君王手上擎。
竹離亭云。蒼鬱新栽四五行。常將真節負秋霜。爲緣春筍鑽牆破。不得垂陰覆玉堂。
鏡離臺云。鑄瀉黃金鏡始開。初生三五月徘徊。爲遭無限塵蒙蔽。不得華堂上玉臺。
元公詩云。馬上同携日。今盃湖邊還折去年梅。年年祇是人空老。處處何曾花不開。歌詠
每添詩酒興。醉酣還命管絃來。樽前百事皆依舊。點檢唯無薛秀才。

賈 耽

耽賦虞書歌云。衆書之中虞書巧。體法自然歸大道。不同懷素只攻顛。豈類張芝惟劄草。
形勢素。筋骨老。父子君臣相揖抱。孤青似竹更颯颯。闢白如波長浩渺。能方正。不墮倒。功夫未

至難尋奧。須知孔子廟堂碑。便是青箱中至寶。

魇字敦詩。正元中爲宰相。

盧貞

字子蒙。會昌五年。爲河南尹。樂天九老會。貞年未七十。亦與焉。時又有內供奉盧貞。貞和劉夢得。歲夜懷云。文翰走天下。琴樽臥洛陽。貞元朝士盡。新歲一悲涼。名早緣才大。官遲爲壽長。時來知病已。莫歎步趨妨。

楊柳枝詞云。一樹依依在永豐。兩枝飛去杳無蹤。玉皇曾採人間曲。應逐歌聲入九重。

姚合

合宰相崇曾孫。登元和進士第。調武功主簿。世號姚武功。又爲富平萬年尉。寶應中。歷鹽察御史。戶部外郎。出荆杭二州刺史。後爲給事中。陝隴觀察使。開成末。終祕書監。與馬戴。費冠卿。殷堯藩。張籍遊。李頎師之。合有涵元集。取王維等二十六人詩百篇。曰。此詩中射雕手也。

移花兼蝶至。買石得雲饒。(句)插劍龍纏臂。開旗火滿身。(句)家中去城遠。日月在缸多。(句)身漸山友棄。膽賴酒盃扶。(句)

右張爲主客圖。取李益爲清奇雅正。以合爲入室。

酉陽雜俎言僧清教句云雷電下嵩陰。故姚監常吟之不輟。又僧雲容句云木末上明星。清教又有句云香連鄰舍像。荊州僧云犬熟護隣房。

張籍寄合詩云病來辭赤縣。按上有丹經。爲客燒茶竈。教兒掃竹亭。詩成添舊卷。酒盡臥空瓶。聞下今遺逸。誰占隱士星。

又寒食夜寄合云貧官多寂寞。不異野人居。作酒和山藥。教兒寫道書。五湖歸去遠。百事病來疏。况是同懷客。寒應月上初。

合酬張司業見寄云日日在心中。青山青桂叢。高人多愛靜。歸路亦應同。罷吏無山病。因僧得解空。新詩勞見問。吟對竹林風。

一日看除日。終年捐道心。合之詩也。

合爲魏州從事。寄耿拾遺云。小在兵馬間。長還繫戎職。雞飛不得遠。豈要生羽翼。三年城中遊。與君最相識。應知我衷腸。不苟念衣食。主人樹功名。欲撼天下賊。愚雖乏智謀。願陳一夫力。人生須氣健。飢凍縛不得。睡當一席寬。覺乃千里窄。古人不懼死。徒死亦無益。至交不可合。一合難離折。君嘗相勸勉。苦語毒胸臆。百年心知聞。誰限河南北。

送張宗原詩云東門送客道。春色如死灰。一客失意行。十客顏色低。住者旣無家。去者又

非歸愁窮一成疾。百藥不可治。于賢我且愚。命分不合齊。誰開塞蹟門。日日同遊棲。子行何所之。切切食與衣。誰能買仁義。令子無寒飢。野田不草草。四向生路岐。士人甚商賈。終日須東西。鴻鴈春北去。秋風復南飛。勉君向前路。無失相見期。

武功縣閑居云。縣去京城遠。爲官與隱齊。馬隨山鹿放。鷄雜野禽棲。連舍惟藤架。侵塔是藥畦。吏師嵇叔夜。不擬作書題。

又云。簿書多不會。簿俸亦難銷。醉臥慵開眼。閑行懶繫腰。移花兼蝶至。買石得雲饒。且自心中樂。從他笑寂寥。

又云。日出方能起。庭前看種莎。吏來山鳥散。酒熟野人過。岐路荒城少。煙霞遠岫多。同官更相引。下馬上西坡。劍器云。聖朝能用將。破敵速如神。插劍龍纏臂。開旗火滿身。積屍川沒岸。流血野無塵。今日當場舞。須知盡戰人。

方于哭姚云。入室人成弟子。爲儒是處哭先生。又上姚杭州云。身貴久離行樂伴。才高猶作後人師。

唐詩紀事卷第五十

封敖 鄭薰 王軒

宋雍 李攀 卓澳

段文昌 姚向 溫會

李敬伯 姚康 張正元

楊嗣復 次穀子 楊摩

劉郇伯 王觀 陳上美

侯列 崔樞 陳彥博

郭良驥 崔巖 李景遜

唐球

封敖

敖爲池州刺史。題西隱寺云。三年未到九華山。終日披圖一室間。秋寺喜因晴後賞。靈峯看待足時還。猿從有性留僧坐。雲謫無心伴客閑。勝事儘能銷歲月。已拚名利不相關。

敖字碩夫。冀州人。雅爲李德裕所器。武宗時。詔慰邊將傷夷者。曰。傷居爾體。痛在朕躬。劉稹平。德裕進太尉制。曰。言皆予同。謀不他惑。皆敖爲之。終尙書右僕射。才高而少行檢。故不至宰相。

鄭 冀

贈常暉詩序云。九華處士常暉。擅玄言之要。通易老。其於淨名僧肇。尤精達。余在句溪時。重其能。車幣而致之。及到官舍。再說易。一說老氏。將兒姪輩執卷。列坐而傳之。老氏畢業。而寇難作。與輩各散去。不知其何之。存耶亡耶。余旣休居洛師。齋扉獨靜。已卯冬十一月半。雪中有客扣柴門。樵童視之。走復曰。輩處士。遽下榻。開關執手。話艱苦。輩背漆笈草履。杖藜下笠。且哈笑曰。聞公恬養淡逸。不居於榮悴。故以玄來助成之。升榻解四書。卽易老淨肇也。明日講肇論。階前多偃松高桂。冰凍墮落。有琴瑟金石聲。理致明妙。神骨超爽。自謂一時之遇。曰。與故人爲徒。又意茲樂之難諧也。遂成二十韻贈之。詩云。密雪松桂寒。書窗導餘清。風撼冰玉碎。階前琴磬聲。榻靜几硯潔。帙散縑緗明。高論展僧肇。精言資叢生。立意加玄虛。析理分縱橫。萬化悉在我。一物安能驚。江海何所動。丘山常自平。遲速不相闕。後先徒起爭。鏡照各妍醜。秤稱分重輕。顏容富入鑑。銖兩豈關衡。蘊微道超忽。剖證音泠泠。紙上掣牢鍵。舌端搖利兵。圓澈保真性。

客塵排妄情。有住卽非住。無行方是行。疎越捨吳典。朱絃鄙秦箏。淡薄貴無味。羊斟慙大羹。洪遠包乾坤。幽宿潛沉冥。岡煩跬步舉。頓達萬里程。廬遠尙莫曉。隱留曾誤聽。直須持妙說。共詣毗耶城。

薰字子溥。爲宣歙觀察使。前不治。薰以才力自將。牙將素驕。其謀逐出之。奔楊之後。分司東都。懿宗時。爲左丞。薰端勁。再知禮部。引寒俊士。類多遺老。號所居爲隱嵒。自號七松處士云。大中八年。掌文。誤以顏標爲魯公之後。以第一人處之。士子嘲曰。主司頭腦太冬烘。錯認顏標作魯公。鄭谷有故少師。從翁隱巖別業。亂後榛蕪。感舊愴懷之作。卽薰也。詩云。風騷爲士人。風俗作青塵。密行稱閭闔。明誠動晉紳。周旋居顯重。內外掌絲綸。妙主蓬壺籍。忠爲社稷臣。大儀墻仞峻。東轄紀綱新。聞善嘗開口。推公直爲身。立朝鳴珮貴。歸宅典衣貧。半醉看花晚。中餐煮菜春。晴臺隨鹿上。幽野約僧隣。理論知清越。清越江左詩僧。公甚稱之。生徒得李頻。藥香沾筆硯。竹色染衣巾。寄鶴眠雲叟。騎驢入室賓。咸通中。舉子乘馬。唯張高跨駟。延於門下。近將姚監比。自姚監祕合。主張風雅後。孤卿一人而已。僻與段卿親。故少常成式。與學辛勤章句。及徵孤卿爲前序。葉積池邊路。茶遲雪後薪。所難留著述。誰不秉陶鈞。喪亂時多變。追思事已陳。浮華重發作。雅正甚湮淪。宗從今何在。依棲素有因。七松無影響。孤卿植

松七枝。白號七松處士。雙淚益悲辛。猶喜子門秀。年來屈併伸。班即孤卿姪。孫登進士科。級也。

王軒

軒少爲詩。頗聞淇澳之篇。遊西江。泊舟亭蘿山下。題西施石曰。嶺上千峯秀。江邊細草春。今逢浣紗石。不見浣紗人。

軒登大和進士第

宋雍

范摠云。宋雍初無令譽。及嬰瞽疾。其詩名始彰。盧員外綸作擬僧之詩。僧清江作七夕之詠。劉隨州有眼作無眼之句。宋雍無眼作有眼之詩。詩流以爲四背。或云四倒。然辭意悉爲佳致。盧公詩云。願得遠公知姓字。焚香洗鉢過餘生。清江詩曰。唯愁更漏促。離別在明朝。劉隨州曰。細雨濕衣看不見。閑花落地聽無聲。雍詩曰。黃鳥不堪愁裏聽。綠楊宜向雨中看。

李摯

正元十二年。摯以宏詞振名。與李行敏同姓。同甲子。同年登第。俱二十五歲。又同門。摯嘗有詩曰。因緣三紀異。契分四般同。

韋 澳

字子斐。以宏詞登科。懿宗時。爲邠甯節度使。坐事罷鎮。以祕書監分司東都。嘗戲吟云。莫將韋監同殷鑒。錯認容身是保身。此句聞於京師。權倖尤怒之。

段文昌

古柏文云。是草木有異。於草木則靈。武侯祠前。柏壽千齡。盤根擁門。勢如龍形。含碧太空。散霧虛庭。合抱在於旁枝。駢梢葉之青青。百尋及於半身。蓄風雷之冥冥。攢柯垂陰。分翠間明。忽如虬螭。向空爭行。上承翔雲。孤鸞時鳴。下蔭芳苔。凡草不生。古色天風。蒼蒼玲玲。曾到靈山。老栢縱橫。亦有大者。莫之與京。於惟武侯。佐蜀有程。神其不昏。表此爲積。斯廟斯柏。實播芳馨。長慶二年六月題。

文昌字墨卿。有別業。在廣都縣之南龍華山。營杜門力學于此。俗謂之段公讀書臺。長慶初。朝議文昌少在西蜀。諳詳利病。詔授劍南節度使。有邑人贈詩曰。昔日騎驢學忍飢。今朝忽着錦衣歸。等閑畫虎驅紅旆。可畏登龍入紫微。富貴不由翁祖致。文章生得羽毛飛。廣都再去應惆悵。猶有江邊舊釣磯。

文昌還別業。有尋龍華山寺廣宣上人詩云。十里惟聞松桂風。江山忽轉見龍宮。正與休

師方話舊。風煙幾度入樓中。郭震亦有題龍華山詩曰。昔年曾到此山回。百鳥聲中酒一盃。最好寺邊開眼處。段文昌有讀書臺（出古今詩話）

文昌父鏐。爲江陵糾。文昌長自諸宮。客遊成都。韋南康與奏。釋褐爲賓從。後劉闢遂作外邑。高崇文收蜀。召復舊職。指其椅曰。此猶不足與君坐。文昌遽請歸闕。至興元。西鶴鳴驛。有僧倚巴山之隈。有前識。請文昌曰。去日旣逢梅藥綻。來時應見杏花開。至京。屢外擢。自相位拜劍南節度。西至鶴鳴。僧已物故。杏花方盛。

文昌客荊州。從事劍南帥幕。其後相穆宗。罷相鎮蜀。再相文宗。罷相帥荆南。復鎮蜀。太和九年卒。

文昌鎮蜀。有題武擔寺西臺詩云。秋天如鏡空。樓閣盡玲瓏。水暗餘霞外。山明落照中。鳥行看漸遠。松韻聽難窮。今日登臨意。多歡語笑同。

文昌晚夏登張儀樓。呈院中諸公詩云。重樓窈戶開。四望歛煙埃。遠岫林端出。清波城下迴。乍疑蟬韻促。稍覺雪風來。併起鄉關思。銷憂在酒盃。

姚向

和登武擔寺西臺詩云。開閣錦城中。餘閑訪梵宮。九層連畫景。萬像寫秋空。天半將身到。

江長與海通。提携出塵土。曾是穆清風。

向奉陪段相公晚夏登張儀樓詩云。秦相架翠材。登臨契上台。查從銀漢落。江自雪山來。儷曲親流火。凌風洽小杯。帝鄉如在目。欲下盡徘徊。

向爲節度判官。時長慶二年也。

溫會

登武擔寺西臺詩云。桑臺煙樹中。臺榭造雲空。眺聽逢秋興。篇辭變國風。坐愁高鳥起。笑指遠人同。始媿才情薄。躋攀繼韻窮。

晚夏登張儀樓詩云。危軒重疊開。訪古上徘徊。有舌嗟秦策。飛檄駕楚材。雲霄隨鳳到。物象爲詩來。欲和關山意。巴歌調更哀。

會以殿中侍御史爲安撫判官。

楊汝士時掌管記。和西臺詩云。清淨此道宮。層臺復倚空。偶時三伏外。列席九霄中。平視雲端路。高臨樹杪風。自憐榮末座。前日別池籠。

又和張儀樓詩云。從公城上來。秋近絕纖埃。樓古秦規在。江分蜀望開。遠山標宿雪。末席本寒灰。陪賞今爲忝。臨歡敢訴口。

李敬伯

登武擔寺西臺詩云。臺上起涼風。乘閑覽歲功。自隨台席貴。盡許羽觴同。樓殿斜暉照。江山極望通。賦詩思其樂。俱得詠時豐。

晚夏登張儀樓詩云。層屋架城隈。寶筵此日開。文鋒摧八陣。星分應三台。望雪煩襟釋。當歡遠思來。披雲霄漢近。慙覺出塵埃。敬伯試大理評事。爲觀察巡官。

姚康

晚夏登張儀樓詩云。登覽值晴開。詩從野思來。蜀川新草木。秦日舊樓臺。池景搖中座。山光接上台。近秋宜晚景。極目斷浮埃。

登武擔寺西臺詩云。松逕引清風。登臺古寺中。江平沙岸白。日下錦川紅。疎樹山根淨。深雲鳥跡窮。自慚陪末席。便與九霄通。

康試口武衛倉曹參軍。爲觀察推官。

康禮部試早春殘雪云。微暖春潛至。輕明雪尙殘。銀鋪光漸濕。珪破色仍寒。無柳花常在。非秋露正團。素光浮轉薄。皓質駐應難。幸得依陰處。偏宜帶月看。玉塵銷欲盡。窮巷起袁安。

魚縱云。水府乘閑望。圓波息躍魚。從來暴泥久。今日脫泉初。得志寧相忌。無心任宛如。龍門應可度。鯨室豈常居。掉尾方窮樂。遊鱗每自舒。乘流千里去。風力藉吹嘘。

康字汝諧。南仲孫也。登元和十五年進士第。大中時爲太子詹事。開成時曾以贓敗。

張正元

冬日可愛詩云。寒日臨清晝。遶天一望時。未消押徑雪。先暖讀書帷。屬思光難駐。舒情影若遺。晉臣曾比德。謝客昔言詩。散彩寧偏照。流陰信不追。餘輝如可就。迴燭幸無私。

東野聞夜啼。贈張正元云。寄泣須寄黃河泉。此中怨聲流徹天。愁人獨有夜燈見。一紙鄉書淚滴穿。

正元登正元五年進士第。

楊嗣復

丁巳歲八月祠祭畢。因題臨淮公舊碑詩云。齊莊修祀事。旌旆出郊闈。薤草軒墀狹。塗墻赭堊新。謀猷期作聖。風俗奉爲神。酌酒成均澤。持兵列偶人。非才膺寵任。異代揖芳塵。况是平津客。碑前淚滿巾。

楊汝士和云。古柏森然地。修嚴蜀相祠。一過榮異代。三顧盛當時。功德流何遠。馨香薦未

光敬名探國志。飾像慰眈思。昔謁從征蓋。今聞擁信旗。固宜光寵下。有淚刻前碑。

臨淮公武元衡也。元和初元衡鎮蜀。嗣復爲節度推官。後二十七年。嗣復鎮蜀。時大和九年也。汝士爲東川節度使。故相唱和。汝士曾爲蜀帥段文昌掌管也。

炙轂子

牡丹詩云。牡丹妖豔亂人心。一國如狂不惜金。曷若東園桃與李。果成無語自成陰。

松詩云。寒松聳拔倚蒼岑。綠葉扶疎自結陰。丁固夢時還有意。秦皇封日豈無心。常將正節柄孤鶴。不遣高枝宿衆禽。好是特凋羣木後。護霜凌雪翠踰深。

竹詩云。庭竹森疎玉質寒。色包葱碧盡琅玕。翠筠不染湘娥淚。班籜堪裁漢主冠。成韻含風已蕭瑟。媚澁凝滌更檀奕。此君引鳳爲龍日。聳節稍雲直上看。

炙轂子王叡也。元和後詩人。

楊 厚

早起云。星漢轉寒更。伊余索寞情。鍾催歸夢斷。鴈引遠愁生。危壁蘭光暗。疎簾露氣清。閑庭聊一望。海日未分明。

厚。正元間詩人。

劉郇伯

早行云。鎮靜人猶寢。天高月自涼。一星楚戍火。殘月半橋霜。客老愁塵下。蟬寒怨路傍。青山依舊色。宛是馬卿鄉。

郇伯與范鬱郎中爲詩友。范曾得一句云。歲盡天涯雨。久而莫屬。郇伯曰。何不曰。人生分外愁。范甚賞之。出北夢瑣言。

王觀

早行云。雞唱催人起。又生前去愁。路明殘月在。山露宿雲收。村店煙火動。漁家燈燭幽。趨名與趨利。行役幾時休。

觀大曆正元間人。

陳上美

咸陽懷古云。山連河水碧。氛氳瑞氣東。移擁聖君秦。苑有花空笑。日漢陵無主自侵雲。古槐堤上鶯千轉。遠渚沙中鷺一羣。賴與淵明同把菊。煙郊四望夕陽曛。

上美登開成進士第。

侯洵

冽金谷園懷古云。金谷千年後。春花發滿園。紅芳徒笑日。穠豔尙迎軒。雨濕輕光軟。風搖碎影翻。猶疑施錦帳。堪歎罷朱紈。愁罷鶯吟澹。啼容露綴繁。慙慙問前事。桃李竟無言。

冽登元和六年進士第。

崔樞

賜耆老布帛云。殊私及耆老。聖德賑黎元。布帛忻天賜。生涯作主恩。情均皆挾纜。禮異賁丘園。慶洽時方泰。仁沾月告存。寧知酬雨露。空識荷乾坤。擊壤將何幸。徘徊望九門。

裴埴舉宏詞。崔樞考之。落第。及埴爲宰相。擢樞爲禮部。笑謂樞曰。聊以報德也。終於祕書監。

順宗時有詔曰。古之所以教太子。必茂選師傅。以輔翼之。法於訓詞。而行其典禮。左右前後。罔非正人。是以教諭而德成也。給事中陸贄。中書舍人崔樞。積學懿文。守經據古。夙夜講習。庶協于中。並充皇太子侍讀。

陳彥博

恩賜魏文正公諸孫舊第。以導直臣云。阿衡隨逝水。池館主他人。天意能疇德。雲孫喜庇身。生前由直道。歿後振芳塵。雨露新恩日。芝蘭故里春。勳庸流十代。光彩映諸鄰。共喜升平代。

從茲得諫臣。

前定錄云。彥博元和中。與謝楚同爲廣文生。夢一官司列几案上。有尺牘如金字者。問之。曰。明年進士之名。見其名在三十二。從上二人。皆李姓。而無楚名。明年果如夢。二李卽李願行。李仍叔也。時元和五年。明年。楚於于尹躬下擢第。

白居易爲翰林學士。奏云。今日奉宣令撰李師道請收賄魏證宅。還其子孫。甚合朕心。允依來奏者。臣伏以魏證太宗宰相。盡忠輔佐。以致太平。在其子孫。合加優卹。事關激勸。合出朝廷。師道何人。輒掠此美。伏願明勅有司。特以官錢收賄。使還後嗣。以勸忠臣。則事出皇恩。美歸聖德。憲宗深然之。其後有司以爲詩題試進士。

郭良驥

白蘇州至望亭驛有作云。南浦（菰蒲）澆白蘋。東吳黎庶逐黃巾。野棠白發空流水。江燕初歸不見人。遠岫依依如送客。平田渺渺獨傷春。淮中迴首長洲苑。烽火年年報虜塵。

觀詩所載。疑李錡叛時事也。

崔叡

叡字乾錫。邢州刺史。會劉稹反。歸朝授考功郎中。中書舍人。李德裕之謫。叡草制。不盡書。

其過。貶端州刺史。

施肩吾與之同年。不睦。瑕舊失一目。以珠代之。施嘲之曰。二十九人及第。五十七眼看花。元和十五年也。

李景遜

景遜。字後已。贈太尉澄孫也。大中中。進御史大夫。威肅當朝。爲大夫三月。蔣伸輔政。宣宗盡書羣臣名。內器中禱。憲宗神前。射取之。而景遜名不得。乃見宰相。自陳。考深當代。卽拜西川節度使。景遜好獎寒士。如李蔚。楊知退。所善。蘇滌。裴夷直。

寄華州周侍郎。立秋日。奉詔祭嶽。詩云。關河豁靜曉。雲開。承詔秋祠太守來。山霽蓮花添翠黛。路陰桐葉少塵埃。朱轡入廟。威儀肅。玉佩昇壇。步武回。往歲今朝幾時事。謝君非重我非才。

自大中至咸通。相白敏中。次畢誠。曹確。使相羅劬權。崔相植。由。戲曰。可以歸矣。近日中書皆藩臣。謂畢白。曹羅。皆藩姓也。始自蔣伸。景遜在蜀。聞報曰。不能伏事斯人也。遽託疾離鎮。有詩曰。成都十萬戶。拋若一鴻毛。（出北夢瑣言）

唐球

球有詩名。如臨池洗硯云。恰似有龍深處臥。被捕驚起黑雲生。又有漸寒沙上鷺。欲暖水邊村。亦佳句也。球居蜀之味江山。方外之士也。爲詩撚麤。爲圓納之大瓢中。後臨病。投瓢於江。曰。斯文苟不沉沒。得者方知吾苦心爾。至新渠。有識者曰。唐山人瓢也。接得之。十纒二三。其題有處士隱居云。不信最清曠。及來愁已空。數點水泉雨。一溪霜葉風。業在有山處。道成無事中。酌盡一樽酒。老夫顏亦紅。贈行如上人云。不知名利苦。念佛老岷峨。衲葉雲千片。香焚篆一窠。戀山人事少。憐客道心多。日日齊鍾罷。高懸瀟水羅。

題青城范賢觀云。數里緣山不厭難。爲尋真訣問黃冠。苔鋪翠點山橋滑。松織香稍古道寒。晝傍綠畦薈嫩玉。夜開紅竈燃新丹。孤鐘已斷泉聲在。風動瑤花月滿壇。

贈僧云。曾聞半偈雪山中。其葉翻時理盡通。般若常添持戒力。落叉誰算念經功。雲間曉月應難染。海上虛舟自信風。長說滿庭花色好。一枝紅是一枝空。（已上詩見芳亭客話）

球生於唐末。至性純慤。篤好雅道。放曠疎遠。邦人謂之唐隱居。或云。王建帥蜀。召爲參謀。不就。今以其故居爲隱居寺。

北夢瑣言曰。球詩思遊歷。不出二百里。

李洞贈唐山人云。長鬚長我髮。七十色如鰲。醉眼青天小。吟情太華低。千年松籬屋。半夜

雨連溪。叩蜀路無限。往來琴自携。（不知是球否也。）

唐詩紀事卷第五十一

白敏中

魏扶

馬植

崔鉉

殷堯藩

沈亞之

裴夷直

楊敬之

房千里

厲元

喻亮

楊衡

符載

于彥威

繁知一

楊洵美

白敏中

敏中字用晦。武宗欲召用。居易德裕卽薦敏中。文頹其兄。而有器識。卽日知制誥。宣宗立。德裕貶。乃力試之。五年十三遷。至門下侍郎。咸通二年。以太傅致仕卒。

至日上公獻壽酒云。候曉天門闕。朝天萬國同。瑞雲昇觀闕。香氣映華宮。日色臨仙籞。龍顏對昊宮。羽儀瞻百姓。獻壽侍三公。化被君王洽。恩沾草木豐。自欣朝玉座。宴此詠皇風。

敏中方爲郎。唯李德裕時以國器重之。大中初。邊鄙不寧。吐蕃屈強。宣宗決於致討。延英

先問宰臣。敏中首奏興師。遂爲統帥。宣宗初覽捷書云。我知敏中必殄兇醜。敏中凱旋。與同列宰輔進詩。

敏中詩云。一詔皇城四海頒。醜戎無數束身還。戍樓吹笛人休戰。牧野嘶風馬自閑。河水九聲收數曲。天山千里鎖諸關。西邊北塞今無事。爲報東南夷與蠻。

魏扶詩云。蕭關新復舊山川。古戍秦原景象鮮。戎虜乞降歸惠化。皇威漸被懾腥膻。穹廡遠戍煙塵滅。神武光揚竹帛傳。左衽盡知歌帝澤。從茲不更備三邊。

崔鉉詩云。邊陲萬里注恩波。宇宙羣方洽凱歌。右地名王爭解辯。遠方戎壘盡投戈。煙塵永息三秋戍。瑞歲遙清九折河。共偶聖明千載運。更觀俗阜與時和。

王起長慶中再主文柄。意欲以第一人處敏中。恨其與賀拔慧爲友。慧有文而落魄。因密令親知述意。俾與慧絕。敏中欣然曰。如所教。旣而慧造門。左右給以敏中他適。慧遲留不言而去。俄頃敏中躍出。見慧於是。悉以實告。乃曰。一第何門不致。奈輕負至交。相與歡醉。或語於起。起曰。我此只得敏中。今當更取慧矣。遂以第一人處慧。而敏中居三焉。

杜牧云。今皇帝一詔會兵。不日功集。河湟關郡。次第歸降。因獻詩云。捷書皆應運謀期。十萬會無一鏃遺。漢武慙誇朔方地。宣王休道太原師。威加塞外寒來早。恩入河源凍合遲。聽取

滿城歌舞曲。涼州聲韻喜參差。牧又和敏中詩。呈上三相云。行看臘破好年光。萬壽南山對未央。黠戛可汗修職貢。文思天子復河湟。應須日御西巡狩。不假星弧北射狼。吉甫裁詩歌盛業。一篇江漢美宣王。牧又作河湟詩云。元載相公會借筇。憲宗皇帝亦留神。旋見衣冠就東市。忽遺弓劍不西巡。牧羊驅馬雖戎服。白髮丹心盡漢臣。唯有涼州歌舞曲。流傳天下樂閑人。

魏扶

扶登太和四年進士第。大中初知禮闈。入貢院。穎詩云。梧桐葉落滿庭陰。鎖閉朱門試院深。曾是當年辛苦地。不將今日負前心。勝出無名子。削爲五言詩。以譏之。

李義叟。義山弟也。是歲登第。義山因上魏公詩曰。國以斯文重。公仍內署才。風標森太華。星象逼中台。朝滿遷鸞侶。門多吐鳳來。寧同魯司寇。只鑄一顏回。

馬植

敏中之捷。植時爲相。和敏中詩云。舜德堯仁化犬戎。許提河隴欵皇風。指揮獮武皆神算。恢拓乾坤是聖功。四帥有征無汗馬。七關雖戍已弮弓。天留此事還英主。不在他年在大中。

同華解最利。元和中。令狐楚鎮三峯。時及秋賦。榜云。特加試五場。莫有至者。唯盧洪正請試。已試兩場。而植不解。植將家子。從事竊笑曰。此未可知。已而試登山採玉賦。略曰。文豹且異。

於驪龍探斯疎矣。白石又殊於武蚌。剖莫得之。公大伏其精。遂奪解元。後洪正自丞郎將判。齏俄爲植所據。復以手札戲植曰。昔日華元已遭毒手。今來齏務。又中老拳。植罷安南都護。又除黔南。殊不得意。維舟峽中古寺。寺前有長堤。夜月明甚。見白衣緩步堤上。吟曰。截竹爲筒作笛吹。鳳凰池上鳳凰飛。勞君更向黔南去。卽是陶鎔萬類時。邀問則失之矣。後自黔南召入。爲大理遷刑判鹽鐵。拜相。

植字存之。爲李德裕所抑。頗怨望。宣宗立。白敏中當國。凡德裕所不善。悉不次用之。故植遂相。

崔鉉

魏公鉉。元略之子也。爲兒時。隨父訪韓晉公滉。滉指架上鷹。令詠焉。吟曰。天邊心膽架頭身。欲擬飛騰未有因。萬里碧霄終一去。不知誰是解條人。滉曰。此兒可謂前程萬里也。寶曆三年。登第。久居廊廡。三擁節旄。宣宗嘗謂侍臣曰。崔鉉眞貴也。裴休眞措大。初李石鎮江陵。辟爲戎倅。一旦告去。旣入京華。俄昇翰苑。造朝凡三歲。石未離荆渚。崔旣秉鈞衡。石馳牋賀之曰。某早拜光塵。叨承眷與。深蒙異分。屢接清言。幸曾顧於厚恩。俯見循於末契。去載分麾南楚。拜節西秦。思賢方詠於嘉魚。棲止實慙於威鳳。賓筵初啓。曾陪樽俎之歡。將幕未移。已在陶鎔之下。

光生鄰節喜溢幃門豈唯九士獲安斯亦一方多幸乃掌記李隲之詞也。

鉉字台碩和武宗與李德裕不叶罷復相宣宗除楊州大都督府長史封魏國公宣宗於太液亭賦詩宴餞有七載秉鈞調四序之句識者榮之。

殷堯藩

元和九年韋貫之掌文衡堯藩羅文黜矣尙書楊漢公乃貫之前榜門生盛言堯藩屈貫之爲之重收是年登第（摭言謂之旣落復收）

三月初三日千家與萬家蝶飛秦地草鶯入漢宮花鞍馬皆爭麗笙歌盡鬪奢吾師無所願唯願老煙霞曲水公卿宴香塵盡滿街無心修禊事獨步到禪齋細草縈愁目繁花逆旅懷綺羅人走馬遺落鳳凰釵（二章已上贈都上人）

堯藩登第許渾贈詩云幾載聞名翰墨林爲從知己信浮沉青山有雪譜松性碧落無雲稱鶴心帶月獨歸蕭寺遠翫花頻醉庾樓深尋思一見如瓊樹空把新詩舊日吟

堯藩從李翱長沙幕府後以侍御官江南姚合有送堯藩歸同州詩

堯藩爲永樂令雍陶寄詩云古縣蕭條秋景晚昔時陶令亦如君

堯藩有憶江南詩三十章皆蘇杭事樂天詩曰江南名郡數蘇杭寫在殷家三十章君是

旅人猶苦憶，我爲刺史更難忘。

堯藩有宮詞云：吳宮愛歌舞，夜夜醉嬋娟。見日吹紅燭，和塵掃翠鈿。徒令句踐靈，不信子胥賢。若問長洲草，荒涼無限年。又有館娃宮詩云：宮女三千去不回，眞珠翠羽是塵埃。夫差舊國久破碎，紅燕自歸花自開。又有暮烟葵葉屋，秋月竹枝歌句。欲射狼星把弓箭，休將熒火讀詩書。（句）

右張爲取作主客圖。

堯藩未第時，許渾寄詩云：直道知誰用，經年向水濱。宅從栽竹貴，家爲買書貧。就學多新客，登朝盡故人。蓬萊自有路，莫羨武陵春。又酬堯藩云：相知愧許詢，寥落向溪濱。竹馬兒猶小，荆釵婦慣貧。獨愁憂過日，多病不如人。莫恠青袍選，長安隱舊春。

沈亞之

字下賢，登進士第。大和初，李同捷反，詔兩河諸鎮出兵，反無功，乃授柏耆、德利、行營諸軍計會使。亞之以殿中侍御史爲判官，諭旨。會李祐平德州，同捷窮，請降。耆乃馳入滄，誅同捷。諸將嫉其功，比奏攢詆，文宗不獲已，貶耆循州司戶參軍。亞之南康尉，張祐以詩送云：秋風江上草，先是客心摧。萬里故人去，一行新鴈來。山高雲緒斷，浦迴日波頽。莫恠南康遠，思相不可裁。

亞之吳人。元和七年不第。李賀以詩送云。吳興才人怨春風。桃花滿陌千里紅。紫絲竹斷駿馬小。家住錢塘東復東。是也。

杜牧之贈詩云。斯人清唱何人和。草逕苔荒不可尋。一夕小敷山下夢。水如環珮月如襟。亞之村居詩云。無樹巢宿鳥。無酒共客醉。月上蟬韻殘。梧桐陰繞地。獨出村舍門。吟劇微風起。蕭蕭蘆荻叢。叫嘯如山鬼。應緣我憔悴。爲我發愁思。

五月發石頭城。步望前船。示弟詩云。客子去淮陽。蹉跎客夢長。水關開夜禪。霧掉起晨涼。烟月期同賞。風波忽異行。隱帆口撼櫓。轉瀨指遙墻。蒲葉錢刀綠。筠筒楚粽香。因書報惠遠。爲我憶檀郎。

李商隱擬沈下賢詩云。千二百輕鸞。春衫瘦着寬。倚風行稍急。含雪語應寒。帶火遺金斗。兼珠碎玉盤。河陽看花過。曾不問潘安。

裴夷直

王質傳云。李德裕擢爲河南尹。宣歙觀察使幕府。若河東裴夷直。天水趙哲。隴西李行方。梁國劉蕢。皆一時選云。

獻蕢書情云。白髮添雙鬢。空宮又一年。音書鴻不到。夢寐兔空懸。地遠星辰側。天高雨露

偏聖期知有感。雲海慢相連。

同樂天中秋夜洛河翫月二首詩云。清洛半秋懸璧月。練船當夕泛銀河。蒼龍領底珠皆沒。白帝心邊鏡乍磨。海上幾時霜雪積。人間此夜管絃多。須知天地爲鑪意。盡取黃金鑄作波。又云。不熱不寒三五夕。晴川朗月正相臨。千珠競沒蒼龍領。一鏡高懸白帝心。幾處淒涼綠地遠。有時惆悵值雲陰。如何清洛如清晝。共見初升又見沉。

李景遜傳云。所善蘇滌。裴夷直皆爲宗閔嗣復所擢。故景遜在會昌時。抑厭不遷。

夷直字禮卿。文宗時爲右拾遺。張克勤以五品官。推與其甥。夷直時爲禮部外郎。劾曰。是開後日賣爵之端。詔聽遂著于令。爲中書舍人。武宗立。視冊牒不肯書。出刺杭州。斥驩州司戶參軍。宣宗初。復拜江華等州刺史。終散騎常侍。夷直戲唐仁烈詩云。自知年幾偏應少。先把屠蘇不讓春。儻更數年逢此日。遂應惆悵羨他人。

楊敬之

禾黍正離離。南園剪白芝。細腰沉趙女。高髻唱蠻姬。路醜前崗月。梳慚一領絲。鄉人不可語。獨念畏人知。(敬之客思吟)

姚合寄楊祭酒云。日日新詩出。城中寫不禁。清光宜對竹。閑雅勝聞琴。門戶饒秋景。兒童

解令吟。雲山持管盡。莫惜別人尋。

敬之字茂孝。文宗命爲祭酒。兼太常少卿。是日。二子戎載登科。時號楊家三喜。敬之華山賦。最爲韓愈李德裕所稱。士林一時傳布。霜樹烏棲夜。空街雀報明。碧山相倚暮。歸鴈一行斜。右張爲取作主客圖。

房千里

房千里。博士初上第。遊嶺徼。詩序云。有進士韋滂者。自南海邀趙氏而來。爲余妾。西上京都。調于天官。乃與趙別約。中秋爲會期。趙極悵戀。余乃杼詩寄情。曰。鸞鳳分飛海樹秋。忍聽鐘鼓越王樓。只應霜月明君意。緩撫瑤琴送我愁。山遠莫教雙淚盡。鴈來空寄八行幽。相如若返臨邛市。畫舸朱軒萬里遊。(萬里橋在蜀州。)

房至襄州。逢渾侍御。赴引農蕃。揚之命。乃以情意相託。許到府邸。遣人訪之。則趙氏却從韋矣。渾寄房詩曰。春風白馬紫絲韁。正值蠶眠未採桑。五夜有心隨暮雨。百年無節待秋霜。重尋綉帶朱滕合。卻認羅裙碧草長。爲報西遊誠離恨。阮郎纔去嫁劉郎。

千里以罪居廬陵。作所居竹室記云。子方窮。不能奮其處。于是亦宜矣。千里字鶴舉。大和進士也。終於高州刺史。

馬使君與千里俱貶端州。李羣玉留別詩云：俱來海上嘆煙波。君佩銀魚我觸羅。經國才微甘放蕩。專城年少豈蹉蛇。應憐旅夢千重思。共愴離心一曲歌。唯有管絃知客意。分明吹出感恩多。

厲元

元日觀朝云：玉座臨新歲。朝盈萬國人。火連雙闕曉。仗列五門春。瑞雪銷鴛瓦。祥光在日輪。天顏不敢視。稱慶拜空頻。

元大和二年進士。終於侍御史。有子自南登中和進士第。

元有從軍行云：邊草旱不春。劍花增野塵。戰場收驥尾。清澗怯龍鱗。帆色起歸越。松聲厭避秦。幾時逢范蠡。處處是通津。

右張爲取作主客圖。

姚合題厲侍御所居云：幽棲一畝宮。清峭似山峯。隣里不通徑。俸錢惟買松。野人時寄宿。谷鳥自相逢。朝路宋前是。誰知曉起慵。

喻堯

元日卽事云：斂板賀交親。稱觴詎有巡。年老悲擲舊。景色喜呈新。水柳煙中重。山梅雪後

眞不知將白髮。何以度青春。

贈李商隱云。羽翼恣搏扶。山河使筆驅。月疎吟夜桂。龍失詠春珠。草細盤金勒。花繁倒玉壺。徒嗟好章句。無力致前途。

浴馬云。解控復收鞍。長津動細漣。空蹄沉綠玉。闌臆沒連錢。沫漩橋聲下。嘶盤柳影邊。常聞粟龍性。固與白波便。

姚合有送喻冕歸毗陵詩云。闕下詩名出。鄉中賦籍除。又曰。吾亦家吳者。無因見弊廬。杜荀鶴敍雪寄冕詩曰。比時行逕無人迹。唯望音徽問寂寥。

冕。毗陵人。開成進士也。卒於烏程令。

顏淵明鏡覺。思苦白雲知。(句)滄洲迷釣隱。紫閣負僧期。(句)酬難塵鬢皓。坐久壁燈青。(句)滄洲未歸迹。華髮受恩心。(句)

右張爲取作主客圖。

北夢瑣言云。冕體閎仙爲詩。嘗謁杜紫微不遇。乃曰。我詩無羅綺鉛粉。宜其不售也。

冕與方干友善。干嘗贈詩云。知心似古人。歲久分彌親。離別波濤闊。留連槐柳新。蠓陵寒蕙酒。漁浦夜垂綸。自此星居後。音書豈厭頻。

又哭臯詩云。日夜役神多損壽。先生下世未終年。撰碑縱託登龍伴。營奠應支賣馬錢。孤壘陰風吹細草。空牕濕氣漬殘篇。人間別更無冤事。到此誰能與問天。

楊 衡

初隱廬山。有盜其文登第者。衡因詣闕。亦登第。見其人盛怒曰。一一鶴聲飛上天。在否。答曰。此句知兄最惜。不敢偷。衡笑曰。猶可恕也。

隨雲步入青牛谷。青牛道士留我宿。可憐夜久月明中。唯有壇邊一枝竹。（宿青牛）
都無看花意。偶到樹邊來。可憐枝上色。一一爲愁開。（題花樹）

竹亭送姪侑云。落葉寒擁壁。清霜夜霑石。正是憶山時。復送歸山客。殷勤一樽酒。曉月當窗白。

寄廬山隱者云。風鳴雲外鐘。鶴宿千年松。相思查不見。月出山重重。

哭李象云。白鷄黃犬不將去。寂寞空餘葬時路。草死花開更幾年。後人知是何人墓。憶君思君獨不眠。夜寒月照青楓樹。

邊思云。蘇武節旄盡。李陵音信稀。花當隴上發。人向壘頭歸。

仙女辭云。玉笋初侍紫皇君。金縷鴛鴦滿絳裙。仙宮一閉無消息。遙結芳心向碧雲。

孟東野有悼吳興楊衡詩云。君生雲水清。君死響水渾。空有骨肉親。哭得日月昏。大夜不復曉。古松長閉門。琴絃綠水絕。詩句青山存。昔爲芳春顏。今爲芳草根。獨恨冥漠理。先儒未嘗言。衡與符載者。羣隱廬山。號山中四友。

衡寄微公云。北風吹霜霜月明。荷葉枯盡越水清。別來幾度龍宮宿。雪山童子應相逐。題山寺云。千峯白路後。雪壁掛殘燈。曙色海邊月。經聲松下僧。意閑門不閉。年去水空澄。稽首如何問。森羅盡一乘。

送孔周之南海謁王尚書云。泛棹送流萍。桂寒山更青。望雲生碧落。看日下滄溟。潮盡收珠母。沙閑拾翠翎。自趨龍戟下。再爲頌芳馨。

符載

載字厚之。蜀人有奇才。始與楊衡。宋濟。習業青城山。衡擢第。濟老死無成。唯載以王霸自許。恥於常調。韋臯鎮蜀。辟爲支使。雖日受知。尙多假塞。臯嘗於二十四化。設醮請禳齋詞。于時陪飲於摩訶池。載離席盥漱。命小吏十二人。捧硯人分兩題。緩步池間。各授口占。其敏速如此。劉闢時爲金吾倉曹參軍。始依臯焉。載與撰直贊云。矯矯化初。氣傑文雄。靈螭出水。秋鷄乘風。行義則固。輔仁乃通。他年良覲。麟閣之中。及臯卒。闢總留務。載亦在幕中。及闢敗。載遂免禍。載

居廬山。遣三尺童子。持數幅書。乞買山錢百萬於于頔。于卽與之。

柳子厚賀趙江陵宗儒啓云。伏聞以武都符載爲記室。天下立志之士。雜然相顧。繼以歎息。知爲善者得其歸。嚮流言者有所間執。直道之所行。義風之所物。堂堂焉。實在荆山之南矣。夫以符君之藝術志氣。爲時聞。人才位未會。盤旋固久。中間因緣。陷在危邦。與時偃仰。不廢其道。而爲見忌嫉者。橫致唇吻。房給事以高節特立。明之於朝。王吏部以清議自任。辨之於外。然猶小人浮議。困在交戟。凡諸侯之欲得符君者。城聯壤接。而惑於騰沸。環視相讓。莫敢先舉。及受署之日。則皆開口垂臂。悵望悼悔。譬之採珠於海。而徑寸先得。則衆皆怏然罷去。知奇寶之有所歸也。嗚呼。巧言難明。下流多謗。自非大君子出世之氣。則何望焉。瞻望清風。若不在天外。無任感激欣躍之至。(房式傳云。劉闢發兵書牒首曰。闢副曰式。參謀曰符載。似謗也。

崔羣送載歸蜀覲省序云。旄頭光明。垂三十載。不習俎豆。化爲侯王者。十有八九焉。由是隱逸憔悴。羔鴈不行。蒼山沈沈。側陋不顯。建中初。有峨嵋客符君。發六籍。棹三湘。深入匡廬。絕跡半紀。學窺顏子之門闕。文紹陳君之骨鯁。逸慕嚴光之垂釣。志毀管寧之不欺。結廬熙熙。人不知其然也。頃予奉命江西。三年往復。彭蠡未嘗不詠湖月。漱天倪。造符君雲扃。宿五老峯下。動更晦朔。不理還權。偶丹霄至人。白鶴羽客。奉靈芝。跪天壇。相顧永息乎蓬瀛。豈復又縈於塵

網。賴君超澹。愴興舊遊。雖笑語飲食如常。終忽忽若居大夢。君家在岷蜀。展愛高堂。將聖賢典籍。充人子幣帛。期所以激衰俗。扇清風。方伯地君。不以厚禮遲吾子。予未之信。秋九月。楚人歌採蘭以送之。

或云。載始隱廬山。不爲章句學。正元中。李巽爲江西觀察。薦其材。授奉禮部郎。爲南昌軍副使。繼辟西川。韋臯掌記。澤潞。鄆士美參謀。歷協律郎。監察御史。卒。嘗以牋叩襄陽樊澤曰。故處士孟浩然。丘壘頽沒。公欲更築大墓。久之未遑。誠令好事者。乘而有人。負公風志矣。澤乃更爲刻碑。鳳林山南村。寵其墓。

王彥威

長安舊俗。以不歷臺省。出領廉車節鎮者。率呼爲鹿官。大變。重內而輕外。今東京皇城乾元門。舊章武軍鼓角樓也。節度使王彥威。有詩刻石在其上。曰。天兵十萬勇如貔。正是酬恩報國時。汁水波瀾噴鼓角。隋堤楊柳拂旌旗。前驅紅旆關西將。坐間青蛾趙國姬。寄語長安舊冠蓋。鹿官到底是男兒。彥威自太常博士。出辟使府。至茲鎮。故有是句。後梁氏建國。其石不知所存。薛能亦有謝寄茶詩云。鹿官寄與真口却。賴有詩情合得嘗。洪文館舊不置學士。文宗特置一員。以待彥威爲戶部侍郎。邊兵訴所賜不時。縑皆敵惡。貶衛尉卿。俄爲忠武節度。徙宣武卒。

繁知一

樂天除蘇州刺史。自峽溪流赴郡。時秣歸縣繁知一。聞居易將過巫山。先於神女祠粉壁大書之曰。忠州刺史今才子。行到巫山必有詩。爲報高唐神女道。速排雲雨候清祠。居易覩處暢然。邀知一至。曰。歷陽劉郎中禹錫。三年理白帝。欲作一詩而不能。罷棹經過。悉去千餘詩。但留四章而已。

沈佺期詩曰。巫山高不極。合沓奇狀新。閭谷疑風雨。幽崖若鬼神。月明三峽曙。潮滿九江春。爲問陽臺客。應如入夢人。

王無競詩曰。神女向高唐。巫山下夕陽。徘徊作行雨。婉孌逐荆王。電影江前路。雷聲峽外長。朝雲無處所。臺館曉蒼蒼。

皇甫冉詩曰。巫峽見巴東。迢迢出半空。雲藏神女館。雨到楚王宮。朝暮泉聲落。寒暄樹色同。清猿不可聽。偏在九秋中。

李端詩曰。巫山十二重。皆在碧空中。迴合雲藏日。霏微雨帶風。猿聲寒度水。樹色暮連空。悲向高唐去。千秋見楚宮。居易吟四篇。與繁生同濟。卒不賦詩。

答李昌期詩云。三山載羣仙。峨峨鹹浪中。雲衣翦不得。此路安可從。我生亦何事。出門如飛蓬。白日又黃昏。所悲遙草空。蟲聲故鄉夢。枕上禾黍風。吾道如未喪。天運何時通。

洵美。登寶曆元年進士第。終監察御史。

洵美有慕鷗不噪禁城樹。衙鼓未殘兵衛秋之句。口答昌期詩。張爲取作主客圖。

唐詩紀事卷第五十二

雍裕之 裴潏 皇甫曙

李肱 皇甫松 徐凝

張祐 崖涯 盧儲

趙璜 柴夔 王繼勳

夏鴻 曹汾 楊鴻

易重

雍裕之

敢競桃李色。自呈刀尺功。蝶猶迷剪翠。人豈辨栽紅。（煎綵花）

野酌亂無巡。送君兼送春。明年春色至。莫作未歸人。（春晦送客）

裕之。正元後詩人也。

五雜組云。五雜組。刺繡窠。往復還。織錦梭。不得已。戍交河。

自君之出矣。寶鏡爲誰明。思君如隴水。長聞嗚咽聲。

裴 潏

長安豪貴惜春殘。爭賞先開紫牡丹。別有玉杯承露冷。無人起就月中看。

長安三月十五日。兩街看牡丹甚盛。慈恩寺元果院花最先開。太平院開最後。潏作白牡丹詩。題壁間。太和中。駕幸此寺。吟翫之久。因令宮嬪諷念。及暮歸。則此詩滿六宮矣。

潏。河東人。柳泌爲憲宗治丹劑。潏上疏極諫。帝卒以藥棄天下。世以爲知言。潏以兵部侍郎卒。嘗哀古今辭章。綺文選。號大和通典。上之。當時之士。非與遊者不取。世恨其隘。

開成元年。李衛公分司東都。居平泉別墅。潏述其素尚。賦四言詩十四章。兼述山泉之美。明年。衛公觀察浙西。潏自兵侍尹河南。乃刻于石。首章云。動靜有源。進退有期。用在得正。明以知微。夫惟哲人。會且有歸。靜固致動。安每慮危。將憩于盤。止亦先機。

皇甫曙

立春日。呈宮傳侍郎云。朝旦微風吹曉霞。散爲和氣滿家家。不知容貌潛消落。且喜春光動物華。出問池冰猶塞岸。歸尋園柳未生芽。摩娑酒饜重封閉。待入新年共賞花。

曙。元和十一年。中書舍人李逢吉。下登第。逢吉所擢。多寒素。時有詩曰。元和天子丙申年。三十三人同得仙。袍似爛銀文似錦。相將白日上青天。是歲高澣第一人。劉端夫行。李方周匡。

物。廖有方輩皆預選。寶曆間。崔從鎮淮南。署爲行軍司馬。

李肱

開元太平日。萬國賀豐歲。梨園馱舊曲。玉座流新製。鳳管遞參差。霞衣競搖曳。宴罷水殿空。簾餘香草細。蓬壺事已久。仙樂功無替。誰肯聽遺音。聖明知善繼。

肱開成二年。試霓裳羽衣曲詩也。是年秋。帝命高銜復司貢籍。詔曰。夫宗子維城。本枝百代。封爵所宜。無令廢絕。常年宗正寺解送人。恐有浮薄。以忝科名。在卿精揀藝能。勿妨賢路。所試賦。則准常規。詩則依齊梁體格。乃試琴瑟合奏賦。霓裳羽衣曲詩。主司先進五人。詩其最佳者。李肱。次則王收。乃以勝元及第。帝覽之曰。近屬如肱者。其不忝乎。

高銜奏曰。臣銜。昨日奉宣進旨。令將進士所試詩賦進來者。伏以陛下聰明文思。天縱聖德。今年詩賦題目。出自宸衷。體格雅麗。意思遐遠。諸生捧讀相賀。自古未有。倍用研精覃思。磨礪緝諧。其今年試詩賦。比於去年。又勝數等。臣日夜考校。敢不推公。就中進士李肱。霓裳羽衣曲詩一首。最爲超出。更無其北。詞韻既好。去就又全。臣前後吟詠。近三五十遍。雖使何遜復生。亦不能過。兼是宗枝。臣與狀頭第一人。以獎其能。次張堂詩一首。亦絕好。其次李肱。臣與第二人。其次沈黃中。琴瑟合奏賦。又似文選中雪月賦體格。臣與第三人。其次王收。賦。自立意緒。言

語不凡。臣與第四人。其次柳棠。詩賦興思敏速。日中便成。臣與第五人。凡此五卷詩賦。擢其中科。實所不憚。其餘三十五人。或獎舊文。別錄人材。非止一途。四面搜擇。臣並與及第。李肱舊文亦好。人物絕奇。每事且他日必爲卿相。宗枝之俊。實謂難得。况屬籍之中。讀書爲文者甚少。伏望聖恩。俯留宸覽。李肱等三人詩賦。若有不堪。敢受欺天之罪。如或可採。伺候聖心。其李肱詩賦。伏望陛下聖慈。特賜降獎飾。宣示百寮。以勸皇族修飾之道。臣謬忝主司。不勝搜摭之誠。其詩賦總爲一卷。謹隨狀奉進。以聞。

范攄云。肱止於岳齊二牧。

皇甫松

古松感興云。皇天后地力。使我向此生。貴賤不我均。若爲天地情。我家世道德。旨意匡文
明。家集四百卷。獨立天地經。寄言青松姿。豈羨朱槿榮。昭昭大化光。共此遺芳聲。

怨回紇歌云。白首南朝女。愁聽異城歌。收兵頡利國。飲馬胡蘆河。毳布腥膻久。穹廬歲月
多。鷗巢城上宿。吹笛淚滂沱。

又云。祖席駐征棹。聞帆候信潮。隔篷桃葉泣。吹管杏花飄。船去鷗飛閣。人歸塵上橋。別離
惆悵淚。江路濕紅蕉。

松著醉鄉日月三卷自叙也。或曰松丞相奇章公表甥。公不薦舉。怨望。因襄陽大水。極言誹謗。有夜入眞珠室。朝遊玳瑁宮之句。眞珠。公愛姬名也。

拋毬樂詩云。紅撥一聲飄。輕毬墜越綃。帶翻金孔雀。香滿綉蜂腰。少少拋分數。花枝正索饒。

又云。金盞花毬小。眞珠綉帶垂。幾回銜蠟燭。千度入春懷。上客終須醉。觥盃自亂排。

松有登郭隗臺詩云。燕相謀在茲。積金黃巍巍。上者欲何顏。使我千載悲。又有勸僧酒詩云。勸僧一盃酒。共看青青山。酣然萬象滅。不動心印閑。

右張爲取作主客圖。

松韓門弟子。混之子也。

徐凝

宿湖上人房云。浮生不定若蓬飄。林下眞僧偶見超。覺後始知身是夢。更聞寒雨滴芭蕉。凝睦州人。樂天詩中有李郎中訪徐凝山人云。郡守輕詩客。鄉人薄釣翁。解憐徐處士。惟

有李郎中。

張祐

題金山寺云。一宿金山頂。微茫水國分。僧歸夜歇月。龍出晚堂雲。樹影中流見。鐘聲兩岸聞。因悲在朝市。終日醉醺醺。

高懷寄蘇州劉郎中云。一聞周傑佐明時。西望都門強策羸。天子好文才自薄。諸侯力薦命猶奇。賀知章口徒勞說。孟浩然身更不疑。唯是勝遊行未遍。欲離京國尚遲遲。

入潼關云。都城三百里。雄險此迥堪。地勢遙尊嶽。河流側讓關。秦皇曾虎視。漢祖昔龍顏。何處烏兒輩。干戈自不閑。

故國三千里。深宮二十年。一聲河滿子。雙淚落君前。自倚能歌曲。先皇掌上憐。新聲何處唱。腸斷李延年。二章。祐所作宮詞也。傳入宮禁。武宗疾篤。目孟才人曰。吾卽不諱。爾何爲哉。指笙囊泣曰。請以此就絃。上憫然。復曰。妾嘗藝歌。請對上歌一曲。以泄其憤。上許。乃歌一聲河滿子。氣亟立殞。上令醫候之曰。脉尙溫。而腸已絕。帝崩。棺重不可舉。或曰。非俟才人乎。爰命其襯。襯至。乃舉。祐爲孟才人嘆序曰。才人以誠死。上以誠命。雖古之義激。無以過也。歌曰。偶因歌態詠嬌嘶。傳唱宮中十二春。却爲一聲河滿子。下泉須弔舊才人。

杜牧之守秋浦。與祐遊。酷吟其宮詞。亦知樂天有非之之論。乃爲詩曰。睫在眼前人不見。道超身外更何求。誰人得似張公子。千首詩輕萬戶侯。

寧哥來云。日映宮城霧半開。太真簾下畏人猜。黃翻綽指向西樹。不信寧哥迺馬來。
退宮人云。開元皇帝掌中憐。流落人間二十年。長說承天門上宴。百官樓下拾金錢。又云。
歌喉漸退出宮闈。泣訴伶官上許歸。猶說人時歡聖壽。內人初着五方衣。

玉環琵琶云。宮樓一曲琵琶聲。滿眼雲山是去程。迴顧段師非汝意。玉環休把恨分明。
春鶯囀云。興慶池南柳未開。太真先把一枝梅。內人已唱春鶯囀。花下傴僂軟舞來。
容兒鉢頭云。爭走金車叱鞅牛。笑聲誰是說千秋。兩邊角子羊門裏。猶學容兒弄鉢頭。
邪娘羯鼓云。新教邪娘羯鼓成。大酺初日最先呈。冬曰指向真真說。一曲乾鳴杖子輕。
耍娘曲云。宜春花夜雪千枝。妃子偷行上密隨。便唱耍娘歌一曲。六宮生老是娥眉。
悖拏兒舞云。春風南內百花時。道調涼州急遍吹。搗手便拈金梳舞。上皇驚笑悖拏兒。
集虛臺云。日光斜照集虛臺。紅樹花迎曉露開。昨夜小皇新授籙。太真含笑入簾來。
阿鶻湯云。月照宮城紅樹芳。綠窗燈永在雕梁。金輿未到長生殿。如子偷尋阿鶻湯。
和杜牧之齊山登高云。秋溪南岸菊霏霏。急管繁絃對落暉。紅葉樹深山逕斷。碧雲江淨
浦帆稀。不堪孫盛嘲時笑。願送王洪醉夜歸。流落正憐芳意在。砧聲徒促授寒衣。

感王將軍柘枝妓歿云。寂寞春風舊柘枝。舞人休作曲休吹。鴛鴦鈿帶拋何處。孔雀羅衫

付阿誰。畫鼓不聞招節拍。錦靴空想挫腰支。今來坐上偏惆悵。曾是堂前教徹詩。

題干越亭云。扁舟亭下駐煙波。十五年遊重此過。洲芡露沙人渡淺。樹稍藏竹鳥啼多。山
啣落照欹紅蓋。水蹙斜紋卷綠羅。腸斷中秋正圓月。夜來誰唱異鄉歌。

世傳韋鮑二生。以妾換馬之事云。韋生下弟東歸。同憩水閣。鮑有美妾。韋有良馬。鮑以夢
蘭小情佐歡。飲酣。停盃閣馬軒檻。韋曰。能以人換。任選殊尤。鮑欲馬之意頗切。密遣四絃更衣
盛裝。頃之而至。乃命勸韋酒。歌云。白露濕庭砌。皓月臨前軒。此時去留恨。含思獨無言。又歌送
鮑生酒云。風颭荷珠雖暫圓。多生信有短因緣。西橋今夜三更月。還照離人泣斷絃。韋乃命牽
紫叱撥以酬之。俄有紫衣冠二人。自閣西升階而來。二生恐悚。闔戶窺之。一人長髯云。足下賦
云。斜漢尤界。北陸南躔。白露曖空。素月流天。可謂光絕。對曰。何不見賞。風霽地表。雲歛天末。洞
庭始波。木葉微脫。今佳月如畫。可以爲賦。長髯曰。向聞妾換馬之事。可以爲題。以彼傾城。求其
駿足爲韻。長髯曰。彼佳人兮如瓊之英。此良馬兮負駿之名。將有求於駿足。亦何惜於傾城。香
暖深閨。未厭天桃之色。風清廣陌。曾憐噴玉之聲。希逸曰。原夫人以矜其容。馬乃稱其德。既各
從其所好。諒何求而不克。長跪而別。姿容休耀。其金鈿。右牽而來。光彩頓生於玉勒。文通曰。步
及庭砌。効當軒墀。望新恩懼非吾偶也。戀舊主疑借人乘之。香散綠驥。意已忘於鬢髮。汗流紅

頤愛無異於凝脂。希逸曰：是知事有廢興，用有取捨，彼以絕代之容爲鮮矣。此以軼羣之足爲貴也。買笑之恩既盡，有類求之。據鞍之力尙存，猶希進也。賦訖，行十餘步而失。故祐自愛，妾換馬之什云：綺閣香綃華廐空，忍將行雨換追風。休憐柳葉雙眉綠，却愛桃花兩耳紅。侍宴永辭春色裏，趁朝休立漏聲中。恩勞未盡情先盡，暗泣西風兩意同。

祐長慶中，深爲令狐楚所知。楚鎮天平，自草薦表，令以詩三百篇隨狀表進。祐至京，屬元稹在內庭，上問之。稹曰：祐雕虫小巧，壯夫不爲，或獎激之，恐變陛下風教。上頷之，由是失意東歸。有孟浩然身更不疑之句。

驪宮小禽，名阿濫堆。明皇御玉笛，採其聲，翻爲曲。且名焉。遠近以笛爭効之。祐有華清宮詩曰：紅樹蕭蕭閣半開，玉皇猶幸此宮來。至今風俗驪山下，村笛猶吹阿濫堆。

皮日休云：祐字長吉，元和中，作宮體小詩，辭曲豔發，當時輕薄之流，能其才，合諫得舉。老大稍窺建安風格，誦樂府錄，知作者本意，短章大篇，往往間出，講諷怨譎，時與六義相左右。善題目，佳境言，不可刊置別處。此爲才子之最也。或薦之天子，書奏不下，亦受辟諸侯府。性狷介，不容物，輒自劾去。以曲阿地古澹，有南朝遺風，遂築室種植而家焉。性嗜水石，悉力致之。從南海間罷職事，載羅浮石筍還，不蓄美田利產，爲身後計。死未二十年，而故姬遺孕，凍餒不暇，豈

其怨刺於神明耶。天果不愛才，沒而猶譴耶。又進士顏萱過祐丹陽遺居，見其愛姬崔氏，貧居荆榛下，有一子，杞兒，求食汝墳矣，憫然作詩弔之。

萱詩曰：憶昔爲兒逐我兄，曾拋竹馬拜先生。書齋已換當時主，詩壁空題故友名。豈是爭權留怨敵，可憐當路盡公卿。柴扉草屋無人問，猶向荒田責地征。

日休詩云：勝華通子共悲辛，荒逕今爲舊宅鄰。一代交遊非不貴，五湖風月合教貧。魂應絕地爲才鬼，名與遺編在史臣。閒道平生偏愛石，至今猶泣洞庭人。

陸龜蒙云：先生清骨葬煙霞，業破孤存孰爲嗟。幾箇詩編分貴位，一林石笥散豪家。兒過舊宅啼楓影，姬遶荒田泣稗花。唯我共君堪便戒，莫將交譽作生涯。（杞兒後名望虔，嘉興鹽裴洪慶以爲冬瓜堰宮。）

張爲作主客圖，以白樂天爲廣大教化主，而以祐爲入室，取其句云：萬國見清道，一身成白頭。（上令狐相公句）此地榮辱盛，豈宜山中人。（秋晚句）葛溪謾淬張家劍，却是猿聲斷客腸。（葛溪句）書空疑未決，卓地計初成。（拄杖句）春中還有三千客，寂寞無人報李園。（句）

杜牧之酬祐詩云：七子論詩誰似公，曹劉須在指揮中。薦衡昔日知文舉，（令狐公會表

瀟湘火無人作。通北極樓臺長掛夢。西江波浪遠吞空。可憐故國三千里。虛唱歌辭滿六宮。

或言祐清河人。嘗賦淮南詩。有人生只合揚州死。禪智山光好暮田。大中中。果卒於丹陽隱舍。

崔涯

崔涯。吳楚人。與張祐齊名。其妻雍氏。乃愬校之女。夫婦相歡。而涯不禮其妻父。妻父不平。之。奪其女爲尼。涯不得已。爲詩留別日。隴上泉流隴下分。腸斷嗚咽不堪聞。常娥一入月中去。巫峽千秋空白雲。(或謂崔膺之作)

詠春風云。動地經天物不傷。高情易韻住何方。扶持燕雀連天去。斷送楊花盡日狂。遠桂月明過萬戶。弄帆晴晚渡三湘。孤雲雖是無心物。借使吹教到帝鄉。太行嶺上三尺雪。崔涯袖中三尺鐵。一朝若遇有心人。出門便與妻兒別。涯挾士詩也。涯與張祐失意游挾江淮。此詩往往傳於人口。

盧儲

李翱江淮典郡。儲以進士投卷。翱禮待之。置文卷几案間。因出視事長安。及筭閔步鈴闈。

前見文卷尋繹數回。謂小青衣曰：此人必爲狀頭。迨公退，李聞之，深異其語，乃令賓佐至郵舍，具語於儲，選以爲登。儲謙辭久之，終不却其意。越月，遂許。來年果狀頭及第，纔過關試，徑赴嘉禮。催粧詩曰：昔年將去玉京遊，第一仙人許狀頭。今日幸爲秦晉會，早教鸞鳳下粧樓。後盧止官舍，迎內子，有庭花開，乃題曰：芍藥斬新栽，當庭數朶開。東風與拘束，留待細君來。人生前定，固非偶然耳。

趙璜

正月云：正月今朝半，陽臺信未迴。水芹寒不食，山杏雨應開。世網留三宿，真源寄一杯。囚聲謝猿鳥，歲宴會歸來。

題七夕圖云：帝子吹簫上翠微，秋風一曲鳳凰歸。明年七月重相見，依舊高懸織女機。

七夕詩曰：烏鵲橋頭雙扇開，年年一度過河來。莫嫌天上稀相見，猶勝人間去不迴。欲滅

煙花饒俗世，暫煩煙月掩樓臺。

璜開成三年登第。

柴夔

望九華山詩云：九華如劍插雲霓，青霭連空望欲迷。北截吳門疑地盡，南連楚界覺天低。

龍池水醮中秋月。石路人攀上漢梯。惆悵舊遊無復到。會須登此出塵泥。
夔登太和中進士第。

王濬勳

贈和龍妙空禪師詩云。白面山南靈慶院。茅齋道者赴峯禪。只棲雲樹兩三畝。不下煙蘿
四五年。猿鳥認聲呼喚易。龍神降伏住持堅。誰知今日秋江畔。獨步醫王闍法筵。

夏 燧

和贈和龍妙空禪師詩云。翰林遺迹鏡潭前。孤峭高僧此處禪。出爲信門興化日。坐當吾
國太平年。身同滄海澈尼珠淨。語並鋒鏑慧劍堅。道果已圓名已遂。卽看千匝遠香筵。

鴻登開成進士第。

曹 汾

早發靈芝望九華。寄杜使君詩云。戴月早歸三秀館。平明初辨九華峯。嵯峨玉劍寒芒利。
曩曩青蓮翠葉重。怪狀却疑人盡出。嵐光似爲客添濃。行香若到五溪上。此處褰幃正面逢。

汾以尙書鎮許下。其子希幹及第。用錢二十萬。勝至鎮。張宴置勝於側。時進士胡錡有啓
賀。略曰。桂枝折處。著萊子之綵衣。楊葉穿時。用魯連之舊箭。汾先登第。故也。又曰。一千里

外。觀上國之風光。十萬軍前。展長安之春色。

汾字道謙。開成四年登第。希幹咸通十四年登第。汾終戶部侍郎。汾懿宗宰相。確之弟。確罷相。爲鎮海節度使。以扞虜助功。就加太子太師。汾爲忠武節度。入爲戶部判度支。弟兄並列將相之任。時人榮之。

九華

晴望九華山詩云。九華閑屋簇清虛。氣象翠峯盡不如。惆悵都南掛冠吏。無人解向此山居。

鴻登開成二年進士第。

易重

會昌五年。陳商下進士。張漬第一。重次之。後詔白敏中重考。覆落漬等八人。而重居榜首。有詩寄宜陽兄弟云。六年鴈序恨分離。詔下今朝道已知。上國皇風初喜日。御塔恩渥屬身時。內庭再考稱文異。聖主宣名獎藝奇。故里仙才若相問。一春攀得兩重枝。

唐詩紀事卷第五十二

喬琳 王鋌 于興宗

李朋 楊牢 李汶儒

薛蒙 李艱 于環

王嚴 劉駿 李渥

盧栢 劉璐 李績

盧求 高璩 田樟

牛徵 蕭祐 魏謨

陸肱 李商隱 劉得仁

喬琳

綿州越王樓卽事云。三蜀澄清郡政閑。登樓携酌日躋攀。頓覺胸懷無俗事。迴看掌握是
人寰。灘聲曲折涪州水。雲影低銜富樂山。行鴈南飛似鄉信。忽然西笑向秦關。

琳爲郭子儀朔方掌書記。與聯舍畢曜相棹訐。貶巴州司戶參軍。歷果綿遂懷四州刺史。

建中初爲朱泚叛。爲僞吏部尙書。後伏誅。臨刑歎曰。我以七月七日生。以此日死。非命耶。

王 鈺

登越王樓見喬公口詩偶題云。雲架重樓出郡城。虹梁雅韻仲宣情。越王空置千年跡。丞相兼揚萬古名。過鳥時時衝客會。閑風往往弄江聲。謬將蹇步尋高躅。魚目驪珠豈繼明。

鈺大歷中代喬琳爲綿州刺史。

于興宗

夏抄登越王樓臨涪江望雪山寄朝中知友詩云。巴西西北樓。堪望亦堪愁。山亂江迴遠。川清樹欲秋。晴明中雪嶺。煙靄下魚舟。寫寄朝天客。知予恨獨遊。

大中時以御史中丞守綿州。後爲洋川節度。初在左綿作此詩。和者李朋楊牢輩。皆朝中知友也。

許渾酬綿州于中丞見寄云。故人書信越褒斜。新意雖多舊約賒。皆就一麾先去國。共謀三逕未還家。荆巫夜隔巴江月。鄖郢春連漢上花。半月離居猶恨望。可堪垂白各天涯。

李 朋

綿州中丞以江山小圖遠垂賜及兼寄詩云。巴江與雪山。井邑共迴環。圖寫丹青內。分明

煙藺間。移君名郡輿。助我小齋閑。日想登臨處。高蹤不可攀。

朋爲尙書郎。和于興宗詩。

朋除刑部員外郎制云。將仕郎御史李朋。能積行實。發其辭華。方正端慎。官業克舉。（杜牧之句）

楊 宰

宰。洪農人。少孤。年六歲。母俾入雜學。誤入人家。乃父友也。方彈棋。戲以局爲題。俾宰賦之。應聲曰。魁形下方天。須亞二十四寸窗。中月年十八中第。

宰。酬于中丞見寄之什詩云。劍外書來日。驚忙自拆封。丹青得山水。強健慰心胸。事少勝諸郡。江迴見幾重。甯悲久作別。且似一相逢。詩合焚香詠。愁應賴酒濃。庾樓寒更憶。腸斷雪千峯。

宰登大中二年進士第。最有詩名。大中時。顧陶作唐詩類選。去取其嚴。其序云。刪定之初。如楊宰等十數人。時猶在世。及稍稍淪謝。一篇一詠。未稱所錄。若續有所得。當列爲卷軸。庶無遺恨。

李汝儒

和綿州于中丞詩云。珍重巴西守。殷勤寄遠情。劍峯當戶碧。詩韻滿樓清。日照涪川闊。煙籠雪嶠明。徵黃看卽及。莫歎滯江城。

汝儒登大和五年進士第。官至翰林學士。汝儒守禮部員外郎。充翰林學士。制云。才行冠時。名聲畢然。楊歷臺閣。宣昭職業。無人而不得其道。守正而莫混其源。並爲儒者之英。獨蘊賢人之操。久遊安在。相見何晚。（牡牧之詞）

薛蒙

和綿州于中丞詩云。左縣江上樓。五馬此銷愁。暑退千山雪。風來萬水流。迢迢猶刺郡。繫滯似維舟。卽有徵黃日。名川莫厭遊。

蒙時爲考功郎。

李鄴

和絳州于中丞詩云。長蘊巴西事。看圖勝所聞。江樓明返照。雪嶺亂晴雲。景象詩情在。幽奇筆跡分。使君徒說好。不抵怨離羣。

鄴時爲戶部郎官。

于瓌

和縣州于中丞詩云。樓因藩邸號。川勢似依樓。顯敞含清暑。風光入素秋。山宜姑射貌。江泛李膺舟。郢曲思朋執。輕紗畫勝遊。

又云。極目郡城樓。浮雲拂檻愁。政成多暇日。詩思覺先秋。遠霽千巖雪。隨波一葉舟。昔曾窺粉繪。今願許陪遊。

瓌字正德。敖之子也。大中七年進士第一人。時爲校書郎。

王 巖

和于中丞詩云。雉堞臨朱檻。登茲便散愁。蟬聲怨炎夏。山色報新秋。江轉穿雲樹。心閑隨棄舟。仲宣徒有歎。謝守幾追遊。

嚴大中時布衣。

劉 騷

題越王樓寄獻中丞使君詩云。朱軒迥壓碧煙州。昔歲賢王是勝遊。山簇劍峯朝闕遠。水如巴字遶城流。人間物象分千里。天上笙歌醉五侯。今日登臨無限意。同霑惠化自銷愁。

巖時爲鄉貢進士。

李 渥

秋日登臨越王樓詩曰。越王曾牧劍南州。因向城隅建此樓。橫玉遠開千嶠雲。暗雷下聽一江流。畫簷先弄朝陽色。朱檻低臨衆木秋。徒學仲宣聊四望。且將詞賦好依劉。

溘時爲鄉貢進士後登第。

劉 璠

洋州于中丞頃牧口綿。題詩越王樓上。朝賢繼和。輒課四韻。詩云。隔政代君侯。多慙跡令猷。山光來戶牖。江鳥滿汀洲。雅韻徵朝客。清詞寫郡樓。至今謠未已。注意在洋州。

璠爲綿州刺史。隔政代興宗。璠曾刺蜀州。

盧 楠

和于中丞見寄詩云。圖書越王樓。閑織慰別愁。山光涵雪冷。水色帶江秋。雲鳥孤征鴈。煙帆一葉舟。響風舒霽景。如伴謝公遊。

楠時爲洪文館學士。

李 夔

和中丞見寄詩云。早年登此樓。退想不勝愁。地遠二千里。時將四十秋。續相從京川奏。舉。滿綿州。刺史堂。洪臯尙書。携登此樓。於令三十口年矣。遭連多失路。華皓任盧舟。詩酒雖

堪使何因得其遊。續時爲同州刺史。

求

和于中丞見寄詩云。高情推謝守。善政屬綿州。未落紫泥詔。閑登白雪樓。晴江如送日。寒嶺鎖迎秋。滿壁朝天士。唯予不繫舟。

求。登寶曆二年進士第。李翱之婿也。翱典合。有道人號先知。始翱妹婿楊嗣復。知舉。求落第。至是。嗣復再知舉。道人以小卷遺嗣復。曰。放榜日。開之。曰。放榜開卷。乃曰。裴頭黃尾。三求六李。時第一人裴求。榜末黃駕。次則李休。虛求。又李方玄。從毅道。裕景初。李助。李休。共六人。道人又謂翱曰。公之子。不如外孫。後求子携鄭亞子。畋。李審權子。遜。能。相。皆翱外孫也。

田章

和于中丞云。志乖多感物。臨眺更增愁。暑候雖云夏。江聲已似秋。雪遙難辨木。村近好維舟。莫恨歸朝晚。朝辭擬勝遊。

章登開成四年進士第。

高璩

白敏中自劍南節度移荆南。經忠州。追尋樂天遺迹。有詩云。南浦花臨水。東樓月映風。璩

時爲書記。有詩云：公齋一到人非舊。詩板重尋墨尚新。據自梓州刺史入朝。經綿州。與刺史薛蓬登越王樓。逢以詩贈別云：乘遞初登劍外州。傾心喜事富人侯。方當游藝依仁日。便到攀轅臥轍秋。客聽巴歌消子夜。許陪仙躅上危樑。欲知戀情深處。聽取長江且暮流。璩和云：劍外縣州第一州。罇前喜接君流。歌聲婉轉添長恨。管色淒涼似到秋。但務歡娛思曉角。獨耽雲水上高樓。莫言此去難相見。怨別微黃是順流。

璩字瑩之。第進士。第翰林學士。擢諫議大夫。學士超省郎。進官者惟鄭顥。以尚主。而璩以寵升。懿宗時爲宰相。卒。曹鄴言：璩宰相交游醜雜。進取多蹊徑。諡法不思妄愛曰刺。請諡爲刺。牛徵

登越王樓卽事詩云：危樓送遠目。信美奈鄉情。轉岸孤舟疾。銜山落照明。蕭條看草色。惆悵認江聲。誰會登臨恨。從軍白髮生。

微登咸通二年進士第。叢之子也。

蕭 祐

遊石堂觀詩云：西山高高何所知。上有古昔真人居。欽崖巨石自成室。其下磅礴含清虛。我來斯邑訪遺迹。乃遇沈生耽載籍。沈生爲政哀惻整。又能索隱探靈奇。欣然向我話佳境。與

我崎嶇到山頂。甘瓜割綠出寒泉。碧甌浮花酌春茗。嚼瓜啜茗身清涼。汗消絺綌如迎霜。胡爲空山百草花。倏爾籩豆肆我旁。始驚知周無小大。力寡多方驗斯在。妙用勝聲冠蓋間。勝遊恣意烟霜外。故碑石像凡幾年。雲鬱雨霏生綠煙。我知遊此多靈仙。縹緲月中飛下天。天風微微夕露委。松梢颺颺時聲起。風去空遺籥管音。星翻寥落銀河水。勸君學道此時來。結茅獨宿何遼哉。齋心玄默成靈衛。必見鸞鶴相徘徊。我愛崇山雙劍北。峯如人首挂天黑。俗呼爲人頭山。羣仙偃僂勢奔走。狀若歸尊趨有德。半巖有洞頂有池。出入靈怪潛蛟螭。我去不得晝夜思。夢遊曾信南風吹。南風吹我到林嶺。故國不見秦天迥。山花名藥撲地香。月色泉聲洞心冷。蔭松散髮逢異人。寂寞曠然口不言。道陵公遠莫能識。髮短耳長誰獨存。司農驚覺忽惆悵。可惜所遊俱是妄。蘊懷耿耿誰與言。直至今來意通形神開。擁傳又恨斜陽催。一丘人境尙堪戀。何況海上金銀臺。

祐於唐爲祠部郎中。

魏 謹

宣宗重陽錫宴羣臣。有御製詩。其略曰。款塞旋征騎。和戎委廟賢。傾心方倚注。叶力共安邊。宰臣以下應制皆和。上曰。宰相魏謨詩最佳。其兩聯云。四方無事去。神像抄秋來。八水寒光

起。千山霽色開。上嘉賞久之。魏蹈舞拜謝。羣寮聳視。魏有得色。極歡而罷。

謨。字申之。文宗時。以直言拜右補闕。大中時。鎮蜀。宣宗曰。謨名臣孫。有祖風。朕心憚之。然卒以剛正爲令狐綯所忌。讒罷之。

陸肱

松詩云。霜雪知勁質。今古乞嘉名。斷砌盤根遠。疎林偃蓋清。鶴栖何代色。僧老四時聲。鬱鬱心彌久。煙高萬井生。

肱。大中九年登進士第。咸通六年。自前振武從事。試平判入等。後牧南康郡。辟許棠爲郡從事。鄭谷寄詩云。江山多勝境。賓主是貧交。肱以奉賦得名。

李商隱

商隱。字義山。懷州人。英國公世勣裔孫。令狐楚帥河陽。奇其文。使與諸子游。楚歷鎮表爲巡官。卒於工部侍郎。商隱累佐王茂元。鄭亞。柳仲凱。故樊南甲乙之集作焉。溫庭筠。段成式。俱以儷偶相誇。號三十六體。

楊大年出義山詩示陳恕。酷愛一絕云。珠箔輕明覆玉墀。披香新殿鬪腰支。不須看盡魚龍戲。終遣君王怒假師。嘆曰。古人措辭。寓意如此深妙。令人感慨不已。大年又曰。鄧帥錢若水。

舉賈誼兩句云。可憐半夜虛前席。不問蒼生問鬼神。錢云。措意如此。後人何以企及。鹿門先生唐彥謙爲詩。慕慕玉溪。得其清峭。感愴盡其一體也。然警絕之句。亦多有。

商隱賦云。豈如河畔牛星。隔年只開一過。不及苑中人柳。終朝剩得三眠。注。漢中有人形柳。一日三起三側。義山少遊。投宿逆旅。主人會客。召與坐。不知其爲義山也。酒酣。席客賦木蘭花詩。義山後就曰。洞庭波冷時侵雲。日日征帆送遠人。幾度木蘭舟上望。不知船是此花身。坐客覽之。大驚。詢之。乃義山也。

商隱爲彭陽公從事。彭陽之子綯繼。有韋平之拜。惡商隱。從鄭亞之辟。以爲忘家恩。疎之。重陽日。商隱留詩於其廳事曰。曾共山翁把酒卮。霜天白菊透塔墀。十年泉下無消息。九日巖前有所思。不學漢臣裁苜蓿。空教楚客詠江離。郎君官貴施行馬。東閣無因再得窺。綯乃補太學博士。尋爲東川柳仲郢判官府。罷客榮陽卒。

錦瑟詩云。錦瑟無端五十絃。一絃一柱思華年。莊生曉夢迷蝴蝶。望帝春心託杜鵑。滄海月明珠有淚。藍田日暖玉生煙。此情可待成追憶。只自當時已惘然。或云錦瑟令狐楚之妾。

劉得仁

聽松聲詩曰。庭際微風暖。高松韻自生。聽時無物亂。晝日覺神清。強以幽泉並。翻嫌細雨

并拂空增鶴唳。過隔合琴聲。况復當秋抄。偏宜在月明。不知幽澗底。飄飄有誰聽。

樂遊原春望云。樂遊原上望。望盡帝城春。始覺繁華地。應無不醉人。雲間雙闕麗。柳映九衢新。愛此偏高野。閑來竟日頻。

題邵公禪院云。無事門多掩。陰階竹掃苔。勁風吹雪聚。渴鳥啄冰開。樹向寒山得。人從瀑布來。終期天日老。擎錫逐雲回。

悲老宮人云。白髮宮娃不解悲。滿頭猶自插花枝。曾緣玉口君王愛。准擬人看似舊時。得仁貴主之子。自開成至大中三朝。昆弟皆歷貴仕。而得仁苦於詩。出入舉場。三十年卒無成。常自述曰。外家雖是帝當路。且無親。又云。帝族外王是。中朝親故稀。翻令浮議者。不許九霄飛。既終。詩人競爲詩弔之。僧栖白詩曰。忍苦爲詩身到此。冰魂雪魄已難招。若教桂子落墳上。生得一枝冤始銷。

吟苦曉燈暗。露深秋草疎。舊山多夢到。流水送愁餘。(句)風定一池星。(句)
右張爲取作主客圖。

宿宣義里池亭云。暮色遶桐亭。南山幽竹青。夜深斜舫月。風定一池星。島嶼無人傍。菰蒲有鶴翎。此中休使得。何必泛滄溟。

聽歌云。朱檻滿明月。美人歌落梅。忽驚塵起處。疑有鳳飛來。一曲聽初徹。幾年愁暫開。東
南正雲雨。不得見陽臺。

長信宮云。簾涼秋氣初。長信恨何如。拂黛月生指。解環雲滿梳。一從悲畫扇。幾度泣前魚。
坐聽南宮樂。清風搖翠裾。

唐詩紀事

唐詩紀事卷第五十三終

唐詩知不足齋卷第五十四

韋表微

羅引信

高崇文

王智勝

劉綺莊

馬戴

孟暹

南卓

鄭顥

李羣玉

溫庭筠

周繇

韋表微

表微字子明。韋早鎮西川。王緯司空略。獨孤良弼。裴說居幕府。厚相推挹。以表微比荀爽。自以不能及也。遷中書舍人。敬嘗語左右。欲相二韋。會崩。處厚以父事表微。

池州夫子廟麟臺碑銘曰。二儀既開。三象乃乖。聖道堙鬱。人心不聞。上無文武。下有定哀。吁嗟麟兮。孰爲來哉。周雖不綱。孔實嗣聖。詩書既刪。禮樂太定。勸善懲惡。姦邪乃正。吁嗟麟兮。克昭符命。聖道時君。化行位尊。苟或乖戾。身窮道存。於昭魯邑。栖遑孔門。吁嗟麟兮。孰知其仁。運極數殘。德至時否。楚國寢廣。秦封益侈。墻仞迫阨。崎嶇闕里。吁嗟麟兮。靡有攸止。世治則麟。世亂則麋。出非其時。麋鹿同羣。孔不自聖。麟不自祥。吁嗟麟兮。天何所亡。

羅引信

柳詩云。粧點青春更有誰。青春常許占先知。亞夫營畔風輕處。元亮門前日暖遲。花密苑如飄大出。葉繁何惜借雙眉。交情別緒論多少。好向仁人贈一枝。

詠白菊云。雖被風霜競欲催。皎然顏色不低摧。已疑素手能粧出。又似金錢未染來。香散自宜飄淥酒。葉交仍得蔭蒼苔。尋思閉戶中宵見。應認寒窗雪一堆。

弘信。字德孚。魏州人。爲魏博節度使。

崇文

崇文。本劍門將校。討劉闢有功。爲西川節度使。渤海鄙言。呼人爲髀兒。一旦雪下。崇文謂賓客曰。某雖武夫。亦有一詩。乃吟曰。崇文崇武不崇文。提戈出塞號將軍。那箇髀兒射鴈落。白毛空裏雪紛紛。或謂北齊敖曹之比也。（出北夢瑣云）

智輿

智輿爲徐州節度。一日。從事於使院。會飲賦詩。智輿召護軍俱至。從事屏去翰墨。智輿曰。適聞作詩。何獨見某而罷。復以牋陳席上。小吏亦置牋於智輿前。於是引毫立成曰。三十年前老健兒。剛被郎官遣作詩。江南花柳從君詠。塞北煙塵獨我知。四座驚嘆。監軍謂張祐曰。觀茲

盛事。豈得無言。祐乃獻詩曰。十年受命鎮方隅。孝節忠規兩有餘。誰信將壇嘉政外。李陵草句
右軍書。左右曰。書生諂辭耳。智輿叱曰。有人道我惡。汝輩又肯否。張生海內名士。篇什豈易得。
天下人間。且以爲王智輿樂善矣。

劉綺莊

揚州送人詩云。桂楫木蘭舟。楓江竹箭流。故人從此去。望遠不勝愁。落日低帆影。歸風引
棹謳。思君折楊柳。淚盡武昌樓。置酒云。酒熟人須飲。春還鬢已秋。願逢千日醉。得遣百年愁。卒
卒周姬旦。悽悽魯孔丘。平生能幾日。不及且遨遊。尤善樂府。嘗守藩服。與白敏中。崔元式。韋琮
相知。宣宗時人也。

馬戴

易水懷古詩云。荆卿西去不復返。易水東流無盡期。落日蕭條薊城北。黃沙白草狂風吹。
送客南遊云。擬卜何山隱。高秋指岳陽。葦乾雲夢色。橘熟洞庭香。疏雨殘虹影。回雲背鳥
行。靈均如可問。爲哭清湘。

河梁別云。河梁送別者。行哭半非親。此地足征戰。胡天多殺人。金壘照離席。寶瑟凝青春。
中秋夜對月云。陰魄出海上。望之增苦吟。冷搜颯。頷重寒。徹蚌胎深。皓氣籠諸夏。清光射

萬岑悠然天地內。皎潔一般心。

校獵曲云。楚子畋郊野。布罟籠天涯。浮雲張作羅。萬草結成罟。意在絕飛鳥。臂弓腰鎖鑿。遠將射句踐。次欲誅夫差。壯志一朝摠。湯網本來疎。

露氣寒光盡。微陽下楚丘。猿啼洞庭樹。人在木蘭舟。（楚江懷古句）夜久遊子息。月明歧路閑。（句）却憶軒義日。無人尙戰功。（句）

右張爲取作主客圖。

孟遲

懷鄭泊云。風蘭舞幽香。雨葉墮寒滴。美人來不來。前山看向夕。

發蕭風館遇陰。不見九華山。有作云。我來准口城。千江萬山無不經。山青水碧千萬丈。奇峯急派何縱橫。又聞九華山。山頂連青冥。太白有逸韻。使我西南行。一步一攀策。前行正鷄鳴。陰雲冉冉忽飛起。千里萬里危崢嶸。譬如天之有日蝕。使我昏沉猶不明。人家敲鏡救不得。光影却屬貪狼星。恨亦不能通。言亦不足聽。長鞭揮馬出門去。是以九華爲不平。

遲字遲之。登會昌五年進士第。

廣陵城云。紅映樓臺綠遶城。城邊春草傍墻生。隋家不向此中盡。汴水應無東去聲。

又有過垓下之句云。天地有時饒一擲。江山無主任平分。過驪山云。冷月微煙渭上愁。華清宮樹不勝秋。霓裳一曲千門鎖。白盡梨園弟子頭。已上數篇。張爲取作主客圖。

遲與杜牧之友善。牧之嘗有池州送遲詩。其間云。烟濕樹姿嬌。雨餘山態活。仲秋往歷陽。同上牛磯。大江吞天去。一練橫紳抹。歷陽裴太守。襟韻苦超越。鞞鼓畫騏驎。看君擊狂節。離袖颺應勞。恨粉啼還咽。明年忝諫官。綠樹秦川闊。子提健筆交。勢若夸父盡。他日繁華。當時能獵賢。保國兼保家。

口口久困名場。咸通末。戴佐大同軍幕。棠往謁之。一見如舊相識。留連數月。但詩酒而已。未嘗問所欲。一日大會賓友。命使者以棠家書授之。裳驚愕莫知其來。啓緘卽知。戴潛遣一介卹其家矣。戴與姚合善。合有詩云。天府鹿鳴客。幽山秋未歸。我知方甚善。衆說以爲非。隔石聞泉細。和風見鶴飛。新詩此處得。清峭此應稀。合又有送戴下第客遊詩云。昨夜送君處。亦是九衢中。此日慇懃別。前時寂寞同。烏黃寒食雨。花落暮春風。向晚離人別。筵收樽未空。戴酬姚合歸字韻詩云。歧路非人見。尙得起心中。日憶瀟湘渚。春生蘭桂叢。烏啼花半落。客散爵方空。所贈誠難答。冷然一雅風。

蠻家云。領得賣珠錢。還歸銅柱邊。看兒調小象。打鼓口新船。醉後眠神樹。耕時語瘴煙。不

逢寒便老。相問莫知年。

夕次淮口云。天涯秋光盡。木末羣鳥還。夜久遊子息。月明岐路閑。風生淮水上。帆落楚雲間。此意竟誰見。行行非故關。

夕發邠中路却寄舒從事云。飲酣走馬別。馬後纒邊城。日落月未上。烏棲人獨行。方馳故國戀。復愴長年情。久夜不能息。何當閑此生。

楚江懷古云。露氣寒光集。微陽下楚丘。猿啼洞庭樹。人在木蘭舟。廣澤生明月。蒼山夾亂流。雲中君不見。竟夕自悲秋。

金華子云。戴大中初掌書記於大原。李司空慕以正言被斥。貶龍陽尉。行道興詠。以自傷。其方城懷古云。中胥任向秦庭哭。斬尙終貽楚國羞。新春聞赦云。道在猜讒息。仁深疾苦除。堯聰能下渴。九衢林馬櫪。千門識車轍。奏臺破心膽。鯨陣驚毛髮。子固屈一鳴。余固宜三朋。又曰。丹鷁東飛來。喃喃送君札。呼兒旋（去聲）供衫。走馬空踏襪。手把一枝物。桂花香帶雪。喜極至無言。笑餘翻不悅。又送遲詩云。手撚金僕姑。腰懸玉鞦韆。爬頭峯北正好去。係取可汗鉗作奴。六宮雖念相如賦。其郈防邊重武夫。（堯聰能下渴必有脫字）

金華子云。遲陳商門生。爲浙西掌書記。以讒罷。至淮南。崔相國奏掌書記。後以詩寄浙右。

幕中曰。由來惡舌駟難追。自古無媒謗所歸。句踐豈能容范蠡。李斯何暇救韓非。巨拳豈爲鷄
揮肋。強弩那因鼠發機。慚愧故人同鮑叔。此心江柳尙依依。

南卓

子厚在柳州。呂溫嘲之曰。柳州柳刺史。種柳柳江邊。柳管依然在。千株柳拂天。後卓爲黔
南經略使。故人嘲曰。黔南南太守。南郡在雲南。閑向南亭醉。南風變俗談。初爲拾遺。與崔黯因
諫出宰。陸爲支江。卓爲松滋。

卓贈副戎等詩曰。翺翔曾在玉京天。墮落江南路幾千。從事不須輕縣宰。滿身猶帶御爐
烟。

卓字昭嗣。大中時爲黔南觀察使。

鄭顥

顥宰相綱之孫。登甲科。以起居郎尙主。有器識。宣宗時。恩寵無比。嘗夢中得句云。石門霧
露白。玉殿莓苔青。續成長韻。此一聯。杜甫集中詩也。大中十年。顥放榜後。謁假觀省於洛。生徒
餞長樂驛。俄有紀於屋壁云。三十驂騑一烘塵。來時不鎖杏園春。楊花滿地如飛雪。應有偷遊
曲水人。舊史云。顥綱之子。尙宣宗女萬壽公主。因壽昌節上壽。回夢一宮殿。與十數人納涼聯

羣玉。字文山。澧州人。裴休觀察湖南。厚延致之。及爲相。以詩論薦。授校書郎。

杜牧送羣玉赴舉詩曰。故人別來面如玉。一榻拂雲秋影中。玉貌花紅三百首。五陵誰唱兩春風。或曰。羣玉受相府之知。進詩三百篇。授麟臺讎校。

黃陵廟前莎草春。黃陵女兒茜裙新。輕舟小楫唱歌去。水遠天長愁殺人。羣玉賦黃陵廟詩也。或曰。李遠之作。

方干經羣玉故居云。訐直上書難遇主。銜冤下世未成翁。琴樽劍鶴誰將去。惟鍾山齋一樹風。

溫庭筠

彥博裔。孤。與李商隱俱有名。號溫李。與貴胄裴誠。令狐高等。蒲飲狎昵。爲襄陽巡官。

郭處士擊甌歌云。吉栗金虬石潭古。勺陂澹灩幽脩語。湘君寶馬上神雲。碎珮叢鈴滿煙雨。吾聞二十六宮花。離離。軟風吹春星斗稀。玉辰冷磬破昏夢。木露未乾香著衣。闔釵委墜垂雲髮。小響丁當逐回雲。晴碧煙滋重疊山。羅屏半掩桃花月。太平天子駐雲車。龍鑪勃鬱雙蟠。紫宮中近臣抱扇立。侍女低鬟落翠花。亂珠觸續正跳蕩。傾頭不覺金烏斜。我亦爲君長嘆思。緘情遠寄愁無色。莫霑香夢綠楊絲。千里春風玉無力。

陽春曲云。雲母空窗曉煙薄。香昏龍氣疑輝閣。霏霏霧雨杏花天。簾外春寒著羅幕。曲欄
伏檻金麒麟。沙苑芳郊連翠茵。廐馬何能嚙芳草。路人不敢隨流塵。

多庭筠才思艷麗。工於小賦。每人試。押官韻作賦。凡八叉手。而八韻成。時號溫八吟。多爲隣
鋪假手。號曰救數人也。而士行玷缺。摺紳薄之。李義山謂曰。近得一聯句云。遠比趙公三十六
年宰輔。未得偶句。溫曰。何不云。近同郭令二十四考中書。宣宗嘗賦詩。上句有金步搖。未能對。
遣求進士對之。庭筠乃以玉條脫續也。宣宗賞焉。又藥名有白頭翁。溫以蒼耳子爲對。他皆類
此。宣皇愛唱菩薩蠻詞。丞相令狐綯假其修撰密進之。戒令勿洩。而遽言於人。由是疎之。溫亦
有言云。中書內坐將軍。譏相國無學也。宣皇好微行。遇於逆旅。溫不識龍顏。傲然而詰之曰。公
非長史司馬之流。帝曰。非也。又曰。得非六參簿尉之類。帝曰。非六。謫然方城尉。其制詞曰。孔門
以德行爲先。文章爲末。爾旣德行無取。文章何以補焉。徒負不羈之才。罕有適時之用。竟流落
而死。杜悰自西川除淮海。廷筠詣韋曲杜氏林亭。留詩云。卓氏壚前金線柳。隋家堤畔錦帆風。
貪爲兩地行霖雨。不見池蓮照水紅。幽公聞之。遺絹千疋。曾於江淮爲親表辱之。由是改名。
廷筠又改名。舉場多爲舉人假手。沈詢知舉。施鋪席授廷筠。不與諸公隣。此困於場屋。卒
無成而終。

令孤絢曾以舊事訪於廷筠。對曰：事出南華，非僻書也。或冀和公變理之暇，時宜覽古。絢益怒。奏廷筠有才無行，卒不登第。廷筠有詩曰：因知此恨人多積，悔讀南華第二篇。

廷筠五丈原詩云：鐵馬雲雕共絕塵，柳陰高壓漢營春。天晴煞氣屯關右，夜半長星照渭濱。下國臥龍空誤主，中原得鹿不因人。象床錦帳無言語，從此誰周是老臣。

過新豐云：一劍乘時帝業成，沛中鄉里到咸京。寰區已作皇都貴，風月猶含白社情。泗水舊亭春草遍，千門遺瓦古苔生。至今留得離家恨，鷄犬相聞落照明。

蘇武廟云：蘇武魂銷漢使前，古祠高樹兩茫然。雲邊鴈斷胡天月，隴上羊歸塞草煙。回日樓臺非甲帳，去時冠劍是丁年。茂陵不見封侯印，空向秋波哭逝川。

閔繇

繇字爲憲，池州人。及咸通進士第，以明皇夢鍾馗賦知名。（弟繁亦工爲詩）調池之建德，令李昭象以詩送曰：投文得仕而今少，佩印還家古所榮。後以御史半承與段成式、韋蟾、溫庭皓同遊襄陽徐商幕府。繇有看牡丹贈段成式詩云：金鑿霞英瑩彩香，初疑少女出蘭房。逡巡又是一年別，密語集山呼索郎。成式前看恠酒絕句贈繇曰：太白東西飛正狂，新竊石凍雜梅香。詩中反語常迴避，尤怪花前呼索郎。

繇又以人參遺成式。有詩云：人形上品傳方志，我得真英自紫團。慙非叔子空持藥，更請伯言審細看。式求人參詩曰：少賦令才猶強作，衆醫多失不能呼。九莖仙草真難得，五葉靈根許惠無。

襄陽中堂賞花。繇與妓人戲語。成式嘲之曰：罌裏花前選孟光，東山逋客酒初狂。素娥畢竟難防備，燒得河車莫遺嘗。繇和云：迴簪轉黛喜猜防，粉署裁詩助酒狂。若遇仙丹借羽化，便隨簫史亦何傷。

成式不赴光風亭夜宴。贈繇云：屏開屈膝見吳娃，蠻臘同心四照花。姹女不愁難管領，斬新鈿裏得黃牙。繇和云：玉樹瓊筵映彩霞，澄虛樓閣似仙家。只緣存想歸蘭室，不向春風看夜花。

廣陽公宴成式。速罷馳騁。坐觀花艷。或有眼飽之嘲。繇賦詩云：蹙鞠且徒爲，寧如目送時。報讎暫選哭，存想恨逶遲。促坐疑辟咤，銜盃強朵頤。恣情窺窈窕，曾恃好風姿。色授應難奪，神交願莫辭。請君看曲講，不負少年期。

段成式和并序云：近者初開金埒，大敞紅筵。騎歷塊而風生，鼓摻搗而雷發。成式未曾盤馬，徒效執鞭。喜過君子之營，徒接將軍之地。以歛段辭退，因得坐觀。是時滿目鈿黃，逆鼻蘭麝。

晚薪餘論（有屬）恨織素而不憐。斜柯新知。歎因針而難假。化符端公。妾換名馬。賦闕長門。莫逆賞心。形於善諫。爲憲老舅吟。飄白雪思。効碧雲六韻。傳觀不得。落地鏗如。珮玉粲若列星。儼眼詎貴於千金。貸心只勞於一句。轍鳴瓦釜。方應金鏡。扃輔宜哈。足代諧笑。詩云。才甘魚目。並。藝怯馬啼間。王謝初飛蓋。姬姜盡下山。縛鷄難角逐。射雉豈開顏。亂翠移林色。狂紅照座殷。防梭齒雖在。乞帽鬢慙班。儻恕相如瘦。應容累騎還。

庭筠和云。齊馬馳千駟。盧姬逞十三。玳筵方盼盼。金勒自趨趨。墮珥情初洽。鳴鞭戰未酣。神交花苒苒。眉語柳毵毵。（柳吳興云。窗疎眉語度。）却略青鸞鏡。翹翻翠鳳簪。專城有佳對。寧肯願春蠶。

唐詩紀事卷第五十五

周 墀 王 起 盧 肇 丁 稜

姚 鵠 高 退 之 孟 球 劉 耕

裴 翻 樊 驥 崔 軒 蒯 希 逸

林 滋 李 宣 古 黃 頗 張 道 符

丘 上 卿 石 貫 李 潛 孟 守

唐 思 言 尤 牢 金 厚 載 王 甚 美

周 墀

武宗會昌三年王起僕射再主文柄起自長慶至此凡三領貢藉墀時刺華州以詩寄賀云文場三化魯儒生三十餘年振重名曾忝木鷄誇羽翼又陪金馬入蓬瀛（墀初年木鷄賦及第常陪僕射守職內庭）雖欣月桂居先折更羨春蘭最後榮欲到龍門看風雨關防不許暫離營（和者列姓名於後）

酬李常侍立秋日奉詔祭嶽見寄云秋詞靈嶽奉樽壘風過深林古柏開蓮掌月高珪幣

列金天雨露鬼神陪。質明三獻雖終禮。祈壽千年別上杯。豈是瑣才能祀事。洪農太守主張來。
(常侍李景遜也。亦曾知華州。)

墀字德升。汝南人。長史學。屬辭高古。武宗時。刺華州。召爲兵部侍郎。遂爲宰相。以議河湟事不合指罷。鄭顥言於帝曰。世謂墀以直言相。亦以直言免。帝悟。加拜右僕射。

王起

和周侍郎見寄云。貢院離來二十霜。誰知更忝主文場。楊葉縱能穿舊的。桂枝何必愛新香。九重每憶同儂禁。六義吟得夜光。莫道相知不相見。蓮峯之下欲徵黃。

張籍喜起放榜詩云。東風時節近清明。車馬爭來滿禁城。二十八人初上榜。百千萬里盡傳名。誰家不惜花園看。在處多將酒器行。共賀春司能鑒識。今年應合有分卿。(勅下後人置皮袋。例以圖章酒盃錢絹實之。逢花卽飲。)太和中。文宗重之。曾爲詩寫于太子之笏。武宗嘗以乃方二字問之。起曰。羣書未之見也。周穆王有饜飻二字。百儒但言古馬名。于今未詳。臣所不識者。惟此八駿圖中三五字而已。帝曰。知卿夙學。偶相試示。

起字舉之。元和末。爲中書舍人。穆宗時。錢徽坐貢舉失實。貶。詔起覆核。起建言以所試送宰相閱可否。然後付有司。議者謂起失職。李訓爲相。起門生也。引與共政。文宗上文好古學。時

鄭賈以經術進。起以該博顯。武宗時。自東都召爲尙書。判太常卿。帝患選士不得才。特命起典貢舉。凡四舉士。皆知名者。人伏其鑒。慈恩寺題名云。進士題名。自神龍之後。遇闕宴後。率皆期集於慈恩塔下題名。故貞元中。劉太真侍郎試慈恩寺。望杏園花發詩。會昌三年。贊皇公爲卜相。其年十一月十九日。勅諫議大夫陳商守本官權知貢舉。後因奏對不稱旨。十二月十七日。宰臣遂奏依前命。右僕射兼太常卿王起主文。二十二日。中書覆奏。奉宣旨。不欲令及第進士呼有司爲座主。趨附其門。兼題名局席等條。疏進來者。伏以國家設文學之科。求真正之士。所宜行崇風俗。義本君親。然後升於朝廷。必爲國器。豈可懷賞技之私惠。忘教化之根源。自謂門生。遂成膠固。所以時風寢壞。臣節何施。樹黨背公。靡不由此。臣等商量。今日已後。進士及第。任一度參見有司。向後不得聚集參謁。及於有司宅置宴。其曲江大會。朝官及題名局席。並望勒停。緣初獲美名。實皆少雋。旣遇春節。難阻良遊。三五人自爲宴樂。並無所禁。唯不得聚集同年進士。廣爲宴會。仍委御史臺察訪聞。奏謹具如前。奉勅宣依。於是向之題名。各盡削去。蓋贊皇公不由科第。故設法以排之。洎公失意。悉復舊態。

李德裕爲祕省校書。有雨中自祕省歸訪王御史。（時起爲監察御史集賢直學士）知早入朝。便入集賢。不遇詩。起和之。序云。起頃任集賢校書。及升桓堂。又與祕閣相對。今直書殿。

有張學士嘗忝同幕而與祕書稍遠故瞻望之詞多詩云台庭才子來款扉典校初從天祿歸已慚陋巷迴玉趾仍聞細雨占綵衣詰朝始趁鳳闕去此日遂歎鷄黍違憶昨謬官在烏府喜君對門討魚魯直廬相望夜每闌高閣遙臨月時吐昔聞三入承明廬今來重入中祕書校文復忝丞相屬博物更與張侯居新冠峨峨不變鐵舊泉脈脈猶在渠忽在情人吐芳訊臨風不羨潘錦舒憶見青天霞未卷吟翫瑤華不知晚自憐超足風引舟如何漸與蓬山遠

樂天惜玉蘂花懷集賢王校書云芳意將闌風又吹白雲離葉雪辭枝集賢讎校無閑日落盡瑤花君不知

盧肇

嵩高降德爲時生洪筆三題造化名鳳詔佇歸專北極驪珠搜得盡東瀛褒衣已換金章貴禁掖曾隨玉樹榮明日定知同相印書衿新列柳間營（自肇至王甚夷各和主司王起一章多用起韻）

開成初就江西解試爲試官未送肇謝曰巨鼈負蚌首冠蓬山試官曰某恨人數擠排深慚名第奉浼何云首冠肇曰頑石處上巨鼈戴之豈非冠耶

張祐於甘露寺觀肇詩曰不謂三吳經此詩也祐曰日月光先到山河勢盡來肇曰地從

京口斷人自海門回。因而仰伏。

肇初計偕至襄陽。奇章公方有眞珠之惑。肇賦詩曰。神女初離碧玉塔。彤雲猶擁牡丹鞋。知道和公憐玉腕。強將纖手整金釵。

肇字子發。袁州人也。初登第。或問所由來。曰肇袁民也。或曰袁州出舉人耶。肇曰袁州出舉人。亦猶沅江出龜甲九肋者。蓋稀矣。肇筮仕之初。爲鄂岳盧商從事。其後江陵節度裴休。太原節度盧簡。求奏爲門吏。後除著作郎。遷倉部外郎。克集賢院直學士。咸通中。出知歙州。肇競渡詩云。石溪久住思端午。館驛樓前看發機。鞞鼓動時雷隱隱。獸頭凌處雪微微。衝波突出人齊噉。躍浪爭先鳥退飛。向道是龍剛不信。果然奪得錦標歸。

咸通初。恩除歙州。途中寄座主王侍郎詩云。忽忝專城奉六條。自憐出谷屢遷喬。駟車雖覺還家近。捧日惟愁去國遙。朱戶昨經新棨戟。風帆常覺戀簾瓢。江天夜夜知消息。長見台星在碧霄。

丁 夔

公心獨立副天心。三轄春闈冠古今。蘭署門生皆入室。蓮峯太守別知音。同升翰苑時名重。遍歷朝端主意深。新有受恩江海客。坐聽朝夕繼爲霖。李德裕嘗左宦宜春。盧肇以文見知。

既拜相。舊例放榜。先呈宰相。王起問德裕所欲。答曰。何問爲。如盧肇。丁稜。姚鵠。豈可以不與及第。起遂依次放之。

唐放榜訖。謁宰相。卽勝元致詞。肇以故不至。稜口吃而形陋。俛曰。稜等登翰躬。頰汗。卒不能致後語。左右皆笑。或曰。君善筭耶。稜猶不悟也。稜字子威。

姚鵠

三年竭力向春闈。寒斷浮花衆路岐。盛選棟梁稱昔日。平均雨露及明時。登龍舊美無斜徑。折桂新榮盡直枝。莫道只陪金馬貴。相期更在鳳凰池。

鵠尋趙尊師不遇。詩云。羽客朝元晝掩扉。林中一逕霧中微。松陰遶院鶴相對。山色滿樓人未歸。盡日獨思風馭返。寥天幾望野雲飛。憑高目斷無消息。自醉自吟愁落輝。

鵠字居雲

高退之

昔年桃李已滋榮。今日蘭蓀又發生。葑菲采時皆有道。權衡分處且無情。叨陪鸞鷲朝天客。共作門闈出谷鶩。何事感恩偏覺重。忽聞金榜扣柴荆。退之自顧微劣。始不敢有叨竊之望。策試之後。遂歸盤屋山居。不期一日進士。則遣人齎榜扣關相報。方知忝矣。

退之字遵聖。

孟球

當年門下化龍成。今日餘波進後生。仙籍共知推麗則。禁垣同得薦嘉名。桃蹊早茂誇新

球。字庭玉。

劉耕

孔門頻建鑄顏功。紫綬青衿感激同。一篲勤勞成太華。三年恩德華維嵩。楊隨前輩穿皆

裴翻

常將公道選郡生。猶被春闈屈重名。文柄久持殊歲紀。恩門三啓動寰瀛。雲霄幸接鴛鸞

翻。字雲章。

樊讓

滿朝髻髮半門生。又見新書甲乙名。孤進自今開道路。至公依舊振寰瀛。雲飛太華清詞

著花發長安白屋榮。忝受恩光同上客。惟將報德是經營。

驥字元龍。

崔軒

滿朝朱紫半門生。新榜勞人又得名。國器舊知收片玉。朝宗轉覺集登瀛。同升翰苑三年美。繼入花源九族榮。共仰蓮峯聽雪唱。欲貯僊曲意怔營。

軒字鳴嵐。

蒯希逸

一振聲華入紫微。三開秦鏡照春闈。龍門舊列金章貴。恩谷新遷碧落飛。恩感風雷皆變化。詩裁錦繡借光輝。誰知散質多榮忝。鴛鴦清塵接布衣。

芳草復芳草。斷腸還斷腸。自然堪下淚。何必更斜陽。楚峯千萬里。燕鴻三兩行。有家歸不得。况舉別君觴。杜牧之池州送希逸詩也。

武幹者。事蒯希逸十餘歲。希逸擢第。幹辭以親在求去。希逸以詩送之。略曰。山險不曾離馬後。酒醒長見在床前。士人皆有繼和。

希逸字大隱。

希逸詩。蟾蜍醉裏破。蛺蝶夢中殘。牛相在揚州嘗稱之。

林 滋

龍門一變荷生成。况是三傳不朽名。美譽早聞喧北闕。頽波今見走東瀛。鴛行既接參差影。鷄樹仍同次第榮。從此青衿與朱紫。升堂侍宴更何營。

望九華山詩云。茲山突出何怪奇。上有萬狀無凡姿。大者嶙峋若奔兕。小者崑崙如嬰兒。玉柱金莖相拄枝。千空榆碧勢參差。稀中始訝巨靈擘。斗處乍驚愚叟移。蘿煙石月相蔽虧。天風裊裊猿啾啾。龍潭萬古噴飛溜。虎穴幾人能得窺。吁予比少愛靈境。到此始覺魂神馳。如何獨得百丈索。直上高峯拋俗羈。

滋字後象。

李宣古

恩光忽遠曉春生。金榜前頭忝姓名。三感至公裨造化。重揚文德振寰瀛。佇爲霖雨曾相賀。半在雲霄覺更榮。何處新詩添照灼。碧巖峯下柳間營。

宣古嘗賦寒食日亥時云。人定朱門尙未開。初星粲粲照人回。此時寒食無燈燭。花柳蒼蒼月欲來。

杜司空。自忠武軍節度使。出鎮潯陽。宣古數陪遊宴。乘醉慢侮。悵欲辱之。長林公主曰。豈有飲而舉人細過耶。謂宣古請爲詩。冀彌縫也。宣古得韻。立成詩曰。紅燈初上月輪高。照見堂前萬朶桃。鶯粟調清銀字管。琵琶聲亮紫檀槽。能歌姹女顏如玉。解引蕭郎眼似刀。爭奈夜深。攬要令舞來。接去使人勞。

宣古。宋垂後。

冉冉池上煙。盈盈池上柳。生貴非道傍。不斷行人首。句。翠蓋不西來。池上天池嶽。句。右張爲取作主客圖。

王 頰

二十二年文教至。三千上士滿皇州。獨陪宣父蓬瀛奏。方接顏生魯衛遊。多羨龍門齊變化。屢看鷄樹第名流。升堂何處最榮美。朱紫環鑄幾處酬。

頰爲失第後。久方第。據言曰。黃頰以洪奧文章。蹉跎者一十三載。劉蕡以平漫子弟。而折丹桂。由斯言之。可謂命通性能。豈曰性能命通者歟。韓愈自潮州量移宜春郡。頰學愈爲文。亦振大名。頰嘗觀盧肇爲碑版。則唾之而去。頰宜春人。與肇同鄉。頗富而肇貧。同日遵路赴舉。郡牧餞頗離亭。肇駐蹇十里以俟。明年肇以第一名還。袁因競渡。卽度賦詩云。向道是龍剛不信。

果然奪得錦標歸。

頗字無頗。

張道符

三開文鏡繼芳聲。暗暗雲霄接去程。會厭洪波先得路。早陞清禁共垂名。蓮峯對處朱輪貴。金榜傳時玉韻成。更許下才聽白雪。一枝今過卻詵榮。

道符字夢錫。

丘上卿

常將公道選諸生。不是鴛鴻不得名。天上宴回聯步武。禁中麻出滿寰瀛。簪裾盡過前賢貴。門館仍叨舊學榮。看著鳳池相繼入。都堂那肯滯關營。

上卿字陪之。

石貫

重德由來爲國生。五朝清顯冠公卿。風波久佇濟川楫。羽翼三遷出谷鶯。絳帳青衿同日貴。春蘭秋菊異時榮。孔門弟子皆賢哲。誰料窮儒忝一名。

貫字惣之。

李潛

文學宗師心秤平。無私三用佐貞明。恩波舊是仙舟客。德字新添月桂名。蘭署崇資金口口。重蓮高唱玉音清。羽毛方荷生成力。難繼鸞鳳上漢聲。

潛字德隱。宜春人。

孟守

科文又主守初時。光顯門生濟會期。美擅東堂登甲乙。榮同內署待恩私。羣鴛共喜新遷木。雙鳳皆當卽入池。別有陪深知感士。曾經兩度得芳枝。

守字處中。長慶三年。王起放及第。爲時相所退。是年大和。主和戎。至會昌三年。起以左揆。再知貢舉。守龍鍾就試成名。是歲石維入塞。公主自蕃還京。

唐思言

儒雅皆傳德教行。幾崇浮浴贊文明。龍門昔上波濤遠。禁署同登渥澤榮。虛散謬當陪杞梓。後先寧異感生成。時方側席徵賢急。况說歌謠近帝京。

思言字子文。

尤牟

聖乾文德最稱賢。自古儒生少比肩。再啓龍門將二紀。兩司鴛谷已三年。蓬山皆美成榮貴。金榜誰知忝後先。正是感恩流涕日。但思旌旆碧峯前。

牢字德膠。

金厚載

長慶曾收間世英。果居臺閣冠公卿。天書再受恩波遠。金榜三開日月明。已見差肩趨翰苑。更期連步掌台衡。小儒謬跡雲霄路。心仰蓮峯望太清。

厚載字化光。

王甚夷

春闈帝念主生成。長慶公聞兩歲名。有詔赤心分雨露。無私和氣浹寰瀛。龍門乍出難勝幸。鴛侶先行是最榮。遙仰高峯看白雪。多慚屬和意屏營。

甚夷字無黨。

唐詩紀事卷第五十六

鄭畋

李彙征

劉成

崔郊

譚銖

郭夔

來鵬

來鵠

鄭洪業

杜牧

許渾

童翰卿

雍陶

周元範

李遠

朱可名

趙嘏

祝元膺

韋承貽

鄭史

韋楚老

鄭畋

馬嵬太真。縊所題詩者。多悽感。鄭畋爲鳳翔從事日。題云。玄宗回馬楊妃死。雲雨難亡日。月新。終是聖朝天子事。景陽宮井又何人。觀者以爲有宰輔之器。

中秋月直禁苑云。禁署方懷忝。綸闈已再加。暫來西掖路。還整上清槎。恍惚歸舟地。深巖宿絳霞。幽襟聊自適。閑弄紫薇花。

懿宗朝。韋保衡路嵩忌宰相。劉瞻誣以罪。黜爲荆南節度。畋爲制詞云。早以文學。疊中殊。

科風稜甚高恭謹無玷。又云安數畝之居。仍非已有。却四方之賄。唯恐人知。韋路大怒。貶改爲梧州刺史。責劉驩州司戶。命舍人李庚爲詞。深文痛詆。必欲加害。屬懿宗厭代。僖宗立。蕭傲輔政。舉瞻自代。召歸朝廷。至湖南。庚典是郡。出迎江次。牌亭致酒。瞻唱竹枝詞。送庚酒云。躡屐過溝。竹枝恨君深女兒。瞻命庚酬和。庚曰。不閑音律。瞻曰。君應只解爲制詞也。是夕。庚飲觥而卒。改字台文。相僖宗。昭宗爲人仁恕。姿采如峙玉。

改爲渭南尉。日嘗有題緱山王子晉廟詩曰。有昔靈王子。吹笙遡沉寥。六官攀不住。三鳥玄相招。亡國原陵古。賓天歲月遙。無蹊窺海曲。有廟訪山椒。石帳龍蛇拱。雲龍彩翠銷。露壇裝琬琰。眞像寫松喬。珠館青童宴。琳宮阿母朝。氣輿仙女侍。天馬吏兵調。湘妓紅絲瑟。秦郎白管簫。西城要婢約。南獄命嬌嬈。句曲觴金洞。天台嘯石橋。晚花珠弄藥。春茹玉生苗。二景神光祕。三元寶籙饒。露垂鴉翅髮。冰束虎章腰。鶴馭爭銜箭。龍奴合獻綃。衣從星渚浣。丹就日宮燒。物外花常滿。人間葉自凋。望臺悲漢戾。闕水笑梁昭。古殿香殘地。荒塔柳長條。幾曾期七日。無復降重霄。嵩嶺連天漢。伊瀾入海潮。何由得眞訣。使我佩環口。

李彙征

彙征客遊閩越。至循州。冒雨求宿。或指韋氏莊居。韋氏杖屨迎賓。年八十餘。自稱曰野人。

韋思明每與李生談論。或詩或史。淹留累夕。彙征善談。而不能屈也。論數十家之作。次第至李涉。詩主人階稱善。彙征遂吟曰。遠別秦城萬里遊。亂山高下出商州。關門不鎖寒溪水。一夜潺湲送客愁。又曰。華表千年一鶴歸。丹砂爲頂雪爲衣。冷冷仙語人聽盡。却向五雲翻翅飛。思明復吟二篇。曰。因韓爲趙兩遊秦。十月冰霜渡孟津。縱使鷄鳴見關吏。不知余也是何人。又曰。滕王閣上唱伊州。二十年前向此遊。半是半非君莫問。西山長在水長流。韋叟愀然變色曰。老身弱齡不肖。遊浪江湖。交結姦徒。爲不平事。後遇李涉博士。蒙簡此詩。因而跽跡。李公待愚。擬陸士衡之薦戴若思。中心藏焉。遂隱羅浮。經于一紀。李旣云亡。不復再遊秦楚。追愧今昔。或潛然持觴而酌。反袂而歌云。春雨蕭蕭江上村。五林豪客夜知聞。他時不用相迴避。世上如今半是君。乾符辛丑歲。范攄客于雲川。值彙征細述其事。云於韋叟之居。觀李博士之手翰云。

彙征後登進士第

劉威

遊東湖處士園林詩云。偶向東湖更向東。數聲鷄犬翠微中。遙知楊柳是門處。似隔芙蓉無路通。樵客出來山帶雨。漁舟過去水生風。物情多與閑相稱。所恨求安計不同。

七夕云。烏鵲橋成上界通。千年靈會此霄同。雲收喜氣星樓曉。香拂輕塵玉殿空。翠輦不

行青草路。金鸞徒候白榆風。綵盤花閣無窮意。只在浮生一縷中。

威會昌時詩人也。

崔郊

郊寓居漢上有婢端麗善音律。既貧。鬻婢於連帥。給錢四十一萬。寵盼彌深。郊思慕無已。其婢因寒食來從事家。值郊立於柳陰。馬上漣泣。誓若山河。崔生贈之以詩曰。公子王孫逐後塵。綠珠垂淚滴羅巾。侯門一入深如海。從此蕭郎是路人。或有嫉郊者。寫詩於座。公視詩。令召崔生。左右莫之測也。及見郊。握手曰。侯門一入深如海。從此蕭郎是路人。便是公作耶。遂命婢同歸。至於幃幌奩匣。悉爲增飾之。

譚銖

題九華山詩云。憶矚九華山。尙在童稚年。浮沉任名路。窺仰會無緣。罷職池陽時。復遭迎送牽。因茲契誠願。囑望枕席前。况值春正濃。氣色無不全。或如碧玉靜。或似青靄鮮。或接白雲堆。或映紅霞天。呈姿既不一。變態何箇千。巍峨本無動。崇峻性豈偏。外景自隱隱。潛虛固幽玄。我來暗凝情。務道志更堅。色與山異性。性併山亦然。境變山不動。性存形自遷。自遷阻不俗。自定不失賢。浮華與朱紫。安可迷心田。

眞娘者。葬吳宮之側。行客賦詩多矣。銖書一絕。題者遂止。詩曰。武丘山下冢纍纍。松栢蕭條盡可悲。何事世人偏重色。眞娘墓上獨題詩。

咸通末。鄭渾爲蘇州都郵。銖爲醜院官。鍾幅爲院巡。皆廣文生。時湖州牧李超。趙蒙爲代。皆狀元。時語曰。湖接兩頭。蘇聯兩尾。

銖。吳人。登會昌進士第。

郭夔

九華山詩云。儼翠凌空出迥然。岩臺萬丈倚秋天。暮風飄送當軒色。曉霧斜飛入檻煙。簾捲倚屏雙影聚。鏡開朱戶九條懸。畫圖何必家家有。自有畫圖來目前。

夔。大中時江南進士也。

來鵬

清明日與友人遊玉粒塘庄詩曰。幾宿春山逐陸郎。清明時節好煙光。歸穿細荇船頭滑。醉踏殘花屐齒香。風急嶺雲翻迥野。雨餘田水落方塘。不堪吟罷東回首。滿耳蛙聲正夕陽。

鄂渚清明日與鄉友登頭陀山云。冷酒一盃相勸頻。異鄉相遇轉相親。落花風裏數聲笛。芳草煙中無限人。都大此時深悵望。豈堪高境更逡巡。思量費子眞仙子。不作頭陀山下屨。

寒食山館書情云。獨把一盃山館中。每經時節恨飄蓬。侵塔草色連朝雨。滿地梨花昨夜風。蜀魄笑來春寂寞。楚囚吟後月朦朧。分明寄得還家夢。徐孺宅前湖水東。

鄂洛除夜書懷云。鸚鵡洲頭夜泊船。此時形影共悽然。難歸故國干戈後。欲告何人雨雪天。筋撥冷灰書悶字。枕陪寒席帶愁眠。自嗟落拓無成事。明日春風又一年。

鵬詩思清麗。福建韋尚書岫愛其才。欲以子妻之。而不果。後遊蜀。夏課卷中有詩云。一夜綠荷風剪破。賺他秋雨不成珠。識者以爲不祥。是歲隨秋賦而卒。（岫者丹之子也）

來鵠

聖政紀頌序曰。穆宗皇帝臨朝。與羣臣言及政事。宰臣請史官執筆。當羣臣奏事。隨日撰錄。號爲聖政紀。至上之卽位三年。有鄉校小臣來鵠。因窺穆宗寶錄。追而爲之頌曰。三皇不書。五帝不紀。有聖有神。風銷日已。何教何師。生來死止。無曲無法。頑肩口比。三皇實作。五帝實治。成天造地。不昏不圯。言得非排。文得聖齒。表表如見者。莫若乎史。是知朴繩休結。正簡斯若。君誥臣箴。觚編毫絡。前書後經。窺善鑿惡。國之大章。如何寢略。嗚呼貞觀多吁。永徽多俞。廷日發論。殿日發謨。牙孽不作。烏鼠不除。論出不蓋。謀行不紆。楹然史臣。蛇然史裾。瞠瞠卽視。透透而婁。翹筆當面。決防納污。不楛爾智。不席我恐。執言直注。史文直敷。故得粲粲朝典。落落廷譽。聖

牘既多。堯風不淺。願編坦軸。君出臣顯。若儼見旒。若俯見冕。無閑殿曠。延無尸安。素晏三皇。不忘五帝。不剪太宗。得之史焉。斯展暨乎。後相圖身。天子專問。我獨以言。史不得近。丘明見嫌。倚相在檜。乘筆如今。隨班不進。班退史歸。惘然疇依。奏問莫覩。嘉謀固稀。取彼詰命。祿爲國肥。炯然時皇。言必成章。德宣五帝。道奧三皇。如何翊臣。麤肉嗜啗。垣豸距磨快。福衡拘長。控截僚位。占護陽光。垣私藩已。遠史度唐。俾德音嘉。訪默縮膽。亡咽典噤法。蓋聖籠昌。曷以至此。史文不張。後必非笑。將來否臧。謂乎殿空。辰逸朝。惜廷荒。不知姦蔽。文失汪洋。有貞觀業。有永徽綱。亦匿匪見。亦寢匪彰。賴有後臣。斯言不佞。伊尹直心。太甲須聖。事既可書。史何不命。乃其前欺。大陳不敬。曰逐史之喻。請以物並。且十夫樹楊。一夫欲競。栽既未牢。擗豈能盛。帝業似栽。逐史似擗。穆宗憮然。若疾若蠶。昔何臣斯。隱我祖正。不傳親問。不寫密諍。孰示來朝。以光神政。由是天呼震吸。微奔召急。史提筆來。吐廷而入。端耳抗口。不搯不挹。獬豸側頭。螭蚪擺溼。握管絕怡。當殿而立。君也盡問。臣也倒誠。磊磊其事。鏗鏘其聲。大何不顯。細何不明。語未絕緒。史已錄成。謂之何書。以政紀名。伊紀清芬。可昭典墳。古師官鳥。昔聖官雲。方之我后。錄里書分。錄有君法。書有君文。君法君文。在聖政紀。云殿無閑時。廷無曠日。雲詠波訪。倦編剗筆。君劬臣勞。上討下述。惟勤惟明。在聖政紀。出至德何比。至教焉如。孰窺孰測。外夷內儲。謂君有道乎。臣有謨歟。有道

有謨。在聖政紀。書一體例秩。同力翼戴。祈福去邪。絕防無礙。國章可披。唐文可愛。善吝不偷。嘉論不蓋。不偷不蓋。在聖政紀。載諒夫繆斯不口朽。可懸魏闕。愚得是言。非訕非伐。實謂鑿臣。渾。開君日月。妖物零死。天文光發。惟我之有頌兮。奚斯躍而董狐蹙。

鶴。豫章人。師韓柳爲文。大中咸通間。聲價籍甚。

鄭洪業

詔放雲南子弟還國。詩云。德被陪臣子。仁垂聖主恩。雕題辭鳳闕。丹服出金門。有澤沾殊俗。無征及獷羣。銅梁分漢土。玉壘駕鸞軒。瘴嶺蚕叢盛。巴江越嶲根。萬方同感化。豈獨自南蕃。洪業咸通八年。鄭愚下第一人擢第。

杜牧

牧爲御史。分務洛陽。時李司徒愿罷鎮。閑居。聲妓豪侈。洛中名士咸謁之。李高會朝客。杜持憲不敢邀致。杜遣座客達意。願預斯會。李不得已邀之。杜獨坐南行。瞪目注視。引滿三卮。問李云。聞有紫雲者。孰是。李指之。杜凝睇良久。曰。名不虛得。宜以見惠。李俯而笑。諸妓亦回首破顏。杜又自飲二爵。朗吟而起。曰。華堂今日綺筵開。誰喚分司御史來。忽發強言驚滿座。三行紅粉一時迴。氣意閑逸。傍若無人。牧不拘細行。故詩有十年一覺揚州夢。唯有青樓薄倖名。吳武

武陵以阿房宮賦薦於崔郾。遂登第。郾東都放榜。西都過堂。牧詩曰。東都放榜未開花。三十三人走馬迴。秦地少年多釀酒。卽將春色入關來。

牧佐宣城幕。遊湖州。刺史崔君張水戲。使州人畢觀。令牧問行。閱奇麗。得垂髻者十餘歲。後十四年。牧刺湖州。其人已嫁生子矣。乃悵而爲詩曰。自是尋春去校遲。不須惆悵怨芳時。狂風落盡深紅色。綠葉成陰子滿枝。

杜秋娘詩序曰。杜秋。金陵女也。年十五。爲李錡之妾。後錡叛滅。籍之入宮。有寵於景陵。穆宗卽位。秋爲皇子傅姆。歸子壯。封漳王。鄭注用事。誣丞相欲去異己者。指王爲根。王被罪廢削。秋因賜歸故鄉。予過金陵。感其窮且老。爲之賦詩曰。京江水清滑。生女白如脂。其間杜秋者。不勞朱粉施。老溷卽山鑄。後庭千峨眉。秋持玉罍飲。與唱金縷衣。勸君莫惜金縷衣。勸君須惜少年時。花開堪折直須折。莫待無花空折枝。李錡長唱此詞。一溷旣白首。叛秋亦紅淚。滋吳江落日渡。滿岸綠楊垂。聯裾見天子。盼眇獨依依。椒壁懸錦幕。鏡奩蟠蛟璃。低鬟認新寵。窈窕復融怡。月上白壁門。桂影涼參差。金階露新重。闔捻紫簫吹。晉書。盜開涼州張駿塚。得紫玉簫。莓苔夾城路。南苑鴈初飛。紅粉羽林仗。獨賜辟邪旗。歸來煮豹胎。麋飮不能飮。咸池昇日慶。銅雀分香悲。雷音後車遠。事往落花時。燕口得皇子。壯髮綠綫綫。畫堂授傅姆。天人親捧持。虎睛

珠絡襟。金盤犀鎮幃。長楊尉熊羆。武帳弄啞啞。漸擲竹馬劇。稍出舞鷄奇。蕪蕪整冠佩。侍宴坐瑤池。眉宇儼圖書。神秀射朝輝。一尺桐偶人。汪充知自欺。王幽茅土削。秋放故鄉歸。觚稜拂斗極。迴首尙遲遲。四朝三十載。似夢復疑非。潼關識舊吏。毛髮已如絲。却喚吳江渡。舟人那得知。歸來四鄰改。茂苑草菲菲。清血灑不盡。仰天知問誰。寒衣一疋素。夜借隣人機。我昨金陵過。聞之爲歎歎。自古皆一貫。變化安能推。夏姬滅兩國。逃作巫臣姬。西子下姑蘇。一舸逐鸚夷。織室魏豹俘。作漢太平基。悞置代籍中。兩朝尊母儀。光武紹高祖。本係生唐兒。珊瑚破高齊。作婢奉黃糜。蕭后去楊州。突厥爲閼氏。女子固不定。士林亦難期。射鉤後呼父。釣翁王者師。無國要孟子。有人毀仲尼。秦囚逐客令。柄歸丞相斯。安知魏齊首。見斷箕中屍。給喪歟張輩。廊廟冠峨危。珥貂七葉貴。何妨戎虜支。蘇武却生返。鄧通終死饑。主張旣難測。讎復亦相宜。地盡有何物。天外復何之。指何爲而捉。足何爲而馳。耳何爲而聽。目何爲而窺。己身不自曉。此外何思惟。因傾一樽酒。題作社秋詩。愁來獨長詠。聊可以自怡。牧初自宣城幕。除官入京。有詩留別云。同來不得同歸去。故國逢春歎寂寥。後二十餘年。連典四郡。自湖州拜中書舍人。題汴河云。自憐流落西歸疾。不見春風二月時。至京果卒。或曰。舍人未爲流落。而遽及之。魄已喪矣。

煙着樹姿嬌。雨餘山態活。(句)四海一家無一事。將軍操劍泣霜毛。(句)山密夕陽

多人稀芳草遠。(句)仙掌月明孤影過。長門燈暗幾聲來。(句)右張爲取爲主客圖。
清時有味是無能。閑愛孤雲靜愛僧。欲把一麾江海去。樂遊原上望昭陵。牧赴吳興登樂
遊原之作。

骨清年少眼如冰。鳳羽參差五色層。天上麒麟時一下。人間不獨有餘陵。(贈李秀才)
青山隱隱水搖搖。秋盡江南草木凋。二十四橋明月夜。玉人何處學吹簫。(寄揚州韓綽
判官)

楚鄉寒食橘花時。野渡臨風駐綵旗。草色連雲人去住。水紋如縠燕參差。(江上)
蠓姑寧與雪霜期。賢哲難教俗士知。可憐正觀太平後。天且不留封德彝。(題魏交正)
長空澹澹孤鳥沒。萬古消沉向此中。看取漢家何似業。五陵無樹起秋風。(登樂遊原)
登池州九峯樓寄張祐云。百歲哀來不自由。角聲孤起夕陽樓。碧山終日思無盡。芳草何
年恨卽休。睫在目前人不見。道非身外更何求。誰人得似張公子。千首詩輕萬戶侯。

過華清宮云。長安迴望綉成堆。山頂千門次第開。一騎紅塵妃子笑。無人知道荔枝來。又
云。新豐綠樹起紅埃。數騎漁陽探使迴。霓裳一曲千峯上。舞破中原始下來。

李義山作杜司勳詩云。高樓風雨歎斯文。短翼差池不及羣。刻意傷春復傷別。人間唯有

杜司勳又云杜牧司勳字牧之。清秋一首杜秋詩。前身應是梁江總。名總遠曾字總持。心鐵已從千鎖利。鬢絲休嘆雪霜垂。漢江遠弔西江水。羊祜韋丹盡有碑。（時杜春撰韋碑）

許渾

祇命南海。至廬陵。逢表兄軍倅。奉使淮海。別後却寄云。蘆橋花香拂釣磯。佳人猶舞越羅衣。三洲水淺漁來少。五嶺山高鴈到稀。客路晚依紅樹宿。鄉關暗望白雲歸。交親不念征南吏。昨夜風帆去似飛。

金陵懷古云。玉樹歌殘王氣終。景陽兵合戍樓空。松林遠近千家塚。禾黍高低六代宮。石燕拂雲晴亦雨。江豚吹浪夜還風。英雄一去豪華盡。惟有青山似洛中。

登故洛陽城云。禾黍離離半野蒿。昔人城此豈知勞。水聲東去市朝變。山勢北來宮殿高。鴉噪暮雲歸古堞。鴈迷寒雨上空壕。可憐纒嶺登仙子。猶自吹笙醉碧桃。

咸陽西樓晚望云。一上高城萬里愁。兼葭楊柳似汀洲。溪雲初起日沉閣。山雨欲來風滿樓。鳥下綠蕪秦苑夕。蟬鳴黃葉漢宮秋。行人莫問前朝事。渭水寒聲晝夜流。

杜牧之有許七侍郎乘官東歸。滿酒江南。高秋企望。寄贈之詩云。天子綉衣吏。東吳美退居。有園同庾信。避事學相如。蘭畹晴香嫩。筠溪翠影疎。江山九秋後。風月六朝餘。錦口開詩軸。

青囊結道書。霜嚴紅薜荔。露沼白芙蓉。睡口高梧密。棋燈小閣虛。凍膠元亮瓠。寒鱸季鷹魚。塵意迷今古。雲情識卷舒。他年雪中棹。陽羨訪吾廬。(榮於興義縣近有水榭)

又初春雨中舟次和橫江裴使君見迎李趙二秀才同來因書四韻兼寄江南許渾云芳草渡頭微雨時。萬株楊柳拂波垂。蒲根水暖鴈初落。梅逕香寒蜂未知。辭客倚風吟暗淡。使君迴馬濕旌旗。江南仲蔚多情調。悵望青陰幾首詩。

渾記夢詩序云。余常夢登山。有宮室凌雲。人云此崑崙也。既入見數人方欲招之。至暮而罷。詩云。曉入瑤臺露氣清。坐中唯有許飛瓊。塵心未盡俗緣在。十里下山空月明。或云改第二句爲天風飛下步虛聲。

韋莊讀渾詩云。江南才子許渾詩。字字清新句句奇。十斛真珠量不盡。惠休虛作碧雲詞。渾睦州人。字用晦。困師之後。大中三年。任監察御史。以疾乞東歸。終郢睦二州刺史。

水聲東注市朝變。山勢北來宮殿高。(句)草生宮闕國無主。玉樹後庭花爲誰。(句)何郎翠鳳雙飛去。三十六年聞玉簫。(句)經年未葬家人散。昨日因齋故吏來。(句)垂釣有深意。望山多遠情。

右張爲取爲主客圖。

童翰卿

省試昆明池織女石詩云。一片昆明石。千秋織女名。向風長脈脈。臨水更盈盈。有臉蓮同笑。無心鳥不驚。岸雲連鬢濕。沙月對眉生。苦作輕裙色。波爲促杼聲。還如明鏡裏。形影自分明。

翰卿又有句云。大朴逐物盡。哀我天地功。爭得榮辱心。洒然歸西風。

張爲取作主客圖。

詠雙白鷺云。雙鷺應憐水滿池。風飄不動頂絲垂。立當青草人先見。行傍白蓮魚未知。一足獨拳寒雨裏。數聲相叫早秋時。林塘得爾須增價。况是詩家物色宜。

杜元穎爲西川節度使。治無狀。文宗大和三年。南詔蠻嗟巖。乃悉衆掩攻戎。蕞三州。陷之。入成都。止西郛。十日。掠女子五伎數萬。而南至大渡河。謂華人口。此吾南境。爾去國當哭。衆號慟。赴水死者十三。故陶賦蜀人爲南蠻俘虜詩云。但見城池還漢將。豈知佳麗屬蠻兵。錦江南渡聞遙哭。盡是離家別國聲。又賦過大渡。泣望鄉國詩云。大渡河邊蠻亦愁。漢人將渡盡回頭。此中郵寄思鄉淚。南去應無水北流。別嶺州。一時慟哭。雲日爲之變色。詩云。越嶲城南無難地。傷心從我便爲蠻。冤聲一慟悲風起。雲暗青天日下山。蠻界不許有悲泣之聲。詩云。雲南路出

陷河西。毒草長青瘵色低。漸近蠻城誰敢哭。一時收淚羨猿啼。蜀中戰後感事云。蜀道英靈地。山重水又回。文章四子盛。道路五丁開。詞客題橋去。忠臣叱馭來。臥龍同駭浪。躍馬比浮埃。已謂無妖土。那知有禍胎。蕃兵依漢柳。蠻旆指江梅。戰後悲逢血。燒餘恨見灰。空留犀獸怪。無復酒除災。歲積葭洪怨。春深杜宇哀。家貧移未得。愁上望鄉臺。

蜀中經蠻後友人馬艾見寄答云。黃馬渡瀘水。北來如鳥輕。幾年朝鳳闕。一日破龜城。此地有征戰。誰家無死生。人悲還舊里。鳥喜下空營。弟姪意初定。交朋心尙驚。自從經難後。吟苦似猿聲。

陶蜀川上第後。稍薄親黨。其舊雲安劉敬之。罷舉歸三峽。青陶不寄書曰。山近衡陽雖少。鴈水連巴字。豈無魚。陶得詩。悸。賦。乃有狐首之思。後爲簡州牧。自此謝宣城。柳吳興。貢至則折之。聞者亦怠。投賫者稀。得見。有馮道明。下第請謁云。與員外故舊。聞者以道明言啓之。及引進。陶詞曰。與公昧平生。何云相識。道明云。誦員外之詩。仰員外之德。詩集中日得相見。何隔平生也。遂吟曰。立當青草人先見。行傍白蓮魚未知。又曰。江聲秋入寺。雨氣夜侵樓。又曰。閉門客到常疑病。滿院花開不似貧。陶聞吟。欣狎。待道明如曩昔之友。君子以雍君矜誇而好媚。馮子匪藝而求知。

酬李紺歲除送酒云。歲盡貧心事須就。中深恨酒錢無。故人克壽能分送。遠客消愁免自沾。一夜四乘輕鑿落。五更三點把培蘇。已供時節深珍處。况許今朝更挈壺。

陶典陽安送客至情盡橋。問其故。左右曰。送迎之地止此。故橋名情盡。陶命筆題其柱曰。折柳橋。自後送別。必吟其詩曰。從來只有情難盡。何事名爲情盡橋。自此改名爲折柳。任他離恨一條條。

劉夢得洞庭詩云。湘江秋月兩相和。潭面無風鏡未磨。遙望洞庭山翠小。白雲盤裏一青螺。

陶亦吟云。煙波不動影沉沉。碧色全無翠色深。疑是水仙梳洗處。一螺青黛鏡中心。

陶字國鈞。大中八年。再自國子毛詩博士。出刺簡州。姚合送陶及第歸覲云。獻親冬集書。比橋復何如。此去關河遠。相思笑語疎。路尋清整斷。人近白雲居。幽石題名處。憑君亦記予。

陶河陰新城詩云。高城新築壓長川。虎踞龍盤氣色全。五里似雲根不動。一重如月葦長圓。河流暗與溝池合。山色遙將睥睨連。自有此來當汴口。武牢何用鎖風煙。

天津橋春望云。津橋春水浸紅霞。煙柳風絲拂岸斜。翠葦不來金殿閣。宮鶯銜出上陽花。送徐山人歸睦州舊隱云。君在桐廬何處住。草堂應與戴家鄰。初歸山犬翻驚主。久別江

鷗却避人。終日欲爲相逐計。臨時空羨獨行身。秋風釣艇遙相憶。七里灘西片月新。

賈島送陶入蜀云。江山事若諳。那滯滯雲南。草色分危磴。杉陰近古潭。日斜褒谷鳥。夏淺
蕪州蠻。吾自疑雙鬢。相逢更不堪。

陶題杜子美故居云。沙崩水檻鷗飛盡。樹壓村橋馬過遲。

唐詩人最重行卷。陶首篇上裴度。或云耿漳行卷首篇上第五琦。遂指爲二子邪正。雖然。方琦未有鑿時。上詩亦何足多怪。

周元範

誰云蒿上煙。隨雲依碧落。投白公句。莫怪西陵風景別。鏡湖花草爲先春。賀朱慶餘及第及句。

右張爲取作主客圖。

元範句曲人。

李遠

失鶴詩云。秋風吹却九臯禽。一片閑雲萬里心。碧落有情應悵望。青天無路可追尋。來時
白雪翎尤短。去日丹砂頂漸深。華表柱頭留語後。不知消息到如今。

聽臺話叢云。有客新從趙地迴。自言曾工古叢臺。雲遮襄國天邊盡。樹遠漳河掌上來。絃管變成山鳥弄。綺羅留作野花開。金輿玉輦無行跡。風雨誰知長碧苔。

贈寫御容李長史云。玉座塵消硯水清。龍髯不動彩毫輕。初分隆準山河秀。乍點重瞳日月明。宮女捲簾皆暗認。侍臣開殿盡遙驚。三朝供奉無人敵。始覺僧絲浪得名。

張同幽閑鼓吹云。宣宗朝。令狐綯薦遠爲杭州。宣皇曰。我聞有遠詩云。長日唯銷一局棋。豈可以臨郡哉。對曰。詩人之言。非有實也。仍薦遠廉察可任。乃俞之。宣宗視遠到郡。謝上表。左右曰。不足煩聖慮也。上曰。遠到郡。無非時奏章。只有此謝上表。安知不有情懇乎。吾不敢忽也。遠字求古。大中時爲建州刺史。

朱可名

應舉日寄兄弟云。廢斲鏡湖田。上書紫閣前。愁人久委地。詩道未聞天。不是燒金手。徒拋釣月船。多慙兄弟意。不敢問林泉。

右張爲取作主客圖。

可名。越州人。進士及第。終長安。

趙叢

長安秋望云。雲物淒涼拂曙流。漢家官闕動高秋。殘星幾點鴈橫塞。長笛一聲人倚樓。紫
艸半開籬菊靜。紅衣落盡渚蓮愁。鱸魚正美不歸去。空戴南冠學楚囚。

獻淮南李僕射云。早年曾謁富人侯。今日難甘失鶴羞。新諾似山無力負。舊思如水滿身
流。馬嘶紅葉蕭蕭晚。日照長江灑灑秋。功德萬重知不惜。一言拋得百生愁。

開成五年。樂和侍郎下三十一人及第。時在諒園。率皆雅飲。嘏以詩賀曰。天上高高月桂
叢。分明三十一枝風。滿懷春色向人動。遮路亂花迎馬紅。鶴馭尙飄雲雨外。蘭堂不在管絃中。
居然自是前賢事。何必青樓倚翠空。

宣宗索嘏詩首卷題秦皇云。徒知六國隨斤斧。莫有羣儒定是非。上不悅。

張漬會昌五年。陳商下第一人。翰林覆考黜之。嘏貽漬詩曰。莫向春風送酒盃。謫仙真箇
是仙才。猶堪與世爲祥瑞。曾到蓬萊頂上來。

杜紫微覽嘏早秋詩云。殘星幾點鴈橫塞。長笛一聲人倚樓。吟味不已。因曰。嘏爲趙倚樓。
復有贈嘏詩曰。今代風騷將。誰登李杜壇。瀟陵鯨海動。翰死鶴天寒。今日訪君還有意。三條冰
雪獨來看。

嘏曾有詩曰。早晚粗酬身事了。水邊歸去一閑人。果卒於渭南尉。嘏嘗家于浙西。有美姬。

惑之。泊計偕。會中元鶴林之遊。浙帥窺其姬。遂奄有明年。嘏及第。因以一絕箴之曰。寂寞堂前日。又曛陽臺去。作不歸雲。當時聞說沙吒利。今日青娥屬使君。浙帥不自安。遣一介歸之。嘏方出關。逢於橫水驛。姬抱嘏慟哭而卒。遂葬於橫水之陽。

嘏字承祐。大中終於渭南尉。

一千里色中秋月。十萬軍聲半夜潮。（錢塘句）梁王舊館已秋色。珠履少年輕綉衣。（句）滿樓春色傍人醉。半夜雨聲前計非。（句）三千宮女自塗地。十萬人家如洞天。（送人尉江都司）

右張爲取作主客圖。

祝天膺

送高遂赴舉云。句曲舊宅真。自產日月英。既涵嶽瀆氣。安無神仙名。松桂邈迤色。與君相送情。又寄道友云。兩頰凝清霜。玉鑪焚天香。爲我延歲華。得入不死鄉。又夢仙辭云。蟾蜍夜作青冥鏡。蠅螬晴爲碧落梯。好箇分明上天路。誰教移入武陵溪。又有霧紋班似豹。水力健如龍之句。張爲取作主客圖。

元膺。句曲人。與段成式同時。每愛誦孟不疑句云。白日故鄉遠。青山佳句中。成式紀之。

韋承貽

承貽咸通中策試夜譜紀長句於都堂西南隅云。褒衣博帶滿塵埃。獨自都堂納試回。蓮卷幾時聞吉語。棘籬何日免重來。三條燭盡鍾初動。九轉丹成鼎未開。殘月漸低人擾擾。不知誰是謫仙才。又曰。白雲千朶照廊明。一片昇平雅頌聲。纔唱第三條燭盡。南宮風月盡難成。

承貽字貽之。咸通八年登第。

鄭史

史開成元年登第。經過池陽。廉使崔君悅一妓。行雲有詩云。最愛鉛華薄薄粧。更兼衣著又鵝黃。從來南國名佳麗。何事今朝在北行。臨岐博陵公輟贈之。

史終國子博士。

賈島送史詩曰。葛林頗重疊。岑濟復幽奇。汨水斜陽岸。羈人正則祠。蒼梧多蟋蟀。白露濕紅籬。擢第榮回去。晨昏近九疑。

韋楚老

祖龍行云。黑雲兵氣射天烈。壯士朝眠夢寃結。祖龍一夜死沙丘。胡亥空隨鮑魚轍。腐肉偷生三千里。僞書先賜扶蘇死。莫接驪山土未乾。瑞光已向芒碭起。陳勝城中鼓三下。奉家天

地如崩瓦。龍蛇撩亂入咸陽。少帝空隨漢家馬。

江上蚊子云。飄搖挾翅亞紅腹。江邊夜起如雷哭。請問貪婪一點心。臭腐填腹幾多足。越女如花住江曲。口娥夜夜疑雙綠。口君撩亂錦窗中。十軸輕綃圍夜玉。

杜牧之送韋楚老拾遺自洛中歸朝云。洛橋風暖細飈衣。春引仙官去玉墀。獨鶴初沖太虛日。九牛新落一毛時。行開教化期君是。臥病神祇禱我知。十載丈夫堪恥處。朱雲猶棹直言旗。

楚老長慶進士。終於拾遺。開成時。李德裕代牛僧儒爲淮南節度。奏僧儒錢帛事。補闕王績。魏謨。崔黨。韋有翼。拾遺令狐綯。及楚老。樊宗仁。連章奏德裕。妄奏錢帛。以傾僧儒。上不問。一從黃帝葬橋山。碧落千門鎖元氣。(天上行句)

唐詩紀事卷第五十七

段戎式

成式記云。武宗癸亥三年夏。予與張君希復善。繼同官祕書。鄭君符夢復連職仙局。會暇日遊大興善寺。因問兩京雜記及遊日記。多所遺略。乃約一旬尋兩寺。以街東興善爲首。二記所不具到。則別錄之。遊及慈恩。初知官將併寺。僧衆草草。乃泛問一二上人。及記塔下畫跡。遊於此遂絕。後三年。予職于京洛。及刺安成。至大中七年。歸京。在外六甲子。所留書籍。捕壞居半。於故簡中。覩與口二亡友遊寺。瀝血淚交。當時造適樂事。邈不可追。復方刊整。纔足續穿。盡然。十亡五六矣。

靖恭坊大興善寺。寺取大興兩字。坊名一字爲名。新記云。優填像。總章初爲火所燒。據梁時西域優填在荊州言。隋自臺城移來此寺。非也。今又有旃檀像開目。其工頗拙。尤差謬矣。

不空三藏塔前。多老松。歲旱則官伐其枝。爲龍骨以祈雨。蓋三藏役龍意。其木必有靈也。東廊之南。素和尚院。庭有紫桐四株。素之手植。元和中。卿相遊此。院桐至夏。有汗汚人衣。如鰾脂不可浣。相國東門鄭相。嘗與丞相數人避暑。惡其汗。謂素曰。弟子爲和尚伐此木。各植

一松也。及暮，素戲祝木曰：我種汝二十餘年，汝以汗爲人所惡，來歲若復有汗，我必斫汝。自是無汗。寶曆末，子見說已十五餘年，無汗矣。秦公不出院，轉法華經三萬七千部，夜常有貉子聽經。齋時，烏鵲就掌取食。長慶初，庭前牡丹一朵合權，有僧玄幽題此院詩，警句三萬蓮經三十春，半生不踏院門塵。

左顧蛤像舊傳云：隋帝嗜蛤，所食必兼蛤味，數逾千萬矣。忽有一蛤，椎繫如舊，帝異之，寘諸几上。一夜有光，及明，肉自脫，中有一佛二菩薩像，帝悲悔，誓不食蛤，非陳宣帝。

辭二十字連絕句云：乘晴入精舍，語默想東林。盡是忘機侶，誰驚息影禽。（善繼）有松堪繫馬，遇鉢更投針。記得湯師句，高禪助郎吟。（柯古）一雨微塵盡，支郎許數過。方同嗅簷句，不用筭多羅。（夢復）蛤像連二十字絕句，雖因雀變化，不逐月虧盈。縱有天人匠，神工詎可成。（古）相好全如梵，端倪祇爲陪。寧同蚌頑惡，但與鷓相持。（繼）聖柱連句上，有鐵索跡。天心惟助善，聖身此開陽。（古）載恐雷輪重，紅凝電索長。（繼）上行扶蠅棘，不動束銀鐺。（柯）飢鳥未曾啄，乖龍寧敢藏。

長樂坊安國寺紅樓，睿宗在藩時，舞榭東禪院，亦曰木塔院。院門西北廊五壁，吳道子弟子釋思道畫釋梵八部，不施彩色，尙有典刑。

禪師法堂影堂。世號吉州空者。久養一騾。將終。鳴走而死。有弟子允（一曰元）嵩。患風。常於空室埋一柱。鑠之。僧難輒愈。

佛殿開元初。玄宗拆寢室施之。當陽彌勒法空。自光明寺移來。建都時。此像在村蘭若中。往往放光。囚號光明寺。在懷遠坊。後爲延火所燒。唯像獨存。法空初移像。時索大如虎口。數十牛曳之。索斷不動。法空執爐依法作禮。九拜泣涕。發誓像身。忽曝曝作聲。身迸分爲數十段。不終日。移至寺焉。

利涉塑堂。元和中。取其處聖容院。遷像廡下。上忽夢一僧。形容奇偉。訴曰。暴露數日。豈聖君意耶。及明。爲幸驗。問如夢。卽令移就堂中。側施帷帳。安光明寺中。鬼子母及文惠太子塑像。舉止態度如生。工名李岫。口山庭院古木崇阜。幽若山谷。當時輦土營之。上座璘公院。有穗栢一。林衢柯覆。下坐十餘人。

辭紅樓連句。隱侯體。重疊碎晴空。餘霞更助紅。蟬蹤近。鳩鵲。鳥道接相風。（繼）苔靜金輪路。雲輕白日宮。（元和中帝幸此宮。）壁詩傳謝客。（詞人陳至。題此院詩云。漢井尙寒口跡在。紅樓初施日光通。）門榜占休公。（廣宣上人住此院。有詩名。時號爲紅樓集。）

穗栢連句。一院暑難侵。莓苔可影深。枝標爭息鳥。余吹正開襟。（柯）宿雨香添色。殘

陽石在陰。乘閑動詩意。助靜入禪心。（繼）

題璘公院。（二言至七言每人古而題）靜虛熱際安居。（夢）龕燈斂印香餘。東林賓客。西澗圖書。簷外垂青豆。經中發白渠。縱辯宗因袞袞。忘言事理如如。（柯竟）泉臺定將入流否。鄰笛足疑青梵餘。（柯新度）

常樂坊趙景公寺。隨開皇三年置。本曰弘善寺。十八年改焉。南中三門裏。東壁上。吳道玄白畫地獄變。筆力勁怒。變狀陰怪。觀之不覺毛戴。吳畫中得意處。三階院西廊下。范長壽畫西方變。及六對事實池。尤妙絕。諦視之。覺水入浮壁。院門上白畫樹石。頗似閻立德。予携立德行天詞粉本。驗之。西中三門裏。門南。吳生畫龍。及刷天王鬚。筆蹟如鐵。有執爐天女。竊眸欲語。辭吳畫連句。慘淡十堵內。吳生縱狂跡。風雲將逼人。神鬼如脫壁。（柯）其中龍最怪。張甲方汗栗。黑風夜悉窣。焉知不霹靂。（繼）此際忽仙子。獵獵衣鳥奕。妙瞬乍疑生。參差奪人魄。（夢）往往乘猛虎。衝梁聳奇石。蒼峭束高泉。角膝警欺側。（柯）冥獄不可視。毛戴腋流液。苟能水成渠。制那沉火宅。

題約公院四言。印火熒熒。燈續焰青。（繼）七俱眩咒。四阿舍經。（柯）各錄佳語。聊事素屏。（夢）文室安居。延販不局。（昇人上）

大同坊雲化寺。大曆初。僧儼講經。天雨花至地。咫尺而滅。夜有光燭室。敕改爲雲華。儼卽康藏之師也。康本住恭靖里。甃曲忽覩光如輪。衆人皆見。遂尋光至儼講經所。滅佛殿西廊。立高僧一十六身。天寶初。自南內移來。書蹟拙俗。觀音堂在寺西北隅。建中末。百姓屢嚴。患瘡且死。夢一菩薩摩其瘡曰。我在雲花寺。儼驚覺。汗流數日而愈。因詣寺尋檢。至坐書堂。見菩薩一如其覩也。

辭偶連句。共入夕陽寺。因窺甘露門。（昇上人）清香惹苔蘚。忍草雜蘭蓀。（夢）捷偈飛笳答。新詩倚杖論。（柯）壞幡標古刹。聖畫煥崔垣。（繼）豈慕穿籠鳥。難防在廡損。柯一音唯一性。三語更三幡。（繼）

道政坊寶應寺。韓幹。藍田人。少時常爲酒家送酒。王右丞兄弟未遇。每貰酒漫遊。幹常微僨於王家。戲畫地爲人馬。右丞精思丹青。奇其意趣。乃歲與錢二萬。令學畫。十餘年。令寺中釋梵天女。悉齊公妓小小等寫真也。寺有韓幹畫。下生彌勒。衣紫袈裟。右邊仰面菩薩。及二師子。漆之如羅曠羅。每盆供日出之。寺中彌勒殿。齊公寢堂也。東廊北面。楊岫之畫鬼神。齊公嫌其筆蹟。故止一宿。

辭僧房連句。古甃思匡嶺。上方疑傳富。蝶閑移忍草。蟬曉揭高杉。（柯）香字消芝印。金

經發藏函井通松底脈書垢洞中緘（繼）

小小寫真連句如生小小真猶自未棲塵（夢）榆袂將離座斜柯欲近人（柯）昔時知出衆情寵古橫陳（繼）不遣遊張巷豈窺宋隣（夢）庾樓吹笛裂弘閣賞歌新蟬怯纖腰步蛾驚半額頻（繼）形誰有術買笑詎辭貧（柯）複隴迷村徑重泉隔漢津（夢）同心知作羽比日定爲鱗（繼）殘月巫山夕餘霞洛浦晨

平康坊菩薩寺佛殿東西障日及諸柱上圖畫是東廊跡舊鄭法士畫開元中因屋壞移入大佛殿內北壁食堂前東壁上吳道玄畫智度論色偈變偈是吳自題筆跡遒勁如傑鬼神毛髮次堵畫禮骨仙人天衣飛揚滿壁風動佛殿內後壁吳道子畫消災經事樹石古嶮元和中上欲令移之慮其摧壞乃下詔擇畫手寫進佛殿內槽壁經摩變舍利佛角膝而轉元和末俗講僧文淑裝文筆蹟盡矣故興元鄭公尙書題此壁僧院詩曰但虛彩色汚無虛臂口肥置寺碑陰彫飾奇巧相傳鄭法士所起樣也初會覺上人以利施起宅十餘畝工畢釀酒百石列餅甕於兩廊下引吳道玄觀之因謂曰檀越爲我畫以是賞之吳生嗜酒且利其命欣然面許予以蹤跡似不及景公寺畫中三門內東門神善繼云是吳生弟子王耐兒之工也

辭書事連句悉爲無事者任被俗流憎（夢）客異子時客僧非出院僧（柯）遠聞疎

曠警。曉辨密籠燈。(繼)步觸珠幡響。吟窺鉢水燈。(夢)句饒方外趣。遊愜社中朋。(柯)
靜裏已馴鴿。齋中亦好鷹。(繼)金塗筆是髻。彩溜紙非曾。(昇上人)錫杖已尅鍛。田衣從
壞膝。(柯)占牀暫一脅。卷箔賴長脈。(繼)佛日初開照。魔天破幾層。(柯)况中陳祕計。
論處正燒燈。(繼)勇帶綻針石。危防互井簾。

宣陽坊奉慈寺。開元中。魏國夫人宅。安祿山僞置百官。以田乾真爲京兆尹。取此宅爲府。
後爲郭曖駙馬宅。今上卽位之初。太皇太后爲昇平公主追福。奏置奉慈寺。賜錢二十萬。綉幘
三車。抽左街十寺僧四人居之。今有僧惟則。以七寶木摹阿育王舍利塔。自明州負來。寺成
後二年。司農少卿楊敬之。小女年十三。以六韻成詩。題此寺。自稱關西孔子二十七代孫。字德
麟。警句云。日月金輪動。旃檀碧樹秋。塔分鴻雁翅。鐘掛鳳凰樓。事因見勅賜衣。

光宅坊。光宅寺。本官蒲萄園中。禪師影堂。師號惠中。肅宗上元二年。徵至京師。初居此寺。
詔云。杖錫而來。京師非遠。齋心已久。副朕虛懷。

辯中禪師影堂。連句。名下固無虛。教曹貌嚴毅。洞達見空王。圓融入佛地。(繼)一言當
要害。忽忽醒諸醉。不動須彌山。(一云不動如須彌)多言辯無匱。(夢)坦率對萬乘。倡答
無所避。爾如毗沙門。外形如脫屣。(柯)但以理爲量。不語怪力事。木石催貢高。慈悲引貪恚。

（昇上人）當時乏友許，何人契深致。隨宜詎說三，直下開不二。（柯）

胡善坊保壽寺，本高力士宅。天寶九載，捨爲寺。初鑄鐘成，力士設齋慶之。舉朝畢至，一擊百千，有規其意，連擊二十杵，經藏開，規創危巧二塔，火珠受十餘斛。河陽從事李涿，性好奇古，與僧智增善，嘗俱至此寺，觀庫中舊物，忽於破瓮中得物，如被幅裂汚，盆觸而墜起，涿徐視之，乃畫也。因以縣圖三及縑三十獲之，令家人裝治之，大十餘幅，訪於常侍柳公權，方知張萱所畫石橋圖也。玄宗賜高，因留寺中，後爲鬻畫人宗收，言於左軍，尋有小使領軍卒數十人至宅，宣勅取之，即日進入。先帝好古，見之大悅，命張於盧韶院寺，見有先天菩薩幀本，起成都妙積寺。開元初，有尼魏八師者，常念大悲咒，雙流縣百姓劉乙意兒，年十一，自欲事魏尼，尼遣之不去。嘗與室立禪，嘗自魏云：先天菩薩見身此地，篩灰於庭，一夕有巨跡數尺，輪埋成就，因請畫工，隨意設色，後不如意，有僧楊法成自言能畫，童兒常合掌仰，無後指授之，以匠十稔，五方後，素先天菩薩兒二百四十首，首如塔勢，分臂如意，蔓其膀子，有一百四十日，鳥樹一鳳四翅，水肚樹，所題深怪，不可詳悉。畫樣凡十五卷，柳七師者，崔寧之甥，分三卷，往上都流行時，魏奉古爲長史進之，後因四月八日，賜高力士，今成都者是其次本。

辭先天幀讚連句，觀音化身，厥形孔怪，脛腦淫厲，衆魔膜拜。（繼）指夢鴻紛，勝列區界。

其事明張。何不可解。(柯)閻阿德川。大士先天。衆象參羅。噉噉田田。(夢)百億花發。百千燈燃。膠如終澤。浩汗連綿。(繼)焰摩界成。洛迦苦霧。正念皈依。衆如青黛。(柯)戾滓可汰。癡膜可蛻。稽首如空。睟容若睟。(繼)闍提墨師。觀而面之。寸念不生。未遇乎而。(柯)

宣陽坊靜域寺。本太穆皇后宅。僧寺云。三階院門外。是神堯皇帝射孔雀處。禪門內外遊。日記云。王昭隱書門西裏面。和修吉龍王。有靈門。內之西大目藥叉。又及北方天王。甚奇猛。門東裏面。賢門也。野叉部落。鬼首上蟠蛇。汗烟可懼。東廊樹石嶮怪。高僧亦怪。西廊万菩薩。院門裏南壁。皇甫軫畫鬼神。及鵬。鵬勢若脫軫。與吳道玄同時。吳以其藝逼已。募人殺之。万菩薩堂內。有寶塔。以少金銅塔。數日飾之。大曆中。將作劉監有子。合手出胎。七歲。念法華經。及卒。焚之。得舍利數千粒。分藏於金銅塔中。善繼云。合是釧鉞。佛殿東廊。有古佛堂。其地本雍村堂。佛像設。悉是石作。相傳云。隋恭帝終此堂。

惣三階院連句。密密助堂堂。陪人歌壓桑。雙鶴摧孔雀。一矢隕貪狼。(柯)百步望雲立。九規看月張。獲蛟澁破浪。中一漫如墻。(繼)還似貫金鼓。更疑穿石梁。因添挽河力。爲滅射天狂。(何)絕羣却南牧。英聲來鬼方。麗電何足敵。殫死未爲長。(懲)龍臂勝狼臂。星芒超箭芒。虛誇絕高鳥。垂拱議明堂。(柯)

崇義坊招福院。本日正覺國初毀之。以其地立第。賜諸王。睿宗在藩。居之。乾封二年。移長寧公主佛殿於此。重建此寺。

贈諸上人連句。翻了西天偈。燒餘梵字香。撚眉愁俗客。反頰背殘陽。(柯)州號唯思沃。山名祗記匡。辯中摧世智。定裏破魔強。(繼)許敷禪心徹。湯休詩思長。助吟疏磬斷。久語貫珠妨。(柯)乘輿書芭葉。閑來入豆房。漫題存古壁。怪畫匝長廊。(繼)

招國坊崇濟寺。寺內有天后織成綾。龍披襖子。及綉衣六事。東廊從南第二院。有宣律師製袈裟堂。曼殊堂。有松數株甚奇。

辭宣律和尚袈裟絕句。善繼云。其覆三衣中夜寒。披時不鎖尼師壇。無因蓋得龍宮地。畦裏塵飛葉相殘。

和前云。南山披時寒夜中。一角不動毗嵐風。何人見此生慙愧。斷續猶應護得龍。

奇松二十字。杉松何相疏。榆柳方迴層。無人檀談柄。一枝不敢折。(柯)中庭苔蘚深。吹余鳴佛禽。至於摧折枝。凡草猶避陰。(繼)僻徑根從露。閑房枝任侵。一株風正好。來助碧雲吟。(夢)時時掃惚聲。重露滴寒砌。風颭一枝口。閑窺別生勢。(昇上人)偃蓋入樓妨。盤根侵井窄。高僧獨惆悵。爲與燈嵐隔。(柯)

永安坊永壽寺三門東。吳道子畫似不得意。佛殿名會仙。本是內中梳洗殿。貞元中有證智禪師。往往靈驗。或時在張檀蘭中。若治田及夜歸寺。若在金山界。相去七百里。

辭閑中好。閑中好。盡日松爲侶。此趣人不知。輕風度僧語。(夢)閑中好。塵務不縈心。坐對當牕木。看移三面陰。(柯)閑中好。幽磬度鍾遲。卷上論題筆。畫中僧姓支。(繼)

崇仁坊資聖寺淨土院門外。相傳吳生一夕秉燭醉畫。就中戟手視之。惡駭。院門裏盧稜伽。常學吳勢。吳亦授以手訣。乃畫摠持三門寺方半。吳大賞之。謂人曰。稜伽不得心訣。用思太苦。其能久乎。畫畢而卒。中門牕間。吳畫高僧。韋述贊。李巖書。中三門外。兩面上層。不知何人畫。人物頗類閻令寺。西廊北偶。楊怛畫。近塔天女。明眸將瞬。團塔院北堂。有鐵觀音。長三丈餘。觀音院兩廊。四十二賢聖。韓幹畫。元中書贊。東廊北頭散馬。不意見者。如將嘶蹠。聖僧中龍樹。商那和修絕妙。團塔上菩薩。李真畫。四面花鳥。邊鸞當藥。菩薩頂上。莪葵尤佳。塔中藏千部法華經。

辭諸畫連句。柏梁體。吳生畫勇正戟攢。(柯)出變奇勢千萬端。(繼)蒼蒼鬼怪層壁寬。(夢)觀之忽忽毛髮寒。(柯)稜伽之力所疲殫。(柯)李真周昉優劣難。(夢)活禽生卉推邊鸞。(柯)花房嫩彩猶未乾。(柯)韓幹變態如激湍。(夢)惜者壁畫勢未殫。後

人新盡何汗漫。(繼)

成式字柯古。文昌之子。博學強記。多奇篇祕籍。嘗於私第鑿池。得片鐵。命尺周量之。笑而不言。寘之密室。時窺之。則有金書二字。報十二時也。

成式博物類此。終太常少卿。

成式與溫庭筠雲藍紙詩序曰。予在九江。多意造之。分送五十。詩云。三十六鱗充使時。數番猶得裏相思。待將袍襖重抄了。盡寫陽襄播措詞。

成式酉陽雜俎云。古樂府木蘭篇。願馳千里明。送兒還故鄉。明字多誤作鳴。駭臥腹不帖地。屈足漏明。則行千里。又云。波斯國謂象牙爲白暗。犀角爲黑暗。故老杜有黑暗通蠻賈之句。又載鬼詩二篇云。長安女兒踏春忙。何處春歸不斷腸。舞袖弓彎渾忘却。娥眉空帶九秋霜。又云。流水娟娟片發牙。織鳥雙飛客還家。荒村無人作寒食。殯宮空對棠梨花。

酉陽雜俎云。一夕。予坐客牙。送連句爲煩。乃命工取細斑竹。以白金口首。如茶挾。以遞聯名之。予在城時。常與客連句。初無虛日。小酌求狎。或窮韻相角。或押惡韻。或煎茗一椀。爲八韻詩。謂之雜連。若志於不朽。則汰揀穩韻。無所得。輒已。謂之苦連。連待其押平聲好韻不僻者。出於竹簡。謂之韻牒。出城忘携行。坐客句枝韻牒之語。必爲好事者所傳矣。因說故相牛公。楊州

賞秀才蒨希逸詩。蟾蜍醉裏破。蛺蝶夢中殘。每坐吟之。予因請坐客各吟近日爲詩者佳句。有吟賈島舊國別多日。故人無少年。馬戴猿啼洞庭樹。人在木蘭舟。又骨銷金鏃在。有吟僧無可。河來當塞斷。一曰盡。山。一曰岸。遠與沙平。又開門落葉深。有吟張祐河流側讓關。一曰山。又泉聲到池盡。有吟僧靈準詩。晴看漢水廣。秋覺峴山高。吟朱景玄塞鴻先秋去。邊草入夏生。予吟上都僧元礎。守隔殘潮去。又採藥過泉聲。又林塘秋半宿。風雨夜深來。予識蜀中客龐李。予每云寒雲生易滿。秋草長難高。

成式有漢上題襟十卷。

羌風亭夜宴。妓有醉毆者。溫飛卿曰。若狀此便可以痕面對梓胡。成式乃曰。梓胡雲彩落。痕而月痕消。又曰。擲履仙曼起。墮衣蝴蝶飄。羞中含薄怒。嘯裏帶餘嬌。醒後猶攘腕。歸時更折腰。狂夫自纒絕。眉勢倩誰描。韋蟾云。爭揮鈞弋手。競聳踏籥身。傷頰詎關舞。捧心非効嘯。飛卿云。吳國初成陣。王家欲觀圍。拂巾雙雉叫。飄瓦兩鴛飛。

唐詩紀事卷第五十八

溫庭皓 韋蟾 李傲芳 李溟

李郢 韓琮 劉滄 柳棠

賀蘭朋吉 崔珏 李洞 長孫翺

崔櫓 曹唐 于武陵 霍揔

劉魯風 盧尙卿

溫庭皓

尙書東苑公鎮襄陽成式庭皓皆其從事上元唱和詩各三篇成式詩云風抄影凌亂
露輕光陸離如霄散仙掌似燒上峨嵋涪樹千花發扶桑九日移因山成聚象不復藉蟠螭
踴出多寶塔往來飛錫僧分明三五月倣照百千燈馴狻移高柱摩雲遮半屨夜深寒焰
白猶自綴金繩磊落風初定輕明蠶乍妨疏中搖月彩繁處雜星芳火樹枝柯密燭籠鱗角張
窮愁讀書者應得假餘光

庭皓詩云一峯當勝地萬點照嚴城勢異崑岡發光疑玄圃生焚書翻見字舉燧不招兵

况遇新春夜，何勞秉燭行。

九枝應並耀，午夜思潛然。景集青山外，螢分碧草前。輝華侵月影，歷亂寫星躔。望極高樓上，搖光滿綺筵。春山收暝色，燭火集餘輝。麗景饒紅焰，祥光出翠微。白榆行自此，青桂影相依。唯有偷光客，追遊欲忘歸。

庭皓，咸通中爲徐州崔彥曾幕府。龐勛反，以勸庭皓使爲表求節度使。倨答曰：我豈以筆硯事汝耶？其速殺我。遂遇害。庭皓，梅詩云：一樹寒林外，何人此地栽。春光先自煖，陽艷暗相催。曉覺霜添白，寒迷月借開。餘香低惹袖，墮葉逐流杯。零落移新暖，飄揚上故臺。雪繁鶯不識，風裊蝶空迴。羌吹應愁起，征徒異渴來。莫貪題詠興，商鼎待鹽梅。

韋蟾

上元唱和詩云：新正圓月夜，尤重看燈時。累塔嫌沙細，成文訝筆遲。歸牛疑燧落，過鴈悞書遺。生惜蘭膏燼，還爲隔歲期。

舉燭光纔起，揮毫勢競分。點時驚墜石，挑處接崩雲。辭異秦丞相，銘非竇冠軍。唯愁殘焰落，逢玉亦俱焚。多寶神光動，生金瑞色浮。照人低入郭，伴月夜當樓。熏穴應無取，焚林固有求。夜闌陪玉帳，不見九枝留。

蟾簾問鄂州。罷賓僚。祖餞。蟾曾書文選句云。悲莫悲兮生別離。登山臨水送將歸。以牋毫授賓從。請續其句。逡巡有妓泣然起曰。某不才不敢染翰。欲口占兩句。韋大驚異。令隨念云。武昌無限新栽柳。不見楊花撲面飛。座客無不嘉歎。韋令唱作楊柳枝詞。

蟾爲尤承。至長樂驛。見李湯給事題名。題其側曰。渭水春山照眼明。希仁何事寡詩情。只應學得虞姬媼。書字才能記姓名。

蟾字隱珪。下杜人。大中七年進士。登第。初爲徐商掌書記。終尙書左丞。梅詩云。高樹臨溪。低枝隔竹繁。何須是桃李。然後欲忘言。擬折魂先斷。須看眼更昏。誰知南陌草。却解望王孫。題僧壁云。一竹橫簷桂淨巾。竈無烟火地無塵。剃頭未必知心法。要且閑於名利人。段成式。和有僧支頰撚眉毫。起就夕陽磨剃刀。到此旣知閑處樂。俗心何啻九牛毛。

送盧潘尙書之靈武云。賀蘭山下果園成。塞北江南舊有名。水木萬家朱戶暗。弓刀千隊鐵衣鳴。心源落落堪爲將。膽氣堂堂合用兵。却使六番諸子弟。馬前不信是書生。

贈商山僧云。商嶺東西路欲分。兩間茅屋一溪雲。師言耳重知師意。人是人非不欲聞。

李敬方

天台閣望云。天台十二句。一片雨中春。林果垂楊盡。山苗半夏新。陽鳥暗展翅。陰魄夜飛

輪坐冀無雲物。分明見北辰。勸酒云。不向花前醉。花應解笑人。只憂連夜雨。又過一年春。

聞高侍郎卒。貶所云。京西高院長。直氣似吾徒。走馬論邊備。飛聲感廟謨。官移人未察。身沒事多符。寂寞他年後。名編野史無。

遣興云。果窺丹竈鶴。莫羨白頭翁。日月仙壺外。筋骸藥臼中。雲歸無定所。鳥跡不留空。何必勞方寸。嶮崎問遠公。

汴河直進。船云。汴水通淮利最多。生人爲害亦相和。東南四十三州地。取盡脂膏是此河。字中虔。登長慶進士第。大和中。爲歙州刺史。大中時。顧陶集唐詩類選云。李歙州敬方。才力周備。輿比之間。獨與前輩相近。家集三百首。簡擇律韻八篇而已。雖前後憂絕。或畏多言。而典刑具存。非敢避棄。

李 溟

喬木掛斗色。水驛壞門開。向月片帆去。背雲行鴈來。晚年名利跡。寧免路岐哀。前計不能息。若爲玄時迴。〔無題〕溟以是詩得名。溟爲取作主客圖。

賈島送溟謁宥州李權使君云。英雄典宥州。迢遞苦吟遊。風宿驪山下。月斜灞水流。去時初落葉。迴日定無秋。太守携才子。看鵬百尺樓。

李 鄴

重陽日寄浙東諸從事云。野人多病門長掩。荒圃重陽菊自開。愁裏又聞清笛怨。望中難見白衣來。元瑜正及從軍樂。甯戚誰憐叩角哀。紅旆紛紛碧江暮。知君醉下望鄉臺。

奉陪裴相公重陽日游安樂池亭云。絳霄輕鶴翊三台。嵇阮情懷管樂才。蓮沼昔爲王儉府。菊籬今作孟嘉盃。寧知北闕元勳在。漢賜蕭何等北闕。大第却引東山舊客來。白笑吐茵還酩酊。日斜空從綠衣迴。

和潤州杜員外冬至日白蘋州見憶云。白蘋亭上一陽生。謝眺新裁錦繡成。千嶂雪銷溪影綠。幾家梅綻海波清。已知鷗鳥長來狎。可許汀洲獨有名。多愧龍門重招引。卽拋田舍棹舟行。

贈羽林將軍云。虬髯顛頽羽林郎。曾入甘泉侍玉皇。鵬沒夜雲知御苑。馬隨仙仗識天香。五胡劫去孤舟月。六國平來兩鬢霜。唯有桓伊江上笛。臥吹三弄送殘陽。

上裴晉公詩云。四朝憂國鬢如絲。龍馬精神海鶴姿。天上玉書傳詔夜。陣前金甲受降時。曾經庾亮三秋月。下盡羊曇兩路棋。惆悵舊堂局綠野。夕陽無限鳥飛遲。

江亭春霽云。江籬漠漠荇田田。江上雲亭霽景鮮。蜀客帆檣背歸燕。楚山花木怨啼鶻。春

風掩映千門柳。晚色凄寒萬井烟。金磬泠冷水南寺。上方僧室翠微連。

寒食遠望云。舊墳新隴哭多時。流世都堪幾度悲。烏鵲亂啼人未遠。野風吹散白棠梨。

七夕寄張氏兄弟云。新秋牛女會佳期。紅粉筵開玉饌時。好與檀郎記花朵。莫教清曉羨珠絲。

七夕云。烏鵲橋頭雙扇開。年年一度過河來。莫嫌天上稀相見。猶勝人間去不回。欲滅烟花饒俗世。暫煩明月掩粧臺。別時舊路長清淺。豈肯離口似死灰。

中元夜詩云。江南水寺中元夜。金粟關邊見月娥。紅燭影迴仙態近。翠環光動見人多。香飄彩纓疑蘭麝。霧透輕衣雜綺羅。湘水夜空巫峽遠。不知歸路欲如何。

字楚望。大中進士。終於御史。

郗有詩云。江風徹曙不成睡。二十五聲秋點長。最爲驚絕。劉光遠載於金華子。

李義山汴上送郢之蘇州云。人高詩苦滯夷門。萬里梁王有舊園。烟幌自應憐白紵。月樓雜伴詠黃昏。露桃塗頰依苔井。風柳誇腰住水村。蘇小小墳今在否。紫蘭香逕與招魂。

杜牧之湖南正初招郢云。行樂及時時已晚。對酒當歌歌不成。千里暮山重疊翠。一溪寒水淺深清。高人以飲爲忙事。浮世除詩盡強名。看着白蘋芽欲吐。雪舟相訪勝閑行。

方千贈李郢端公。非唯孤峭與世絕。吟處斯須能變通。物外搜羅歸大雅。毫端剪削有餘功。山川正氣侵靈府。雪月清輝引惠風。別得人間上昇術。丹青路在五言中。

鄧子興字魯珍。生於南海。尤能詩。每一管成。必餽炙人口。後登甲科。

韓琮

春愁篇云。金烏長飛玉兔走。青鬢長青古無有。秦娥十六語如絲。未解貪花惜楊柳。吳魚嶺鴈無消息。冰盼蘭情別來久。勸君年少莫遊春。暖風遲日濃如酒。

詠馬云。曾經伯樂識長鳴。不似龍行不敢行。金埒未登嘶若是。驢車猶駕瘦何驚。難逢王濟知音癖。欲就燕昭買駿名。早晚飛黃引同阜。碧雲天上作鸞鳴。

暮春送客云。綠暗紅稀出鳳城。暮雲樓閣古今情。行人莫聽宮前水。流盡年光是此聲。駱谷晚望云。秦川如畫渭如絲。去國還鄉一望時。公子皇孫莫來好。嶺花多是斷腸枝。

二月二日遊洛源云。舊苑新晴草似苔。人還香在踏青開。今朝此地成惆悵。已後逢春更莫來。

公子行云。紫袖長衫色。銀蟬半臂花。帶粧盤水玉。鞍繡坐雲霞。別殿承恩澤。飛龍賜渥洼。控羅青梟轡。鏤象碧熏篋。意氣催歌舞。闌珊走鈿車。袖彰雲縹緲。釵轉鳳欹斜。珠卷迎歸箔。紅

龍晃醉紗。唯無難夜日。不得似仙家。

字代封大中。爲湖南觀察使。待將士不以禮。宣宗時。爲都將石載順等所逐。

劉滄

中秋夜翫月詩云。中秋朗月靜天河。烏鵲南飛客恨多。寒色滿牕明枕簟。清光凝露拂烟蘿。桂枝斜漢流靈魄。蘋葉微風動細波。此夜空庭聞木葉。兼葭霜積鴈初過。

與僧話舊云。山鳥同時下翠微。舊遊因話事多違。南朝古寺幾僧在。北嶺空林唯鳥歸。莎徑晚烟凝竹塢。石池香色染苔衣。此來相見又相別。卽是關河朔雁飛。

經煬帝行宮云。此地曾經翠輦過。浮雲流水竟如何。香消南國美人盡。怨入東風芳草多。殘柳宮前空露葉。夕陽川上浩烟波。行人遙起廣陵思。古渡月明聞棹歌。

咸陽懷古云。經過此地無窮事。一望淒廢感廢興。渭水故都秦二世。咸陽秋草漢諸陵。天空絕塞聞邊雁。葉盡孤村見夜燈。風景蒼蒼多少恨。寒山半出白雲層。

長洲懷古云。野燒空原盡狄灰。吳王此地有樓台。千年事在人何在。半夜月明潮自來。白鳥影從江樹沒。清猿聲入楚雲哀。停車日晚薦蘋藻。風靜寒塘花正開。

滄字蘊靈。大中進士也。

柳棠

東川柳棠應進士舉。才思優贍。楊尙書汝士作鎮日。以一巨魚飲之。棠不卽飲。楊公以詩戲之曰。文章謾道能吞鳳。盃酒何曾解喫魚。今日梓州張社會。應須遭這老尙書。棠曰。未向燕臺逢厚禮。幸因社會接餘歡。一魚喫了終無愧。鷓鴣化爲鷓鴣也不難。初棠與馮戡善。棠及弟後戡與詩曰。桃花浪裏成龍去。竹葉山頭退鷓鴣。棠每於東川席上。狂縱日甚。詩忤楊公云。莫言名位未相儔。風月何曾阻獻酬。西齋不須輕後輩。靖安今日在衡州。靖安李宗閔尙書。與楊公中外昆弟。東川益怒。爲書讓其座上。高諧侍郎曰。柳棠者。兇悖囂傲。識者惡之。狡過者仲容才非犬子。且膺門之貴。豈宜有此生乎。二公以書往返詰難。棠不任憂惕。其後參越舊軍事而卒。

賀蘭朋吉

客舍喜友人相訪云。荒居無四隣。誰肯訪來頻。古樹秋中葉。他鄉病裏身。雁聲風送急。螢影月流新。獨爲成名晚。多慚見友人。

賈島寄朋吉云。往往東林下。花香似火焚。故園從小別。夜雨近秋聞。

野菜連寒水。枯株簇古墳。泛舟同遠客。尋寺入幽雲。斜日扉多掩。荒田徑細分。相思蟬幾處。偶坐蝶成羣。會宿曾論道。登高省議文。苦吟遙可想。邊葉向紛紛。

烏又有夜喜賀蘭三見訪詩云。漏鍾仍夜淺。時節欲秋分。泉聒棲松鶴。風陰翳月雲。踏苔行引輿。枕石臥論文。卽此尋常靜。來多祇是君。

崔珏

岳陽樓晚望云。乾坤千里水雲間。釣艇如萍去復還。樓上北風斜卷席。湖中西日倒銜山。懷沙有恨騷人往。鼓瑟無聲帝子閑。何事黃昏尙凝睇。數行烟樹接荆蠻。

哭李商隱云。成紀星郎字義山。適歸黃壤抱長歎。詞林枝葉三春盡。學海波瀾一夜乾。風雨已吹燈燭滅。姓名常在齒牙寒。應遊物外攀琪樹。便着霓裳上玉壇。

水精枕云。千年積雪萬年冰。掌上初擎力不勝。南國舊知何處得。北方寒氣此中凝。黃昏轉燭螢飛沼。白日褰簾水在簷。斲箏蜀琴相對好。裁詩乞與滌煩襟。

鷺鶯云。翠鬢紅毛舞落暉。水禽情似此禽稀。暫分烟鳥猶迴首。祇過寒塘亦並飛。映霧乍迷金殿冷。逐梭齊上玉人機。探蘭無恨蘭橈女。笑指中流候爾歸。

珏作太魏公幕。與副車袁克常侍不叶。公俱薦之於朝。珏拜芸閣讎校。會有客以絲桐詣公。心善之。欲振其名。命以所乘馬迎珏賞之。公爲客請一篇。珏因以發其憤。詩云。七條絃上五音寒。此藝知音自古難。唯有河南房次律。始終憐得董庭蘭。公大恚。

珏字夢之。登大中進士第。

李義山送珏往西川云。年少因何有旅愁。欲爲東下更西遊。一條雪浪吼巫峽。千里火雲燒益州。卜肆至今多寂寞。酒爐從古擅風流。浣花牋紙桃紅色。好好題詩詠玉鈎。

李洞

上崇賢曹郎中云。閉坊宅枕穿宮水。聽冰分袞盡蜀僧。藥杵聲中搗殘夢。茶鑪影裏煮孤燈。荆曹樹蔭千年井。華岳樓間裏里冰。詩句變風宮漸緊。夜濤吞盡海邊藤。

子規詩云。萬古瀟湘波上雲。化爲流血杜鵑口。長疑啄破青山色。只恐啼穿白月輪。花落玄宗歸蜀道。雨飛工部宿江津。聲聲曾恐聒君耳。不見千愁一甌塵。

洞唐諸王孫也。常遊西川。慕賈浪仙爲詩。鑄銅像其儀。事之如神。洞爲終南山詩二十韻。句有殘陽高照蜀。敗葉遠浮涇。復曰。斷竹烟嵐凍。偷湫雨雹腥。遠平丹鳳闕。冷射五侯廳。曾司空侍郎云。馬飢食落葉。鶴病曬殘陽。又曰。卷簾清谿月。敲松紫閣書。又送僧云。越講迎騎象。蕃蕃懺射鵬。上高僕射曰。征南破虜漢功臣。提劍歸來萬里身。閑倚凌雲金柱看。形容消瘦老於真。復曰。藥杵聲中搗殘夢。茶鑪影裏獻孤燈。送人歸東南云。島嶼分諸國。星河共一天。時人但謂其僻澁。而不能貴其奇峭。唯吳子華深知之。子華才力浩大。八面受敵。以韻著稱。(游刃)

頗攻騷雅。嘗以百篇示洞。洞曰：大兄所示百篇中，有一聯絕唱。西昌新亭曰：「鰲溪魚遺子，晴遊鹿引麋。子華不怨所鄙，而喜所許。」洞三榜。裴公第二榜。策夜簾，獻詩公道。此時如不得昭陵，慟哭一生休。尋卒蜀中。裴公無子，人謂屈洞所致。裴公贊也。洞慕賈島，鑄其像頂戴，常念賈島佛。（北夢）

洞終南山詩云：關內平田窄，東西截杏冥。雨侵諸縣黑，雲破九門青。暫看猶無暇，長栖信有靈。古苔先漬斗，積霧夜甘螢。怒恐撞天漏，深疑隱地形。盤根連北岳，轉影落南溟。窮穴何山出，遮巒上國寧。殘陽高照蜀，敗葉遠浮溼。隨竹朔嵐凍，偷湫雨雹腥。閑房僧灌頂，浴澗鶴爲翎。梯滑危緣索，雲深靜唱經。放泉經鹿睡，聞磬得人醒。踏逐神仙宅，敲開洞府扃。碁殘秦士局，字缺晉公銘。一谷癸開午，孤峯聳起了。遠平丹鳳闕，冷射五侯廳。方丈三口折，千尋樹影亭。望中仙島動，行處月輪馨。疊石移臨砌，研膠澣上屏。明時獻君壽，不假老人星。

送僧遊南海云：春往海南邊，秋開半路蟬。鯨吞洗鉢水，犀觸舞燈懸。島嶼分諸國，星河共一天。長空却歸日，松偃舊房前。

賦得送賈島調長江云：敲爐吟雪月，謫出國西門。行傍長江影，愁深汨水魂。印攜過燒寺，琴曲在花村。飢食山松子，誰知賈傅孫。

題維摩暢林居云。諸方遊幾闕。五夏五峯銷。越講迎騎象。蕃齋懺射鵬。冷筇書雪倚。枯櫟
畫雲燒。從此西林老。瞥然三萬朝。

鄭谷哭洞詩云。自聞東蜀病。唯我最關情。若近長江死。想君勝在生。李生皓愛浪仙詩。
瘴蒸丹旄濕。燈隔素帷清。塚樹僧栽後。新蟬一兩聲。

長孫翹

長孫翹。朱慶餘。各有宮詞。朝詞曰。

一道甘泉接御溝。上皇行處不曾秋。誰言水是無情物。也到宮前咽不流。

朱曰。寂寂花時閉院門。美人相對泣瓊軒。含情欲說宮中事。鸚鵡前頭不敢言。

崔櫓

來聲。春晚岳陽城。言懷云。煙花零落過清明。異國光陰老客情。雲夢夕陽愁異色。洞庭春浪坐
來聲。天邊一與舊山別。江上幾看芳草深。獨凭欄杆意難寫。暮笳鳴。虬調孤城。

華清宮詩云。銀河漾漾月輝輝。樓礙星邊織女機。橫玉叫雲清似水。滿空霜逐一聲飛。
障掩金鷄蓄禍機。翠華西拂蜀雲飛。珠簾一閉朝元閣。不見人歸見燕歸。
草遮回蹬絕鳴鑿。雲樹深深碧殿寒。明月自來還自去。更無人倚玉欄杆。

門橫金鎖悄無人。落日秋聲渭水濱。紅葉下山口寂寂。濕雲如夢雨如塵。

櫓。慕杜紫微爲詩。櫓才情麗而近蕩。有無機集三百篇。尤能詠物。如梅花詩曰。強半瘦因前夜雪。數枝愁向晚天來。復曰。初開已入雕梁畫。未落先愁玉笛吹。山鵲詩曰。雲生柱礎降龍地。露洗林巒放鶴天。蓮花詩云。無人解把無塵袖。盛取殘香盡日憐。櫓有酒失於虔州。陸郎中肱以詩謝之曰。醉時顛蹶醒時羞。麴蘖推人不自由。叵耐一雙窮相眼。不堪花卉在前頭。出撫言。

櫓大中時進士也。

山路見花詩曰。曉紅初折露香新。獨立空山冷笑春。春意自知無主惜。恣風吹逐馬蹄塵。岸梅云。含情含怨一枝枝。斜壓漁家短短籬。惹袖尙餘香半日。向人如訴雨多時。初開偏稱雕梁畫。未落先愁玉笛吹。行客見來無去意。解帆烟浦爲題詩。

曹唐

暮春戲贈吳端公云。年少英雄好丈夫。大家望拜漢金吾。閑眠曉日聽鷓鴣。笑倚春風杖。轆轤深院吹笙從漢婢。靜街調馬任奚奴。牡丹花外簾鉤下。獨凭紅肌捋虎鬚。

病馬云。綠耳何年別渥洼。病來顏色半泥沙。四蹄不繫銀砧裂。雙眼慵開玉燭斜。墮月兔。

毛輕翦。裁失雲龍骨。瘦牙槎。平原好放無人放。嘶向東風首宿花。

嘗寓江陵佛寺。寺有亭沼。唐得句曰。水底有天春。漠漠人間無路月。茫茫明日還坐沼上。有二婦人。素裳徐步。詠所口詩。唐迫而訊之。不應。未十步而沒。數日。唐亦殞。竟不成名。

簫聲欲盡。月色苦依舊。漢家宮樹秋。一遊仙句。看却龍髯攀不得。九霞零落鼎湖宮。句。一曲哀歌茂陵道。漢家天子葬秋風。句。誰知漢武無仙骨。滿竈黃金成白烟。句。

右張爲取作主客圖。

唐字堯賓。桂州人。初爲道士。後爲使府從事。咸通中。卒。作遊仙詩百餘篇。其友人曰。堯賓曾作鬼詩。唐曰。何也。且井廣有天春。我寂。人間無路月。茫茫。非鬼詩而何。唐大哂。遊仙詩。今見一絕云。薛節先生。幾代登。青娥曾口。玉郎魂。春風流水還無賴。偷放桃花出洞門。唐詩。屬對清切。如鷓鴣。思起歌聲動。鷓鴣身。翻舞袖。齊。斬蛟。青海上。射虎。黑山頭。此類頗多。

于武陵

孤雲詩云。南北各萬里。有雲心更閑。因風離海上。伴月到人間。洛浦少高。一作佳。樹。長安無舊山。徘徊不可住。漠漠又東還。

客中云。楚人歌竹枝。遊子淚沾衣。異國久爲客。寒宵頻夢歸。一封書未返。千樹葉皆飛。南

度洞庭水，更應消息稀。

長信宮云：簾涼秋氣初，長信恨何如。拂黛月生指，理髮雲滿梳。一從悲畫扇，幾度泣前魚。坐聽南宮樂，清風搖翠裙。

武陵會昌時詩人也。

白日不西落，紅塵應亦深。（白）青山如有利，白石亦成塵。（句）四海少年路，千川無定波。（句）

右張爲取作主客圖。

靈 摠

郡樓望九華歌云：樓上坐見九子峯，翠雲赤日光溶溶。有時朝昏變疏密，八峯和烟一峯出。有時風卷天雨晴，聚立連連如弟兄。陽鳥生子偶成數，丹鳳養雛同此名。日日遙看機已靜，未離塵濁思眞境。子明龍駕騰九垓，陵陽相對空崔嵬。玉漿瑤草不可見，自有神仙風馬來。

武元衡嘗有送摠詩云：瑟絲簫管怨津樓，三奏行人醉不留。別後相思江一岸，落花飛處

杜鵬愁。

摠咸通時爲池州刺史。

劉魯風

魯風。江西投謁所知。頗爲典客所阻。因賦一絕曰。萬卷書生劉魯風。煙波萬里謁文翁。無錢乞與韓知客。名紙毛生不肯通。

魯風。張又新客也。又新水記曰。子刺九江。有客李滂。門士劉魯風。

自正元後。唐文甚振。以文學科第爲一時之榮。及其弊也。士子豪氣罵吻。遊諸侯門。諸侯望而畏之。如劉魯風。姚富保。柳棠。平曾之徒。其文皆不足取。余故載之者。以見當時諸侯。爭取譽於文士。此蓋外重內輕之牙蘖。如李益者。一時文宗。猶曰。感恩知有地。不上望京樓。其後如李山甫輩。以一名第之失。至挾方鎮。劫宰輔。則又有甚焉者矣。一篇一韻。初若虛文。而治亂之萌。係焉。余以是知世不可忽也。

盧仝卿

咸通十一年。以馳助盜據徐州。久屯戍卒。連年飛輓。物力方虛。因詔權亭貢舉一年。是歲。尙卿自至闕。聞詔而迴。乃賦東歸詩曰。九重丹詔下塵埃。深瑣文闈罷選才。桂樹放教遮月長。杏園終待隔年開。自從玉帳論兵後。不許金門諫獵來。今日滿陵橋上過。門人應笑臘前迴。

尙卿。至僖宗中和二年。始登第於蜀。

唐詩紀事卷第五十九

薛瑩

褚載

汪遵

蕭遇

盧渥

李訥

崔元範

楊知至

封彥卿

盧鄴

高湘

盧激

滕倪

林傑

李明遠

李章武

郭圓

薛逢

張洪靖

韓察

崔恭

崔公信

陸灋

胡證

高銖

張賈

薛瑩

中秋月云。三十六句盈復缺。百年堪喜又堪傷。勸君莫惜登樓望。雲放嬋娟不久長。

褚載

雲詩云。盡日看雲首不迴。無心都大似無才。可憐光彩一片玉。萬里青天何處來。

賀趙觀文重試及第云。一枝仙桂兩回春。始覺文章可致身。已把色絲要上第。又將彩筆

冠羣倫。龍泉再淬方知利。火浣重燒轉更新。今日街頭看御勝。大能榮耀苦心人。

案觀文乾寧二年。崔凝下第。八人登第。是年命陸辰重試。而觀文爲榜首。

陸威爲郎官。載以文投獻。數字犯其家諱。威因矍然。載尋以牋致謝曰。曹興之圖書雖精。終慚誤筆。殷浩之矜持太過。翻達空函。

載字厚之。登乾寧造士第。

汪遵

五湖詩曰。已立平吳霸。越功片帆高。颺五湖風。不知戰國縱橫者。誰似陶朱得始終。澠池云。西秦北趙各稱高。池上張筵列我曹。何事君王親擊缶。相如有劍可吹毛。

函谷關云。脫禍東奔壯氣催。馬如飛電勢如雷。當時若不輕彈鋏。那得關門夜半開。

遵幼爲吏。許棠應二十餘舉。遵猶在胥徒。善爲絕句詩。而深晦密。一旦辭役就貢。會棠送

客至。滌濟間遇遵於途。訊曰。何事至京。遵曰。就貢。棠怒曰。小吏無禮。後遵成名。五年。棠始登第。

秦築長城比鐵牢。蕃戎不敢過臨洮。雖然萬里連雲際。爭及堯階三尺高。遵長城詩也。得

名於時。

遵。宣城人。登咸通七年進士第。許棠其鄉人也。水泉花木好高樹。嵩少縱橫滿目前。惆悵

人間不平事。今朝身在海南邊。遵題李太尉平泉莊詩也。

蕭 遇

春詩云。南國韶光早。春風送鴈來。水堤煙報柳。山寺雪驚梅。練色鋪江晚。潮聲逐渚迴。青旌問沽酒。何處撥寒醅。

蕭與韋保衡同年登第。保衡以幸進。而蕭自標致。衡銜之。既相。倚蕭之失。貶播州司馬。途經三峽。月夜賦詩自悼。懼其見害。若有人告曰。公其勿憂。余當爲禁禦。蕭後爲相。

盧 渥

渥。字子章。軒冕之盛。近代無比。伯仲四人。咸居顯列。乾符初。母憂服闋。渥自前中書舍人。拜陝府解察使。弟紹。前長安令。除給事中。弟沅。自前集賢校理。除左拾遺。弟沼。自畿尉遷監察御史。詔書學士。士族榮之。及赴任。陝郊洛城。自居守分司。朝臣已下。牙設祖筵。洛城爲之一空。都人聳觀。亘數十里。渥題嘉祥驛詩曰。交親榮餞洛城空。秉鉞戎裝上將同。星使自天丹詔下。雕鞍照地數程中。馬嘶靜谷聲偏響。旆映晴山色更紅。到後定知人易化。滿街棠樹有遺風。

渥在舉場。甚有時稱。曾於灤水逆旅。遇宣宗微行。意其貴人。斂身避之。帝呼與相見。乃自稱進士盧渥。帝請詩卷。袖之而去。它日對宰臣語及盧渥。令主司擢第。宰臣問渥與主上有何

階緣。渥且陳其由。時亦不以爲忝。

渥應舉之歲。偶臨御溝。見一紅葉。葉上有絕句。置於巾箱。或呈於同志。及宣宗放宮人。初下詔。許從百官司吏。獨不許貢舉人。盧後一任范陽。獲其退宮。視紅葉而吁。藏巾篋。驗其書。無不驚訝。詩曰。水流何太急。深宮盡日閑。慙慙謝紅葉。好去到人間。出本事詩。

唐末渥自陝府廉察入朝。知舉。遇巢寇犯闕。不及終場。趙崇戲之曰。出腸不生養主司也。蓋盧氏未嘗知舉。盧相攜恥之。拔爲主文。卒不果。渥終檢校司徒。

李訥

李尙書訥。爲浙東廉使。夜登越城樓。聞歌曰。雁門山上雁初飛。其聲激切。召至。曰。去籍之妓。盛小叢也。時察院崔侍御元範。自府幕赴闕庭。李餞之。命小叢歌餞。在座各爲一絕。贈送之。崔下句云。獨向栢臺爲老吏。或曰。侍御鳳閣中書。卽其程也。何老於栢臺。請改之。崔不可。是年秋。崔鞠獄譙中。乃終於栢臺之任。訥詩云。繡衣奔命去情多。南國佳人歛翠娥。曾向教坊聽國樂。爲君重唱盛叢歌。

訥。故侍郎建。字杓直之子。字敦正。大中時。爲浙東觀察使。卒於兵部尙書。

崔元範

元範詩云。羊公留宴岷山亭。洛浦高歌五夜情。獨向柏臺爲老吏。可憐林木響餘聲。
元範以監察御史爲浙東幕府。

楊知至

知至詩云。趙燕能歌有幾人。爲花回雪似含聲。頻隨御史西歸去。誰伴文翁怨九春。
知至時爲浙東團練判官。

會昌四年。王起奏五人。楊知至。(刑部尙書汝士之子)源重。(故相牛僧孺之孫)鄭
朴。(河東節度使崔永式女婿)楊嚴。(監察御史發之弟)竇緘。(故相易直之子)有旨
令送所試雜文。付翰林重考。覆續奉口口口進旨。楊嚴一人。宜與及弟源重等四人。落下。知至
因以長句呈同年曰。由來梁雁與冥鴻。不合翩翩向碧空。寒谷謾勞鄒氏律。長天獨遇宋都風。
此時泣玉情雖異。它日銜環事亦同。二月春光正搖蕩。無因得醉杏園中。

知至字幾子。登進士第。爲宰相劉瞻所善。擢累戶部侍郎。

封彥卿

彥卿詩云。蓮府纔爲綠水濱。(庾杲之在王儉幕府。似芙蓉泛綠水。古有此句。)忽乘驄
馬入咸秦。爲君唱作西歌調。日暮偏傷去住人。

彥卿。大中進士第。爲浙東觀察判官。戶部尙書敖之子。

廣

鄴詩云。何郎載酒別賢侯。更吐歌珠宴庾樓。莫道江南不同醉。卽陪舟楫上京溝。
鄴大中四年登第。爲浙東觀察御使。

高湘

湘詩云。謝安春渚餞袁宏。千里仁風一扇清。歌黛慘時方酩酊。不知父子重飛觥。唐父子之學三家。高諧子。湘。湜。子。邵。子。允。躬。崔。郾。子。瑤。唯。崔。氏。相。去。只。二。十。年。咸。通。末。路。富。作。相。除。不。附。已。者。十。司。戶。崔。沆。浙。州。李。瀆。繡。州。李。藻。費。州。湘。高。州。湘。與。兄。湜。不。睦。湜。爲。中。書。舍。人。與。富。善。湘。到。任。憤。湜。不。已。嘗。賦。詩。曰。唯。有。高。州。是。當。家。

湘字濬之。錯之子。爲右諫議大夫。

盧澥

澥詩云。烏臺上客繡衣公。共捧天書靜境中。桃朶不須歌白苧。耶溪暮雨起樵風。
澥浙東處士也。

滕倪

滕倪苦心爲新詩。嘉聲早播遠之吉州。謁宗人太守郎中邁。邁每吟其句云。白髮不能容相國。也同閑客滿頭生。又題鷺鷥障子云。映水有深意。見人無懼心。邁曰。魏文惜陳思之學。潘安褒正叔之文。貴集一家之盛。如此。倪逼秋試。捧笈告遊。留詩爲別。悵然曰。是必不祥。倪至秋。逝於商口館舍。聞者莫不傷焉。倪詩曰。秋初江上別旌旗。故國無家淚欲垂。千里未知投足處。前程便是聽猿時。誤攻文字身空老。却返漁樵計已遲。羽翼彫零飛不得。舟霄無路接差池。

林傑

林傑。字智周。幼而秀異。言則成文。年六歲。請舉童子。時父肅爲園府大將。性樂善。尤好聚書。又妙於手譚。當時名公多與之交。及有是子。益大其門。庶使崔侍郎于函。與遷職。鄉人榮之。傑五歲。父行。至王仙君霸壇。戲問童子能詩乎。傑口占云。羽客已登仙路去。丹爐草木盡彫殘。不知千載歸何日。空使時人掃舊壇。父初不謂眇歲之作。遽臻於此。羣親益驚異。越相傅諷。自此日課所爲。未幾盈軸。明年。遂獻唐中丞。唐旣伸幅。窺吟。簪爾駭嘆。命子弟延入學院。時會七夕。賦乞巧詩。傑援筆曰。七夕今霄看碧霄。牛郎織女渡河橋。家家乞巧望秋月。穿盡紅絲幾百條。唐嘆曰。真神童耳。傑又精於琴棋。草隸。俱自天然。不煩師授。唐因與省從。或全局輸者。令罩之。勿觸。取童子來。繼終其事。傑必指縱出奇。往往返勝。曲盡其妙。時謂神助。後復業詞賦。

頗振聲問。有仙客入壺中賦云。仙客以變化隨形。逍遙放情。處於外則一壺斯在。入其中則萬象俱呈。飛閣重樓。不是人間之狀。奇花異木。無非物外之名。至九歲。謁盧大夫貞。黎常侍植。無不嘉獎。尋就賓廡。日在宴筵。李侍御遠。趙支使格。深所知仰。不捨斯須。和趙支使詠荔枝詩云。金盤摘下排朱顆。紅殼開時飲玉漿。鄭副使立作奇童傳。劉制置灌爲序。以貽之。至年十七。方結束琴書。將西邁而殂。

李明遠

宣宗時。太僕卿韋覲。以禱醮之故。爲女巫誣告。帝知其冤。詔誅巫。謫覲潘州司馬。李明遠時爲監察御史。有詩曰。北鳥飛不到。南人誰去遊。天涯浮瘴水。嶺外向潘州。草木春秋暮。猿狖日夜愁。定知遷客淚。應只對君流。

李章武

大和末。勅僧尼試經不通者。勒還俗。章武爲成都少尹。有山僧云。禪觀有年。未嘗念經。今被追試。前業棄矣。章武因詩曰。南宗尙許通方便。何處心中更念經。好去必蕩雲水畔。何山松武不青青。論主者特免試。

郭圓

世傳張延賞。韋皇持節劍南。相代之事。頗爲延賞之恥。郭泗濱圓詩曰。宣父從周又適秦。昔賢雖少出風塵。當時甚訝張延賞。不識韋皇是貴人。南部新書云。韋皇見辱於張延賞。崔圓受薄於李彥允。皆丈人子壻。爲西川交代。

圓。會昌中。檢校司門外郎。爲劍南李固言從事。

薛逢（子庭珪）

逢。字陶臣。蒲州人。會昌進士。初與劉瑒交。會瑒當國。有薦逢知制誥者。瑒猥曰。先朝以兩省官給事舍人。先治州縣。乃得除。逢未試州。執不可。乃出刺巴州。而楊收王鐸同牒署收輔政。逢有詩。微辭幾訕收銜之。復斥逢綿二州刺史。鐸爲相。又以詩警鐸云。昨日鴻毛萬鈞重。今朝山嶽一毫輕。遂不見齒於祕書監。題黃花驛云。孤戍迢迢蜀路長。鳥鳴山館客思鄉。更看絕頂煙霞外。數樹崑崙照夕陽。

元日田家云。南村晴雪北村梅。樹裏茅簷曉盡開。檀棧出門兒婦去。鳥飛迎路女郎來。相逢但祝新正壽。對舉那愁暮景催。長笑士林因管別。一官輕是十年迴。

賀楊收作相詩云。闕下憧憧車馬塵。沉沉和次宦遊身。須知金印朝天客。同是沙堤避路人。威鳳偶時因瑞聖。應龍無水謾通神。丘門不是趨時客。始向窮途學問津。

逢命一道士口眞。自爲贊曰。裝造薛逢。長一尺五寸。於是絕筆。終未能續。一旦忽一羽衣詣門。見眞讚。命筆續之。云。手把金鎚。鑿開混沌。長揖而去。不知所之。逢鑿開混沌賦得名也。

漢武帝詞云。武帝清齋夜築壇。自斟明水醮仙官。殿前童女移香案。雲際金人捧露盤。絲節有時還入夢。碧桃何處更驂鸞。茂陵煙雨埋弓劍。石馬無聲謾草寒。

張洪靖

洪靖爲太原節度使。有山亭懷古詩云。叢石依古城。懸泉灑清池。高低袤丈內。銜霍相蔽虧。歸田竟何因。爲郡豈所宜。誰能辦大野。寄適聊在斯。

節度判官侍御史韓察和云。公府政多暇。思與仁智全。爲山想富穴。引水聽潺湲。軒冕迹自逸。薦俗無由牽。蒼生方颺望。詎得賦歸田。

節度副使檢校右散騎常侍崔恭和云。高情樂閑放。寄跡山水中。朝霞鋪座右。虛白貯清風。潛竇激飛泉。石路躋且崇。步武有勝概。不與俗情同。(恭能文。嘗叙梁肅文集。)

觀察判官兼殿中侍御史崔公信和云。疊石狀崖巘。翠舍城上樓。前移盧霍峯。遠帶沅湘流。瀟灑主人靜。蚤緣芳徑幽。清輝在昏旦。豈異東山遊。

給事中陸澗和云。激水瀉飛瀑。寄懷良在茲。如何謝安石。要結東山期。入座蘭蕙馥。當軒

松桂滋於焉悟幽道境寂心自怡。

左金吾衛大將軍胡證和云。飛泉天台狀峭石蓬萊姿。潺湲與青翠咫尺當幽奇。居然盡精道。得以書妍詞。豈無他山勝。懿此清軒墀。

節度判官監察御史高銖和云。關石類崑嶷。飛流瀉潺湲。遠壑蒼字際。孤鸞雉堞間。何必到海岳。境幽機自閑。茲焉得高趣。高步謝東山。

尚書左丞張賈和云。中庭起崖谷。漱玉下漣漪。口口誰云遠。寓象得心期。豈不貴鍾鼎。至懷在希夷。唯當蓬萊閣。靈風復來儀。（賈洪靖從姪也。）

節度掌書記監察御史李德裕和云。崑石在朱戶。風泉當翠樓。始知峴亭賞。難與清輝留。餘景澹將夕。凝嵐輕欲收。東山有歸志。亦接赤松遊。

洪靖字元理。元和中。自宰相出爲河東節度使。公信登元和元年進士第。洪靖帥太原。辟爲掌記。後以德裕代之。

以公信爲觀察判官。灑登正元元年進士第。

證河東人。舉進士第。元和十三年。自振武節度使召任金吾大將軍。趙宗儒鎮河中。證時建節。赴振武。備桑梓。里入謁。持刺稱百姓。獻趙公詩云。詩書入京國。旌旆過鄉關。州里榮之。

(出因話錄)退之奉酬振武胡十二丈大夫詩云。傾朝共羨寵光頻。半歲遷騰作虎臣。弩矢前驅煩縣令。(一云戎旆暫停辭仕樹)里門先下敬鄉人。橫飛玉醜家山曉。遠蹀金珂塞草春。自笑平生誇膽氣。不離文字鬢毛新。

恭終汾州刺史。銖字權仲。既擢第。爲洪靖幕府。後爲太常卿。

賈爲韋夏卿所知。後至達官。初以侍御史爲華州。上以忘言之句。別之曰。束簡下高閣。買符驅短轅。故人惜分袂。結念醉芳醪。切切別思纏。蕭蕭征騎煩。臨歸無限意。相視却忘言。

唐詩紀事卷第六十

李節 費冠卿 劉虛白 蕭建

袁不約 孫緯 周祚 崔澹

盧頻 李廊 李頻 賈馳

薛能 曹鄴 裴虔餘 陳陶

李節

會昌季年武宗大剪釋氏巾其徒且數萬人民隸其居容口於土木者沉諸水嘗詞於紙素者烈諸火分命御史乘駟走天下察敢隱匿者罪之田是天下名祠珍宇撤如掃天子建號之初雪釋氏之不可廢也詔徐復之而自湖已南遠人畏法不能酌朝廷之體前時焚撤書像殆無遺者故雖明命復許創立莫能得其書道林寺湘川之勝遊也有釋疏言警辯有謀獨曰太原府國家舊都多釋祠我聞其帥司空范陽公天下仁人我第往求釋氏遺文以惠湘川之人宜其聽我而助成之矣卽杖而北遊旣上謁軍門范陽公果諾之因四求散逸不成繡軼者至釋祠而不見焚而副剝者又命講丐以補繕缺漏者月朱幾凡得釋經五千四十八卷以

大中九年秋八月。輦自河東而歸於湘焉。喜釋氏之助。世既言之矣。向非我君洞察理源。其何能復立之。卽旣立之。且亡其書。非有疏言識遠而誠堅。孰克洪之耶。吾喜疏言奉君之令。演釋之宗。不憚寒暑之勤。德及遠人。爲敘其事。且贈以詩。湘川信口兮俗獷且佞。利殺業偷兮吏莫之訓。緊釋氏兮易暴使仁。釋何在兮釋在斯文。湘水滔滔兮四望何以。猿狖騰擊兮雲樹飛飛。月沉浦兮煙暝山。檣席卷兮櫺牀閑。偃仰兮嘯詠。鼓長江兮何時還。湘川超忽兮落日晚。松覆秋亭兮蘭被春苑。上人去兮幾千里。何日同遊兮湘川水。

節登大中進士第

費冠卿

閑居卽事云。生計唯將三尺童。學它賢者隱牆東。照眠夜後多因月。掃地春來祇藉風。幾處旌旗驅戰士。一園青草伴衰翁。子房仙去孔明死。更有何人解指蹤。

酬范中丞見惠云。花宮柳陌正從行。紫袂金鞍問姓名。戰國方須禮干木。康時何必重侯嬴。捧將束帛山僮喜。傳示銀鈞邑客驚。直爲雲泥相去遠。一言知己殺身輕。

秋日與冷然上人寺莊觀稼云。世人從擾擾。獨自愛身閑。美景當新霽。隨僧過遠山。村橋出秋稼。空翠落澄灣。唯有中林犬。猶應望我還。

題中峯云。中峯高挂沈寥天。上有茅庵與石泉。晴景獵人曾望見。青藍色裏一僧禪。

蒙召拜拾遺。書情二首云。拾遺帝側知難得。官緊才微恐不勝。好是中朝絕親友。九華山下詔來徵。又云。三千里外一微臣。二十年來任運身。今日忽蒙天子召。自慙驚動國中人。

梓樹藤云。本爲獨立難寄彼。高樹枝。蔓衍數條遠。溟濛千朶垂。向日助成陰。當風藉持危。誰言柔可屈。坐見蟠蛟螭。

枕流石云。不爲幽岸隱。古色涵空出。願以清泚流。鑒此堅貞質。傍臨玉光潤。時瀉苔花密。往往驚游鱗。尙疑垂釣日。

冠卿字子軍。池州人。久居京師。感懷詩云。燈燭不爲苦。求名始辛酸。上國無交親。請謁多少難。九月風到面。羞汗成冰片。求名俟公道。名與公道遠。力盡得一名。他喜我且輕。家書十年絕。歸去知誰榮。馬嘶渭橋柳。特地起愁聲。登元和二年第。母卒。旣葬而歸。嘆曰。千祿養親耳。得祿而親喪。何以祿爲。遂隱池州九華山。長慶中。殿院李行修。舉其孝節。拜右拾遺。制曰。前進士費冠卿。常預計偕。以文中第。祿不及於榮養。恨每積於永懷。遂來屏身丘園。絕跡仕進。守其志性。十有五年。峻節無用。清飈自遠。夫旌孝行。舉逸人。所以厚風俗而敦名教也。宜承高獎。以儆薄夫。擢參近侍之榮。載佇移忠之効。冠卿竟不應命。杜荀鶴有詩吊其墓曰。凡弔先生者。多傷

荆棘間。不知三尺墓。高却九華山。天地有何外。子孫無亦閒。當時若徵起。未必道身還。冠卿以拾遺召不起。賦詩云。君親同是先王道。何如骨肉一處老。也知臣不合佐時。自古榮華誰可保。姚合嘗寄詩云。逍遙繒繖外。高鳥與潛魚。闕下無朝籍。林間有詔書。夜眠幽洞石。曉飯白雲疏。四海人空老。九華君獨居。此心誰復識。日與世相疏。

李羣玉經費拾遺故居云。雲臥竟不起。少微空損光。惟應孔北海。爲立鄭公鄉。舊館苔蘚合。幽齋松菊荒。空餘書帶草。日日上階長。

劉虛白

竟陵人劉虛白。擢進士第。嗜酒。有詩云。知道醉鄉無戶稅。住他荒却下口田。出北夢瑣言。虛白與盧坦交友。坦主文。虛白於簾前獻一絕云。二十年前此夜中。一般燈燭一般風。不知歲月能多少。猶着麻衣待至公。

蕭建

建與費冠卿同時。建寄冠卿云。見說九華峯上寺。日宮猶在下方開。其中幽境客難到。請爲詩中圖畫來。冠卿答詩云。自地上青峯。懸崖一萬重。踐危頻側足。登暫半齊胸。飛狖啼攀桂。遊人喘倚松。入林寒瘁瘁。近瀑雨濛濛。徑滑石稜上。寺開山掌中。幡花撲淨地。臺殿印晴空。勝

境層層別。高僧院院逢。泉魚候洗鉢。老攬戲撞鐘。外戶憑雲掩。中廚課水舂。搜泥時和麵。拾橡半添種。渡鰲綠槎際。持燈入洞窮。夾天開壁峭。透石疊波雄。澗藹清無土。潭深碧有龍。畚田一片淨。谷樹萬株濃。野客登臨慣。山房幽寂同。寒爐樹根火。夏牖竹梢風。邊鄙疇賢相。黔黎託聖躬。君能棄名利。歲晏一相逢。

建登進士第。終禮部侍郎。

袁不約

不約有深秋之句云。愁聲秋遠杵。寒色碧山歸。又有客去之句云。送將歡笑去。收得寂寥迴。張爲取二聯於主客圖。

范曄云。李固言在成都。則李珣郎中。郭圓員外。陳會端公。袁不約侍郎。來擇書記。薛重詩。事皆遠從公。可謂蓮幕之盛。不約登長慶三年第。

孫緯

中秋夜思鄭延美有作云。中秋中夜月。世說憎妖精。願兔雲初蔽。長蛇誰與勅。未追良友翫。安用玉輪盈。此意人誰論。裁詩寄禁城。

緯咸通人。年宏詞登科。

周祚

莫道春花獨照人。愁花未必怯青春。四時風雨沒時節。共保松筠根底塵。祚以此詩得名。張爲取作主客圖。

崔澹

怪得輕風送異香。娉婷仙子曳霓裳。惟憂錯認偷桃客。曼倩曾爲瑱侍郎。（澹贈美人）
太中末。崔鉉自平章事鎮淮海。楊收爲支使。收狀云。前時里在。初迎避馬之威。今日藩垣。便仰問牛之代。澹之詞也。澹終於吏部侍郎。

盧頰

蛺蝶行云。東園宮草綠。上下飛相逐。君恩不禁春。昨夜花中宿。
東西行云。種荷玉盆裏。不及溝中水。養雉黃金籠。見草心先喜。

頰又有春淚爛羅綺。泣聲抽恨多。莫滴芙蓉地。愁傷連蒂荷。（句）一朶花葉飛。一枝花光彩。美人惜花心。但願春長在。（句）張爲取作主客圖。

李廓

夏日途中云。樹夾炎風路。行人正午稀。初蟬數聲起。戲蝶一團飛。日色欺清鏡。槐膏點白

衣無成歸故里。自覺少光輝。

廓李程之子也。登元和進士第。大中中。拜武寧節度使。不能治軍。補闕鄭魯言。新麥未登。徐必亂。既而軍亂。果逐廓。按舊史。廓有詩名。大中末。累官至穎州刺史。再爲觀察使。子晝亦登進士第。

廓長安少年行云。金紫少年郎。繞街鞍馬狂。身從左中尉。官屬右春坊。劉戴揚州帽。重薰異國香。垂鞭踏青草。來去杏園芳。

追逐輕薄伴。閑遊不着緋。長攜出獵馬。數換打毬衣。曉日尋花去。春風帶酒歸。青樓無畫夜。歌舞歇時稀。

日高春睡足。帖馬賞年華。倒插銀魚袋。行隨金犢車。還携新市酒。遠醉曲江花。幾度歸伊黑。金吾送到家。

好勝耽長夜。天明燭滿樓。留人看獨脚。賭馬換偏頭。樂奏曾無歇。盃巡不暫休。時時遙令笑。怪答有春秋。

遨遊攜豔妓。裘束似男兒。盃酒逢花住。笙歌簇馬吹。鶯聲催曲急。春色送歸遲。不以聞街鼓。華筵待月移。

賞春唯逐勝。大宅可曾歸。不樂還逃席。多狂慣白衣。歌人踏日起。語燕卷簾飛。婦好唯相妬。倡樓不醉稀。

戟門連日閉。苦飲惜殘春。開鎖通新客。教姬屈醉人。清歌牽白馬。自舞踏紅茵。時輩皆相許。乎生不負身。

新年高殿上。始見有光輝。玉鴈排方帶。金鵝立仗衣。酒深和碗賜。馬疾打珂飛。朝下人爭看。香街意氣歸。

遊市慵騎馬。隨姬入座車。樓邊聽歌吹。簾外中欽花。樂眼從人鬧。歸心畏日斜。蒼頭來去報。飲伴到倡家。

小婦教鸚鵡。頭邊喚醉醒。犬嬌眠玉管。鷹掣撼金鈴。碧地攢花障。紅泥待客亭。雖然長按曲。不飲不曾聽。

鷄鳴曲云。星稀月沒入五更。膠膠角角鷄初鳴。征人牽馬出門立。辭妾欲向安西行。再鳴引頸簷頭下。月中角聲催上馬。纔分地色第二鳴。旌旆紅塵已出城。婦人上城亂招手。夫婿不聞遙哭聲。長恨鷄鳴別時苦。不遣鷄栖近窗戶。

鏡聽詞云。匣中取鏡祠竈王。羅衣掩盡明月光。昔時長着照容色。今夜潛將聽消息。門前

地黑人來稀。無人錯道朝夕歸。更深弱體冷如鐵。綉帶菱花懷裏熱。銅片銅片如有靈。願得照見行人千里形。

勇士行云。戰鼓驚沙惡天色。勇士虬鬚眼前黑。單于衣錦日行兵。陣頭走馬生擒得。幽并少年不敢輕。虎狼窟裏空手行。

送振武將軍云。葉葉歸邊騎。風頭萬里乾。金裝腰帶重。錦縫耳衣寒。蘆酒燒蓬暖。霜鴻撚箭看。黃河古城道。秋雪白漫漫。

小說載。廓從其父程。過三亭渡。爲小石隱。足痛。以呼父程曰。太華峯頭。見有仙人手跡。黃河灘裏。爭得隱人脚跟。

廓落第詩云。榜前潛制淚。衆裏自嫌身。氣味如中酒。情懷似別人。暖風張樂席。晴日看花塵。盡是添愁處。深居乞過春。

姚合有送李廓侍郎赴夏州詩云。酬恩不顧名。走馬覺身輕。迢遞河邊路。蒼茫塞上城。沙寒無宿鴈。虜近少閑兵。飲罷揮鞭去。傍人意氣生。

李 頻

頻字德新。睦州人。與里人方千善。給事中姚合。名爲詩士。多歸重。頻走千里。丐其品藻。合

大加獎挹。以女妻之。乾符中。以工部外郎爲劍州刺史。卒。

吳州月夜與曹太尉話別詩云。早晚更看吳苑月。西齋長憶月當窗。不知明夜誰家見。應照離人隔楚江。

送茶山人歸洞庭云。却共孤雲去。高眠最上峯。半湖垂早月。中路入疏鐘。秋盡蟲聲急。夜深山雨重。當時同隱者。分得幾株松。

湖口送友人云。中流欲暮見湘煙。葦岸無窮接楚田。去鴈遠衝雲夢澤。離人獨上洞庭船。風波盡日依山轉。星漢通霄向水連。零落梅花過殘臘。故園歸去及新年。

過四皓廟云。東西南北人。高跡自相親。天下已歸漢。山中猶避秦。龍樓曾作客。鶴氅不爲臣。獨有千年後。青青廟木春。

陝下懷云。故國何處在。零落五湖東。日暮無來客。天寒有去鴻。大河冰徹塞。高岳雪連空。獨夜懸歸思。迢迢永漏中。

鄭谷哭建州李員外詩云。今歸終故里。末歲道如初。舊友誰爲誌。清風豈易書。雨墳生野蕨。鄉奠釣金魚。獨夜吟還泣。前年作直廬。

羅隱題方干詩云。中間李建州。夏汭偶同遊。顧我論佳句。推君最上流。九霄無鶴板。雙鬢

老漁舟世難方如此。何當浣旅愁。

姚合答頻詩云。一年離九陌。壁上掛朝袍。物外詩情遠。人間酒味高。思歸知病長。失寢覺
勤勞。衰老無多思。因君把筆毫。

賈馳

秋入關詩云。河上微風來。關頭樹初溼。今朝關城吏。又見孤客入。上國誰與期。西來徒自
急。

馳。唐末人。會昌間。陸貞洞王滌輩題三鄉詩。馳後留贈云。壁古字未滅。聲長響不絕。蕙質
本如雲。松心應耐雪。耿耿離幽谷。悠悠望甌越。杞婦哭夫時。城崩無此說。
馳有秋入關詩。及東風吹曉霜。雪鳥雙雙來之句。張爲取作主客圖。

薛能

能。字大拙。汾州人。會昌六年進士。大中八年。平判入等。補塾屋尉。辟太原陝虢河陽從事。
李福鎮滑州。表觀察判官。歷侍御史都官。刑部員外郎。福徙西川。取爲節度副使。咸通中。攝嘉
州刺史。歸朝。遷主客度支刑部郎中。俄刺同州。京兆尹溫璋貶。命權知尹州。出領感化節度。入
授工書。復節度徐州。徙忠武。廣明元年。徐兵赴潞水。經許。能以前帥徐軍吏懷恩。館之州內。許

軍懼。徐人見襲。大將周岌。因衆怒。遂能自稱留後。能全家遇害。

能申湖詩云。昔年依峽寺。每日見申湖。下淚重來此。知心一已無。雨霖舟色暗。岸拔木形枯。舊境深相惱。新春宛不殊。方來尋熟侶。起去恨驚鳧。忍事花何笑。喧吟瀑正竈。堪憂從宦到。倍遣曩懷孤。上馬終回首。傍人怪感吁。

謝劉相寄天柱茶云。兩串春團敵夜光。名題天柱印維揚。偷嫌曼倩桃無味。搗覺嫦娥藥不香。惜恐被分緣利市。盡應難覓爲供堂。宦官寄與真拋却。賴有詩情合得嘗。

獻僕射相公云。清如冰玉重如山。百辟嚴趨禮絕攀。強虜外聞應破膽。平人長見盡開顏。朝廷有道青春好。門館無私白晝閑。致却垂衣更何事。幾多詩合詠關關。

從事蜀川日。每知諸葛功業。其詩曰。流連有功終是撓。陰符多術得非姦。又云。陣圖誰許可。廟口我擲揄。又云。焚却蜀書宜不讀。武侯無可律吾身。能役鎮徐州。上元夜偶作云。誰見將軍心似海。四更親領萬人遊。自負如此果軍亂。被害上元詩。偃王燈塔古徐州。二十年來樂事休。此日將軍心似海。四更身領萬人遊。又云。十萬軍城百萬燈。酥油香暖夜如蒸。紅粧滿地烟光好。祇恐笙歌引上昇。(其後死於徐州)

能鎮徐。慕容溥。劉巨容。周岌。俱在麾下。來數年。溥鎮徐。巨容鎮襄。岌鎮許。俱假端揆。故能

詩曰：舊將已爲三僕射，病身猶是六尙書。

能題後集曰：詩源何代失澄清，處處狂波汙後生。常感道孤吟有淚，却緣風壞語無情。難甘惡少欺韓信，枉被諸侯殺禰衡。縱到緱山也無益，四方聯絡盡蛙聲。

青春背我堂堂去，白髮催人故故生。此能詩也。然無子美大體之度。

鄭谷讀許昌詩集有作云：篇篇高且真，真爲國風陳。澹佇雖師古，縱橫得意新。剪裁成幾帙，（近世詩人遊作公篇什最多）唱和是誰人。華岳題無敵，黃河句絕倫。（韋岳黃河詩序云：皆二京之內，巨題目也。）吟殘荔枝雨，詠徹海棠春。（公有海棠荔枝二首，序云：杜子美老於兩蜀，而無此詠。）李白欺前輩，（公有寄符郎中云：我生若在開元日，爭遣名爲李翰林。）陶潛仰後塵。（公有論詩一草云：李白終無取，陶潛固不刊。）難望嵩山下，（公有嵩山巨篇）不負蜀江濱。（公常從事蜀中者，一千集）屬思看山眼，冥搜倚樹身。樵樸勞夢想，諷誦爽精神。筆落空追愴，曾蒙借斧斤。

秋夜旅舍寓懷云：夜鎖荒蕪獨夜吟，西風吹動故人心。三秋木落半年客，滿地月明何處砧。漁唱亂松汀鷺合，雁聲寒咽隴雲深。平身只有松堪對，露浥霜欺不受侵。

許州題德星亭云：澗水南流東有堤，堤邊亭是武陵溪。槎松配石堪僧坐，藥杏含春欲鳥

啼。高處月生滄海外。遠郊山在夕陽西。頻來不似軍從事。只載紗巾曳杖藜。

褒斜道中云。十驛襟斜到處慵。眼前常似接靈蹤。江遙旋入旁來水。山闊猶藏向後峯。鳥徑惡時應立虎。畚田開日自燒松。行吟却笑公車役。夜發星馳半不逢。

曹鄴

鄴能交。有持操。咸通初。爲大常博士。白敏中卒。議諡。鄴責其病不堅退。且逐諫目。敏中病足。求避位不許。補闕王譜奏。願聽其請。无使有特寵曠責之譏。帝怒。斥譜。舉怙威肆行諡曰醜。高元裕子曠。懿宗時爲相。卒。鄴建言。曠爲宰相。交游醜雜。進取多蹊。諡法不思愛曰刺。請諡爲刺。

讀李斯傳云。欺暗常不然。欺明當自戮。難將一人手。掩得天下目。

杏園卽席上。同年云。岐路不在天。十年行不至。一旦公道開。青雲在平地。枕上數聲鼓。衡門已如市。白日探得珠。不待驪龍睡。忿忿出九衢。僮僕顏色異。故衣未及換。尙有去年淚。晴陽照花影。落絮浮野翠。對酒時忽驚。猶疑夢中事。白憐孤飛鳥。得接鸞鳳翅。永懷其濟心。莫起胡越意。

鄴字業之。大中進士也。唐末。以祠部郎中知洋州。

隣女面上花。空床常對影。况妾不嫁容。甘爲瓶墜井。（句）右張爲取此句。洎讀李斯傳。杏園上同年詩。作主客詞。

老圃堂詩云。邵平瓜地接吾廬。穀雨乾時手自鋤。昨日春風欺不在。就床吹落讀殘書。
送人歸南海云。數片紅霞映夕陽。攬君衣袂更移觴。行人莫歎碧雲晚。上國每年春草芳。
雪過藍關寒氣薄。雁迴湘浦怨聲長。應無惆悵滄海遠。十二重樓非我鄉。

右二章。韋莊取爲又元集。

裴虔餘

咸通末。虔餘佐北門。李公淮南幕。（李蔚）嘗遊江。舟子刻舟。竹篙濺水。濕近坐之衣。公色變。虔餘紀一絕云。滿額娥黃金縷衣。翠翹浮動玉釵垂。從教水濺羅衣溼。知道巫山行雨歸。公極懽。命謠者傳之。

陳陶

朝元引四闋云。帝燭燧煌下九天。蓬萊宮曉玉爐烟。無央鸞鳳隨金母。來賀薰風一萬年。
玉殿雲開露冕旒。下方珠翠壓鰲頭。天鷄唱罷南山曙。春色先輝十二樓。
萬寓靈祥擁帝居。東華元老薦屠蘇。龍池遙望非烟拜。五色瞳矐在玉壺。

寶祚河宮一向清。龜魚天象益分明。近臣誰獻登封草。五岳齊呼萬歲聲。

閑居雜興云。一顧成周力有餘。白雲擗釣五溪魚。中原莫道無麟鳳。自是皇家結網疏。

又云。長壽真人王子喬。五松山月伴吹簫。從他浮世悲生死。獨駕蒼龍八九霄。

池塘生春草云。謝公遺詠處。池水夾通津。古往人何在。年來莫自春。色宜波際綠。香異雨中新。今日青青意。空悲行路人。

北夢瑣言云。大中年。陳陶歌詩。似負神仙之術。或露王霸之說。其詩云。江河水清淺。不足悼鯨尾。又云。飲水狼子瘦。思日鷓鴣寒。又云。中原不是無麟鳳。自是皇家結網疏。又云。一鼎雄雌金液火。一年寒曙鹿麕衣。又云。寄語東流任斑鬢。向隅終守鐵梭飛。諸如此例。不可殫紀。

貫休書西人陳陶處士隱居云。有叟傲堯日。髮白肌膚紅。妻子亦譚書。種蘭青溪東。白雲有奇色。紫桂含天風。卽應迎鶴書。肯羨於洞洪。又云。高步前山前。高歌北山北。數載賣柑橙。山資近又足。(陶種柑橙。令山童賣之。)

陶劍浦人。居南昌之西山。宋齊丘守南昌。因有蒲安之覲。乃自詠云。中原莫道無麟鳳。自是皇家結網疏。與水曹任暉郎中友善。寄暉詩云。好向明時薦遺逸。莫交千里弔靈均。江南後主卽位。知其運衰。襄替以修養爲事。故詩曰。乾坤見了文章懶。龍虎應來印綬疏。嚴尙書字鎮。

豫章遣小妓號蓮花者。往西山侍陶。陶殊不顧。妓爲詩曰。蓮花爲號玉爲腮。珍重尙書遣妾來。處士不生巫峽夢。虛勞神女下陽臺。陶答之曰。近來詩思清於月。老大心情薄似雲。已向昇天得門戶。錦衾深媿卓文君。

陶。唐末自稱布衣。開寶中人。或見之。或云。已得仙矣。蟬聲將月短。草色與秋長。(句)此屋歌黃竹。何人撼白榆。(句)

右張爲取作主客圖。

陶題徐穉湖亭云。伏龍山橫洲渚地。人如白蘋自生死。洪崖成道二千年。唯有徐君播青史。

方干哭陶詩云。雖云掛劍來墳上。亦恐藏書在壁中。

